

# ಕೊಡಗೂರ ಕೈರನ್ನಡಿ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ  
ಮಡಿಕೇರಿ

# ಕೂಡಗರ್ ಕೃಗನ್ನಡೆ

(ಕಥಾ ಸಂಕಲನ)

ಶ್ರೀಮತಿ ಬಾಚರಣೆಯಂಡ ಅಪ್ಪಣ್ಣ



ಕರ್ನಾಟಕ ಕೂಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

"KODAGRA KAIGANNADI" is the bunch of Kodava Stories written by **Sri Bacharanyanda Appanna & Smt. Ranu Appanna** Published by the **Karnataka Kodava Sahithya Academy, Madikeri.**

ಕ್ರಯ ಉ. : 32.00

ಹಕ್ಕು :- ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

ಬೆಂಗಳೂರು :-

ರಿಜಿಸ್ಟ್ರಾರ್  
ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ  
ಸ್ಯಾಟ್ಸ್ ಅಂಡ್ ಗೈಡ್ಸ್ ಕಟ್ಟಡ  
ಮ್ಯಾನ್ಸ ಕಾಂಪೌಂಡ್  
ಮಡಿಕೇರಿ : 571 201 ಫೋನ್ : 29074

ಅಚ್ಚು ಮಂಡ್ಲನವು :-

ಗುಡ್‌ಟಚ್ ಪ್ರಿಂಟರ್ಸ್  
ಜಯಲಕ್ಷ್ಮಿ ಪುರಂ, ಮೈಸೂರು.  
ಫೋನ್ :- 512626, 517919

## ಎಳ್ಳಾಕರತಿರ ತಕ್ಕಾ

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿರ ಅಧ್ಯಕ್ಷ ಶ್ರೀ ಮೇಕೇರಿರ ಕಾರ್ಯಪ್ಪ ಅಯಿಂಗ ಕಾಗದ ಎಳ್ಳಾದಿತ್ ಈಯಾಂಡೆತರ ಪುಸ್ತಕ ಪ್ರಕಟಣೆಕ್ ಓರ್ ಕಥಾ ಸಂಕಲನ ಅಯಿಚಿ ತರಂಡೂಂದ್ ಕೇಟಂಡತ್. ಇದ್ ಅಯಿಂಗಡ ಬಲ್ಯಗುಣತ್‌ನ ಕಾಟ್‌ಚಿ.

ಸುಮಾರ್ ಕಾಲತ್‌ಂಜಿ ಕೊಡವ ಸಾಹಿತ್ಯ ಪರಿಷತ್, ಕೊಡವ ಪತ್ರಿಕೆಯೆಲ್ಲ ಕಾಲೋದಿ ಪೊರಬೂಕುವಂಜ ಸಂಚಿಕೆರ ಕಥಾ ಪೈಪೋಟಿಕ್ ಎಳ್ಳಾದ್‌ನ ಕಥೆಯೆಲ್ಲ ಕೂಟಿತ್ "ಕೊಡಗಾರ ಕೈಗನ್ನಡಿ" ಎಣ್ಣುವೊ ಪೆದತ್‌ಲ್ ಈ ಕಥೆಯೆಲ ಅಯಿಚಿ ಕೊಡತ್.

ಇದ್‌ಲುಳ್ಳ ಕಥೆಯಡ ಪೈಕಿ ಅಂಜಿ ಕಥೆ ನಾಡ ವಡಿಯಂಡ ಪೆದತ್‌ಲ್ ಪ್ರಕಟ ಆನವು. ನಂಗ ಎಳ್ಳಾದುವೊ ಕಥೆ, ಪ್ರಬಂಧ, ಹಾಸ್ಯಕಥೆ, ಕವನ, ಪುಸ್ತಕ ವಿಮರ್ಶೆ ಏದೇ ಆಡ್ ವಡಿಯನೂ ಪೊಣ್ಣೂ ದಂಡಾಳ್ ಕೂಡಿತೇ ಎಳ್ಳಾದುವೊ. ಒಬ್ಬ ಕಥೆ ಸುರು ಮಾಡ್‌ಚೇಂಗಿ ಅಳತಿತ್ ಚರ್ಚೆ ಮಾಡಿತ್ ಆಖೀರಿ ರೂಪು ಕೊಡತಿತ್ ದಂಡಾಳ್‌ಕೂ ತೈಪ್ಪಿ ಕಂಡಕ ಮಾತ್ರ ಪ್ರಕಟಣೆಕ್ ಅಯಿಪದ್ ಕ್ರಮ.

ಈ ಕಥಾ ಸಂಕಲನತ್‌ಲುಳ್ಳ ಕಥೆಯೆಲ್ಲ ಕೊಡಗಾರ ಸಾಮಾಜಿಕ ಸಮಸ್ಯೆ, ಪರಿಸರ ನಾಶ, ಪರಿಸರ ಸಂರಕ್ಷಣೆ ಇನ್ನತಾನೆಲ್ಲ ಕಥಾವಸ್ತುವಾಯಿತ್ ಆಂಜೆಡ್‌ತಂಡ್, ಅನುಭವತ್‌ರ ಆಧಾರತ್‌ಲ್, ಕೊಡಗಾರ ಪರಿಸರಕೊತ್ತಿತ್ ನೆಜ್ಜ ಕಥೆಯ ಅದ್‌ಂಗಾಯಿತೇ "ಕೊಡಗಾರ ಕೈಗನ್ನಡಿ"ಂದ್ ಪೆದ ಕೊಡತಿಯೆ. ಪ್ರತಿ ಕಥೆಲೂ ಬಪ್ಪಂತ ವ್ಯಕ್ತಿಯ ಕಾಲ್ಪನಿಕ ವ್ಯಕ್ತಿಯ. ದಾರ್‌ನೋ ತೇಂಡಿತ್ ಎಳ್ಳಾದ್‌ನದಲ್.

ಈ ಕಥೆಯೆಲ್ಲ ಬೊಳಿಕಾಂಗಂಡಿಕ್ ಮೂಲ ಕಾರಣಕರ್ತನಾನ ಬ್ರಹ್ಮಗಿರಿ ಪತ್ರಿಕೆ ಸಂಪಾದಕ ಶ್ರೀ ಉಳ್ಳಿಯಡ ಪೂವಯ್ಯನೊ ಪಿಂಞ ಪೂಮಾಲೆ ಸಂಪಾದಕ ಶ್ರೀ ಅಜ್ಜನಿಕಂಡ ಮಹೇಶ್ ನಾಚಯ್ಯನೊ ಕೃತಜ್ಞತೆಲ್ ಗೇನ ಮಾಡಿಯವಿ.

ಈ ಕಥೆಯೆಲ್ಲ ಪುಸ್ತಕ ರೂಪ ಕೊಡತಿತ್ ಪೊರಬೂಕುನ್ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ ಅಧ್ಯಕ್ಷ ಶ್ರೀ ಮೇಕೇರಿರ ಕಾರ್ಯಪ್ಪ, ರಿಜಿಸ್ಟ್ರಾರ್ ಕೊರವಂಡ ಗಣಪತಿ ಪಿಂಞ ಅಕಾಡೆಮಿರ ಸರ್ವಸದಸ್ಯಂಗಕೂ ನಾಡ ವಂದನೆ.

ಕುಶಾಲನಗರ

ಶ್ರೀಮತಿ ಬಾಚರಣಿಯಂಡ ಅಪ್ಪಣ್ಣ

20.2.2001

## ಕೊಡಗ್ಗರ ಕೈಗನ್ನಡಿ

	ಕಥೆಗಲು	ಪು.ಸಂ.
1.	ಸುಖಿತರ ಸೊಪನ	1
2.	ಎತ್ತನ ಆಸೆ	14
3.	ಬಿತ್ತನಾನ ಕೊಜ್ಜತ್	29
4.	ಪ್ರೀತಿರ ಅಂತರ	47
5.	ರಾಯಲ್ ಆಂಟಿ	58
6.	ಮಾರಾಕೂಡ್ನ ತಿತ್ತ	71
7.	ಎತ್ತತ ಆಸೆ	80
8.	ಚೊಕ್ಕನವು ಚಿಕ್ಕತಿರ	85
9.	ಮಾಚುರ ಮರಾಯಣ	90
10.	ಕೊಂದವು ದಾರ್?	106
11.	ಉಯ್ಯ ತರಂಗ್ನಕ ಕೊಂಬಡಿಕೆ	114
12.	ಕಟ್ಟೆರ ಮಂದಣ್ಣ	121
13.	ದೆಸೆಫಲ	134
14.	ತಾಟಕ ತನ ತಲೆಪತ್ತ	149
15.	ಪೋಲೀಸ್ ತೀರ್ಪು	162
16.	ಋಣತ್ಂದತ್	174
17.	ವಲಸೆ	192

## ಎಳ್ಳೆಕಾರಡ ತಕ್ಕ

ಈ ಪುಸ್ತಕತುಳ್ಳ ಕಥೆಯೆಲ್ಲ ಕೊಡಗ್ ಪರಿಸರಕ್ ಒತ್ತಿತ್ ನೆಜ್ಜದ್. ಈ ಕಥೆಯೆಲ್ಲ ಎಳ್ಳೆದಂಡಿಕ್ ಬ್ರಹ್ಮಗಿರಿ, ಪೂಮಾಲೆ ಪತ್ರಿಕೆಯೆಲ್ಲ, ಅಕ್ಕಕ್ಕವರ್ಪಾಡಾಪಂಜ ಕೊಡವ ಸಮಾರಂಭತ್ಲ ಪೊರಬೂವಂಜ ಸ್ಮರಣ ಸಂಚಿಕೆಯ ಪಿಂಞ ಕೊಡವ ಸಾಹಿತ್ಯ ಅಕಾಡೆಮಿಕಾರಡ ಸ್ಮರಣ ಸಂಚಿಕೆಯಡ ಪ್ರೋತ್ಸಾಹವೇ ಕಾರಣ. ಕಥೆ ಎಳ್ಳುವ ಪೈಪೋಟಿ ಬೆಚ್ಚಿತ್ ನಲ್ಲ ಇನಾಮು ಬೆಪ್ಪಂಜತ್. ಈ ಇನಾಂರ ಚೋದ್ಕಾಯಿತೇ ರೂಪೆಡ್ತ ಕಥೆಯ ಇದೆಲ್ಲ!

ಏದೇ ತರ ಎಳ್ಳಾಡ್ ನಂಗ ವಡಿಯನೂ ಪೊಣ್ಣೂ (ಓರಮ್ಮ ಮಕ್ಕಳೂ)ಕೂಡಿತೇ ಎಳ್ಳುವ ಕ್ರಮ. ಒಬ್ಬ ಎಳ್ಳಾನಾನ ಇಇಞ್ಚೊಬ್ಬ ವಿಮರ್ಶೆ ಮಾಡಿತ್, ತಿದ್ದಿತ್ ದಂಡಾಳ್ಕೂ ಮನಸ್ಸಕ್ ಒತ್ತ ಪಿಂಞ ಮಾತ್ರ ಪ್ರಕಟಣ್ಕ ಅಯಿಪ ಕ್ರಮ. ಕೊಡಗಲ್ ಇಕ್ಕಿಕ್ಕ ಪೆರ್ತ್ ಪೋನ ಅನಾಚಾರ ಪಿಂಞ ಸಮಾಜದ್ರೋಹಿ ಚಟುವಟಿಕೆಯೆಲ್ಲ ಈ ಕತೆಯಡೆಲ್ಲ 'ಕಥಾವಸ್ತು' ಆನಾನಗುಂಡ್ "ಕೊಡಗರ್ ಕೈಗನ್ನಡಿ" ಂದ್ ಈ ಸಂಕಲನಕ್ ಪೆದಬೆಚ್ಚಿಯೆ.

ಕೊಡವ ಪತ್ರಿಕೆಯಡ ಸಂಪಾದಕಂಗಳೂ, ಕೊಡವ ಅಕಾಡೆಮಿರ ಅಧ್ಯಕ್ಷಂಗಳ ಪಿಂಞ ಸದಸ್ಯಂಗಳ ಪ್ರೋತ್ಸಾಹತ್ನಗುಂಡೆ ಈ ಕಥೆಯಡೆಲ್ಲ ಸೃಷ್ಟಿ ಆಚಿ. ಅಯಿಂಗಳೆಲ್ಲ ಕೃತಜ್ಞತೆಲ್ ನೆನತಿಯವ.

ಕುಶಾಲನಗರ  
16.4.2001

ಬಾಚರಣಿಯಂಡ ಅಪ್ಪಣ್ಣ  
ಪಿಂಞ  
ಶ್ರೀಮತಿ ರಾಣು ಅಪ್ಪಣ್ಣ

The United States

The United States is a large country with a long history. It is a country of many different people and cultures. The United States is a country of freedom and opportunity. It is a country where everyone has the chance to succeed. The United States is a country of innovation and progress. It is a country where the future is bright.

The United States is a country of many different people and cultures. It is a country where everyone has the chance to succeed. The United States is a country of innovation and progress. It is a country where the future is bright.

The United States is a country of many different people and cultures. It is a country where everyone has the chance to succeed. The United States is a country of innovation and progress. It is a country where the future is bright.

The United States is a country of many different people and cultures. It is a country where everyone has the chance to succeed. The United States is a country of innovation and progress. It is a country where the future is bright.

United States  
 Department of State  
 Washington, D.C.

SECRET  
 CONFIDENTIAL

## ಸುಖತರ ಸೊಪನ

ನಂಗಡ ಕೊಪ್ಪತ್ ಬಾಣೆ ಚಾಮ ಎಲ್ಲಾರ್‌ಕೂ ಬೋಂಡಿಯಂವನೂ ಅಲ್ಲ, ದಾರ್‌ಕೂ ಬೋಂಡತಂವನೂ ಅಲ್ಲ. ಒಕ್ಕತ್‌ಲ್ ಅಂವಂಡ ಭಾಗಕ್ ಅಂವನೊಬ್ಬನೆ. ಅನ್ನನೆ ಆಯಿತ್ ಮುನ್ನೂರ್ ಭಟ್ಟಿ ಭೂಮಿ, ನುಪ್ಪದ್ ಏಕ್ರೆ ಬಾಣೆ ಜಾಗ ಅಂವಂಡ ಪಾಲ್‌ಕ್ ಇಂಜತ್. ಅಂವಂಡ ಎಳ್ತರ ಬಗ್ಗೆ ದಾರ್‌ಕೂ ಗೊತ್ತಿಲ್ಲೆ. ಪನ್ನೆರಂಡನೆ ಬಯತ್‌ಕೇ ಮನೆ ಬುಟ್ಟಿತ್ ಪೋನಂವ ಎಲ್ಲಿ ಇಂಜತ್‌ಂದ್ ದಾರ್‌ಕೂ ಗೊತ್ತಿಲ್ಲೆ. ಮಿಲಿಟರಿಕ್ ಕೂಡಿತ್ ಅಲ್ಲಿಂಜ ಓಡಿ ಒಳ್‌ಚಿತ್ ಬಂದಂವೊಂದ್ ಜನ ಪರೆಯುವ. ಇದ್‌ನೆಲ್ಲ ಚಾಮಂಡ ಕೂಡ ಕೇಟಕ ಒರ್ ಕ್‌ರಂದೊಳಿ ಮಾತ್ರ ಉತ್ತರ. ಅಂವನ ತಕ್ಕ್ ಪರಿಚಿಟ್ಟಕ ಮದಿ, ತಕ್ಕ್ ಪರಿಚಿಟ್ಟಂವಂಡ ಕೂಡೆನ್ನೆ ಪೋಕು. ತಕ್ಕ್ ಪರಿಚಿಟ್ಟ ತಪ್ಪುಕ್ ಅಂವಂಡ ಎಲ್ಲಾ ಖರ್ಚಿ ನೀಸಂಡಿಯ ಬಕ್ಕು. ಇದ್‌ಂಗ್ ಬೊತ್ತಿತ್ ದಾರೂ ಚಾಮಂಡ ಕೂಡೆ ತಕ್ಕ್‌ಕ್ ನಿಪ್ಪುಲೆ.

ಭಾಗಕ್ ಒಬ್ಬನೆ. ಆಸ್ತಿ ಪಾಸ್ತಿಕ್ ಪೇಕ್‌ಲ್ ಇಲ್ಲೆ. ಭೂಮಿ ಮನೆಯೆಲ್ಲಾ ಉಳ್ಳಾನ ಕಂಡಿತ್ ಕಾಕಿತ್ ಪೊಣ್ಣ್ ಕೊಡ್‌ತತ್. ಪೊಣ್ಣ್ ಗಂಗಿ ಬಲ್ಕ ಒಕ್ಕಾಮೆಕರ್ತಿ. ಚಾಮ ಮಾತ್ರ ಕೆಯ್ಯಂಗಳ್. ಮಂಡೆಕ್ ಓರ್ ಮಡ್‌ಕ್ ತೊಪ್ಪಿಯ. ನಿಪ್ಪುಕುಟ್ಟ್ ಕೀತ್‌ನ ಕೋಟ್, ಕಾಕೋಡ್ ತೇಂಜ ಕಾಕಿ ಸುರಾಲ್, ಪಳಿಯ ತೂರತಂಡ್‌ರ ಬೂದಿ ಮರ್‌ಂಜ ತಾಪತ್ತಿ ಕೊಡೆ, ಎದ್‌ಕೆ ಮೊಸಳೆನನ್ನೆಕೆ ಬಾಯಿ ತೊರ್‌ಂದಂಡ ಮಿಲ್ಪಿ ಬೂಟ್. ಇದೇ ಎಂಗಡ ಚಾಮಂಡ ಯೂನಿಫಾರಂ.

ಅಂವಂಡ ಯೂನಿಫಾರಂ ಕೊಯತಂಡ್ ಪೊಲಾಕ ಮನೆ ಬುಟ್ಟಕ ಎಲ್ಲಿಕ್‌ಂದ್ ಅಂವಂಗೇ ಗೊತ್ತಿಪ್ಪುಲೆ. ಬಟ್ಟೆ ತೇಂಜಾಲೆ ಕಾಲ್ ಪೋಕು. ಕಾಲ್ ಪೋನಾಲೆ ತಡಿ. ಪಾಪ ಮನೆಲ್ ಅಳ್‌ತಂಡ್ ಮಾತ್ರ ಎನ್ನಾ ಮಾಡುವೋ. ಪೊಣ್ಣ್‌ರ ಗೊಣಗಲ್‌ಕ್, ಬೈಗಳಕ್ ತೀರಾ ಕೂಟಾಕುಂವಂವ ಅಲ್ಲ. ಬಜ್ಜಕ ಅದ್ ನಾಕ್ ಅಲ್ಲ ಬೋರೆ ದಾರ್‌ನೋ ಬಯ್ಯುವೊಂದ್ ಗೇನ ಮಾಡಿಯಂಡ್ ಮುಂಡತೆ ಕೂಡಿರುವ ಸ್ಥಿತಪ್ರಜ್ಞ. ಭೂಮಿ ವಾರ ಕೊಡ್‌ತ ಪಿಂಞ ನಾನೆನ್ನೆ ಭೂಮಿಲ್ ಬುದ್ಧ್ ಉರ್‌ಂಡಿ ಕಳಿಕಂಡುವಾಂದ್ ಓರ್



ಜವಾಬ್ ಮಾತ್ರ ಎಣ್ಣು. ಜೋಬ್‌ಲ್ ಕಾಸ್ ಇಂಜ್‌ಲೇಂಗಿಯೂ ಬೈಟ್ ಬಪ್ಪಕ ದಂಡೋ ಮೂಂದೋ ಪ್ಯಾಕೇಟ್ ನೇಡಿತ್ ಎರ್‌ಕತೆ ಮನೆಕ್ ಬಂದಂವನೇ ಅಲ್ಲ.

ಚಾಮಂಡ ಮೋವ ಶಂಭು ಸ್ಕೂಲ್ ಬುಟ್ಟಿತ್ ಮಿಲ್ಟಿಕ್ ಕೂಡಿರ್‌ತ್. ಮೋವ ತಂಗು ಪತ್ತನೆ ಕ್ಲಾಸ್ ಪರೀಕ್ಷೆಕ್ ಮೂಂದ್ ಕುರಿ ಅಳಾತಿತ್ ದಂಡ್ ಸಬ್ಜೆಕ್ಟ್ ಪಾಸ್ ಮಾಡಿತ್ ಇಂಜತ್. ಚಾಮನ ಚೆರಿಯ ಬಾಲೆಕಾರಳೂ ಕೂಡಿ ಚಾಚೆ ಬೆಚ್ಚಿತ್ ಕಾಕುವದೇ ಇಂಜ್‌ಲೆ. ಅವ ಮಾತ್ರ ಬಾಯಿಕ್ ಎನ್ನಂಗ್ ಬಡಸ್ತಾನಾಂದ್ ಏದೇಂಗಿ ಓರ್ ಚಾಚೆ ಬೆಚ್ಚಿತ್ತೇ ಕಾಕುವ ಇಂಜತ್. ದಾರೇಂಗಿ ಅಪ್ಪಿ ತಪ್ಪಿತ್ ಎನ್ನ ಚಾಮ ದೂರ ಪೂರ್‌ಟಿಯೇಂದ್ ಕೇಟಕ ಮದಿ, ನಿನ್ನೇ ಕಾಂಗಂಡೂಂದ್ ಪೂರ್‌ಟ ಬಾವ. ಎದ್ದ ಗಳಿಗೆ ನಲ್ಲದ್ ನೋಟ್. ತೇಡಿ ಪೋನ ಪಾಬಳ್ಳಿ ಕಾಲ್‌ಕ್ ತೋರ್‌ತಂಡನ್ನೆ ಕಾಂಬಕ್ ಕಾಟ್ಟಿಟಿಯಾ, ಎಣ್ಣೆರುವಂಜಿ ಉಂಬ್‌ಳಾನನ್ನೆ ಪತ್ತಿಯವ. ತಕ್ಕ ಪರಿಚಿಟ್ಟಿ ತಪ್ಪುಕ್ ಅಂದ್‌ಡಿ ಚಾಮನ ಚಾಕಂಡಿಯ ಗ್ರಾಚಾರ ಆ ತಕ್ಕ ಪರಿಚಿಟ್ಟಿಂವಂಗ್ ಪುಡ್‌ಚತ್‌ಂದ್ ಲೆಕ್ಕ.

ಚಾಮನ ನಾನ್ ಕಾಂಗತೆ ಓರಾಂಡ್ ಆಯಿತ್ ಇಂಜತ್. ನಾನೂ ಚಾಮನೂ ವಾರಡಿ ಮಕ್ಕ. ನಾಕೂ ಅವಂಗೂ ಚೆನ್ನ ದೂರ ದೂರ. ಒನ್ನಾಂದ್ ನಾನ್ ಬಲ್ಯಮನೆ ಬೊಳ್ಳು ಅಣ್ಣಯ್ಯಂಡಲ್ಲಿ ಎನ್ನತದೋ ವ್ಯವಹಾರ ತಕ್ಕ ಪರ್‌ಂದಂಡ್ ಅಳಾತಿಯೆ. ಬಾಣೆ ಇಳಾಂಜಿತ್ ಬೊಳ್ಳು ಅಣ್ಣಯ್ಯಂಡ ಪಾಲ ದಾಟಿತ್ ದಂಡಾಳ ಬಂದಂಡ್ ಉಂಡ್. ನಂಗ ದಂಡಾಳು ನೆಬ್ಬಿ ನೋಟ್‌ಚಿ. "ಅದ್ ಮಿಂಞಲ್ ಉಳ್ಳಂವ ಎಂಗಡ ಕೊಪ್ಪತ್ ಬಾಣೆ ಚಾಮನಾಕುಲಾಂದ್" ಬೊಳ್ಳು ಎಣ್ಣೆ ಚಿ. ಪಕ್ಕ ಬಂದನ್ನೆ ಮೂಡ್ ಕಾಂಬ. ನಾಕ್ ನಾಡ ಕಣ್ಣನ ನಂಬುವ ಕಯ್ಯಲೆ. ಪಂಡೇತ ನಿಪ್ಪುಕ್ ಅಡೆಬೆಚ್ಚಿ ಕೋಟ್ ಪೋಯಿತ್ ಪುದಿಯ ಕೋಟ್ ಸುರಾಲ್, ತಾಡಿಯೆಲ್ಲಾ ಕೆರ್‌ತಿತ್ ಮೂಡಲ್ ರಂಗೇರಿತ್. ಪುದಿಯ ಶೂ ಇಟ್ಟಿತ್. ಪುದಿಯ ಕೊಡೆ ಉಂಡ್. ನೇರೆ ಮನೆ ಪತ್ತಿತ್ ಬೊಳ್ಳು ಅಣ್ಣಯ್ಯಂಡ ಕಾಲ್ ಪುಡ್‌ಚತ್. ನಾಡ ಕಾಲ ಪುಡಿಪಕ್ ಬಗ್ಗಿ ಚಾಮ ಐಮರತ್ ಅಳಾತತ್. ಕೂಡೆ ಉಳ್ಳಂವಂಗ್ ಕುರ್ಚಿ ಕಾಟಿತ್ ಕೊಡ್‌ತತ್. ಅಕ್ಕಣೆ ಬೊಳ್ಳು ಅಣ್ಣಯ್ಯಂಡ ಮೂಡ್ ಪುಳಿ ಮಾಂಗ್ ಕಡ್‌ಚನ್ನೆ ಆಚಿ.

ಕೂಡೆ ಬಂದಂವ ಮಂಡೆಕ್ ಬೊಳ್ಳು ಸಿಲ್ಕಾರ ಮುಂಡಾಸ್, ಬೊಳ್ಳು ಶರ್ತ್, ಬೊಳ್ಳುಪು ಮುಂಡ್, ದಂಡ್ ಕೈರ ನನ್ನಾಲ್, ಬೆರತ್‌ಲೂ ಪೊನ್ನ ಮೊಯಿರ, ಪಚ್ಚೆ ಕಲ್ಲ ಚೋಪ್ ಪರ, ವಜ್ರತಾರ ಪೋಲೆ ಮಿನ್ನುವ ಪರ ಎಲ್ಲಾ ಅಳಾಪ್‌ಚಿಟ್ಟಿ ಮೊಯಿರ

ಕಾಂಬಕಲೇ ಅವ ಎಚ್ಚಕ್ ಬಲ್ಯ ಕುಳ ಎಣ್ಣುವದ್ ಗೊತ್ತಾಪ ಇಂಜತ್. ಕೂಟ್‌ಕ್ ಮೂಕ್‌ಕ್ ಕುತ್ತವ ಸೆಂಟ್. ಅಕ್ಯ ಅವ ದಾರ್‌ಂದ್ ಕೇಕಂಡಲಾ !

ಚಾಮನೇ ಪರಿಚಯ ಮಾಡ್‌ಚಿ. ಇವು ಕ್ಯಾಲಿಕಟ್‌ರ ಬಲ್ಯ ಸಾಹುಕಾರ. ಪೆದ ಎಂ.ಎಂ. ಕೋಯ. ಇಂವಂಗ್ ಸ್ವಂತ ಮೂಂದ್ ಹಡಗ್ ಉಂಡ್. ಲಾರಿಯಕ್ ಕೈಕಣಕ್ ಇಲ್ಲೆ. ಅಂವಂಗ್ ಪಣ ಎಣ್ಣುವದ್ ನಂಗಕ್ ಮಣ ಉಳ್ಳನ್ನೆಕೆ. ಇಚ್ಚಕ್ ಎಣ್ಣೆತ್ ಚಾಮ ಜೋಬ್‌ಂಜಿ ಸಿಗರೇಟ್ ಎಡ್‌ತಿತ್ ಬೊಳ್ಳು ಅಣ್ಣಯ್ಯಂಗ್ ಕಾಟಿತ್ ತಾನ್ ಒಂದ್ ಕತ್‌ಚಿಟ್ಟತ್.

"ನೋಟ್ ಚಾಮ, ಏದೇ ಸಾವುಕಾರ ಆಡ್, ನಂಗಡ ಐನ್‌ಮನೆಲ್ ನಂಗ ಐಮರತ್ ಅಳಾತಿತ್ ಇಪ್ಪಕ ಅವನ ಕುರ್ಚಿಲ್ ಅಳಾಪಕ್ ನೀನ್ ಎಣ್ಣಾನದ್ ನಾಕ್ ಸೆರಿ ಕಂಡಾಲೆ. ಪಾಳ ಪರದೇಶಿಯಳ ತಕ್ಕುವಚ್ಚಿ ಕೇ ತಕ್ಕೊಂಡು. ನಂಗಡ ಗತ್ತನ ನಂಗ ಬೆಚ್ಚವಂಡು. ಆ ಮೂಲೆರ ಸ್ಕೂಲಾಲೊ, ಬೆಂಚಿಲೋ ಅಳಾಪಕ್ ಎಣ್ಣೆತ್ ಇಂಜಕ ಪೋರತೆ ಇಂಜತಾ. ಎನ್ನೇಂಗಿ ಆಡ್, ನೀನ್ ಬಂದ ಸಂಗತಿ ಎನ್ನತ ಎಣ್ಣೆ"ಂದ್ ಚೆನ್ನ ಗತ್ತಲೇ ಕೇಟತ್ ಬೊಳ್ಳು ಅಣ್ಣಯ್ಯ. ಮತ್ಯ ಕೋಯಂಗ್ ಬೊಳ್ಳುರ ತಕ್ಯ ಅರ್ಥ ಆಯಿತ್ ಕಾಲ್ ಮಡ್‌ಕಿತ್ ಚೆನ್ನಂಗ್ ತುರಂಡಿತ್ ಅಳಾತತ್. ಚಾಮಂಗ್ ಅನ್ನತ ತಕ್ಯ ಎಲ್ಲಾ ಕೆಂದಾಲೆ.

ಚಾಮ ತಕ್ಯಕ್ ಇಳಾಂಜತ್. "ನೋಟ್ ಬಾವ, ನೀಡ ವಾರಕಾರ ಓಡಿರಾತಲೋ. ಈಯಾಂಡ್ ಭೂಮಿ ನಡಪ ಎನ್ನನೆ. ಆಳಡ ಸಂಬಳ ಗೊತ್ತ ಉಂಡಲ್ಲಾ. ನೀಡ ಭೂಮಿಕ್ ಟ್ರಾಕ್ಟರಾಡ್, ಟಿಲ್ಲರಾಡ್ ಕೊಂಡ ಬಪ್ಪಕ್ ಕಯ್ಯುಲೆ. ಈ ಆಳಳ ನಂಬಿತ್ ಭೂಮಿಲ್ ಬೊಳೆ ಎಡ್‌ಪದ್ ಉಂಡಾ. ಇದೆಲ್ಲಾ ಚೋದರಂಜಿತ್ ನಾನ್ ಭೂಮಿಲ್ ಇಂಜಿ ನಡಪಕ್ ಕೊಡ್‌ತಟ್. ನೀಡ ಭೂಮಿನ ಕೊಡ್‌ಪಿಯಾ"ಂದ್ ಕೇಪಕ್ ಈ ಸಾವುಕಾರನ ಕೂಟಿಯ ಬಂದಿಯೆಂದ್ ಎಣ್ಣೆಚಿ.

"ಇಂಜಿ ಬೊಳ್ಳಾತ್‌ನಲ್ಲಿ ನಾಲಂಜಿ ಕಾಲ ಒಂದೂ ಬೊಳೆ ಆಪಾಲೇಂದ್ ಎಣ್ಣುವ ಚಾಮ. ನೀನ್ ಇಂಜಿಕ್ ಕೊಡ್‌ತಕ ಉಂಬ ಎನ್ನತಾನ. ನಾನ್ ಕೊಡ್‌ಪುಲೆ. ನೀನ್ ಎನ್ನ ಪಿರಾಂದ್ ಪುಡ್‌ಚಿತ್ ಕೊಡ್‌ತದಾ"?ಂದ್ ಕೇಟತ್ ಬೊಳ್ಳು.

"ಇದೆಲ್ಲಾ ದಾಡ ಪೋಟ್ತ್ ತಕ್ಯ ಬಾವ. ನಾಡ ಎತ್ತಳೂ ಬರ್‌ಕತ್ ಇಲ್ಲೆ. ಆ ಒತ್ತೆ ಕೊಂಬ ಕಳ್ಳ. ನೊಗ ಕಂಡಕ ಬುದ್ದವ. ಕಾಯಿ ತಟ್ಟತ ದಂಡ್ ಮಂಡಂಗ ಕೊಟ್ಟಾಕೇ

ಬಪ್ಪಲೆ. ಓರೆಕ್ ಎತ್ತ್ ಎಡ್ಕನಾಂದ್ ತೇಡ್ಚೇಂಗಿ ಎಲ್ಂಬ್, ತೋಲ್ "ಬಾಲ" ದಂಡ್ ಕೊಂಬಿಂಜಕ ಮದಿ, ಅಂಜಾಯಿರ ಉರ್ಪಿಯ ಎಣ್ಣುವ. ಇದೆಲ್ಲಾ ಕೋಪ್ ಕೂಟಿತ್ ಭೂಮಿ ನಟ್ಟಂದ್ ಕೆಟ್ಟಿಯ. ಕ್ಕಟ್ಟುವ ನೆಲ್ಲ್ ಎಚ್ಚಕ್? ತಟ್ಟಿಕೊಟ್ಟಿ ನಾಲ್ ಗಾಡಿ. ದಂಡ್ ಗಾಡಿ ಉಂಬಕ್ ಆಂಡು. ದಂಡ್ ಗಾಡಿ ಮಾರ್ನಕ ಆರಾಯಿರ ಕ್ಕಟ್ಟು. ಈ ಪಣತ್ಲಾ ಓರಾಂಡ್ ನೀಸೊಂಡುಲ. ಇಂಜಿಕ್ ಕೊಡ್ತಾನಗುಂಡ್ ನುಪ್ಪದ್ ಆಯಿರ ಕ್ಯಾಸ್ ಕ್ಕಟ್ಟಿ. ದಂಡ್ ಗಾಡಿ ನೆಲ್ಲ್ಕ್ ಅಂಜಾಯಿರ ಅಡ್ವಾನ್ಸ್ ಕೊಡ್ತಿತ್ ಬೆಚ್ಚಿಯೆ. ಕೆತ್ತೆಕ್ ಇಳಿಯಂಡ, ಮಳೆಲ್ ನೆಲಿಯಂಡ, ಬೆದ್ಲಾ ಒಣ್ಣಂಗಂಡ. ಓರಾಂಡೆಕ್ ಉಂಬಕ್ ಉಳ್ಳ ನೆಲ್ಲ್ ಕೆಟ್ಟಿತ್ ಇರ್ವತ್ತಂಜಾಯಿರ ಕ್ಯಾಸ್ ಕ್ಕಟ್ಟಿ. ಇದೇ ಅಲ್ಲತೆ ಪಿಲ್ಲೆಲ್ಲ ದಾಡ ದಾಡ ಕಳ್ಳ ಅತ್ತ ತಿಂದಿತ್ ತೊಯಿಚಿತ್ ಪೋಪದೆನ್ನೆ? ನಾಡ ಮುಂಡತಾರ ದಂಡಾಯಿರ ಕತ್ತೆ ಪಿಲ್ಲೆನ ಕತ್ತೆಕ್ ಮೂಂದ್ ಉರ್ಪಿಯ ಲೆಕ್ಕತ್ ಕೊಡತಿತ್ ಆಚಿ. ಈ ಪಣತ್ಲಾ ಮನೆಕ್ ಉಳ್ಳ ಕಟ್ಟು ಕಡಿಕೆ, ಬಿರಿಪಕ್, ಪೊದ್ಪಕ್, ನಂಗ ಎಲ್ಲಾರ್ಕೂ ಪುದಿಯ ಬಟ್ಟೆ ಬರಿ ಮಾಡಿತೂ ಆಚಿ. ಮೋವಕ್ ಓರ್ ಜೋಮಾಲೆ, ಪೊಣ್ಣಾಕ್ ಓರ್ ಕೊಕ್ಕೆ ತಾತಿಕ್ಂದ್ ಪದಾನಂಜಿ ಆಯಿರ ಉರ್ಪಿಯ ಪೊಣ್ಣಾರ ಕೈಕೇ ಕೊಡ್ತಿಟಿಯೆ. ಅವ್ವನೂ ಮೋವಳೂ ಕುಸಿ ಬಂದ ಮಾಲ್ ಮಾಡಿಯವಡ್ಂದ್" ಎಣ್ಣೆತ್ ಚಾಮ ಅಂವಂಡ ಆ ಇಡೀ ಕಾಲತಾರ ಬಡ್ಡೆಟ್ ಭಾಷಣ ತೇತಿತ್ ಬೊಳ್ಳುರ ಎದಿಕೆ ಕಾಲತಾರ ಬಡ್ಡೆಟ್ ಅಂಕೆ ಸಂಖ್ಯೆ ಬೆಚ್ಚತ್. "ಕೊಡವಕ್ ಬದ್ಕುವಕ್ ಗೊತ್ತಿಲ್ಲೆ. ಪಂಡ್ ಪೋಲೆ ಉತ್ತ್ ಕಳ್ಳತ್ ಅರೆ ಕೆಲತಾಲೇ ಬದ್ಕೀಂದ್ ಕಾವೇರಮ್ಮರ ಶಾಪ ಕಾಂಬ"ಂದ್ ಭಾಷಣ ನಿಪ್ಪಾಚಿಟ್ಟತ್.

ಇದಾನೆಲ್ಲ ಕಡಿಕೆರ ಒಳಿಯ ಕೇಟಂಡ್ ಇಂಜ ಬೊಳ್ಳುರ ಪೊಣ್ಣಾಕ್ ಈಯಾಂಡೆತಾರ ಇಂಜಿರ ಪಣತ್ಲಾ ಕೊಕ್ಕೆ ತಾತಿ ಮಾಡ್ಚಿರುವ ಎಣ್ಣಾನಾ ಕೇಪದು ತೆಡ್ಬಡ್ಚನ್ನೆ ಆಚಿ. "ಒಮ್ಮ ಒಳ್ಳಕ್ ಬಾರೀ"ಂದ್ ವಡಿಯನ ಕಾಕ್ಚಿ. ಬೊಳ್ಳು ಅಳ್ತಲ್ಲಿಂಜಿ ಅನ್ಂಗಾಲೆ. "ಅಲ್ಲಾ ಕೆಮಿ ಕೇಪಾಲಿಯಾ ನಿಂಗಳಲ್ಲಾ ಒಳ್ಳಕ್ ಬಾರೀಂದ್ ಕಾಕ್"ನಂದ್ ಚೆನ್ನ ಉಯಿತತಾಲೇ ಕಾಕ್ಚಿ. ಕಾಫಿ ಎಡ್ತ ಬರಡಾಂದ್ ಕೇಪಕ್ ಪೊಣ್ಣಾ ಕಾಕುವೊಂದ್ ಗೇನ ಮಾಡ್ನ ಬೊಳ್ಳು, "ಇಲ್ಲಿ ಕಯ್ಯಾಲೆಕೇ ಎಡ್ತಂಡ್ ಬಾ. ಅದ್ಂಗ್ ನನ್ನೊಮ್ಮ ಎನ್ನಂಗ್ ಕಾಕುವೊಂದ್ ಐಮರತ್ ಕಾಲ್ ನೋಟಿ ಅಳ್ತತ್. ಪೊನ್ನವ್ವಂಗ್ ಚೆಡಿಬಾತ್. "ಎಚ್ಚಕ್ ಕುರಿ ಕಾಕೊಂಡು. ಒಮ್ಮ ಬಪ್ಪಿರಾ ಇಲ್ಲಿಯಾಂದ್ ಎಣ್ಣೆ. ಸೊಯೆ ಇಲ್ಲತ ಆಣ್ನ ಕೆಟ್ಟಿಯಂಡಕ ಇದೇ ಗೋಳ್"ಂದ್ ಚೆನ್ನ ರಭಸ ಅಳ್ಳಕ್ಚಿ.

ಬೊಳ್ಳು ಒಳ್ಳೆ ಪೋನದು, "ಅಲ್ಲಾ ನಿಂಗಕ್ ಎನ್ನಂಗ್ ಬುದ್ದಿ ಕೆಟ್ಟ್ ಪೋಯೆ. ನಂಗಡ ಭೂಮಿನ ಇಂಜಿಕ್ ಕೊಡ್‌ಪಕ್ ಒತ್ತವದ್ ಬುಟ್ಟಿತ್ ಲೋಕತ್‌ರ ಸುದ್ದಿ ಎನ್ನಂಗ್? ಅವಂಡ ಇವಂಡ ತಕ್ಕ್‌ಕ್ ಕೆಮಿ ಕೊಡ್‌ಪದಾ ಅಲ್ಲ, ನಂಗ ಬದ್‌ಕುವ ಬಟ್ಟೆ ನೋಟುವದಾ? ಆ ನಾಟ್ ಕುಂಞಪ್ಪ ಸವಾರಿ ಚಾಮಂಗ್ ಕಡೆಕೆಟ್ಟ್ ಪೋಯಿರಲ್ಲಾ. ಅವಂಡ ಪೊಣ್ಣಾಕ್ ಕೊಕ್ಕೆ ತಾತಿಕೂ ಮೋವಕ್ ಜೋಮಾಲೆಕೂ ಉಳ್ಳ ದುಡ್ಡ್ ಕೊಡ್‌ತಿತ್‌ಲೊ. ನಾನ್ ಇಚ್ಚಕ್ ಕಾಲ ಐಪಣಿ ಬೊಳೆಪಣಿ ಕೆಜ್ಜಿತ್ ನೂಲ್‌ರ ಕರ್‌ತಮಣಿ ಕೆಟ್ಟುವ ಹಣೆಬರ ತಪ್ಪಿತೇ ಇಲ್ಲೇ"ಂದ್ ರೇಗಿತ್ ಕಾಫಿ ತಪ್ಪಲೆನ ಒಮ್ಮ ಮೇಜಿಕ್ ಜೆಪ್ಪಾಚಿ. "ನೀನ್ ಮಂಡೆ ಕುತ್ತಿ ಕೊಡ ಮರ್‌ಂಜಕಲೂ ನಾಡ ಭೂಮಿನ ಇಂಜಿಕ್ ಕೊಡ್‌ಪುಲೇ"ಂದ್ ಪೊರ್‌ಮೆ ಅಳ್‌ತಯಿಂಗಕ್ ಕೇಪನ್ನಕೆ ಜೋರ್‌ಲ್ ಕೂತ್ ಕೊಡ್‌ತಂಡ್ ಪೊರ್‌ಮೆ ಬಾತ್. ಪೊನ್ನವ್ವ ಬೊಳ್ಳುರ ಹರ ಕಂಡಿತ್ ಎನ್ನತದೆಲ್ಲೊ ಗೊಣ್‌ಂಗಿಯಂಡ್ ಪೊಡಿಯ ಸೆರ್‌ಗ್ ಪೊತ್ತಿಯಂಡ್ ಮೂಕ್ ತುಂಯಿಂಚಂಡ್ ಕಣ್ಣ್ ನೀರ್ ತೇಟಿಯಂಡ್ ಪಡಿಗಾರ್ ಪಡಿಕಾಯಿತೆ ಪೊರ್‌ಮೆ ಕಡ್‌ಂದತ್.

ವಡಿಯ ಪೊಣ್ಣಾರ ಪೋರ್‌ಮೆ ಕೇಟಿತ್ ಚಾಮನೂ ಅವಂಡ ಸಾವುಕಾರ ಕೋಯನೂ ಪಟ್ಟಿಕ್ ಇಳ್‌ಂಜತ್. "ಬಪ್ಪಿ ಬಾವ" ಎಣ್ಣೆತ್ ನನ್ನೊಮ್ಮ ತೆರ್ಮೆ ನೋಟಿತ್ ಪೊರ್‌ಟ್ ಪೋಚಿ. ಅಂದ್‌ಂಜಿ ಓರ್ ತಿಂಗಕ್ ಎತ್ತಣೆ ಪೊನ್ನವ್ವ ದುಂಡ್ ಪೊರ್‌ತಂಡ್ ನೇರಕ್ ಸೆರಿ ಕೂಳ್‌ಕರಿ ಮಾಡತೆ ಬಂದಯಿಂಡ ಪೋನಯಿಂಡ ಕೂಡೆಲ್ಲ ವಡಿಯನ ದೂರಿಯಂಡ್ ಇಂಜತ್‌ಂದ್ ಒನ್ನಾಂದ್ ಬೊಳ್ಳು ಎಣ್ಣಾಚಿ.

ಚಾಮಂಡ ಬೇಲ್‌ಲ್ ಇಂಜಿ ನಡ್‌ಪ ಆಳಕ್ ಇಪ್ಪಕ್ ನೆರ್‌ಕೆ ಮನೆ ಕೆಟ್ಟಾಚಿ. ಸುತ್ತು ಮುತ್ತು ಬೋರೆ ಚೆನ್ನಂಗ್ ಜನಡ ಭೂಮಿಲ್ ಇಂಜಿ ನಟ್ಟಿತ್ ಆಚಿ. ಊರ್ ನಾಡ್‌ಲ್ ಉಳ್ಳ ಪಣೆಕಾರ ಪೋರತೆ ಕೇರಳತ್‌ಂಜಿ ಆಣ್ ಪೊಣ್ಣಾರ ಪಡೆ ಬಂದಿತ್ ಕೂಡ್‌ಚಿ. ಇಂಜಿ ಪಣೆಕಾರಕ್ ಪನ್ನಂದ್ ಗಂಟೆಕ್ ಟೀ, ಮಜ್ಜಣ ಕೂಳ್‌ಕರಿ, ನಾಲ್ ಗಂಟೆಕ್ ಓರಂದ್ ಟೀ, ಬೈಟ್ ಪಣಿ ಬುಡುವ ನೇರಕ್ ಆಳಣ್ಣ ಓರಂದ್ ಕಳ್ಳಾ ಪ್ಯಾಕೆಟ್. ಇದೂ ಪೋರಾಂದ್ ದಿನಕ್ ಎಳ್‌ವದ್ ಉರ್‌ಪಿಯ ಸಂಬಳ. ಇನ್ನನೆ ಇಪ್ಪಕ ನುಪ್ಪತ ಅಂಜಿ ಉರ್‌ಪಿಯ ಸಂಬಳಕ್ ನಾಟಿ ಪಣೆಕ್ ಏದ್ ಆಳ ಪೋಕು? ಇಂಜಿ ಪಣೆಕಾರಳೆನ್ನಕೆ ಸಂಬಳ ಕೊಡ್‌ತಿತ್ ಬೇಲ್ ಪಣಿ ಕೆಯ್ಯಾಚಿಟ್ಟಕ ಉಳ್ಳ ಭೂಮಿನೇ ಮಾರಂಡಿಯ ಬಕ್ಕು. ಸುಮಾರ್ ಜನಡ ಬೇಲ್ ಪಡ್ ಆಚಿ. ಬೊಳ್ಳುಕ್ ಆಳ್ ಕಟ್ಟತೆ ಯಾಕತ್‌ಲ್ ಪಾದಿ ಅಗೆ ಅನ್ನನೇ ಮಿಂಜಿತ್ ಯಾಕತ್‌ಲೇ ಕದ್ ಬಾತ್. ಪೊನ್ನವ್ವ ಎಕ್ಕಲೂ ಕುತ್ತಿಕುತ್ತಿ

ಪರಿವ ತಕ್ಕ್ ಕೇಟಿತ್ ಓರಮ್ಮ ಬೊಳ್ಳು, ನಾನ್ ಇಂಜಿಕ್ ಭೂಮಿ ಕೊಡ್ಕತೆ ತಪ್ಪು  
ಮಾಡಿಟಂದ್ ಮನಸ್ಸಲೇ ಎಣ್ಣೆಯವ ಇಂಜತ್.

ಇಂಜಿ ಸಾವುಕಾರ ಬಪ್ಪಕ ಬಣ್ಣೆ ಕೈಲ್ ಒನ್ನಾಂದೂ ಬಪ್ಪ ಇಂಜಾಲೆ. ತಾನ್  
ಕುಡ್ಚಾಲೇಂಗಿಯೂ ಚಾಮಂಗ್ ಓರಂದ್ ಕುಪ್ಪಿ ಬ್ರಾಂಡಿ, ಯರ್ಚಿ, ಬ್ರೆಡ್, ಬಿಸ್ಕೆಟ್,  
ಚಾಮಂಡ ಮೋವಕ್ ಡ್ರೆಸ್, ಪೊಣ್ಣಾಕ್ ಪೊಡಿಯ ಇನ್ನನೆ ಕೋಯಂಡ ಜೀಪಲ್  
ಬಲ್ಯ ಕೆಟ್ತ್ ಇಪ್ಪ ಇಂಜತ್. ಸಾವುಕಾರ ಕೋಯಂಗ್ ಬುದ್ದವಕ್ ಚಾಮಂಡ ಮನೆರ  
ಕಯ್ಯಾಲೆ ಕೋಂಬರೆಲ್ ಏರ್ಪಾಡ್ ಮಾಡಿತ್ ಇಂಜತ್.

ಪಣಿಕಾರಡ ಕೂಡೆ ಇಂಜಂಡ್ ಎಚ್ಚರ ಎಡ್ತವಕ್ ಚಾಮನ ಮೇಸ್ತ್ರಿ ಮಾಡ್ಚಿ.  
ಇದಾಂಡ ಕೂಟ್ಕ್ ಊರ್ಲಾ ಕಳ್ಳ, ಕಾಚುವಯಿಂಗಡ ಕಳ್ಳಕೆಲ್ಲಾ ಹೋಲ್ ಸೇಲ್  
ಡೀಲರ್ ಚಾಮನಾಚಿ. ಅದಲ್ ಬೋರೆ ಚಾಮಂಗ್ ನಲ್ಲ ಕಮಿಷನ್ ಕೊಟ್ಟವಯಿಂಜತ್.  
ಪಣಿಕ್ ಅಳಿಲ್ಲತೆ ಕೋಯಂಗ್ನ ಊರ್ಕಾರ ಇಕ್ಕ ಚಾಮಂಡ ಕಾಲ್ಕ್ ಬೂವ ದಿನ  
ಬಾತ್. ಪಂಡೇತ ಚಾಮ ಅಲ್ಲಾ ಇಕ್ಕ. ಇಕ್ಕ ಚಾಮಣ್ಣ, ಚಾಮ ಬಾವ, ಚಾಮಮಾಮಂದೆಲ್ಲ  
ಬದಲಾಚಿ. ನಾಡ ಕೊಟ್ತ್ ಕೆಟ್ಟುವಕ್ ನಾಳೆ ನಾಲ್ ಆಳಳ ಬುಟ್ಟ್ತರೆಂಡು. ನಾಡ  
ಕಾಫಿ ಕಚ್ಚಡಕ್ ನಾಲಾಳ್ ಅಯೆಚಿತ್ ತಾಂದ್ ಚಾಮಂಡ ಮನೆಕ್ ಬಪ್ಪಯಿಂಡ ಸಂಖ್ಯೆ  
ಪೆರ್ತತ್. ಚಾಮಂಗ್ ಊರ್ ನಾಡಲೇ ಡಿಮಾಂಡ್ ಏರಿ ಪೋಚಿ!

ನಾಡಲ್ ಉಳ್ಳ ಓರಂದ್ ಅನುಕೂಲಸ್ತ ಕೊಡವಂಗಕ್ ಕಾರ್ ಜೀಪು ಇಂಜಕಲು  
ಗರೀಬ ಕೊಡವಳ ಮಂಡೆ ನೇತಿ ನೋಟುಲೆ. ಪೇಟೆಕ್ ಒಬ್ಬನೇ ಪೋಪಕಲೂ ಬಟ್ಟೆಲ್  
ಕುಂಟನೋ, ಕುರ್ಡನೋ, ತೊಂಡ ತೊಂಡಿನೋ ಕಂಡಕ ಪತ್ತೆಚಿಟ್ಟವ ಗುಣ ಕೊಡವಕ್  
ಇಂಜಾಲೆ. ಆಚೇಂಗಿ ಇಂಜಿ ಕೋಯಂಡ ಜೀಪು ಅಪ್ಪರಿಪ್ಪರ ಓಡಿಕಳಿಪಕ ಪೇಟೆಕ್  
ಪೋಪಯಿನ, ಸ್ಕೂಲ್ ಮಕ್ಕಳ, ಕೆಟ್ತ್ ಪೊರ್ತಂಡ್ ನಡಪ್ಪಯಿಂಗಳೆಲ್ಲ ಕಾಕಿತ್  
ಪತ್ತೆಚಿಟ್ಟವ ಇಂಜತ್. ಪೇಟೆಂಜಿ ಜನಡ ಗೊಬ್ಬರಚೀಲ ಇಟ್ಟಬಪ್ಪ, ಕಾಯಿಲಕಾರಳ  
ಆಸ್ಪತ್ರೆಕ್ ಕೂಟಿಯ ಪೋಪ ಇನ್ನತ ಫಲತರ ಸೇವೆ ಮಾಡುವ ಇಂಜತ್. ಇನ್ನನೆ ಆಯಿತ್  
ಆರ್ ತಿಂಗತ್ ಕೋಯಂಗ್ ಕೊಟ್ಟವ ಇಂಜಚ್ಚಕ್ ಸಲಾಂ ಪಿಂಞ ಮರ್ಯಾದಿ ಪಣಕಾರ  
ಕೊಡವಂಗಕ್ ಕೊಟ್ಟವ ಇಂಜಾಲೆ.

ಕೈಲ್ಪೊಳ್ಡ್ ಗಂಗಿರ ಕೊಕ್ಕೆತಾತಿ, ತಂಗುರ ಜೋಮಾಲೆ ಎಲ್ಲಾ ಕೊಟ್ಟಿಚಿ.  
ಅದಾಂಡ ಕೂಟ್ಕ್ ಚಾಮಂಡ ಬಡ್ಡೆಟ್ಲಾಲ್ ಕೊಡ್ತನ್ನತ ಬಟ್ಟೆ ಬರೆ ಮಾಲ್ ಮಟ  
ಎಲ್ಲಾ ಮನೆ ದುಂಬಿಚಿ. ಒಟ್ಟಾರೆ ಭಾಗ್ಯಲಕ್ಷ್ಮಿ ಕೊಪ್ಪತ್ ಬಾಣೆ ಚಾಮಂಡ ಮನೆಲ್

ನೆಲೆ ನಿಂದಾರ್‌ತ್. ತಂಗುರ ಮೇಲೂ ತೆಳ್‌ಂಗಿತ್ ನರ ಪಾಂಜಂಡ್ ಬಾತ್. ತಂಗು ಪತ್ತನೆ ಕ್ಲಾಸ್ ಪಾಸಾಗತದ್ ಒಂದೇ ಆ ಮನೆಲ್ ಇಂಜ ಕೊರತೆ.

ಪೊಟ್ಟಿರ ಒಳ್‌ಲ್ ಮಾಲ್‌ಮಟ ಬೆಚ್ಚಂಡ್ ಮನೆಲ್ ಅಳತಕ ಅದಲ್ ಎನ್ನತ ಕುಸಿ. ಈಯಾಂಡ್ ಭೂಮಿ ನಟ್ಟಿತ್ ಇಲ್ಲೆ. ಪಣಿಯೊಂದೂ ಇಲ್ಲೆ. ಮೋವಳ ಕೂಟಿಯಂಡ್ ಗಂಗಿ ತಾಂಡ ಪಳಿಯ ಬೆಂದ್‌ಕಡ ಮನೆಕೂ ಊರ್‌ನಾಡಲ್ ಎಲ್ಲಾ ಕೊಡವಡ ಮನೆಕೂ ಸುತ್ತವ ಇಂಜತ್. ಗಂಗಿರ ಪುದಿಯ ಪುದಿಯ ಪೊಡಿಯ, ಮಾಲ್‌ಮಟ ಕಂಡಿತೂ ಇಂಜಿ ಬೊಳೆ ಗಂಗಿರಲ್ಲಿಕ್ ಭಾಗ್ಯಲಕ್ಷ್ಮಿರ ಜಡೆ ಪುಡಚಿ ಈತ ಬಂದ ಪವಾಡತೆನೆಲ್ಲಾ ಕೇಟಿತ್ ಭೂಮಿ ಉತ್ ನಟ್ಟಿಯಿಂಡ ಮನೆಲ್ ನೆಮ್ಮದಿ ಇಲ್ಲತೆ ಆಯಿಪೋಚಿ.

ವಡಿಯಂಗ ಕೈಲ್ ಕಾಸ್ ಇಲ್ಲತೆ ಮೂಡ್‌ಬಾಡ್‌ಚಿಟ್ಟಂಡ್ ಇಪ್ಪಾನ ಕಂಡ ಪೊಮ್ಮಕ್ಕ ವಡಿಯಂಗಡ ದುಂಡ್‌ಕ್ ಅಂಗೈ ನೋಟಿ ಕುತ್ತಿ ಕುತ್ತಿ ಪರೆಯುವ ಇಂಜತ್. "ನಿಂಗಳೂ ಉಳ್ಳಿರ ಆಣಾಯಿತ್. ಜಮ್ಮಕಾರಲೊ, ನಿಂಗಕ್ ಎಲ್ಲಾ ಎನ್ನಂಗ್ ಬೋಂಡು ಇಂಜತ್ ಪೊಣ್ಣ್ ಮಕ್ಕ? ಚಾಕುವಕ್ ಅರಿಯತವಂಗ್ ಸಂಸಾರ ಎನ್ನಂಗ್. ಚಾಮ ಬಾವಂಡ ಸಂಸಾರ ನೋಟಿತ್ ಬಾರಿ. ಎನ್ನನೆ ನೆಮ್ಮದಿಲ್ ಉಂಡ್‌ಂದ್ ಗೊತ್ತಾಪಾ"ಂದ್ ಹಂಗ್‌ಚಿಡುವಾನ ಕೇಟಿತ್ ತಡ್‌ಪಕ್ ಕಯ್ಯತೆ ಚೆನ್ನಂಗ್ ಬುದ್ಧಿವಂತಂಗ ಚಾಮಂಡ ಕೂಡ ತಕ್ಕ ಪರಂದಿತ್ ಕೋಯಂಗ್ ಬಪ್ಪ ಕಾಲ ಇಂಜಿಕ್ ಬೇಲ್‌ನ ಕೊಡ್‌ಪೀಂದ್ ಅಡ್ವಾನ್ಸ್ ಎಡ್‌ತರ್‌ತ್. ಓರಂದ್ ಪೆದ್ದಂಗ ಪುಡ್‌ಚದೇ ಪುಡೀಂದ್ ಬೇಲ್ ಕೊಡ್‌ತದೇ ಇಲ್ಲೆ. ಈ ಬೇಲ್ ಕೊಡ್‌ಕತ ಕೂಟ್‌ಲ್ ಬಲ್ಯಮನೆ ಬೊಳ್ಳು ಒಬ್ಬ. ಇನ್ನನೆ ಆಯಿತ್ ಬೊಳ್ಳುಕೂ ಅವಂಡ ಪೊಣ್ಣ್‌ಕೂ ಜಗಳ ಒನ್ನೊಂದೂ ತಪ್ಪಲೆ.

ಆ ಕಾಲ ಇಂಜಿಕ್ ಭಾರೀ ಧಾರಣೆಯೂ ಬಾತ್. ಸುಮಾರ್ ಕೊಡವಳೂ ಸ್ವಂತ ಇಂಜಿ ನಡ್‌ಪಕ್ ಇಳ್‌ಂಜತ್. ಒರೇ ಜಾಗತ್‌ಲ್ ಬಲ್ಯ ಏರಿಯ ಕ್‌ಟ್ವಚೇಂಗಿ ಪಣಿಕ್ ಅನುಕೂಲ ಆಪ. ಅದ್‌ಂಗ್ ಆಯಿತ್ ಬಪ್ಪ ಕಾಲತ್‌ರ ಬೊಳೆಕ್ ಚಾಮಂಡ ನುಪ್ಪದ್ ಏಕ್ರೆ ಬಾಣೆ ಜಾಗತ್‌ನ ಕೋಯ ಎಡ್‌ತಂಡತ್. ನುಪ್ಪದ್ ಏಕ್ರೆಕ್ ಓರ್ ಲಕ್ಷ ಪಣ. ಅದಲ್ ಇರ್‌ವತ ಅಂಜಾಯಿರ ಚಂಗ್ರಾಂದಿಕಾವಕ, ಬಾಕಿ ಅಯಿಂಬದ್ ಆಯಿರ ಸುರೂವೆತ ಇಂಜಿ ಲೋಡ್ ಪೋಪಕ ತಪ್ಪಾಂದ್ ತಕ್ಕ ಬಾಕ್ ಎಳ್‌ತ್ ಕುತ್ತಾಚಿ.

ಚಾಮಂಡ ನುಪ್ಪದ್ ಏಕ್ರೆ ಕಾಡ್ ಕೆತ್ತ್‌ಚಿ. ಅದಲ್ ಉಳ್ಳ ಮರತ್‌ರ ಕೊಂಬುನ ತೀರಾ ತರ್‌ಚಿತ್ ತಡಿನ ಮಾತ್ರ ಬುಟ್ಟಿತ್. ಕೊಂಬ್‌ನೆಲ್ಲ ತರ್‌ಚಿ ಅಟ್ಟಿ ಮಾಡಿತ್

ಕೋಯ ಲೋಡ್ ಲೋಡ್ ಪುಳ್ಳಿ ಮಾರಾಚಿ. ಪುಳ್ಳಿ ಮಾರುವಕ್ ದಾರಾನ್ಲಾ ಪುಡಿ ಕೊಂಡು, ದಾರಾಕೆಲ್ಲ ಮೇಚಿ ಇಡೊಂಡು, ದಾರಾಕೆಲ್ಲಾ ಎಂಜಿ ನಕ್ಕೊಚಿಡೊಂಡು ಇದಾನ್ಲಾ ಪಡಾಪೊಚಿಡುವಕ್ ಕೋಯಂಡ ಊರಾಕಾರ ಜಾರ್ಜ್ ಪತ್ತಾಕಾಲ ಕೊಡಗಾಲ್ ಪಳಾಂಗಾನ್ವ ಇಂಜತ್. ಎಚ್ಚೆಕೊ ಲಕ್ಷಾಂತರ ಪಣತಾರ ಪುಳ್ಳಿ ಚಾಮಂಡ ಜಾಗತ್ಂಜಿ ಪೋಚಿ. ಜಾಗ ಕೊಡಾಪಕ ಪುಳ್ಳಿರ ಸಂಗತಿ ಪರಂದಿತೂ ಇಂಜಾಲೆ. ಚೆನ್ನ ಬೂಟಿ ಮರ ಇಂಜಾನ ಮಾತ್ರ ತುಂಡ್ ಇಟ್ಟಿತ್ ಬರಿ ಬರಿಲ್ ಬೆಚ್ಚದ್ ಅಲ್ಲಿಯೇ ಇಂಜತ್.

ಈ ಒರೇ ಕಾಲತಾರ ಒಳಾಲ್ ಕೋಯಂಡ ಜೀಪು ಚಾಮಂಡ ಸ್ವಂತತಾರನ್ನೆಕೆ ಆಯಿ ಪೋಚಿ. ಪುದಾಮಳೆ ಪುಡಿಪಾಂಡ ಒಳಿಯ ಒಮ್ಮ ತೀರ್ಥಯಾತ್ರೆ ಮಾಡಂಡೊಂದ್ ಗಂಗಿರ ಒರಾತ ಆಚಿ. ಇದ್ ಕೋಯಂಡ ಕೆಮಿಕೂ ಬುದ್ಧತ್. ಜೀಪುಲ್ ಕೋಯಂಡ ಕೂಡೆ ಪರಶಿವಂಡಕಡು, ಗುರುವಾಯೂರ್, ಪಳನಿ, ಮಧುರೆ..... ಇನ್ನತ ದೇವಸ್ಥಾನ ಎಲ್ಲಾ ಸುತ್ತಿತ್ ಎಲ್ಲಾರೂ ಕಲ್ಲಿ ಕೋಟೆಲ್ ಬಲ್ಯ "ಹೋಟೆಲ್‌ಲ್ ದಂಡ್‌ದಿನ ಇಂಜಿತ್ ಕಾಂಗತಾನೆಲ್ಲಾ ನೋಟಿಯಂಡತ್. ಚಾಮ ಪೋಪುಲ್ ಎಲ್ಲಾ ಸುತ್ತ, ಆಚೇಂಗಿ ಬೈಟ್ ಆರ್ ಗಂಟೆ ಕಯಿಂಜ ಪಿಳಾ ಎರಕತೆ ಕಯ್. ಚೆನ್ನ ಎರ್‌ಕ್‌ನ ಪಿಳಾ ಕೂಡೆ ಕೂಡೆ ಆಂಡು. ಚಾಮ ಬೈಟ್ ರೂಮಾಲೇ ಕುಡಾಚಂಡ್ ಇಪ್ಪಯಿಂಜತ್. ಕೋಯಂಡ ಕೂಡೆ ಗಂಗಿಯೂ ತಂಗೂ ಸಮುದ್ರ, ಹಡಗ್, ಪಿಚ್ಚೆರ್ ಎಲ್ಲಾ ನೋಟಿತ್ ಬಪ್ಪಯಿಂಜತ್. ಈಯಾಂಡ್ ಬಾಣೆ ಜಾಗಕ್ ತಂದ ಅಡ್ವಾನ್ಸ್ ಇರ್‌ವತ್ತ ಅಂಜಿ ಆಯಿರತ್ ತಂಗುಕ್ ಬೋಂಡಿಯ ಮಾಲ್ ಮಟಿ ಎಡ್‌ತಂಡತ್. ಅವ್ವಂಗೂ ಮೋವಕೂ ಉಳ್ಳ ಪೋಡಿಯ ಬಟ್ಟೆ ಬರಿಯೆಲ್ಲ ಕೋಯಂಡ ಗಿಫ್ಟ್! ಓರಾಂಡಲ್ ಚಾಮಂಡ ಸಂಸಾರತಾರ ಬೋಳಾಚೆನ ಕಂಡಿತ್ ಸುತ್ತ ಮುತ್ತ ಉಳ್ಳಯಿಂಗಡ ಕೆಲ ಕತ್ತುವ ಇಂಜತ್. ಒಬ್ಬ ನಲ್ಲದ್ ಆಪಾನ ಕಂಡಿತ್ ಕುಸಿ ಪಡುವವು ದಾರೂ ಇಪ್ಪುಲೆ. ಕುಂಡಕ್ ಬೂವವನ ಕಂಡಿತ್ ಅಲ್ಲಿಕೇ ನೂಕಿತ್ ಚಾಯಿ ನೋಟುವಯಿಂಗಳೇ ಇಪ್ಪ.

ಕೈಲ್ ಚಡಿಯತವು, ಕಾಸ್ ನೇಡತವು, ಕೇಡ್ ಪರೆಯುವಕೇ ಮೊಳಿ ತೇಡುವೊ. ಚಾಮಂಡ ಸಂಸಾರತಾರ ಮೀದ ಎನ್ನತೆಲ್ಲೋ ಕತೆ ಕೆಟ್ಟಿಯಂಡತ್. ಚಾಮಂಡ ಸಂಸಾರ ಜನಡ ತಕ್ಕಾಕೆಲ್ಲ ಕೂಟಾಕಾಲೆ. ಚಾಮನಗುಂಡ್ ಜನಕ್ ಉಪಕಾರ ಇಂಜತ್ ಅನ್ನನೆ ಆಯಿತ್ ಏರ ಕುತ್ತ ಪರಿಯುವಕ್ ಧೈರ್ಯವೂ ಇಂಜಾಲೆ.

ಚಾಮಂಡ ಈಯಾಂಡೆತಾರ ಬಡ್ಡೆಟ್‌ಲ್ ಇರ್‌ವತ್ತ ಅಂಜಿ ಆಯಿರ ಮೋವಕ್

ಮಾಲ್ ಮಟಕ್, ಇರ್ವತ್ತ ಅಂಜಿ ಆಯಿರ ಪಳಿಯ ಮನೆನ ಚಾಯಿ ಕೂಟುವಕ್, ಆಖೀರಿ ಕಂತ್ಲ್ ಕ್ಕಟ್ಟುವ ಅಯಿಂಬದ್ ಆಯಿರತ್ಲ್ ಇಂಜಿ ನಟ್ಟಿ ಬಾಣೆ ಜಾಗತ್ಲ್ ಕಾಫಿ ತೋಟ ತೋರ್ಪ. ಬೋರೆ ಚಿಲ್ಲರೆ ಖರ್ಚಿಕ್ ಎಲ್ಲಾ ಅವ ಮೇಸ್ತ್ರಿ ಕೆಲಸ ಮಾಡುವಾಂಗ್ ಕೋಯ ಕೊಡ್ಪಯಿಂಜ ಕಮಿಷನ್ ಮದಿ ಆಪ ಇಂಜತ್. ಅನ್ನನೆ ಓರ್ ಸೆರಿಯಾನ ಪಣಕಾಸಾರ ತಜ್ಜನನ್ನೆಕೆ ಸಂಸಾರತಾರ ಬಡ್ಡೆಟ್ ತಯಾರ್ ಮಾಡಿಬೆಚ್ಚತ್. ಬೈಟ್ ಚಾಮಂಡ ಕುಡಿಯೊಂದ್ ಬುಟ್ಟಕ ಇಡೀ ಊರ್ಲ್ ಶಾಂತಿಲ್ ಇಂಜ ಮನೆ ಅದ್ ಒಂದೇ.

ಈಯಾಂಡ್ ಆ ಊರ್ಲ ಪಾದಿ ಎಂ.ಎಂ. ಕೋಯಂಡ ಇಂಜಿ ತೋಟ. ಅದ್ನ ಎಲ್ಲಾ ಸುತ್ತಿ ನೋಟಿಯವಕ್ ಚಾಮ ರೈಟರ್. ಕಳ್ಳ ಕಾಚುವ ಸುಮಾರ್ ಸಂಸಾರ ನಲ್ಲ ನೆಮ್ಮದಿಕ್ ಬಾತ್. ಆಳಡ ಏದ್ ಕ್ಯಾಂಪ್ ಕಳ್ಳ ಪೋಂಡಿಕೂ ಅದ್ ಚಾಮಂಡ ಮುಖಾಂತರವೇ ಪೋಂಡು. ಸೀದಾ ವ್ಯಾಪಾರ ಕಯ್ಯ. ಇನ್ನತ ಚಿಲ್ಲರೆಕೆಲ್ಲ ಕೋಯ ಮಂಡೆ ಇಡುವ ಇಂಜಾಲೆ. ನೇರಕ್ ಸೆರಿ ಅವಂಡ ಪಣಿ ನಡಂದಕ ಮದಿ.

ಎಡ್‌ಮ್ಯಾರಲ್ ಬೇಲ್ಕಾರ ಎತ್ತ್‌ಕೆಟ್ವಾಂಗ್ ಮಿಞ ತೋಡಾರ ನೀರಾನ ಎಲ್ಲಾ ಮಿಷಿನ್‌ಲ್ ಪಾರ್‌ಚಿಟ್ಟಿತ್ ಕೋಯಂಡ ಇಂಜಿ ನಟ್ಟಿತ್ ಆಚಿ. ಯಾಕಕ್ ತೋಡಿಕೆ ಬಿತ್ತ್ ಇಡುವಯಿಂಗಳ್ ನೀರ್ ಇಲ್ಲತೆ ಬಿತ್ತ್‌ಪಾಡ್ ತಪ್ಪಿ ಪೋಚಿ. ತೋಡಾರ ನೀರ್‌ಕ್ ದಾಡ ಕೊರೂ ನಡಪುಲೆ. ತೋಡ್ ನೀರಾನ ಇಂಜಿಕ್ ಬಳಸುವಕ್ ಕಯ್ಯಾಂದ್ ಚೆನ್ನಂಗ್ ಜನ ಗಲಾಟೆ ಮಾಡ್‌ಚಿ. ಆಚೇಂಗಿ ಇಂಜಿಕ್ ಬೇಲ್ ಕೊಡ್‌ತವು ಸದ್ ಮಾಡ್‌ನದೇ ಇಲ್ಲೆ. ಓರಬಡ ಕೂತ್ ಎಲ್ಲಿಕ್ ಎತ್ತು? ಒಂದ್ ದಂಡ್ ಬಾಲೆಕಾರ ಕೂಡಿಯಂಡ್ ತಹಸೀಲ್ದಾರಂಗ್ ಓರ್ ಅರ್ಜಿ ಕೊಡ್‌ತತ್. ತಹಸೀಲ್ದಾರ್ ರೆವಿನ್ಯೂ ಇನ್ಸ್‌ಪೆಕ್ಟರ್‌ನ ತೋಡ್ ನೋಟುವಕ್ ಅಯೆಚತ್. ಕೋಯಂಡ ನೋಟ್ ಕೆಟ್ವಾರ ಮಿಞ ಬಾಲೆಕಾರಡ ಅರ್ಜಿ ಕೆತ್ತೆಲ್ ಪೂಂದ್ ಪೋಚಿ!

ಇಂಜಿಕ್ ನೀರ್ ಪಾರ್‌ಚಿಡುವಕ್ ತೋಡ್‌ಕ್ ಕಟ್ಟೆಕೆಟ್ಟಿ ನಿಪ್ಪಾಚಿಟ್ಟಿತ್ ಇಂಜತ್. ಯಾಕ ಒಣ್‌ಂಗಿತ್ ಬಿತ್ತ್ ಇಡುವಕ್ ಕಯ್ಯತೆ ದಂಡ್ ಬಾಲೆಕಾರ ಆ ಕಟ್ಟೆನ ಒಡ್‌ತಿತ್ ಯಾಕಕ್ ನೀರ್ ಕೇತಿತ್ ಬಿತ್ತ್ ಇಟ್ಟಿತ್. ಕೋಯಂಡ ಕೂಟ್‌ಕಾರ ಊರ್ಲ ಬಾಲೆಕಾರಳ ಪೊಲೀಸ್‌ಕ್ ಕೊಡ್‌ತತ್. ದುಡ್ಡ್‌ಕ್ ಅಲ್‌ಂದ ಇವು ಬಾಲೆಕಾರಳ ಪುಡ್‌ಚಿ ಕೂಟಿತ್ ನನ್ನಾಲ್ ಚವುಟ್‌ಚಿ. ಕೇಸ್ ಇಟ್ಟಿತ್. ಬಾಲೆಕಾರಡ ಯಾಕತ್ ಅಗೆ ಮೊಳ್‌ತದೇ ಇಲ್ಲೆ.



ಬಿತ್ತನೆಲ್ಲೂ ಇಲ್ಲತೆ ಆಚಿ. ಕೈಲ್ ಕಾಸಿಲ್ಲತವಂಗೆ ಬಾವಕಯ್ಯತೆ ಆವದಿಲ್ಲತಾಚಿ.

ಬೇಲೆಲೂ, ಬಾಣೆಲೂ, ಕಾಡೆಲೂ ನಟ್ಟ ಇಂಜಿ ಮಾತ್ರ ನೆಡಿ ಕೂಡಿಯಂಡ್ ಬೊಳಂದತ್. ಇಂಜಿಕ್ ಜಾಗ ಕೊಡತವು ತೆಳಚಂಡ್ ಪೇಟೆ ಸುತ್ತಚಿ. ಇಂಜಿಕ್ ಕೊಡಕತೆ ಬೇಲ್ ನಟ್ಟಯಿಂಗ ನಾಟಿಕ್ ಅಗೆ ಇಲ್ಲತೆ ಮಂಡೆಕ್ ಕೈ ಕೊಡತಂಡ್ ಅಳತತ್. ಭೂಮಿ ನಡಪಕ್ ಕಯ್ಯತ ರೈತಂಗಳ ರೈಟರ್ ಚಾಮ ಕಂಡಿತ್ ಕನಿಕರ ಕಾಟ್ಚಿ. "ನಿಂಗ ಬೊಳೆ ಆಪುಲೇಂದ್ ಬೇಜಾರಪಡತಿ. ಪುತ್ತರಿಕ್ ಆಪಕ ಇಂಜಿ ಬಲಿಪಕ್ ಆಕಣೆ ನಿಂಗಕೆಲ್ಲ ಪಣಿ ತಪ್ಪಕ್ ಕೋಯ ಸಾವುಕಾರಂಗ್ ಎಣ್ಣುವಿ. ಬಪ್ಪಕಾಲಕ್ ಬೇಲೆನೆಲ್ಲ ಇಂಜಿಕ್ ಕೊಡಕೊಲು. ಈಯಾಂಡ್ ನಿಂಗಳ ಪಟ್ಟಣಿ ಬೂಕ್ವಕ್ ನಾನ್ ಬುಡುಲೆ"ಂದೇ ಪರ್ಂದತ್. ಇದ್ನ ಕೇಟಿ ಸ್ವಾಭಿಮಾನಿ ಕೊಡವ ಪಲ್ಲ ಕಡಚತ್. ಬಂದ ಚೆಡಿನ ಚಯಿಂತ್ ಎರ್ಕಿಯಂಡತ್. "ಥೂ, ಬಂಡ, ನಿನ್ನನ್ನತ ಮಂಡೆ ಪುಡಿಪ ಕೊಡವಳಗುಂಡೇ ಪಂಡೂ ಕೊಡವ ತಳಂದಿಯೆ. ಮಿಂಕೂ ನಿನ್ನನ್ನತ ನಾಯಿಯ ಪುಟ್ಟಿಯಂಡೇ ಇಕ್ಕು"ಂದ್ ಬಜ್ಜಿತ್ ತುಪ್ಪಿಯಂಡ್ ಪೋಚಿ.

ಆದರೆಲ್ ಪುಡಚ ಮಳೆ ಕಕ್ಕಡ ಪೋಕಣೆ ಎಡೆಬುಡತೆ ಎರ್ಂಜಿ ಪೊಜ್ಜತ್. ಬೇಲೆಲ್ ಎಕ್ಕೊಲೂ ಮೂಳೆಕ್ ನೀರ್ ನಿಂದಿತೇ ಇಂಜತ್. ಮಳೆಕಾಲತ್ ಜನಕ್ ಪಣಿ ಇಲ್ಲತೆ ತಿತ್ತಕಾಂಜಂಡ್ ಅಳಪಕಾಚಿ. ಚಾಮ ರೈಟರ್ ಮಾತ್ರ ಬೈಟ್ ಆರ್ ಗಂಟೆಕ್ ತೊಂಡೆರ ಕೊತ್ತಕ್ ಎತ್ತಣೆ ಕುಡಚಿತ್ ಕಟ್ಟ ಪತ್ತಿರುವ ಇಂಜತ್. ಸಾವುಕಾರ ಕೋಯ ಅಂವಂಡ ಕಯ್ಯಾಲೆ ಕೋಂಬರೆನೆ ಮನೆ ಮಾಡಿಯಂಡ್ ಇಂಜತ್. ರಸ ರಸ ಕರಿ ಕೂಳೆ ಮಾಡಿತ್ ಇಡುವಕ್ ಗಂಗಿ ಇಂಜತ್.

ಒನ್ನಾಂದ್ ಅಂದಿ ಮುಂದಿ ನೇರಕ್ ಕಯ್ಯಾಲೆ ಕೋಂಬರೆಲ್ ತಂಗುರ ನಿಪ್ಪುಕ್ ಕೈ ಬೆಚ್ಚಂಡ್ ಎಲಂಗೆ ಪರ್ಂದಂಡ್ ಕೋಯ ಅಳತದ್ ಗಂಗಿಕ್ ಸೆರಿ ಕಂಡಲೆ. ಪೆತ್ತವ್ವನಾಕುಲಾ. ವಡಿಯನ ಕಾಕಿತ್ ಗಂಗಿ, "ನೋಟಿ ನಿಂಗ ಸಾವುಕಾರ ಇಪ್ಪಕ ಕುಡಿಪಕ್ ಕಯ್ಯ. ತಂಗುರ ಕೂಡೆ ಅಂವ ಕಳಿಪದ್ ನಾಕ್ ಸೆರಿ ಕಾಂಬುಲೆ"ಂದ್ ಓರ್ ಎಚ್ಚರ ಕೊಡತತ್. ಅಕ್ಕ ಚಾಮ, ಪೊಣ್ಣೆಕೇ ಬಜ್ಜಿತ್ "ನೀನ್ ಚೆನ್ನ ಅಡಕತ್ ಇರ್. ಅಂವಂಗೆ ತಂಗುನಂತ ಮೋಳಿಯ ಉಂಡಲೊ. ಅದೂ ಅಲ್ಲತೆ ನಾಡ ಮೋವ ಎಂತವಾಂದ್ ನಾಕ್ ಗೊತ್ತುಂಡ್" ಎಣ್ಣಿತ್ ಅಲ್ಲಿಕೇ ಅಡಕಿರ್ತ್.

ನೆಲ ಕಾಂಗತನ್ನಕೆ ನೆಡಿಕೂಡಿಯಂಡ್ ಬಂದ ಬೇಲೆರ ಇಂಜಿ ಗರಿಕೆ ಪೈಚೆಯೆಲ್ಲ ಕವಂಜಿತ್ ಇಂಜಿ ತೊಪ್ಪ ಕಾಂಗತೆ ಆಚಿ. ಕೈಲ್ ಪೊಳ್ಳಾಕಾಪಕ ಮಳೆ ಚೆನ್ನ ತೊರ್ಪ್

ಬಾತ್. ಜನ ಕೂಟಿ ಕಳೆ ಎಡ್‌ತ್ ನೋಟುವಕ ಇಂಜಿರ ತೊಪ್ಪಾಕೆಲ್ಲ ಮಂಜ ಚುಳ್ಳಾ ಬುದ್ದಿತ್ ಬೊಳ್‌ಚೆ ನಿಂದ್ ಪೋಯಿತ್ ಇಂಜತ್. ಮಣ್ಣ್ ಮಾಂದಿತ್ ನೋಟಣೆ ಇಂಜಿ ಪಕ್ಕೆತೇರ ಕೀಂಜಿತ್ ಕಂಡತ್. ಏದೆಲ್ಲೋ ಮದ್ ಪೊಜ್ಜಿತ್ ನೋಟ್‌ಚಿ. ಕಾಯಿಲ ನೀಂಗ್‌ಲೆ. ಇಂಜಿಕ್ ಮಹಾಕಾಳಿ ಕಾಯಿಲ ಪೊದ್ದಿತ್ ಬೇಲ್‌ಲ್ ಇಂಜಿ ನಟ್ಟಿಯಿಂದ ಪಣೆಕೂಡ್‌ಚಿಲೊಂದ್ ಊರ್ ನಾಡ್‌ಲೆಲ್ಲ ಪ್ರಚಾರ ಆಚಿ. ಆಚೇಂಗಿ, ಬಾಣೆ ಜಾಗತ್‌ಲ್ ನಟ್ಟಿ ಇಂಜಿಕ್ ತೊಂದರೆ ಬರಾಂದ್ ಧೈರ್ಯ ಇಂಜತ್.

ಬೇಲ್‌ಕಾರಡ ಗುತ್ತಿಗೆ ಪಣ ಕೊಡ್‌ಕತೆ ದಾರೂ ಇಂಜಿ ಬಲಿಪಕ್ ಬುಟ್ವೆಲೆ. ಪುತ್ತರಿಕಾಪಕ ಪಚ್ಚೆ ಇಪ್ಪಕಲೇ ಬಲ್‌ಚಿತ್ ಮಾರುವಕ್ ಉಳ್ಳ ಏರ್ಪಾಡ್ ಮಾಡ್‌ಚಿ. ಎಲ್ಲಾರ್‌ಕೂ ಒಮ್ಮಕೇ ಪಣ ಕೊಡ್‌ಪಕ್ ಕೋಯಂಡ ಪಕ್ ಪಣ ಪೋರತೆ ಆಚಿ. ಗಂಗಿನೋ, ರೈಟರ್ ಚಾಮನೋ ಕೂಟಿತ್ ಓರ್ ಪುದಿಯ ಐಡಿಯಾ ಎಣ್ಣೆಚಿ.

"ನೋಟಿ ರೈಟ್ರಿ, ಬೇಲ್‌ಕಾರಡ ಗುತ್ತಿಗೆ ಪಣತನ ಕೊಡ್‌ಕತೆ ಫಸಲ್ ಬಲಿಪಕ್ ಬುಡುಲೆ. ನಾಡ ಪಕ್ ಚೆನ್ನ ಪಣಪೋರ. ಊರ್‌ಕ್ ಪೋಯಿತ್ ಸೆರಿ ಮಾಡಿತ್ ಬರಣೆ ಇಂಜಿ ಕೀಂಜಿತ್ ಭಾರೀ ನಷ್ಟ ಆಯಿರುವ. ಆನಗುಂಡ್ ಅಲಂಬಲಾಯಿತ್ ಓರ್ ಆಚೆರ ಮಟ್ಟಿಕೆ ನಿಂಗಡ ಮಾಲ್‌ನೆಲ್ಲಾ ಬ್ಯಾಂಕ್‌ಲ್ ಬೆಚ್ಚಿತ್ ಪಣ ಎಡ್‌ತವನ. ದಂಡ್ ಲೋಡ್ ಇಂಜಿ ಮಾರಿತ್ ಆನದು ಫಸ್ಟ್ ಮಾಲ್ ಬುಡ್‌ತಿತ್ ತಂದ್‌ರುವಿ. ಬ್ಯಾಂಕ್ ಬಡ್ಡಿ ಕೆಟ್ಟಿರುವಂಜಿ ಅದೊಂಡ ಮೀದ ಅಯಿರಾಂಗ್ ಇರ್‌ವದ್ ಉರ್‌ಪಿಯತ್‌ರನ್ನೆ ಕೂಟಿತ್ ತಪ್ಪಿ"ಂದ್ ಎಣ್ಣೆಚಿ.

ಕೋಯ ಮೋಸಕಾರ ಅಲ್ಲಾಂದ್ ಗಂಗಿಕೂ ನಂಬಿಕೆ ಇಂಜತ್. ಅಲ್ಲತೆ ದಂಡ್ ಆಚೆರ ಮಟ್ಟಿಕೆ ಬ್ಯಾಂಕ್‌ಲ್ ಬೆಚ್ಚಕ ಆಯಿರಾಂಗ್ ಇರ್‌ವದ್ ಉರ್‌ಪಿಯ ಸಾವುಕಾರ ಕೂಟಿತೂ ತಪ್ಪ. ಪೊಟ್ಟಿಲ್ ಬೆಚ್ಚಂಡಕ ಅದೆನ್ನ ಮುಟ್ಟೆ ಇಡುಲೆಲ್ಲಾಂದ್ ತೀರ್ಮಾನ ಮಾಡಿಯಂಡ್ ಗಂಗಿರ ವಾಲೆ, ಪತ್ತಾಕ್ ಎಲ್ಲಾ ಕೂಡಿತ್ ಐಂಬದ್ ಆಯಿರ ಉರ್‌ಪಿಯ ಕೊಟ್ಟುವನ್ನೆ ಮಾಡಿತ್ ಕೊಡ್‌ತತ್.

ಇಂಜಿ ಅಳ್‌ಕಾಚಿ. ಪಚ್ಚೆ ಇಂಜಿಕ್ ಹೈದರಾಬಾದ್‌ಲ್‌ನಲ್ಲ ದಾರಣೆ ಇಂಜ ಕಾಲ ಅದ್. ಲೋಡ್ ಪೋಚಿ. ಅಲ್ಲಿಕ್ ಎತ್ತಣೆ ಅಡಿಲ್ ಉಳ್ಳದ್ ಎಲ್ಲಾ ಕೀಂಜಿತ್ ಲಾರಿ ಬಾಡಿಗಿಯೂ ಕೊಟ್ವೆಲೆ. ಪಚ್ಚೆ ಇಂಜಿಕ್ ಬೋರೆ ಎಲ್ಲಿಯೂ ಡಿಮಾಂಡ್ ಇಂಜಲೆ.

ದಂಡನೆ ಲೋಡ್ ಪೋಪಕ ಕೋಯಂಡ ಊರ್‌ಕಾರ ಪುಳ್ಳಿ ಮಾರ್‌ಚಿಟ್ಟಿ ಚಾರ್ಜ್

ಓರ್ ಕೆಣೆಪಾಯ್ಚಿಟ್ಟಿತ್. ಇಂಜಿರ ಒಳ್ಲಲ್ ದಂಡ್ ನಲ್ಲ ಸೈಸಾರ ಬೂಟಿ ಕುಟ್ಟೆ ಬೆಚ್ಚಿತ್ ಇಂಜಿ ಲೋಡ್ ಮಾಡ್ಚಿ. ಈ ಕುರಿರ ಲೋಡ್ ಪೋನಲ್ಲಿ ಬಲೋರ್ ನಷ್ಟ ಬಂದಾಲೆ. ಅಲ್ಲತೆ ಬೂಟಿ ಕುಟ್ಟೆಕ್ ನಲ್ಲ ರೇಟ್ ಕಟ್ಟಿತ್ ಬದ್ಕಿಯಂಡತ್.

ಬೇಲ್ಲ್ ಇಂಜ ಇಂಜಿರ ರೋಗ ಬಾಣೆ ಜಾಗಕೂ ಪತ್ಚಿ. ಬಾಣೆರ ಇಂಜಿನೆಲ್ಲ ಬಲ್ಚಿತ್ ಆಪದು, ಅದೆಲ್ಲಾಂಗೂಡಿ ದಂಡ್ ಲೋಡ್ ಇಂಜತ್. ಪೋನ ಬಂದ ಖರ್ಚಿಯೇಂಗಿ ಬರಂಡಿಕ್ ಬೂಟಿ ಮರ ಸಾಗ್ಚಿಟ್ಟಿತ್ ಮಾರುವದ್ ಒಂದೇ ಬಟ್ಟೇಂದ್ ಕಂಡತ್. ಕೂಟ್ಕ್ ಚಾಮಂಡ ಆಖೀರಿ ಕಂತ್ ಐಂಬದ್ ಆಯಿರ ಕೊಡ್ಕೊಂಡು. ಮಾಲ್ ಮಟ ಬ್ಯಾಂಕ್ಂಜಿ ಬುಡ್ತಿ ಕೊಡ್ಕೊಂಡು. ಇದ್ಂಗುಳ್ಳ ಮಾಸ್ಪರ್ ಪ್ಲಾನ್ ಮಾಡ್ಚಿ. ದಂಡ್ ಲೋಡ್ ಇಂಜಿನ ಒಕ್ಕಚೇ ಆಯಿಪ. ದಂಡ್ ಲಾರಿರ ಅಡಿಲೂ ಸುಮಾರ್ ಓರ್ ಲಕ್ಷ ಬೆಲೆರ ಬೂಟಿ ತುಂಡ್ನ ಒಳ್ಳಪ್ಚಿರುವಂದ್ ಪ್ಲಾನ್ ಮಾಡಿತ್ ಎಲ್ಲಾ ರೆಡಿ ಮಾಡ್ಚಿ. ಬೈಟಾಪಕ ಓರ್ ಲಾರಿಲ್ ಡ್ರೈವರೂ ಚಾಮನೂ ಪೊರಟತ್. ಇಇಂದೊಂದಾತ್ಲ್ ಕೋಯನೂ ಚಾರ್ಜೂ ಪತ್ಚಿ.

ಹುಣಸೂರ್ ಗೇಟ್ಲ್ ಫಾರೆಸ್ವ್ ಸ್ವಾಡ್ಕಾರ ಲಾರಿ ತಡ್ತತ್. ಬೊರ್ಂಡ್ನ ಚಾಮ ಮುಂಡತೆ ಅಳ್ತತ್. ದಂಡನೆ ಲಾರಿಲ್ ಇಂಜಿ ಪಿಂಞ ಬೂಟಿ ತುಂಡಲ್ಲತೆ ಓರ್ ಮನುಷ್ಯನೂ ಇಲ್ಲೆ. ಕೇರಳಕಾರಕ್ ಈ ಕಳ್ಳತನ ತಪ್ಪ್ಚಿಟ್ಟಿವದ್ ಮಾಮೂಲ್. ಇಕ್ಕ ದಂಡ್ ಲಾರಿಕೂ ಚಾಮನೇ ಉತ್ತರ ವಾದಿ!

ಸ್ವಾಡ್ಕಾರಡ ಕೂಡೆ, ತೋಡ್ಕರ ಕಟ್ಟೆ ಒಡ್ತಿತ್ ಪೊಲೀಸಡ ತಲ್ಲ್ ತಿಂದಿತ್ ಇಂಜ ಆ ದಂಡ್ ಕೊಡವ ಬಾಲೆಕಾರ ನಿಂದಂಡ್ ಪಲ್ಲೆಳಿಪಯಿಂಜತ್.

ಚಾಮನ ಪುಡ್ಚಿಕೂಟ್ನದೂ, ಗಂಗಿರ ಮಾಲ್ ಮಟ ಎಲ್ಲಾ ಬ್ಯಾಂಕ್ಲ್ ಆನದೂ ಬೊಳ್ಳುರ ಪೊಣ್ಣ್ ಗೊತ್ತಾಚಿ. ಅರೆಗಳಿಗೆ ಅರಸನಾಯಿತಿಂಜ ಚಾಮಂಡ ಬದ್ಕ್ ಚಿರಾಂದ್ ಅರಂಜಂಡ್ ತಾಂಡ ವಡಿಯಂಡ ಕೂಡೆ ಗೊಣ್ಂಗಿಯಂಡ್ ಇಂಜ ಬೊಳ್ಳುರ ಪೊಣ್ಣ್ ವಡಿಯಂಡ ಕಾಲ್ ಪುಡ್ಚಿತ್ ಓರಾಂಡ್ಡೀ ಗೊಣ್ಂಗಿಯಂಡ್ ವಡಿಯನ ಬಜ್ಜಾಂಗ್ ಮಾಘ್ ಕೇಟಂಡತ್.

ಚಾಮಂಡ ಪೊಣ್ಣ್ನೊ ಮೋವಳೋ ವಿಚಾರಣೆಕ್ ಕೂಟಿಯಂಡ್ ಪೋಪಕ್ ಪೊಲಾಕ ನೇರ್ತೆ ಫಾರೆಸ್ವ್ಕಾರ ಬಾತ್. ಗಂಗಿ ಮೊರ್ಟಂಡ್ ಬಟ್ಟೆ ಇಟ್ಟಿತ್ ಮೋವ ಎಲ್ಲಿಯಾಂದ್ ತೇಡುವಕ ತಂಗು ಗುಡ್ಡತ್ ಅಳ್ತಂಡ್ ಕಾರುವ ಇಂಜತ್. ಇದೆನ್ನಂಗ್

ಮೋವ ಕಾರುವೋಂದ್ ಅರ್ಥ್ ಮಾಡಿಯವಕ್ ಗಂಗಿಕ್ ಏರ ನೇರ ಬೋಂಡಿಯಾಯಿಲೆ.

ವಿಚಾರಣೆಲ್ ಎಂ.ಎಂ. ಕೋಯಂಡ ಊರ್ ಏದ್, ಸೀಮೆ ಏದ್ ಎಣ್ಣುವ ಅಡ್ರೆಸ್ ಮಾತ್ರ ದಾಡ ಪಕ್ಕೋ ಇಂಜ್ಲೆ. ಚಾಮಂಡ ಕೂಳನ ಪಾಳಾಕಿತ್, ಗಂಗಿರ ಬದ್‌ಕ್‌ನ ಗೋಳಾಕಿತ್, ತಂಗುರ ಬಾಳನ ಚೂರಾಕಿತ್ ಓಡ್‌ನ ಕೋಯನ ಕಂಡಂವನಿಲ್ಲೆ.

ನಾಡಯಿನ ತೆರ್‌ಕಿತ್ ಓಡಿ ಬಂದಂವನ ತೆಕ್ಕನಾಂಗ್ ಈ ಗತಿ ಆಚೀಂದ್ ಜೈಲಾರ ಒಳಂಜಿ ಚಾಮನೂ ಪೊರ್‌ಮೆಂಜಿ ಅವ್ವನೂ, ಮೋವಳೂ ಮಂಡೆ ಕುಟ್ಟಿಯಂಡ್ ಮೊರಟತ್. ಅರ್‌ಂಜಿತೂ ಈ ಕೊಡವ ಇನ್ನನೆ ಕುಂಡ್‌ಕ್ ಬೂವಲ್ಲಾಂದ್ ಬೊಳ್ಳು ಪೊಣ್ಣ್‌ಕ್ ಒಪ್ಪಚಿಟ್ಟಿಂಡ್ ಇಂಜತ್.

- \* - \* - \* -

## ವಿತ್ತನ ಆನೆ

ಪಪ್ಪಣಿನ ಪತ್ತಿತ್ ಸೆರಿ ಓರಾಂಡಲ್ ಅಪ್ಪ ಚತ್ಪೋಚಿ. ಗಂಗವ್ವ ತಾಂಡ ಕ್ಕಣ್ಣಮಕ್ಕಳೊ ಮೂಂದ್ ಮೂಡಿಯಳೊ ಮಡಲ್ ಕೆಟ್ಟಿಯಂಡ್ ಚಾಕ್ಚಿ. ಭೂಮಿ ಕಾಣಿ ಇಂಜಕಲೂ, 'ನೆಂಗಿ ಪುಡಿ ಪುಡ್ಚಿ ಉಪ್ಪಂವನಿಲ್ಲತೆ ಭೂಮಿ ಇಂಜಿತೆನ್ನಾ?' ಭೂಮಿನ ವಾರಕ್ ಕೊಡ್ತಕ ವಾರಕಾರನ ಪೊಜ್ಜಿತೂ ಪಿತ್‌ಲಾಟ ಮಾಡಿತೂ ದವುತುವದ್ ಮನೆಕಾರ ಮಂದಯ್ಯಂಡ ಕೂಡೆನ್ನೆ ಪುಟ್ಟಿ ಬಂದ ಗುಣ.

ಗಂಗವ್ವಂಡ ಕ್ಕಣ್ಣಮಕ್ಕಡ ಪಣಿ ಕೂಟಿಟಕ ಜಮ್ಮ ಅಸ್ತಿಕೆಲ್ಲ ನಾಡ ಮಕ್ಕಳೇ ಹಕ್ದಾರಳಾಪಾಂದ್ ನಿಂದಲ್ಲಿಯೂ ಅಳ್ತಲ್ಲಿಯೂ ಮಂದಯ್ಯಂಡ ಮುಂದಾಲೋಚನೆ. ಕೇಡ್‌ಗ ಅಪ್ಪಂಗ್ ಸೆರಿಯಾನ ಕೋಡಂಗಿ ಮೋಂವ ಬಿದ್ದಯ್ಯ. ಈ ಅಪ್ಪ ಮಕ್ಕಡ ಸೆರೆಲ್ ಬದ್‌ಕುವಾಂಗ್‌ಚಿ, ಮಕ್ಕಳೆಲ್ಲ ಪೊಳೆಕ್ ನೂಕಿತ್ ತಾನೂ ಪೊಳೆಕ್ ಪಾರಿತ್ ಚಾವದೇ ಸುಖಾಂದ್ ಎಚ್ಚಕೊ ಕುರಿ ಗಂಗವ್ವ ಗೇನ ಮಾಡುವ ಇಂಜತ್.

ವಾರತ್‌ಲ್ ಕ್ಕಟ್ವನ ನೆಲ್ಲ ಚಂಗ್ರಾಂದಿಕೆತ್ತಣೆ ಮಾತ್ರ ಮದಿಯಾಕು. ಅಪ್ಪರ ಬೊಳೆ ಬರಣೆ ಪೊಲಿಕೆಡ್‌ತಿತೇ ಉಂಗಂಡು. ಇನ್ನತ ಗರೀಬತನತ್‌ಲ್ ಪಪ್ಪಣಿ ಬೊಳಂದತ್. ಪಪ್ಪಣಿ ಎಕ್ಕೊಲು ಸ್ಕೂಲ್‌ಕ್ ಪೊರಡುವಾಂಗ್ ಮಿಳಾ ಅತ್ತಕ್ ಓರ್‌ಕೆಟ್ವ ಪಿಲ್ಲ ಆರ್‌ತ ಬರಂಡು. ಸ್ಕೂಲ್‌ಂಜಿ ಬಂದ ಪಿಳಾ ಅತ್ತಕ್ ಓರ್‌ ಕೆಟ್ವಪಿಲ್ಲ ಅರತ ಬರಂಡು. ಒನ್ನಾಂದ್ ತಪ್ಪಿಪೋನಕ ಅವ್ವಂಡ ತಲ್ಲ ತಿಂಗಂಡಿಯಾಪ ಇಂಜತ್.

ಅಕ್ಕ ಚೆನಿಯಾಚೆ, ನಾರಾಚೆ ದಂಡ್ ದಿನ ಮಕ್ಕಕ್ ರಜ. ರಜ ಉಳ್ಳಂದ್ ಅತ್ತಳ ನೋಟುವದ್ ಸ್ಕೂಲ್ ಮಕ್ಕಡ ಡ್ಯೂಟಿ. ಎಲ್ಲಾ ಮಕ್ಕಳೂ ಅಯಿಂಡಯಿಂಡ ಅತ್ತಳ ಆಟಿಯಂಡ್ ಬಾಣೆಕ್ ಬಂದಿತ್ ಬೈಟಾಕಣೆ ಕಳಿಪದ್ ಸಾಮಾನ್ಯ ನಿಯಮ. ಪಪ್ಪಣಿಕ್ ಮಾತ್ರ ಕಳಿರೆಡೆಲ್ ಕೊಟ್ವಕುಳ್ಳ ತೊಪ್ಪಾಕೆಟ್ವ ಮಾಡಿತಾಂಡು. ಎಕ್ಕೊಲು ತೊಪ್ಪು ತೇಡುವ ಕಷ್ಟಕ್ಕಾಯಿತ್ ಚೆನಿಯಾಚೆ ನಾರಾಚೆ ದಂಡ್ ದಿನ ಅತ್ತಳ ನೋಟುವಕ ಇಡೀ

ಆಚೆಕುಳ್ಳ ತೊಪ್ಪು ಕೆಟ್ಟ ಮಾಡಿತ್ ಒಣಗತನ್ನಕೆ ಏಚಿ ಕೊಚ್ಚೆರೊಳಲ್ ಬೆಚ್ಚವ ಇಂಜತ್. ಸ್ಕೂಲ್ ಉಳ್ಳಂದ್ ಸ್ಕೂಲ್‌ಕ್ ಬಪ್ಪಕಲೇ ಆ ಕೆಟ್ಟನ ಎಡ್ತ ಬಂದಿತ್ ತಾಂಡ ಪಣೆನ ತೇಪ ಇಂಜತ್.

ಬೇಲ್‌ರ ಕರೆಯ ಎಲ್ಲ ಬಲ್ಯ ಬಲ್ಯ ಬಾಣೆ ಇಂಜತ್. ಓರ್ ಬಲ್ಯಪರುಂಬುರ ನಡುಲ್ ಓರ್ ಬೈರಿ ಮರ. ತಾಪತ್ತಿಕೊಡೆ ಬೀತಿತ್ ನಿಂದನ್ನಕೆ ಕಾಂಬಂಜತ್. ಆ ಮರ ತಾನಾಯಿತೆ ಪುಟ್ಟಿ ಬೊಳಂದದೊ ಅಲ್ಲ ಏದೇಂಗಿ ಪುಣ್ಯಾತ್ಮಂಗ ನಟ್ಟ ಬೊಳತಾಚೊ. ಅದ್‌ಂಡ ಚಾಯಿ ದೂರಕ್ ಚಿತ್ರ ಬುಡ್‌ತನನ್ನಕೆ ಕಾಂಬಯಿಂಜತ್. ಮರತಾರ ಮೊರಡಲ್ ಕಾಡ್‌ಕಲ್ಲರ ಗುಡ್ಡೆ ಇಟ್ಟಿದ್ ಕಟ್ಟಿಕೆಟ್ಟನನ್ನಕೆ ಇಂಜತ್. ಬಾಣೆಲ್ ಮೇಂಜ ಅತ್ತ ಮಜ್ಜಣ ನೇರತಲ್ ಆ ಮರತಾರಡಿಲ್ ಬುದ್ದಂಡ್ ಮೇಚಿ ಕರಕುವ ಚಾಯಿ, ಮರತಾರ ಕೊಡಿಲ್ ಎಲ್ಲಾ ತರತಾರ ಪಕ್ಷಿಯ, ಕೊರಿಯಂಗಡ ಸದ್ ಕೇಟಂಡಳತಕ ಸ್ವರ್ಗ ಸುಖ ಕಾಟ್ಟುವ ಇಂಜತ್. ಆ ಬಾಣೆರ ನಡುವೆ ತೇಂಜ ಬಟ್ಟೆಲ್ ನಡಂದ್ ಪೋಪಯಿಂಗ ಈ ಮರತಾರಡಿಲ್ ಅಳಾತಿತ್ ಕೂಪದಿ ಉಂಬ ಇಂಜತ್. ಪೊಣ್ಣಾಳ ಕುಂಞಿಯಕ್ ಎದೆಪಾಲ್ ಊತಾಚಿರುವ ಇಂಜತ್. ಮರಕ್ ತಾಂಗಿ ಅಳಾತಿತ್ ಕೊಡಿಯಲಡಕೆ ತಿಂದಿತ್ ಜನ ಪೋಪ ಇಂಜತ್. ಮಳೆ ಬಂದಾಟಕ ಅತ್ತಕಡಾಚಿಯಳೂ ಅತ್ತಕಾರಮಕ್ಕಳೂ ಓಡಿ ಬಂದಿತ್ ಆ ಮರತಾರಡಿಲ್ ನಿಂದವ ಇಂಜತ್. ಬೋಟೆಕಾರ ಬೊಡಿ ಬೆಚ್ಚ ಜಾತಿನ ಯರ್ಚಿ ಮಾಡಿತ್ ಪಾಲ್‌ಡುವೊ ಈ ಬೈರಿ ಮರತಾರಡಿಲೆ. ಬಿಲ್ಲ ಎಡ್‌ತಂಡ್ ಪಕ್ಷಿ ಬೋಟೆ ಮಾಡುವ ಮಕ್ಕಳ ಈ ಮರತಾರಡಿಲ್ ಕಾಂಗತ ದಿನ ಇಲ್ಲೆ. ಒಟ್ಟಾರೆ ಆ ಮರ ಪ್ರಕೃತಿ ದೇವಿರ ಧರ್ಮ ಭತ್ರ! ಒನ್ನಂದ್ ಮಕ್ಕಡ ಕೂಡೆ ಕಳ್‌ಚಂಡ್ ನೇರ ಬೈಟಾಚಿ. ಆ ಆಚೆಕುಳ್ಳ ತೊಪ್ಪು ಕೆತ್ತಿತ್ ಆಯಿಲೆ. ಅವ್ವ ಬಯ್ಯೊಂದ್ ಪಪ್ಪಣೆಕ್ ಪೋಡಿಯಾಚಿ. ಬೆರಿಯ ಚೆನ್ನ ತೊಪ್ಪುಕೆತ್ತನಂದ್ ಬಾಣೆರ ಬರಿಲುಳ್ಳ ನೇರ ಮರ ಪತ್ತಿತ್ ಕೊಂಬ್ ತರಿಚತ್ ಕೆತ್ತುವ ಸದ್ ಕೇಟಿತ್ ಕೇಡಗ ಮಂದಯ್ಯ ಬಾತ್. ಅದ್ ಕುಟುಂಬತಾರ ಜಮ್ಮ ಜಾಗ. ಆಚೇಂಗಿ ಮಂದಯ್ಯಂಡ ಬೇಲ್‌ಕ್ ಚೆನ್ನಪಕ್ಕ. ಮಂದಯ್ಯ ಪಪ್ಪಣೆನ ಮರತಾಂಜಿ ಉಳಾಪಿತ್ ಅವಂಡ ಅಪ್ಪನ ಅವ್ವನ ಕೂಟಿ ಬಜ್ಜಿತ್ ಕೆಮಿ ನೆರಾಮಿತ್, ದವಡೆಕ್ ದಂಡ್ ಪೊಜ್ಜಿತ್ ಕತ್ತಿನ ಬಲ್‌ಚಂಡ್ ಪೋಯಿರಾತ್. ಪಪ್ಪಣೆಕ್ ತೊಪ್ಪು ಇಲ್ಲೆ ಕತ್ತಿಯೂ ಇಲ್ಲೆ. ಮಂದಯ್ಯ ಕತ್ತಿ ಬಲ್‌ಚ ಪೋನಾನ ಅವ್ವಂಗ್ ಎಣ್ಣೆನಕ ಅವ್ವನೂ ಬಯ್ಯತೆ ಇರ. ಎನ್ನ ಮಾಡಡ್‌ಂದ್ ಮೊರಟಂಡ್ ಮಂದಯ್ಯಂಡ ಬಯ್ಯೆ ಪೋಚಿ. ಮಂದಯ್ಯಂಡ ಮನೆರ ಪಕ್ಕ ಎತ್ತುವದು ಕತ್ತಿನ ಎಡ್‌ತ ಚಾಡಿತ್ ಅದ್ಯ ದಂಡ್ ಪೊಜ್ಜಿತ್ ಬಜ್ಜಂಡ್ ಪೋಚಿ. ಕತ್ತಿ ಪೊರ್‌ಕಿಯಂಡ್ ಬಾತ್.

ಪಪ್ಪುಣಿಕ್ ಬಲ್ಯ ಬಲ್ಯ ಮರ ಪತ್ತುವಕ್ ಕಯಿಂಜಾಲೆ. ಕೊಟ್ಟಾಕುಳ್ಳ ತೊಪ್ಪಾ ಇಲ್ಲತೆ ಮನೆಕ್ ಪೋಪದೂ ಕಷ್ಟ. ದಾಡದೂ ಹಂಗಿಲ್ಲತೆ ಮಿಂಞಾಕ್ ಬಯ್ಯಕ್ ಒಂದೂ ಗೇನ ಮಾಡಾಲೆ. ಪ್ರಕೃತಿರ ಚಾಯಿ, ಪರಿಸರ ನಾಶ, ಪರಿಸರ ರಕ್ಷಣೆ ಇಂತದೆಲ್ಲ ಅರ್ಥ ಆಪ ಬಯತಲ್ಲ ಪಪ್ಪುಣಿರ. ತಾಂಡ ಕೊಟ್ಟಾಕುಳ್ಳ ತೊಪ್ಪಾ ಮಾತ್ರ ಅಂವಂಡ ಗುರಿ. ಮರಪತ್ತಿತ್ ಕೊಂಬನೆಲ್ಲ ಕಯಿಚಿತ್‌ಟ್ಟಿತ್. ತೊಪ್ಪಾರ ಭಾರಕ್ ನನ್ನಾಲ್ ಕೆತ್ತಕೆತ್ತಣೆ ಕೊಂಬ ಅಡಂದಿತ್ ಒಂದಾಂಡ ಮೇಲೆ ಒಂದ್ ಬುದ್ಧಿತ್ ಮರ ಬೋಳಾಚಿ !

ನೆಲಾಚಿ ಬೋಳಿಲ್ ಮೊನಕ್ ಒಳಿಕಳಪಕ್ ಓರ್ ಒಳಿ ಇಡನಾಂದ್ ದಂಡ್ ಪನೆಂಬಾರ್ ನೇತಿಯಂಡ್ ಕುಕ್ಕಜ್ಜ ಬೈರಿ ಮರತಾರಡಿಕ್ ಬಾತ್. ಕೊಂಬ್ ಕಾಲಾನೆಲ್ಲ ಪೊಳಾಚಿ ಎಡ್ತ ಇಂಡ್‌ರ ಮಾದರಿ ಬೋಳಾನ ಮರ ಕಂಡಿತ್ ಕುಕ್ಕಜ್ಜಂಗ್ ದುಃಖ ಬಂದ್‌ರಾತ್. ಕುಕ್ಕಜ್ಜನೂ ಆ ಮರತಾರಡಿಲೇ ಬಾಲ್ಯತ್‌ಲ್ ಕಳಾಚಂವ. ಅದೇ ಮರತಲ್ ಒಳಿಕ್ ಅಳಾತಿತ್ ಎಚ್ಚಕೊ ಮೊನ ಬೊಡಿ ಬೆಚ್ಚಂವ. ಇಂದ್ ಆ ಮರತಾರ ಪಾಪ ಕಂಡಿತ್ ಮೊರೆ ಬಂದ್‌ರಾತ್. ಪಕ್ಕ ಬಂದಿತ್ ನೋಟಣೆ ಪಪ್ಪುಣಿ ತೊಪ್ಪಾ ಚವುರಿಯಂಡುಂಡ್. ಬೋಟಿಲ್ ಬಲ್ಯಕಡಮನ ಬೂಕ್ ನವಂಡೆನ್ನೆಕೆ ಪವುರಲ್ ಪಪ್ಪುಣಿ ಕುಕ್ಕಜ್ಜನ ನೋಟಾಚಿ.

"ಅಪ್ಪಾ ಮೋನೆ, ಬಾ ನಾಡ ಈರಂಡ್ ಕಾಲ್ ಕೈನ ಕೆತ್ತಿರ್"ಂದ್ ಕೈನೋಟಾಚಿ ಕುಕ್ಕಜ್ಜ. ಪಪ್ಪುಣಿಕ್ ಅದೆಲ್ಲ ಅರ್ಥ ಆಪ ಬಯತಲ್ಲ. "ಆ ಮರ ಎಚ್ಚಕ್ ಕಾಲತಂಜಿ ಉಂಡ್, ಅದ್‌ನ ನಟ್ಟ್ ಬೋಳತಿ ಕಾಪಾಡ್‌ನವು ದಾರ್. ಅದ್ ಎಚ್ಚಕೋ ಪ್ರಾಣಿ ಪಕ್ಷಿಯಕೂ ಬಟ್ಟೆಲ್ ನಡಪಯಿಂಗಕೂ ಉಪಕಾರ ಮಾಡಿತ್, ಓರ್ ಮರ ಎಣ್ಣುವದ್ ಓರ್ ದೇವಸ್ಥಾನ. ಅದ್ ಕೆತ್ತಿ ನಾಶ ಮಾಡಿತ್, ಅವ್ವನ ಕೊಂದಂತ ಪಾಪ ಕೆಟ್ಟಿಯಂಡಿಯಲ್ಲಾ"ಂದ್ ಮರತಾರ ಮಹತ್ವತ್‌ನ ಆ ಊರಾರ ಪೆರಿಯ ಕುಕ್ಕಜ್ಜ ಪಪ್ಪುಣಿಕ್ ಎಣ್ಣಿತ್ ಕಣ್ಣೀರ್ ಇಟ್ಟಿತ್. ಪಪ್ಪುಣಿಕ್ ತಾನ್ ಮಾಡ್‌ನ ತಪ್ಪು ಅರಿವಾಚಿ. ಎನ್ನೊಮಾಡುವೊ, ಚತ್ತಂವನ ಬದ್‌ಕಾಚಿರುವಕ್ ಕಯ್ಯುವಾ?

ಪಪ್ಪುಣಿರ ಓರ್ ಬೋಜಪ್ಪಂಗ್ ಮಕ್ಕಳಿಂಜಾಲೆ. ಅವ ಆ ಮರ ನಟ್ಟಿತ್ ಮಕ್ಕಳನ್ನೆಕೆ ಚಾಕಾಚಿ. ಬಯತ್ ಕಾಲಕ್ ಆ ಮರತಾರಡಿಲ್ ಅಳಾತಂಡ್ ಕೊಡಿಯಲಡಿಕೆ ತಿಂದಂಡ್ ಮಜ್ಜಣ ನೇರತಲ್ ಮರತಾರಡಿಲ್ ಬುದ್ಧಂಡ್ ವರುವಯಿಂಜತಲೊ. ಒನ್ನಾಂದ್ ಮಜ್ಜಣ ನೇರತಲ್ ಮರತಾರಡಿಲ್ ಬುದ್ಧಂಡಿಂಜ ಮೋಲಿ ಅಲ್ಲಿಯೇ ಚತ್ತಪೋನಾನ ಮನೆಕಾರ ಊರಕಾರ ದಫನ ಮಾಡ್‌ಚಿಲೊ.

ಮರತಾರ ಕೊಂಬ್ ತರ್‌ಚಾನ ಕಂಡಿತ್ ಎಲ್ಲಾರು ಪಪ್ಪಣಿನ ಬಜ್ಜತ್. ಬಟ್ಟೆಲ್ ಪೋಪಯಿಂಗ ಎಲ್ಲ "ಇದ್ ದಾರಪ್ಪ ಇಂತ ಕೆಲಸ ಮಾಡ್‌ನಂವೊಂ"ದ್ ಶಾಪ ಇಟ್ಟಂಡ್ ಪೋಪಯಿಂಜತ್. ಇದ್‌ನೆಲ್ಲ ಕೇಟಿತ್ ಪಪ್ಪಣಿರ ಮನಸ್ಸಕ್ ನೊಂಬಲಾಚಿ. ನಾಡ ಬೋಜಪ್ಪನನ್ನೆಕೆ ನಾನೂ ಓರ್ ಮರ ನಟ್ಟಿತ್ ಬೊಳ್‌ತುವೀಂದ್ ಗೇನ ಮಾಡಿಯಂಡತ್. ಪುದ್‌ಮಳೆ ಪುಡಿಪಕ ಓರ್ ಬೈರಿ ಕೊಂಬ್ ಕೊಂಡ ಬಂದಿತ್ ತಾನ್ ಕೆತ್ತನ ಮರತಾರ ಪಕ್ಕಲೇ ನಟ್ಟಿತ್ ಸುತ್ತ ಮುಳ್ಳು ಪೊಜ್ಜತ್. ಮಳೆಗಾಲತ್ ನಟ್ಟಿಕೊಂಬ್ ಚಾಯಿಲ್ ತೆಯ್‌ತಂಡ್ ಬಾತ್. ಬೇನಿಲ್ ಆಚೆ ಕೊಮ್ಮ, ಇಮ್ಮ ನೀರ್ ಬೂಕಿ ಕಾಪಾಡ್‌ಚಿ. ಅತ್ತತಿಂಗ ತನ್ನೆಕೆ ಮುಳ್ಳುರ ಕುಕ್ಕೆ ಬೇಲಿ ಕೆಟ್ಟ್‌ಚಿ.

ಪಪ್ಪಣಿರ ಅಣ್ಣ ಬೊಳ್ಳು ದುಂಬಾ ಚೆಡಿಕಾರ. ಬೊಳ್ಳುಕ್ ಪದ್‌ನಾರ್ ಬಯತಾಪಕಲೇ ಅವ್ವಂಡ ಅಧಿಕಾರ ಎಲ್ಲ ಬಲ್‌ಚಂಡತ್. ತಾನೇ ಭೂಮಿ ನಡ್‌ಪಕ್ ಸುರು ಮಾಡ್‌ಚಿ. ಸಂಸಾರತಾರ ಮೀದ ಕನಿಕರ ಉಂಡ್. ಆಚೇಂಗಿ ಬಾಯಿ ಪೆರ್ತ್ ಪಾಳ್, ದುಷ್ಟಕಳಿ. ಪಪ್ಪಣಿ ನಿಂದಕಲೂ ತಪ್ಪೆ. ಅಳತಕಲೂ ತಪ್ಪೆ. ಪಪ್ಪಣಿರ ಕೂಡೆ ನಾಯಿಕಂಡ ಮಾಪಳೆನನ್ನೆಕೆ ಕಳಿಪಯಿಂಜತ್. ಪೊರ್‌ಮೆ ಪೋನಲ್ಲಿ ಮನೆಕಾರ ಕೇಡ್‌ಗ ಮಂದಯ್ಯಂಡ ಪೋಡಿ. ಮನೆರೊಳ್‌ಲ್ ತಾಂಡ ಸ್ವಂತ ಅಣ್ಣಂಡ ಪೋಡಿ. ಅವ್ವ ಗಂಗವ್ವಂಗ್ ಏದೂ ಅಧಿಕಾರ ಇಲ್ಲತೆ ರೆಕ್ಕೆ ಪೊಳ್‌ಂಜ ಪಕ್ಷಿ. ಪಪ್ಪಣಿರ ಕಷ್ಟತಾನ ಎಣ್ಣಿಯವಕ್ ನೆರೆಮನೆಕಾರ ತಮ್ಮಣಿ ಒಬ್ಬ ಮಾತ್ರ ಇಂಜತ್.

ನೆರೆಮನೆ ತಮ್ಮಣಿಯೂ ಪಪ್ಪಣಿಯೂ ನಾಲ್ಕನೆ ಕ್ಲಾಸ್ ಪಾಸಾಚಿ. ಅಂಜನೆ ಕ್ಲಾಸ್ ಓದುವಕ್ ಸ್ಕೂಲ್ ಇಲ್ಲೆ. ದೂರತ ಸ್ಕೂಲ್‌ಕ್ ಅಯಿಚಿತ್ ಓದ್‌ಚಿಡುವವು ದಾರ್? ಆ ಕಾಲತ್‌ಲ್ ನಾಲನೆ ಕ್ಲಾಸ್ ಬಲ್ಯ ಎಳ್‌ತ್. ಮಿಂಞಕ್ ಓದನಾಂದ್ ಮನಸ್ಸುಂಡ್. ಆಚೇಂಗಿ ದಾಡ ಕೂಡೆ ಎಣ್ಣುವೊ. ಪೊಲ್‌ಂದಿತ್ ಬೈಟಾಕಣೆ ಅಣ್ಣ ಬೊಳ್ಳುರ ಕೂಡೆ ನಯಿಪಯಿಂಜತ್ ಆಂಡ ಎಡೆಲ್ ತಾನ್ ನಟ್ಟಿ ಮರತಾರ ಆರೈಕೆ.

ಅಕ್ಕ ದಂಡನೆ ಮಾಪಡೆ (ಮಹಾಯುದ್ಧ) ಶುರುವಾಚಿ. ಬಾಲೆಕಾರಳೊ, ಎಡೆ ಬಯತ್‌ಕಾರಳೊ ತೇಡಿ ತೇಡಿ ಪಟ್ಟಾಳಕ್ ಕೂಟುವ ಇಂಜತ್. ಪಾರತ್ಯಾರ ಸುಭೆದಾರಳೆಲ್ಲ ಊರೂರ್ ಸುತ್ತಿತ್ ಜನಳ ಪಡೆಕ್ ರಿಕ್ರೂಟ್ ಮಾಡಿತ್, ಅಯೆಚಿತ್ ಸರದಾರ್, ಬಹುದ್ದೂರ್, ರಾವ್ ಬಹುದ್ದೂರ್, ದಿವಾನ್ ಬಹುದ್ದೂರ್‌ಂದೆಲ್ಲ ಬಿರ್‌ದ್ ಎಡೆತ ಕಾಲ ಅದ್. ಪೋನಲ್ಲಿ ಬಂದಲ್ಲಿ ಎಲ್ಲ ಯುದ್ಧತಾರದೇ ಸುದ್ದಿ. ಊರ್ ನಾಡ್‌ರ ಬಾಳೆಕಾರಳೆಲ್ಲ ಮಿಲಿಟ್ರಿಕ್ ಪೋಚಿ. ಸ್ವಂತ ಇಚ್ಚೆಲ್ ಪೋನವು ದಾರೂ ಇಂಚ್‌ಲೆ.



ಜಾವಕ್ ತಾನಾಯಿತ್ ಪೋಪಕ್ ಜನಕೆನ್ನ ಪಿರಾಂದಾ? ತಾಂಡ ದೇಶ ರಕ್ಷಣೆಕ್ ದೇಶ ಭಕ್ತಂಗ ಪೋಪದುಂಡ್. ಆಚೇಂಗಿ ಬೊಳ್ಳ ದೊರೆಯಕ್ ಸಹಾಯ ಮಾಡುವಕಾಯಿತ್ ಪ್ರಾಣ ಕೊಡ್ಪಕ್ ಸ್ವಂತ ಇಚ್ಛೆಲ್ ದಾರ್ ಪೋಕು?

ನಲ್ಲ ನಾಟಿಪಣೆಕ್ ಇಳಿಯುವ ನೇರ ಬಾತ್. ಅಣ್ಣಂಡ ಹಿಂಸೆ, ಗರೀಬತನ ಇದ್ನೆಲ್ಲ ತಡ್ಪಕಯ್ಯತೆ ಮಿಲಿಟ್ರಿಕ್ ಕೂಡುವೀಂದ್ ಪಪ್ಪುಣಿ ಗೇನ ಮಾಡ್ಚಿ. ತಾಂಡ ಆಸೆನ, ಸಿನೇತ ತಮ್ಮಣಿಕ್ ಗುಟ್ವಲ್ ಎಣ್ಣೆಚಿ. ತಮ್ಮಣಿ ಅರೆ ಬಟ್ಟೆ ನೆಲ್ಲ್ನ ಮಾಪಳೆಕ್ ಮಾರಿತ್ ನಾಲ್ ಉರ್ಪಿಯ ಮಾಡಿತ್ ಪಪ್ಪುಣಿಕ್ ಕೊಡ್ತತ್. ಪಪ್ಪುಣಿರ ಕೈಲ್ ಕಾಸಿಲ್ಲೆ. ಮನೆಂಜ ಅಕ್ಕಿಯೋ ನೆಲ್ಲೋ ಮಾರನ ಎಣ್ಣೆಚೇಂಗಿ ಕೆಲದುಂಬ ಉಂಬಕೇ ಗತಿಯಿಲ್ಲೆ. ಬೋರೆಯಯಿಂಡ ಮನೆ ನುಗ್ಗಿ ಕಪ್ಪಕ್ ಧೈರ್ಯವೂ ಇಲ್ಲೆ, ಮನಸ್ಸೂ ಕೇಪುಲೆ.

ಆಚೆಕೊಮ್ಮೆ ಮಡಿಕೇರಿಲ್ ಮಿಲಿಟರಿಕ್ ಫಿಟ್‌ನೋಟುವ ಎಣ್ಣುವ ಸಂಗತಿ ಗೊತ್ತಿಂಜತ್. ಅದ್ ಏದ್ ದಿನಾಂದ್ ಜನಳ ಆರ್ಂಜಿ ನೋಡುವಕ ತಿಂಗಳಾಚೇಂದ್ ಗೊತ್ತಾಚಿ. ತಿಂಗಳಾಚೆ ಬೇಲ್ ಉಪ್ಪದಿಲ್ಲೆ. ಅಣ್ಣಯ್ಯ ಬೊಳ್ಳು ಪೊಲಾಕ ಏವದೂ ತಡು ಆಪ. ಮನೆಂಜಿ ಓಡುವಕ್ ಅದೇ ಸೆರಿಯಾನ ದಿನಾಂದ್ ಮನಸ್ಸೆರೊಳ್‌ಲೇ ತೀರ್ಮಾನ ಮಾಡ್ಚಿ. ಬೈಟ್ ಅತ್ತಳಾಟಿಯ ಬಪ್ಪಕ್ ಪೋನಂವೊ ತಮ್ಮಣಿಕ್ ತಾಂಡ ಪ್ಲಾನ್‌ನ ಎಣ್ಣೆಚಿ.

"ತಮ್ಮಣಿ ನಾಳೆ ತಿಂಗಳಾಚೆ. ಮನೆಕಾರ ಏವದೆಲ್ಲ ಚೆನ್ನ ತಡುವಾಪ. ಉಕ್ಕಲ್ ಇಲ್ಲತಾನಗುಂಡ್ ನಾಡ ಮೇಲೆ ಮನೆಲ್ ದಾಕೂ ಗೇನ ಇಪ್ಪುಲೆ. ಇರಲೇ ಎದ್ದಿತ್ ಮಡಿಕೇರಿಕ್ ನಡ್ಂದಿತ್ ಎತ್ತಿರುವಿ"ಂದ್ ಎಣ್ಣೆಚಿ.

"ಅನ್ನನೆ ಆನಕ ನಾನೂ ಮಡಿಕೇರಿಕ್ ಬಪ್ಪಿ. ನೀನ್ ಮಿಲಿಟ್ರಿಕ್ ಫಿಟ್ ಆನಕ ನಿನ್ನ ಅಯೆಚಿತ್, ನಾನ್ ಬಯ್ಯಕ್ ಬಪ್ಪಿ"ಂದ್ ತಮ್ಮಣಿ ಎಣ್ಣೆಚಿ. ನಾಯಿಕೂ ಪೂಜಾಕೂ ಅರಿಯತನ್ನಕೆ ಪೊರ್ಡುವಕುಳ್ಳ ಏರ್ಪಾಡಾಚಿ.

ಬೈಟ್ ಬುದ್ಧಂಡ ಪಪ್ಪುಣಿ ಇರಲೂಡಿ ಪ್ಲಾನ್ ಮಾಡಿಯಂಡೇ ಕಯಿಚತ್. ತಮ್ಮಣಿ ಕೊಡ್ತ ನಾಲ್ ಉರ್ಪಿಯ ಮಾತ್ರ ಕೈಲುಳ್ಳೊ. ಮನೆಲ್ ಕೂವಕ್‌ಂದ್ ಬುಟ್ಟಂಡ ಮಲ್ಲಂಗೋಳಿರ ಗೇನ ಬಾತ್. ಮಡಿಕೇರಿಕ್ ಕೊಂಡ ಪೋನಕ ಕಣ್ಣೆಲ್ಲ ತವನೂ ಓರ್ ಉರ್ಪಿಯ ತರತಿರಾಂದ್ ಗೇನ ಮಾಡಿಯಂಡ್ ಇರಲೂಡಿ ಕಣ್ಣೆ ಮುಚ್ಚಿಲ್ಲೆ.

ಗಂಗವ್ವಂಡ ಮಲ್ಲ ರೆಕ್ಕೆ ತಟ್ಟಿತ್ ಸುರೂಲ್ ಕೂವಕ ನಾಲ್ಗಂಟೆ. ಇಂದೇತ ಎಲೆಕ್ಟಾನಿಕ್ ವಾಚಿ ಆನಕಲೂ ಓರ್ ಸೆಕೆಂಡ್ ಮಿಂಞ ಬಯ್ಯ ಆಯಿ ಪೋಕು. ಆಚೇಂಗಿ ಆ ಮಲ್ಲ ಮಾತ್ರ ಮಳೆಲಾಡ್, ಬೇನಿಲಾಡ್ ಒರೇ ತರತಾರ ಡಿಸಿಪ್ಲೀನ್‌ಕಾರ. ಅವಂಡ ಕೂತ್‌ಕ್ ಎದ್ದಿತ್ ಮನೆಪಣಿ ಎಲ್ಲಾ ತೀತಿತ್ ಒಟ್ಟಿ ಕಲ್‌ಂದಿತ್ ಆಪಕ ಮೆಲ್ಲೆ ಬೊಳಿಪಾಯು. ಅಲ್ಲಂಜಿ ಗಂಗವ್ವಂಡ ಪೂರ್‌ಮೆ ಕೊಟ್ಟಾಪಟ್ಟಿರ ಪಣಿ.

ತಿಂಗಳಾಚೆ ಪೊಲಾಕ ಕಾಡಿಕೆರೊಳಿಯ ಸೂರ್ಯಂಡ ಬೊಳಿಕಾಂಬಕ ಗಂಗವ್ವ ಬೆರಗಾಯಿ ಪೋಚಿ. ಒನ್ನಂದೂ ಆ ನೇರಕ್ ಎದ್ದವ ಅಲ್ಲ. " ಈ ಮಲ್ಲಂಗಿನ್ನ ರೋಗ ಬಂದ್ ಪೋಯೆ. ಇಂದ್ ಕೂಂದದೇ ಇಲ್ಲೆಲ್ಲಾ!? ಈನ ಕುರ್‌ಕ ಪುಡ್‌ಚಿ ಪೋಡ್"ಂದ್ ಶಾಪ ಇಟ್ಟಂಡ್ ಗೊಣ್‌ಂಗಿಯಂಡ್ ಎದ್ದತ್. ಪುಳ್ಳಿ ಬಾತಿಯಬಪ್ಪಕ್ ಪುಳ್ಳಿಕೊಟ್ಟಾಕ್ ಪೋಚಿ. ಪುಳ್ಳಿ ಕೀಲ್‌ಲ್ ಮಲ್ಲಂಗೋಳಿನ ಕಾಂಬುಲೆ. ಪೆರ್ಪಣ ಪುಡ್‌ಚ್‌ರ್‌ತಾಂದ್ ಗಾಬರಿಲ್ ಎಲ್ಲಿ ತೇಡ್‌ನಕಲೂ ಮಲ್ಲನಿಲ್ಲೆ. ಕುಳಿಯಂಗ್ ಅರ್‌ಪಕ್‌ಂದ್ ಬುಟ್ಟದಲ್ಲಾ. ಅದ್‌ನ ಪೆರ್ಪಣ್ಣ ಪುಡಿಪಕಿಲ್ಲೆಂದ್ ಧೈರ್ಯ ಎಡ್‌ತಂಡ್ ತಾಂಡ ಮನೆ ಪಣಿಲೇ ಆಯಿರ್‌ತ್. ಎಟ್‌ಗಂಟೆ ಆಕಣೆಕೂ ಪಪ್ಪುಣಿನ್ ಕಾಂಗತೆ ಇಪ್ಪಕ ತೊಪ್ಪಾ ಕೆತ್ತುವಕ್ ಪೋಯಿತ್ ಇಕ್ಕೂಂದ್ ಅವಂಡ ಒಟ್ಟಿನ ಉದಿಲ್ ಬೆಚ್ಚಿರೊಂಜಿ ಗಂಗವ್ವ ತಾಂಡ ಪಣಿಲೇ ಮುಳಿಪೋಚಿ.

ಮಡಿಕೇರಿರ ಜನ ಶಿವ ಶಿವಾಂದ್ ಪಡಿತೊರ್‌ಕಣೆ ಪಪ್ಪುಣಿ ಪನ್ನೆರಂಡ್ ಮೈಲ್ ನಡಂದಿತ್ ಎತ್ತಿತಿಂಜತ್. ಆಲೆ ಈಲೆ ಗಿರಾಕಿ ತೇಡಿತ್.. ಓರ್ ಸಾಬಿಕ್ ಒಂದೇ ಕಾಲ್ ಉರ್‌ಪಿಯಕ್ ಮಲ್ಲನ ಮಾರಿತ್ ಮಡಿಕೇರಿ ಬಸ್ ಸ್ಟಾಂಡ್‌ರ ಉದ್ದಬೆಂಚಿಲ್ ಅಳತಂಡತ್. ಕೈಲ್ ಒಟ್ಟು ಉಳ್ಳ ಪಣ ಅಂಜೇ ಕಾಲ್ ಉರ್‌ಪಿಯ. ಅದ್‌ನ ವಿರ್ಚ್ ಮಾಡಿಟಕ ಆಪಾಲೆ. ಕೆಲಕ್ಕೊಂದೂ ಇಲ್ಲೆ. ಮನೆಕ್ ಬಯ್ಯಕೇ ಪೋಕಾಂದೆಣ್ಣನಕ ಕೋಳಿ ಕಟ್ಟಿ ಬಂದಿತ್ ಏದ್ ಮೂಡ್ ಎಡ್‌ತಂಡ್ ಪೋಪ?

ಪತ್ತಗಂಟೆ ಆಪಕ ತಮ್ಮಣಿ ಬಂದಿತ್ ಎತ್ತಚಿ. ತಮ್ಮಣಿ ಮೂಂದ್ ಒಟ್ಟಿ ಓರ್‌ಕಟ್ಟಿ ಬೆಲ್ಲ, ಓರ್ ತೆಂಗೆಪೊಳಿ ತುರ್‌ಟಿಯಂಡ್ ಬಂದಿತಿಂಜತ್. ಒಟ್ಟಿ ಕೆಲಕ್ ಬೂವದು ಸ್ಪಿಂಕಲ್ ಮಾಡಿತಾನದು ಕಾಫಿ ಪೂ ಬೀಂದನ್ನಕೆ ಆಚಿ ಪಪ್ಪುಣಿರ ಮೂಡ್. ಆಚೇಂಗಿ ಬ್ಯಾಕಿಂಗ್‌ಕ್ ಎನ್ನ ಮಾಡಡ್‌ಂದ್ ಪೋಡಿಯೂ ಇಂಜತ್. ಮಲ್ಲಂಗೋಳಿರ ಕತೆನ ತಮ್ಮಣಿಕ್ ಎಣ್ಣೆ ಕೊಡ್‌ತತ್. ಬರತ ತೆಳಿನ ಬಪ್ಪಾಚಿಟ್ಟಂಡ್ ದಂಡಾಳೂ ತೆಳಾಚತ್.

ಇಕ್ಕತ ಪೊಣ್ಣಾಳ್ ಮಕ್ಕಡ ಆಸ್ತುತ್ರೆ ಉಳ್ಳಲ್ಲಿ ಪಂಡ್ ಐ.ಬಿ. ಇಂಜತ್. ಅಲ್ಲಿ ಮಿಲಿಟ್ರಿಕ್ ಎಡ್‌ಪಾಂದ್ ಅರಾಂಜಿತ್ ಅಲ್ಲಿಕ್ ಪೋಚಿ. ತಮ್ಮಣಿ ಮಾತ್ರ ಪಕ್ಕ ಪೋಯಿಲೆ. ಮಜ್ಜಣಾಪಕ ಪಪ್ಪುಣಿ ತೆಳ್‌ಚಂಡ್ ಬಾತ್. ಅಂವಂಡ ಮೂಡ್ ನೋಟುವಕಲೇ ತಮ್ಮಣಿಕ್ ರಿಸಲ್ವ್ ಗೊತ್ತಾಚಿ. ಫಸ್ತ್ ಎಟೆಮ್‌ಲ್ ಲಂಚ ಇಲ್ಲತೆ ಮೆರಿಟ್‌ಲ್ ಐ.ಎ.ಎಸ್., ಪಾಸಾನಂವಂಗಡ ಗತ್‌ಲೇ ಬಾತ್ ಪಪ್ಪುಣಿ. "ತಮ್ಮಣಿ, ಫಿಟ್ ಎಡ್‌ತ ದೊರೆ ಖರ್ಚಿಕ್ ಓರ್ ಉರ್‌ಪಿಯ ತಂದಿತ್. ನಾಳೆ ಪೊಲಾಕ ಏಳ್ ಗಂಟೆಕ್ ಬಸ್ಸ್ ಸ್ಟ್ಯಾಂಡ್‌ಲ್ ಇಪ್ಪಕ್ ಎಣ್ಣಿತ್. ನಾನ್ ಬಸ್ ಪತ್ತಣೆ ನೀನ್ ನಾಡ ಕೂಡೆ ಇರಂಡು"ಂದ್ ಕೈನ ಪುಡ್‌ಚಂಡತ್. ದಂಡಾಳೂ ಮಡಿಕೇರಿ ಕೋಟೆ, ರಾಜಾ ಸೀಟ್ ಎಲ್ಲಾ ಸುತ್ತಿತ್ ಬೈಟ್ ಓಂಕಾರೇಶ್ವರ ದೇವಸ್ಥಾನಕ್ ಬಾತ್.

ಪಪ್ಪುಣಿಕ್ ಮನೆ ಬುಟ್ಟ್ ಪೋಪದೊಂದೂ ಬೇಜಾರ ಇಲ್ಲೆ. ತಾನ್ ನಟ್ಟ್ ಬೊಳತನ ಬೈರಿ ಮರತರ ಗತಿ ಎನ್ನಾಕುಂದೇ ಬೇಜಾರ "ಪಪ್ಪುಣಿ, ನೀನ್ ಪಡೆಕ್ ಪೋನ ಪಿಂಞ ನಾಡ ಕೂಟ್‌ಕಾರ ನೀನಟ್ಟ ಆ ಬೈರಿ ಮರ, ಅದ್ ನೀಡ ಜಮ್ಮ ಬಾಣೆಲ್ ಉಳ್ಳದಾಚೇಂಗಿಯೂ ನಾನ್ ಎಕ್ಕೊಲು ನೋಟಿಯಂಡ್ ನೀನ್ ವಾಪಾಸ್ ಬರಣೆಕ್ ಕಾಪಾಡುವಿ. ಇದ್‌ಂಗ್ ಈ ಓಂಕಾರೇಶ್ವರನೇ ಸಾಕ್ಷಿ"ಂದ್ ತಮ್ಮಣಿ ತಕ್ಕ ಕೊಡ್‌ತತ್.

ಬೈಟ್ ಜನಡ ಸದ್ ಅಡ್‌ಂಗಣೆ ಆಲೇ ಈಲೆ ಸುತ್ತಿತ್ ಬಂದಿತ್ ಬಸ್‌ಸ್ಟ್ಯಾಂಡ್‌ರ ಮರತರ ಬೆಂಚಿಲ್ ಬುದ್ದಂಡತ್. "ಪೊಲಾಕ, ಏಳ್ ಗಂಟೆಕ್, ಫಿಟ್ಟಾನ ಬಾಲೆಕಾರೆಲ್ಲ ಬಸ್‌ಸ್ಟ್ಯಾಂಡ್‌ಕ್ ಬಂದಿತ್ ಕೂಡ್‌ಚಿ. ಓರ್ ದೊರೆಯೂ, ಓರ್ ಇಂಡಿಯನ್ ಅಧಿಕಾರಿಯೂ ಮಕ್ಕಕ್ ನಲ್ಲದ್ ಬಯಂದಿತ್ ಬಸ್ ಪತ್ತೆಚಿಟ್ಟಿತ್. ಪಪ್ಪುಣಿ ತಮ್ಮಣಿನ ತಬ್ಬಿಯಂಡ್ "ಅವ್ವಂಗ್ ಎಣ್ಣಿರಾತೆ. ಕೋಳಿನ ಕಟ್ಟಬಂದಾಂಗ್ ಶಾಪ ಇಡು. ಮರತನ ಚಾಯಿಲ್ ನೋಟಿಯ. ಬದಾಕಿತ್ ಬಂದಕ ಅದ್‌ಂಗೋರ್ ಕಟ್ಟೆ ಕೆಟ್ಟ್‌ಚಿರುವಿ"ಂದ್ ಎಣ್ಣಣೆ ಬಸ್ ಸ್ಟಾರ್ಟ್ ಆಚಿ. ಪೋಸ್ಪಾಫೀಸ್‌ಕೆತ್ತಣೆ ನೀರೊಕ್ಕುವ ಕಣ್ಣನ ಚಿಮ್ಮತೆ ನೋಟಾಚಿ. ತಮ್ಮಣಿರ ಕಣ್ಣಲೂ ನೀರ್ ಒಕ್ಕಿಚಿ.

ಮನೆಲ್ ಕಾಂಗತಾನ ಕೋಳಿನ ತೇಡಣೆ ಪಪ್ಪುಣಿ ಕಾಂಗತಾನ ಸುದ್ದಿ ಪಬ್‌ಚಿ. ಪಪ್ಪುಣಿರ ತೇಡಲ್‌ಲ್ ಕೋಳಿನ ಮರಂದತ್. ಅವ್ವ, ಕಾಂಗತ ಮೋಂವನ ಮೊರಾಟಂಡ್ ತೇಡಣೆ, ಬೊಳ್ಳು ಅವ್ವಂಡ ಮೇಲೆ ರೇಗಿಯಂಡ್ "ನೀಡ ಸಸಾರತ್ ಕಣ್ಣ ಇಚ್ಚಿಕ್ ಚೊಕ್ಕಿಯು. ನಾಳೆಂಜಿ ಈರೇಕ್ ಎತ್‌ಕೆಟ್ಟಂಡುಲ ನೀಡ ಚತ್ತವಡಿಯಂಡ ಕೈಕ್ ನೇಂಗಿ ಪುಡ್‌ಪಾಚಿರಡಾ"ಂದ್ ಬಾಯಿಕ್ ಬಂದಾನೆಲ್ಲ ಪರಂದತ್. ಗಂವ್ವಂಡ

ಮೇಲ್ ಉರಿಯುವ ಗಾಯಕ್ ಉಪ್ಪಟ್ಟನ್ನೆ ಆಚಿ. ಮೊರ್‌ಟಂಡೇ ದಿನ ಕಯಿಪಕಾಚಿ. ಪಪ್ಪಣಿ ಪಡೆಕ್ ಪೋನ ಸಂಗತಿ ಗುಟ್ಟಾಯಿತೊಂದು ನಿಂದಾಲೆ.

ಪಪ್ಪಣಿರ ಬಸ್ ಓಡಿ ಓಡಿ ಮೈಸೂರ್‌ಕೆತ್ತಾಚಿ. ಅಲ್ಲಿ ಬಾಲೆಕಾರಕೆಲ್ಲ ಚೆನ್ನ ಕೆಲಕ್ ಕೊಡ್‌ತಿತ್ ರೈಲ್ ಪತ್‌ಚಿಟ್ಟತ್. ಇರಲೂ ಪೋಲು ಓಡ್‌ನ ರೈಲ್ ಮೆಡ್ರಾಸ್ ಕೆತ್ತಾಚಿ. ಎತ್ತನಂದಾಂಚೆ ತರಬೇತ್ ಸುರುವಾಚಿ. ಕಾಂಜ ಓಡ್‌ಂಜಿ ಎಡ್‌ತಿತ್ ಕತ್ತುವ ತಿತ್ತ್‌ಕ್ ಇಟ್ಟನ್ನೆ ಆಚಿ ಪಪ್ಪಣಿರ ಬಾಳ್.

ಪಪ್ಪಣಿನ ಕಾಂಗತಾಪದು ಮನೆಕಾರ ಕೇಡ್‌ಗ ಮಂದಯ್ಯನೂ ಅವಂಡ ಮೋಂವ ಬಿದ್ದಯ್ಯನೂ ಬೊಳ್ಳುಕ್ ತೊಂದರೆ ಕೊಡ್‌ಪದ್ ದಿನ ದಿನಕೂ ಜಾಸ್ತಿ ಆಚಿ. ಅದ್‌ನೆಲ್ಲ ಕಾಂಬಕ ಬೊಳ್ಳುಕ್ ತಮ್ಮಣ ಇಂಜಿತುಂಡೆಂಗಿ ನಾಕ್ ಬಲ ಇಂಜತಲ್ಲ್ಯಾಂದ್ ತೊಂದುವ ಕಾಚಿ. ತಾಂಡ ದುಷ್ಟಗುಣಕ್ ಬೇಜಾರಪಟ್ಟಂಡ್ ತಮ್ಮಣ ಓಡಿ ಪೋಚಿಂದ್ ಅರ್‌ಂಜಂಡ್ ಪೆರ್ತ್ ನೊಂದಂಡತ್. ಆರ್ ತಿಂಗ ಬೇಸಿಕ್ ಟ್ರೈನಿಂಗ್ ತೇಂದದು ಕೊಡ್‌ಗಾರ ಬಾಲೆಕಾರಳ ಇಂಡಿಯತ್‌ಂಜಿ ಪೊರಮೆ ಪಡೆಕ್ ಅಯಚತ್. ತಾಂಡ ದೇಶ ಬುಡುವಾಂಗ್ ಮಿಞ ಪಪ್ಪಣಿ ತಾಂಡ ಸಿನೇತ ತಮ್ಮಣಿಕೂ ಅವ್ವಂಗೂ ಓರಂದ್ ಕಾಗದ ಎಳೆದ್‌ಚಿ -

"ನಾಡ ಪ್ರೀತಿರ ತಮ್ಮಣಿ,

ಇಂದ್ ನಂಗ ಇಂಡಿಯಾ ಬುಟ್ಟಿತ್ ಪೋಪ. ಏದ್ ದೇಶಕ್‌ಂದ್ ಗೊತ್ತಿಲ್ಲೆ. ಪಡೆ ಪೊಪ್ಪಕ್ ಪೋನವು ದಾರೂ ಬಯ್ಯಕ್ ಬಂದಿತಿಲ್ಲೆಲೊ. ನಾನ್ ಬಯ್ಯಕ್ ಬಪ್ಪಿಂದ್ ಪೋಯಂಡಿಲ್ಲೆ. ಬಾತೇಂಗಿ ಕಾಂಗ. ಬಾಣೆಲ್ ಬೊಳ್‌ಂದಂಡುಳ್ಳ ಬೈರಿ ಮರತ್‌ನ ಜಾಯಿಲ್ ಚಾಕ್. ನಾನ್ ಬಂದಕ ಕಟ್ಟೆ ಕೆಟ್ಟಾಚಿರುವಿ. ನಾಡ ಅವ್ವನ ಮಾಘ್ ಮಾಡುವಕ್ ಎಣ್ಣೆ. ಬದ್‌ಕಿ ಬಂದಕ ತಕ್ ಪರೆಯನ."

ನೀಡ - ಪಪ್ಪಣಿ

ಇದಾಯಿತ್ ಆರ್ ಕಾಲಕೆತ್ತಣೆ ಪಡೆಕ್ ಪೋನಯಿಂಡ ಸುದ್ದಿ ಬಂದಾಲೆ. ಸುರೂಸುರುಲ್ ಜರ್ಮನಿ ಸೈನ್ಯಗದ್ದಂಡ್ ಬಂದನ್ನೆ ಕಂಪನಿ ಸೈನ್ಯ (ಬ್ರಿಟಿಷ್) ಕಾರ ಎಲ್ಲ ಚತ್ತ್ ಪೋಚಿಂದ್ ಪಳಮೆ ಪುಟ್‌ಚಿ. ಎಚ್ಚೆಕೊ ಮಿಲಿಟ್ರಿಕಾರಡ ಮಾದ ಕಯಿಚತ್. ವಡಿಯ ಬದ್‌ಕಿತುಳ್ಳವು ಬೊಳ್‌ಪ್ ಪೊಡಿಯ ಉಡ್‌ತತ್. ಕೂಡೋಳಿ ಮಂಗಲಾನ

ಪೊಣ್ಣಾಳೂ ಉಂಡ್. ಮಡಿಕೇರಿ ಚತ್ತೆಕ್ ಪೋನಯಿಂಗಕ್ ಎದೇದ್ ಪೊಟ್ತ್ ಸಮಾಚಾರ ಕ್ಕಟ್ಟುವೊ ಅದೆಲ್ಲ ಒಂದಾಂಗ್ ನೂರ್ ಕಲಿಕೂಟಿತ್ ನಾಡ್ಲೆಲ್ಲ ಪಬ್ಬುವಯಿಂಜತ್.

ಪಪ್ಪುಣಿ ಈಜಿಪ್ಪ್, ಮಸಪೊಟಾಮಿಯ (ಇರಾನ್) ಯುದ್ಧತೆಲ್ಲ ಬದ್‌ಕ್‌ಚಿ. ಬರ್ಮಾ ಯುದ್ಧತೆಲ್ ಜಪಾನ್ ಸೈನ್ಯಕ್ ಸೆರೆ ಕ್ಕಟ್ಟಿ ಪೋಚಿ. ಸುಭಾಶ್ಚಂದ್ರ ಬೋಸರ ಐ.ಎನ್.ಎ.ಕ್. ಕೂಡ್‌ಚಿ. ಆಟಂಬಾಂಬ್ ಬುದ್ಧಿತ್ ಜಪಾನ್ ನಾಶ ಆಚಿ. ಸುಭಾಶ್ಚಂದ್ರ ಬೋಸ ಚತ್ತೊ ಪೋಚಿ. ಐ.ಎನ್.ಎ. ದಿಕ್ಕಿಲ್ಲತಾಚಿ. ಬ್ರಿಟೀಷ್ ಸೈನ್ಯತರ ಕೈಕ್ ಕ್ಕಟ್ಟಿತ್, ಒಳಚಿತ್, ಬರ್ಮಾತ್‌ಂಜಿ ಭಾರತಕ್ ಎತ್ತಿತ್ ಕಲ್ಕತ್ತೆಲ್ ವೇಷ ಮರಾತಂಡ್ ಬಂದರ್‌ಲ್ ಪಣಿಕೆಜ್ಜಂಡ್ ಬದ್‌ಕ್‌ಚಿ. ಮನೆಕ್ ಕಾಗದ ಎಳೆದಿಟಕ ದಾಕೇಂಗಿ ಕ್ಕಟ್ಟಿತ್ ಜೈಲ್‌ಕ್ ಇಡುಂದ್ ಅನ್ನನೇ ದಿನ ಕಯಿಚತ್. ದೇಶಕ್ ಸ್ವಾತಂತ್ರ್ಯ ಕ್ಕಟ್ಟನ ಕಾಲ, ತಾಂಡ ಕೂಡ ಐ.ಎನ್.ಎ.ಲ್ ಇಂಜ ಭಟ್ಟಾಚಾರ್ಯಂಡ ತಂಗೆ ವಾಸಂತಿ ದೇವಿನ ಮಂಗಲಾಯಿತ್ ಪಪ್ಪುಣಿ ಕಲ್ಕತ್ತೆಲ್ ಕೂಡ್‌ಚಿ.

ಒನ್ನಾಂದ್ ತಮ್ಮಣಿಕ್ ಓರ್ ಕಾಗದ ಬಾತ್. ಪಪ್ಪುಣಿ ಪಡೆಲ್ ಚಾವತೆ ಬದ್‌ಕಿತ್‌ಂದ್ ಗೊತ್ತಾಚಿ. ತಾಂಡ ಅವ್ವ, ಅಣ್ಣ ಅಕ್ಕಂಗ, ಊರ್‌ಕಾರ, ನೆರೆಮನೆಕಾರಡೆಲ್ಲ ಪೆದ ಎಳೆದಿತ್ ಎನ್ನನೇ ಉಂಡ್‌ಂದ್ ಕೇಟಿಂಜತ್. ಮರ ನಡಪಕ್ ಕಾರಣಕರ್ತನಾನ ಕುಕ್ಕಜ್ಜ ಉಂಡಾಂದ್ ಎಳೆದಿಂಜತ್. ತಾನ್ ಮಂಗಲಾನ ಸಂಗತಿನೊ ಎಳೆದ್‌ಚಿ.

ತಮ್ಮಣಿಕ್ ಕುಶಿ ಆಚಿ. ಆಚೆಂಗಿ ಬೋರೆ ಜಾತಿನ ಮಂಗಲಾನವ ಇಂಞಿ ಬಪ್ಪಾಲೇಂದ್ ಬೇಜಾರೂ ಆಚಿ. ಕೂಡೆನ್ನೆ ತಮ್ಮಣಿ ಊರ್‌ರ ಸಂಗತಿ, ಬೈರಿಮರತರ ವರ್ಣನೆ, ಊರ್‌ಲ್ ಚತ್ತಯಿಂಡ ಪಟ್ಟಿ, ಮಂಗಲಾನಯಿಂಡ ಪಟ್ಟಿ ಎಲ್ಲ ತಯಾರ್ ಮಾಡಿತ್ ಪಪ್ಪುಣಿ ಕೊಡ್‌ತ ಕೇರಫ್ ಅಡ್ರೆಸ್‌ಕ್ ಅಯಚತ್.

ತಮ್ಮಣಿರ ಕಾಗದ ಓದಿತ್ ದುಂಬಾ ಕುಶಿಯೂ ಬೇಜಾರವೂ ಆಚಿ. ಚತ್ತಯಿಂಡ ಪಟ್ಟಿಲ್ ಅವ್ವ ಗಂಗವ್ವಂಡ ಪಿಂಞ ಕುಕ್ಕಜ್ಜಂಡ ಪೆದ ಕಂಡತ್. ಮಂಗಲಾನಯಿಂಡ ಪಟ್ಟಿಲ್ ಅಣ್ಣ ಬೊಳ್ಳು, ಅಕ್ಕಂಗ, ತಮ್ಮಣಿ ಇಯಂಡೆಲ್ಲ ಪೆದ ಇಂಜತ್. ಕೇಡ್‌ಗ ಮಂದಯ್ಯನೂ ಬಿದ್ದಯ್ಯನೂ ಜಮ್ಮ ಜಾಗಕೆಲ್ಲ ಬೇಲಿ ಇಟ್ಟಿತ್ ಸ್ವಾಧೀನ ಮಾಡಿಯಂಡಾನ ಓದ್‌ನ ಪಿಂಞ, ಪುಟ್ಟನ ಊರ್‌ಕೊಮ್ಮ ಪೋಯಿತ್ ಬಪ್ಪಿಲೇಂದ್ ಇಂಜ ಮನಸ್ಸೂ ಬದ್‌ಲಾಯಿಪೋಚಿ.

\*\*\*\*

ಕಾಲ ಉರಾಂಡ್‌ಚಿ. ಪಪ್ಪಣಿಕ್ ಮಕ್ಕಳಾಚಿ. ಮುಂಡೆ ನೆರತತ್, ಬಲ್ಯಪಣಕಾರನಾಯಿಲೆ. ಬಯತ್ ಅರುವದ್ ದಾಟ್‌ಚಿ. ಮಕ್ಕಳೆಲ್ಲ ಬಲ್ಯವು ಆಚಿ. ಅಯಿಂಡಯಿಂಡ ಬಟ್ಟೆನ ನೋಟ್‌ಚಿ. ಚೆನ್ನ ಸಮಯತ್‌ಲ್ ಪೊಣ್ಣು ಚತ್ ಪೋಚಿ. ಐ.ಎನ್.ಎ. ಸೈನಿಕಂಗಕೂ ಪೆನ್‌ಶನ್ ಕೊಡ್‌ಪ ಸರಕಾರಿ ಕಾನೂನ್ ಬಾತ್. ತಾನ್ ಪುಟ್ಟಾನ ಮಣ್ಣಾಲೆ ಚಾವಂಡೂಂದ್ ಇಚ್ಚಕ್ ಕಾಲ ಇಲ್ಲತ ಆಸೆ ಇಕ್ ಪಪ್ಪಣಿಕ್ ಬಾತ್. ಐಂಬದ್ ಕಾಲಕ್ ಬಯ್ ತಾಂಡ ಊರ್‌ಲ್ ಇಂಜ ಜನಡದೆಲ್ಲ ಗೇನ ಬಾತ್. ತಾಂಡ ಪಳೆಯ ಪಿಲ್ಲ ಮನೆ, ಮನೆರ ಸುತ್ತ ಇಂಜ ಬಲ್ಯ ಬಲ್ಯ ಪರಂಬು, ತಾನ್ ಕಲ್ಮಮರಾಚಿತ್ ಇಂಡ್ ಪುಡಿಪಯಿಂಜ ತೋಡ್, ತರತರತರ ಪಣ್ಣಮರ, ಇನ್ನನೆ ಒಂದ್ ತೋಟ್ ನೂರೋಳ ಗೇನ ಬಂದಿತ್ ಊರ್ ಕೈ ಬೀಜಿ ಕಾಕುವಯಿಂಜತ್.

ತಮ್ಮಣಿಕ್ ತಾಂಡ ಮನಸಾರ ಇರಾದೆನ ಎಳ್‌ದ್‌ಚಿ. ಸಿನೇತಂಡ ಆಖೀರಿ ಕಾಲತರ ಆಸೆ ಓದಿತ್ ತಮ್ಮಣಿಕ್ ದುಂಬ ಕುಶಿ ಆಚಿ. ಪಂಡೇಕೂ ಇಂದೇಕೂ ಊರ್ ನಾಡ್‌ಲೆಲ್ಲ ಎನ್ನನೆ ಬದಲಾಯಿತ್‌ಂದ್ ವಿವರಣೆ ಕೊಡ್‌ತಿತ್ ಅವಂಡ ಕಲ್ಕತ್ತ ಎಡ್ರೆಸ್‌ಕ್ ಕಾಗದ ಎಳ್‌ದ್‌ಚಿ. ಅವ ನಟ್ಟ್ ಬೊಳತಿತ್ ಬುಟ್ಟ್‌ಪೋನ ಬೈರಿ ಮರತರ ಓರ್ ಪೋಟೋ ಎಡ್‌ಪ್‌ಚಿಟ್ಟಿತ್ ಕಾಗದತ್‌ರೊಳ್‌ಲ್ ಇಟ್ಟಿತ್. ಆ ಬೈರಿ ಮರ ಇಕ್ ಸಾಯಿಬಾಬಂಡ ಮಂಡೆರ ಆಕೃತಿಲ್ ಬೊಳಂದಿತ್ ನಿಂದಿತಿಂಜತ್. ಆಚೇಂಗಿ ಪಂಡೇತನ್ನಕೆ ಅತ್ತಕಾರ ಮಕ್ಕಡ ಕಳಿಪ ಬಾಣೆ ಆಯಿತಿಂಜಾಲೆ. ಮನೆಕಾರಡ ಪುಡ್‌ಚೋರಿಲ್ ಈ ಬಾಣೆನ ಬೊಳ್ಳುರ ಮೋಂವ ಸಾಬು ತಂತಿ ಇಟ್ಟಿತ್ ನಳ ಒಪ್ಪಿತ್ ಕಾಫಿ ತೋಟ ಮಾಡಿತಿಂಜತ್.

ತಮ್ಮಣಿ ಅಯೆಚಿ ಕೊಡ್‌ತ ಬೈರಿ ಮರತರ ಪೋಟೋ ನೋಟಿತ್ ಪಪ್ಪಣಿಕ್, ಕಾಂಗತ್ತಾನ ಕುಂಞಾನ ಕಂಡ ಅವ್ವಂಗ್ ಆನ ಕುಶಿ ಆಚಿ. ಕೂಡೆನ್ನೆ ಪತ್ತಾಯಿರ ಉರಾಪಿಯತರ ಡ್ರಾಫ್ಟ್ ಎಡ್‌ತಿತ್ " ಆ ಮರಕೋರ್ ಕಲ್ಲರ ಕಟ್ಟೆ ಕೆಟ್‌ಚಿರ್, ನಾನ್ ಚೆನ್ನಂಗೇ ದಿನತ್‌ಲ್ ಕಲ್ಕತರ ಮನೆನ ಮಾರಿತ್ ಬಪ್ಪಿ. ಕಡೇಗಾಲತ್‌ಲ್ ಪುಟ್ಟಾನ ಮನೆಲೆ ನೆಲೆನಿಪ್ಪಿ"ಂದ್ ಎಳ್‌ದಿತ್ ತಮ್ಮಣಿಕ್ ಅಯಚಿತ್.

ಆಚೇಂಗಿ ಪಪ್ಪಣಿ ಎಳ್‌ದ್‌ನನ್ನಕೆ ಆ ಮರಕ್ ಕಟ್ಟೆ ಕೆಟ್‌ಚಿರುವಕ್ ಅದ್ ಪಂಡೇತ ಪೋಲೆ ಪತ್ತಾಂಡ ಬಾಣೆ ಅಲ್ಲ. ಅದಿಕ್ ಸಾಬುರ ಸ್ವಾಧೀನತುಳ್ಳ ತೋಟ. ಅತ್ತಕಾರ ಮಕ್ಕ ಕಾಡ್‌ಕಲ್ ಪೊರಾಕಿತ್ ಗುಡ್ಡೆಮಾಡ್‌ನ ಕಟ್ಟೆ ಮಾತ್ರ ಉಂಡ್. ತಮ್ಮಣಿ ಸಾಬುನ ಕಂಡತ್, ಅವಂಡ ಕುಂಞಪ್ಪ ಐಂಬತ್ತಂಜಿ ಕಾಲಕ್ ಬಯ್ ಊರ್ ಬುಟ್ಟಿಂವ

ಬಪ್ಪ ಸಂಗತಿನ ಎಣ್ಣೆ ಚಿ. ಸಾಬುಕೂ ಅಂವಂಡವ್ವಂಗೂ ದುಂಬ ಕುಶಿ ಆಚಿ. ಆಚೇಂಗಿ ಓರ್ ನೆಟ್ಟಲ್ ಸುರುವಾಚಿ. ಬಂದಿತ್ ನಾಡ ಭೂಮಿ ಪಾಲ್ ತಾ, ಜಾಗ ತಾ, ಮನೆ ಕೆಟ್ಟುವಕ್ ಜಾಗ ತಾಂದ್ ಕೇಟಕ ಎನ್ನ ಮಾಡನಾಂದ್ ಮನಸಾರೊಳ್ಲೇ ಚಿರಿಯ ಪೊಗೆ ಕೊಳ್ಳಿ ಪೊಯಂದಂಡಿಂಜತ್.

\*\*\*

ಪಪ್ಪಣಿ ತಾಂಡ ಮನೆನ ಮಾರಿತ್, ಕಲ್ಕತ್ತಕ್ ಆಖೀರಿ ತೊಕ್ಕಲ್ ತೊತ್ತಿತ್ ರೈಲ್ ಪತ್ತ್ ಚಿ. ಬೆಂಗಳೂರ್ಲ ಇಂಳಿಂಜತ್. ಪಂಡ್ ಮಿಲಿಟ್ರಿಕ್ ಕೂಡುವಕ ಕಂಡ ಬೆಂಗಳೂರ್. ಅವ ಬೆಂಗಳೂರ್ಲ ದುಂಬ ದಿನ ಇಂಜಂವನಲ್ಲ. ತಾಂಡ ರಾಜ್ಯತಾರ ರಾಜಧಾನಿ ಆಕುಲ. ನಾಲ್ ದಿನ ಬೆಂಗಳೂರ್ಲ ಇಂಜತ್. ವಿಧಾನ ಸೌಧ ನೋಟೊಚಿ. ಕೊಡವ ಸಮಾಜ ಕಂಡ್ ಪುಡ್ ಚಿತ್. ಪೋನಾಲೆಲ್ಲ ಕೊಡವ ತಕ್ಕ ಕೇಪ ! ಆಚೆಂಗಿ ಓರೇ ಓರ್ ಕೊಡವತಿನ ಕಂಡ್ಲೆ. ಇದೆನ್ನ ಆಶ್ಚರ್ಯ ! ಕಬ್ಬನ್ ಪಾರ್ಕ್ ಪೋಚಿ. ಕಲ್ಲ್ ಬೆಂಚಿಲ್ ಅಳತತ್. ಪಕ್ಕತ್ಲೆ ಓರ್ ಸಂಸಾರ ಬಾತ್. ಆಣ್ ಮೀಸೆ ತಡಿ ನೋಟುವಕ ಕೊಡವಂಡ ಮಾದರಿ ಕಾಂಬ. ಪೊಣ್ಣರ ಜುಲ್ಮ ಮಂಡೆ, ಚೋಪ್ ರಂಗ್ ಕಿರಿ, ಎದೆ, ಅರೆ, ಬರಿ, ಕೆಲ, ಪೊಕ್ಕ ನಲ್ಲ ಪ್ರದರ್ಶನಕ್ ಬೆಚ್ಚನ್ನಕೆ, ಅದೆಲ್ಲ ತಾಂಡ ತಡಿರ ಭಾಗವೇ ಅಲ್ಲಾಂದ್ ಮರಂದ್ ರೊಂಜಿ ಪೊಡಿಯ ಸುತ್ತಿಯಂಡ ಕೋಲ ನೋಟಿತ್, ನನ್ನನ್ನಕೇ ಇಂವನೂ ಬೋರೆ ಜಾತಿನ ಮಂಗಲಕಯಿಚಂವಂದ್ ಗೇನ ಮಾಡಿಯಂಡತ್. ಐಸ್ ಕ್ರೀಮ್ ನಕ್ಕಿಯಂಡ್ ದಂಡ್ ಮಕ್ಕ ಓಡಿ ಕಳಿಪ. "ಜಾನ್, ಡಾನ್, ಕಂ ಹಿಯರ್"ಂದ್ ಆ ಪೊಣ್ಣಾಳ್ ಕಾಕ್ ಚಿ. ಅಯಂಡ ಕೂಡ ಬಂದ ಎಳ್ವತ್ತಂಜಿ ಬಯತ್ ದಾಟನ್ ಬೊಳ್ ಪೊಡಿಯತಾರ ಕೊಡವತಿ! ಆ ತಾಯಿನ ಕಂಡಿತ್ ಓಡಿ ಪೋಯಿತ್ ಕಾಲಾಪುಡ್ ಚಿತ್ "ದಾಡ ನಿಂಗಾ"ಂದ್ ಕೇಕಡಾಂದ್ ಪಪ್ಪಣಿರ ಮನಸ್ಸು ತುಳ್ಳಿ ಕಳಿಪ. ಆಚೆಂಗಿ ಇದೆಂತೋರ್ ಮಿಶ್ರ ತಳಿಯಾ, ಹೈಬ್ರಿಡ್ ಸಂತಾನವೊಂದು ಗೊತ್ತಾಗತೆ ಬೆರಗಾಯಿ ಪೋಚಿ ಪಪ್ಪಣಿ. ಈ ಬೆಂಗಳೂರ್ ಬೋಂಡ ಮಡಿಕೇರಿಕ್ ಪೋಪಿಂದ್ ಸೂಪರ್ ಬಸ್ ಪತ್ತ್ ಚಿ. ಅಲ್ಲಿಯೂ ಅದೇ ತರ ಮಿಶ್ರ ತಳಿರ ಕೊಡವಳ ಕಂಡತ್. ಪಂಡ್ ಟಿಪ್ಪು ಸುಲ್ತಾನ ಕೊಡವಳ ಪುಡ್ ಚಿ ಬಂದಿತ್ ಜುಲ್ಮೆಲ್ ಜಾತಿ ಕೆಡ್ತನದ್ ಚಿತ್ರಲ್ ಉಳ್ಳದ್. ಆಚೆಂಗಿ ದಂಡನೆ ವಾರ್ ಕಯಿಂಜ ಪಿಂಞ ಭಾರತಲ್ ಅನ್ನತೋರ್ ಬಲತ್ಕಾರ ಮತಾಂತರ ಆನದ್ ಪಪ್ಪಣಿ ಪೇಪರ್ಲ್ ಓದಿತೂ ಇಲ್ಲೆ. ಅನ್ನನಿಪ್ಪಕ ಈ ಕೊಡವಡಲ್ಲಿ ಇನ್ನತೋರ್ ಮಿಶ್ರ ತಳಿ ಯೋಜನೆ ಕೊಂಡ ಬಂದವು ದಾರ್ಂದ್ ಗೇನ

ಮಾಡಿಯಂಡ್ ಇರಣೆ. ವರಕ್ ಪತ್ತಿ ಪೋಚಿ. "ಮಡಿಕೇರಿ ಇಳಿರಿ"ಂದ್ .....  
ಕಾಕಿತೆಣ್ಣ್ ಚಿ.

ಬಸಂಜೆ ಇಳಿಂಜತ್. ಕೆನರಾ ಬ್ಯಾಂಕ್ ತೇಡಿತ್ ತಾಂಡ ಪೆದತ್‌ಲ್ ಓರ್  
ಎಕೌಂಟ್ ತೊರಂದತ್. ಪಪ್ಪಣಿ ತಾಂಡ ಅಣ್ಣ ಬೊಳ್ಳುರ ಕೇರಾಫ್ ಅಡ್ರೆಸ್  
ಕೊಡತ್. ಬ್ಯಾಂಕ್‌ಲೋರ್ ಮಿಶ್ರ ಜಾತಿ ಪೊಣ್ಣಾಳ್ "ನಿಂಗ ದಾಡಾ"ಂದ್ ಕೇಟತ್.  
ಅಪ್ಪರಿಪ್ಪರ ಕೇಟರ್‌ಂಜಿತಾಪಕ ಅವ ಪಪ್ಪಣಿರ ಓರ್ ಬೆಂದ್‌ಕತಿಯೆ. "ನೀನ್ ಎನ್ನಂಗವ್ವ  
ಇನ್ನನೆ ಪೊಡಿಯ ಉಡ್‌ತಿಯೆ? ವಡಿಯ ಕೊಡವನಾ"ಂದ್ ಕೇಟತ್. ಆ ಪೊಣ್ಣಾಳ್‌ಕ್  
ಚೆನ್ನ ಚೆಡಿಬಾತ್. "ನಿಂಗ ಕಯಿಂಜ ಶತಮಾನತ್‌ರ ಜನ. ನಾಳೆ ಕೊಡವ ಸಮಾಜತ್‌ಲ್  
ಮಂಗಲವುಂಡ್. ಅಲ್ಲಿಕ್ ಪೋಯಿ ಕೊಡವತಿಯಳ ಕಾಂಗಲೂ"ಂದ್ ಎಣ್ಣ್ ಚಿ.

ಪಿತ್ಯಾಂದ್ ಕೊಡವ ಸಮಾಜತ್ ರಾಲೆಪೋಚಿ. ಕುಪ್ಪ ಚೇಲೆಕಾರಳೊ  
ಕೊಡವತಿಯಳೊ ಕಂಡಿತ್ ಕೆಲದುಂಬಿ ಪೋಚಿ. ಕಣ್ಣ್‌ದುಂಬ ನೋಟಿಯಂಡತ್. ಪ್ರತಿ  
ಕೊಡವತಿನೊ ತಾಂಡ ಅವ್ವನನ್ನೆ ಕಂಡತ್. ಪಪ್ಪಣಿ ಮಡಿಕೇರಿನೆಲ್ಲ ಸುತ್ತಿ ನೋಟಿಚಿ.  
ತಾಂಗ್ ಅರುವದ್ ಕಾಲಕ್ ಬಯ್ಯಗೊತ್ತಿಂಜ ಕೊಡವಡ ಮನೆರ ಬರಿಕಾಯಿತ್ತೆಲ್ಲ  
ಸುತ್ತಿಚಿ. ಸಾಧಾರಣ ಎಲ್ಲ ಮಲಯಳಕಾರಡದಾಯಿ ಪೋಯಿತ್. ಮಡಿಕೇರಿಲ್  
ಬದಲಾಗತೆ ಕಂಡ ವಿಶೇಷ ಎಣ್ಣ್‌ನಕ ಪೈವೇಟ್ ಬಸ್ ಸ್ಟಾಂಡಲುಳ್ಳ ಮರತ್‌ರ ಬೆಂಚಿ!  
ಆ ಬೆಂಚಿಲೆ ಪಂಡ್ ಬುದ್ದಂಡ್ ವರಾನದೂ ಮನೆಂಜಿ ಕಟ್ಟಿತ್ ಕೊಂಡ ಬಂದ  
ಮಲ್ಲಂಗೋಳಿನ ಪುಡ್‌ಚಂಡ್ ಅಳತದೂ ಗೇನ ಬಾತ್. ಮಡಿಕೇರಿಕ್ ಬಂದಂದ್  
ತಮ್ಮಣಿಕ್ ಓರ್ ಕಾಗದ ಎಳೆದಿಂಜತ್. "ಬೊಳ್ಳಾಚೆ ಮನೆಕ್ ಬಪ್ಪಿ"ಂದ್  
ಎಳೆದಿಂಜತ್. ತಾಂಡ ಅವ್ವ ಗಂಗವ್ವಂಡ ಗೇನತ್ ಓರ್ ಕಲ್ಲಲ್ ಪೆದ ಎಳೆದ್  
ಚಿಟ್ಟಂಡತ್. ಬೊಳ್ಳಾಚೆ ಬೆರಿಯ ಪೋಪಿಂದ್ ಗೇನ ಮಾಡಿತ್ ಅಣ್ಣ ಬೊಳ್ಳುಕ್ ಬೋರೆ,  
ಸಿನೇತ ತಮ್ಮಣಿಕ್ ಬೋರೆ ಓರಂದ್ ಕುಪ್ಪಿ ಬ್ರಾಂಡಿ ಎಡ್‌ತಂಡತ್. ದಂಡ್ ಮನೆಕೂ  
ಬೋರೆ ಬೋರೆ ಯರ್ಚಿ, ಬೋರೆ ಬೋರೆ ಪ್ಯಾಕ್ ಜಿಲೇಬಿ ಕೆಟ್‌ಚಿಟ್ಟಂಡ್  
ಪೊರಟತ್.

ಬಸಂಪತ್ತನದು ಕಂಡೆಕ್ಕರ್ "ಎಲ್ಲಿಕ್ ಅಜ್ಜ"ಂದ್ ಕೇಟತ್. "ಬೋಡ್  
ಪಲಚಿಕ್ ಟಿಕೆಟ್ ತಾ"ಂದ್ ಎಣ್ಣ್ ಚಿ. ಕಂಡೆಕ್ಕರ್ ಬೆರಗಾಯಿತ್ "ಅಲ್ಲಿಕ್ ಈ ಬಸ್  
ಪೋಪಾಲೆ ಇಳಿರಿ. ಕೇಕತೆ ಮಾಡತೆ ಪತ್ತಿತಳತವ"ಂದ್ ಗೊಣಂಗ್‌ಚಿ. ಮಿಂಞತ  
ಸೀಟ್‌ಲಿಂಜ ಓರ್ ತೊಂಡ ತಿರಿತ್ ನೋಟಿತ್ "ಮೊಯಿದುರ ಅಂಗಡಿಕ್ ಟಿಕೆಟ್ ಕೊಡಿ.



ಪಂಡ್ ಆ ಜಾಗತ್‌ಲ್ ಬಲ್ಯ ಬಲ್ಯ ದಂಡ್ ಪಲಚಿ ಮರ ಇಂಜತ್. ಅಲ್ಲಂಜಿ ಒಳ ಬಟ್ಟೆಲ್ ಪೋಪಯಿಂಜತ್, ಆ ಪಲ್ಟಿನೆಲ್ಲ ಇರ್‌ಕ್ಕಿರ್‌ಲ್ ಈಂದಿತ್ ಮೊಯಿದು ಮನೆ ಕೆಟ್ಟಿಯಂಡತ್"ಂದ್ ಎಣ್ಣೆ ಚಿ.

ಪಪ್ಪುಣಿರ ಮನೆಕ್ ಇಕ್ಕತ್ತರ ಬಸ್ ಶೆಲ್ವರ್, ಮೊಯಿದುರ ಅಂಗಡಿಂಜಿ ಓರ್ ಕಿಲೋಮೀಟರ್ ಮಿಂಞಲ್. ಪಪ್ಪುಣಿನ ಕೂಟಿಯ ಬಪ್ಪಕ್ ತಮ್ಮಣಿ ಓರ್ ಆಳನೊ ಕೂಟಿಯೆಂಡ್ ಬಂದಿತ್ ಶೆಲ್ವರ್‌ಲ್ ಅಳತಂಡ್ ಕಾತತ್. ಪಪ್ಪುಣಿಕ್ ಈ ಪುದಿಯ ರೋಡ್‌ರ ವಿಷಯ ಗೊತ್ತಿಲ್ಲತೆ ಪಂಡೇತ ಜೋಡ್ ಪಲಚಿಲ್ ಇಳಂಜತ್. ತಾಂಡ ಪೊಟ್ಟಿ ಕೆಟ್ಟಾನೆಲ್ಲ ಮೊಯಿದುರ ಅಂಗಡಿಲ್ ಬೆಚ್ಚತ್. ದಂಡ್ ಮನೆಕ್ ಉಳ್ಳದಂಡ್ ಕೆಟ್ಟಾನೊ ಅವ್ವಂಡ ಪೆದ ಕೆತ್ತಚಿಟ್ಟ ಕಲ್ಲ್‌ನೊ ಎಡ್‌ತಂಡ್ ಪಂಡೇತ ಬಟ್ಟೆಲ್ ತಂತಿ ನುಗ್ಗಿತೂ, ಕಡಪೆಪತ್ತಿತೂ ನಡ್‌ಂದತ್. ಪಂಡೇತ ಮರ ಕಾಡೆಲ್ಲ ಪೋಯಿತ್ ತೋಟ ಆಯಿತ್.

ಅಣ್ಣಯ್ಯ ಬೊಳ್ಳುರ ಮನೆಕ್ ಮಿಂಞ ಪೋನಕ ಇಚ್ಚಕ್ ಕಾಲ ನಾಡ ಸೇವೆ ಮಾಡ್‌ನ ತಮ್ಮಣಿಕ್ ಬೇಜಾರಾಕು. ತಾಂಡ ಕಂದ್ ಕರ್‌ನ ತರ್ಪಾಕಿತ್ ನೆರೆಮನೆಕಾರಂಡಲ್ಲಿಕ್ ಪೋನಕ ಅಣ್ಣಯ್ಯಂಗೆ ಚೆಡಿ ಬರತಿರ, ಎನ್ನ ಮಾಡ್‌ಂದ್ ಗೇನ ಮಾಡಿಯಂಡೇ ಬಾತ್. ಏದ್‌ಂಗೊ ಮಿಂಞ ನಾನಟ್ಟಿ ಬೈರಿ ಮರತ್‌ನ ನೋಟಿತ್ ಅದ್‌ಂಡ ಅಡಿಲ್ ಅಳತಿತ್ ಪಿಂಞ ತೀರ್ಮಾನ ಮಾಡುವೀಂದ್ ಗೇನ ಮಾಡಿಯಂಡ್ ಬಾತ್. ಪಂಡೇತ ಮಾದರಿ ಕಾಡೇ ಇಲ್ಲೆ. ಓರೇ ಓರ್ ಬಲ್ಯ ಮರ ಕಾಂಬಾಲೆ. ಎಲ್ಲ ತೋಟ, ಎಲ್ಲ ಬೋಳ ಬೋಳ. ಪಂಡೇತ ಜನ ದಾರೊ ಇಲ್ಲೆ ಬಟ್ಟೆಲ್ ಎದ್‌ಪಾಂಜ ಪಪ್ಪುಣಿನ ಬಾಲೆಕಾರ ಅಡಿಂಜಿ ಕೊಡಿಕೆತ್ತಣೆ ನೋಟ್‌ಚಿ. ಕಾಡ್‌ಂಜಿ ಬೊರ್‌ಂಡಿತ್ ಊರ್‌ಕ್ ಬಂದ ಕಡ್‌ಮನ ನೋಟ್‌ನನ್ನೆ ನೋಟ್‌ಚಿ. ದಾರೊ ಟಿಂಬರ್ ಎಡ್‌ಪಕ್ ಬಂದಂವನಾಂದ್ ಗೇನ ಮಾಡ್‌ಚಿ. ಅಲ್ಲ, ಟಿಂಬರ್ ವ್ಯಾಪಾರಿಯ ಪಂಚೆ ಮುಂಡ್‌ಲಿರಂಡು, ಕಾರ್‌ಲ್ ಬರಂಡು. ಸುರಾಲ್‌ಟ್ಟುಂಡ್ ಒಂಟಿಯಾಯಿತ್ ನಡಂದ್ ಬಪ್ಪಂತ ಟಿಂಬರ್ ಮರ್ಚೆಂಟ್‌ಕ್ ಮರಪೋಡ್, ಪುಳ್ಳಿ ತುಂಡೂ ಕ್‌ಟ್ಟ!

ಪಪ್ಪುಣಿ ಮಾತ್ರ ದಾರ್‌ನೊ ನೋಟತೆ, ಬೈಟ್ ಕೊಟ್ಟಾರ ಪಕ್ಕ ಎತ್ತನ ಪಯ್ಯು ಕಡ್‌ಚಿನ ನೋಟುವಕ್ ಓಡೋಡಿ ಬಂದನ್ನೆ, ನೀರ್‌ಲ್ ಮುಳನಂವ ಉಸರೆಡ್‌ಪಕ್ ಕರೆಕ್ ಮೀಂದ್‌ನನ್ನೆ, ಕುಡಿಪಕಾನ ಕುಂಞಿ ಅವ್ವನ ಕಾಂಬಕ ಪಾಲೂತುವಕ್ ಪಾರ್‌ನನ್ನೆ ತಾಂಡ ಒರೇ ಓರ್ ಆಸ್ತಿ, ತಾನಟ್ಟಿ ಮರತ್‌ನ ನೋಟುವಕ್ ಜಾಪಿ ಜಾಪಿ ನಡಂದಂಡ್ ಬಾತ್.

ಪಪ್ಪಣಿ ಊರ್ಕ್ ಬಪ್ಪ ಸಂಗತಿ ಅಣ್ಣ ಬೊಳ್ಳುಕೂ, ಸಾಬುಕೂ ಗೊತ್ತಾಯಿತಿಂಜತ್. ತಮ್ಮಣಿ ಪೋನ ಪಿಂಞ ಇಯಿಂಗಳೂ ಬಸ್ಕ್ ಪಾರಕಾಪಕ್ ಪೊರಟತ್. ಐಂಬತ್ತಂಜಿ ಕಾಲಕ್ ಬಯ್ಯ ಮನೆ ಬುಟ್ಟಪೋನ ತಮ್ಮಣನ ನೋಟಿತ್ ಚತ್ ಪೋನಕ ಮದಿ ಎಣ್ಣಿಯಂಡ್ ಇಂಜತ್ ಬೊಳ್ಳು. ಕುಂಞಪ್ಪ ಎನ್ನನೆ ಇಕ್ಕೂಂದ್ ಮನಸ್ಸಲೇ ಕಲ್ಪನೆ ಮಾಡಿಯಂಡ್ ಸಾಬು ಪೊರಟತ್. ಈ ಮಜ್ಜಣಕ್ ನಂಗಡ ಚೋಂದ ಮಲ್ಲನ ನೆರಚಿತ್ ಕೋಳಿಕರಿ ಪಾಪುಟ್ ಮಾಡಿತ್ ಬೆಚ್ಚಿತಿರ್"ಂದ್ ಸಾಬು ತಾಂಡ ಪೊಣ್ಣಾನ ಕಾಕಿತ್ ಎಣ್ಣಚಿ. ಮಲ್ಲಂಗೋಳಿರ ಪೆದ ಮೋಂವ ಎಣ್ಣಾನದ್ ಕೇಪಕ ಬೊಳ್ಳುಕ್ ಪಪ್ಪಣಿರ ಪಳೆಯ ಸಂಗತಿ ಗೇನ ಬಂದಿತ್ ಮನಸ್ಸರೊಳ್ಳಲೇ ತೆಳ್ಳಚಂಡತ್. ಸಾಬು ತಾಂಡ ಪಣಿಕಾರ ಪಾಲೆ ಅಂಗರನ ಕಾಕಿತ್ "ನಿಂಗೆಲ್ಲ ಕಾಫಿ ಗಿಡತಾರ ನಳ ಎಡ್ತಂಡಿರಿ ಬೆರಿಯ ಬಪ್ಪಿ"ಂದೆಣ್ಣಿತ್ ಪೋಚಿ.

ಮಜ್ಜಣಾಕಣೆ ಪಾರಕಾತಕಲೂ ಏದ್ ಬಸ್ಲೂ ಪಪ್ಪಣಿ ಬರತಾಪಕ, ಇಂಞಿ ಬಪ್ಪ ಮಾದರಿ ಇಲ್ಲೆ. ಬೈಟೇತ ಬಸ್ಸಲ್ ಓರ್ ಸಮಯ ಬಕ್ಕು. ಇಕ್ಕ ಪೋಯಿತ್ ನಾಲ್ ಗಂಟೆಕ್ ಬರನಾಂದೆಣ್ಣಿತ್ ಪೊರಟತ್.

\* \* \* \*

ಅಂಜಿ ಗಂಟೆಕ್ ಆಳ ಪಣಿ ಬುಟ್ಟಿತ್ ಬಾತ್ ಪಾಲೆ ಅಂಗರ "ಯಜಮಾನ ಚೆನ್ನ ಅಯಡೆಸ್ ತಾರಿ"ಂದ್ ಕೇಟತ್. "ಎನ್ನಂಗ್ ಐಯೋಡೆಕ್ಸ್ ಎನ್ನಾಯೆ"ಂದ್ ಸಾಬು ಕೇಟತ್.

"ಆ ಬೈರಿ ಮರತಾರ ಓರ್ ಕೊಂಬ್ ಜಾರಿತ್ ಕಾಲಾರ ಮೀದ ಬುದ್ಧಿತ್ ದುಂಬ ನೊಂಬಲ"ಂದ್ ಎಣ್ಣಚಿ. ವರ್ಕ್ ನೆಟ್ನನ್ನಕೆ ಸಾಬು ಕೇಟತ್ "ಏದ್ ಬೈರಿ ಮರರಾ"ಂದ್?

"ಅದೇ ಯಜಮಾನ ಬೊಳಿಬಾಣೆರ ನಡುತಾರ ಕಟ್ಟೆಲುಳ್ಳ ಮರ. ನಳ ಆಯಿತ್ ಅದಂಡಡಿಲ್ ಗಿಡ ಏವದೇ ಇಲ್ಲೆ"ಂದ್ ಬಲ್ಯ ಅನುಭವಶಾಲಿ ಎಸ್ಟೇಟ್ ಮೇನೇಜರಾರ ಸ್ಟೆಲ್‌ಲಾ ಎಣ್ಣಣೆ ಸಾಬುಕ್ ತೆಡ್ ಬಡ್‌ಚೆನ್ನಕೆ ಆಚಿ. "ಉಯಿ ಸಿವನೆ ನೀಡ ಕೈ ತುಂಡಿ ಪೋಪಕ್"ಂದ್ ಕೂತ್ ಕೊಡ್ತಂಡ್, ಎನ್ನ ಮಾಡಿರತ್ ನೋಟಿನಾಂದ್ ಎದ್ದ ಬುದ್ಧಿ ಓಡಿ ಪೋಚಿ. ಚಾಣಕ್ಕ ಮಂಡೆ ಕೀಚಿತ್ ಉಟ್ಟಿಲ್ ಓರ್ ಚೆರಿಯ ಜುಟ್ಟು ಬುಟ್ಟನ್ನಕೆ ಮರತಾರ ಕೊಂಬೆಲ್ಲ ತರಚಿತ್ ಓರ್‌ಚೆರಿಯ ಕೊಂಬ್‌ನ ಬುಟ್ಟದ್ ಕಂಡಿತ್

ಸಾಬುಕ್ ಮಿಂಞಾಕ್ ಮೊಟ್ಟ್ ಎಡ್‌ಪಕಯ್ಯತೆ ಅಲ್ಲಿ ಅಳತ್ ಪೋಚಿ.

ಪಾಲೆ ಅಂಗರಂಡ ನಾಯಿ ಮರತ್‌ರಡಿಲ್ ಕೊರ್‌ತಂಡ್ ಎಂತಾನೊ ಕಡಿಪಕ್ ದವುತುವಾನ ಕೇಟಿತ್ ಸಾಬು ನಾಲ್‌ಮೊಟ್ಟ್ ಮಿಂಞಾಕ್ ಪೋಚಿ. ಎಟ್ಟ್ ಪತ್ತ್‌ಕಾಕೆಯ ಕಾಂದಂಡ್ ನಾಯಿರ ಕೈಂಜಿ ಎಂತಾನೊ ಬಲಿಪಕ್ ಪೇಚಾಡುವ. ನಾಯಿ ಕಾಕೆಯಳ ಬೊತ್ತ್‌ಚಿಟ್ಟಂಡ್ ಎಂತಾನೊ ತಿಂದಂಡುಂಡ್ ! ಪಕ್ಕ ಪೋಯಿತ್ ನೋಟಣೆ ಮರತ್‌ರ ಮೊರ್‌ಡ್‌ಲ್ ಸುಮಾರ್ ಎಳಾವದ್ ಬಯತ್‌ರ ಅಜ್ಜ ಬುದ್ಧ್ ಪೋಯಿತ್. ಪ್ಲಾಸ್ತಿಕ್ ಪ್ಯಾಕೆಟ್‌ಲುಳ್ಳ ಯರ್ಚಿನ ನಾಯಿ ತಿಂದಂಡುಂಡ್. ಅದ್‌ನ ಬಲ್‌ಚಿ ತಿಂಬಕ್ ಕಾಕೆಯ ರಂಪ ಇಟ್ಟುಂಡುಂಡ್ ! ಬುದ್ಧಂಡ ಅಜ್ಜಂಡ ಪಕ್ಕ ಪೋಯಿತ್ ನೋಟಾಚಿ. ಕೈಲೋರ್ ಪೆನ್ನ್ ಪುಡ್‌ಚದ್ ಅನ್ನನೇ ಉಂಡ್. ಓರ್ ಕಾಗದ ಪ್ಯಾಕೆಟ್‌ರ ಮೇಲೆ "ಅಣ್ಣಯ್ಯ, ತಮ್ಮಣಿ, ಎದೆ ನೊ....." ಇಚ್ಚಕ್ ಎಳಾದಿತ್ ಎಳಾದುವಕಯ್ಯತೆ, ಓರ್ ಬರಿಕ್ ತರ್‌ಂಜಿ ಪೋಯಿತಿಂಜತ್.

ಸಾಬು ಪಾಂಬುನ ಚವುಟ್‌ನ ಕುಂಞಿನನ್ನಕೆ ರಂಪ ಇಟ್ಟುಂಡ್ ಓಡಿ ಬಂದಿತ್. ಎಲ್ಲಾಕು ಎಣ್ಣೆಚಿ. ಬೊಳ್ಳು ಪಪ್ಪುಣಿರ ಚಾವುರ ಮೇಲೆ ಬುದ್ಧ ಉರ್‌ಂಡಿಯಂಡ್ ಮೊರಡುವಾನ ದಾರ್‌ನಗುಂಡೂ ತಡ್‌ಪಕ್ ಕಯಿಂಜ್‌ಲೆ. ತಮ್ಮಣಿ ಓರ್ ತಕ್ಕೂ ಪರಿಯತೆ ಕಲ್ಲ್ ಮರ್‌ಂಜಿ ಪೋಯಿತಿಂಜತ್ !

ಆ ಇಡೀ ಮೂಂದೇಕೆ ಬಾಣೆನ "ಪಪ್ಪುಣಿವನ"ಂದ್ ಪೆದ ಬೆಚ್ಚಿತ್ ತರ ತರತ್‌ರ ಗಿಡ ಮರ ಬೊಳ್‌ತಿತ್ ತಾಂಡ ಪರಿಸರ ಪ್ರಿಯ ಕುಂಞಿಪ್ಪಂಡ ಗೇನಕಾಯಿತ್ ಸಾರ್ವಜನಿಕ ವನ ಮಾಡಿತ್ ಓರ್ ಕಟ್ಟೆಯೂ ಕಟ್ಟಿತ್ ಆ ಮಣ್ಣ್‌ಲ್ ಪುಟ್ಟನ ಪಪ್ಪುಣಿರ ಋಣ ತೇತತ್.

- \* - \* - \* -

## ಚಿತ್ರನಾನ ಕುಜ್ಜಿತ್

"ಪಪ್ಪ, ನಾಳೆ ಮಾತ್ರ ನಾನ್ ಸ್ಕೂಲ್‌ಕ್ ಪೋಪ್‌ಲೆ. ನಾಳೆ ಒನ್ನಾಂದೆ. ನಾನ್ ನೀಡ ಕೂಡ ಬಪ್ಪಿ. ಆಗ ಪಪ್ಪಾ.....?"

"ಎನ್ನಂಗ್ ದೊರೆ, ನಾಳೆ ರಜ ಉಂಡಾ? ಎಂತಾಂಗ್ ರಜ? ರಜ ಉಂಡೇಂಗಿ ಚೆನ್ನ ನೇರ ಅತ್ತಳ ನೋಟಿಯಂಡಿರಿ ಆಗಾ? ನಾಕ್ ಪೇಟೆಲೋರ್ ಮೀಟಿಂಗ್ ಉಂಡ್. ಪೋಯಿತ್ ಬೆರಿಯ ಬಂದ್‌ರುವಿ".

"ಹೇಂ, ಈ ಬುಲೆಟ್‌ಲ್ಲ ನಾಡ ಕೂಡ ಬೋಂಡ. ನಾಕ್ ಎಲ್ಲ ಗೊತ್ತುಂಡ್. ಗಪ್ಪು ಮಾಂವೊ ಅಂಗಡಿಲಕ್‌ತಂಡ್ ರಘು ಬಾವಂಡ ಕೂಡ ಎಣ್ಣೆಯಂಡಿಂಜಾನ ನಾನೇ ಕೇಟಿಯೆ ಗೊತ್ತಾಚಾ.....? ಗಪ್ಪು ಮಾಂವೊ ಸೊಸೈಟಿ ಓಟ್‌ಲ್ ಗೆದ್ದಾಂಗ್ ಮೇಕಟ್ತ್ ಪೊಳೆರ ಕರೆಲ್ ನಾಳೆ ಪತ್ತಿ ಕಯಿಪದುಂಡಲೊ. ಒಟ್ಟು ನಿಂಗ ಎಟ್ಟಾಳೆಲೊ. ಎಲ್ಲ ನಾಕ್ ಗೊತ್ತುಂಡ್. ನಾನ್ ಮಾತ್ರ ನೀಡ ಕೂಡ ಬರತಿಪ್ಪೆಲೆ. ಗಪ್ಪು ಮಾಂವಂಡ ಮೋಂವೊ ತಮ್ಮಿಯೂ ಪೋಪಲೊ."

ಅಂಜನೆ ಕ್ಲಾಸ್‌ಲೋದುವ ಮೋಂವೊ ಬೊಳ್ಳುರ ತಕ್ಕ ಕೇಟಿತ್ ಅಪ್ಪ ತಿಮ್ಮಯ್ಯಂಗ್ ಸುಸ್ತಾಯಿ ಪೋಚಿ. "ಪತ್ತಿ ಕಯಿಪ ಎಣ್ಣೆನಕ ಎಂತಂದ್ ಗೇನ ಮಾಡಿಯ ಮೋನೆ? ಅದೆನ್ನಾ ನಮ್ಮಯಾ? ಮಕ್ಕಳೆಲ್ಲ ಅಲ್ಲಿಕ್ ಬಪ್ಪಕಾಗ ಮುಂಡತಿರ್" ಎಣ್ಣೆಚಿ ತಿಮ್ಮಯ್ಯ.

"ಓಹೋ, ನೀಕೊಬ್ಬಂಗೆ ಗೊತ್ತುಳ್ಳ ಕಾಂಬ. ಪತ್ತಿ ಕಯಿಪೊ ಎಣ್ಣೆನಕ, ಕೋಳಿ ಚುಟ್ಟಿತ್, ಉಪ್ಪುಮಳು ಮೇಕಿಯಂಡ್ ತಿಂಬೊ. ಅವಲಕ್ಕಿ, ಒಟ್ಟಿ ಎಲ್ಲ ಗುಡ್ಡೆ ಇಟ್ಟಂಡ್, ಬಲ್ಕಿಯಿಂಗೆಲ್ಲ ಕಳ್ಳ ಕುಡ್‌ಚಂಡ್ ಗದ್ದಾಳ ಮಾಡುವೊ ಕಾಡ್‌ಕಂಬಳ. ನಿಂಗ ಎಚ್ಚಕ್ ಕುರಿ ಮಾಡಿತುಳ್ಳಿರ ನಾಕ್ ಗೊತ್ತಿಲ್ಲಿಯಾ? ನಾನ್ ಮಾತ್ರ ನೀಡ ಕೂಡ ಬರತೆ ಇಪ್ಪೆಲೆ"ಂದ್ ಗಾಂಧಿರನ್ನತ ಸತ್ಯಾಗ್ರಹಕ್ ಮೋಂವೊ ಸುರು ಮಾಡಿರ್ತ್.

ಪಿತ್ಯಾಂದ್ ಪೊಲಾಕ ಮಕ್ಕ ಸ್ಕೂಲ್‌ಕ್ ಪೋನ ಪಿಂಞ ನಾನ್ ಮನೆ ಬುಡ್‌ವೀಂದ್

ತಿಮ್ಮಯ್ಯ ಕೊಟ್ಟಾರ ಬರಿಯ ಸುತ್ತಿ ಕಳಚಂಡಿಂಜತ್. ಮಕ್ಕ ಸ್ಕೂಲಾಕ್ ಪೊರಡುವ ಲಕ್ಷಣ ಕಾಂಬಾಲೆ. "ನಿಂಗ ಎನ್ನೇಂಗಿ ಮಾಡಿ, ನಾನ್ ಪೋಪಿ"ಂದೆಣ್ಣೆತ್ ಏಳನೆ ಕ್ಲಾಸಾರ ತಂಗಿ ಬ್ಯಾಗ್ ತೂಕಿಯಂಡ್ ಪೊರಾಟತ್. ಅಂಜನೆ ಕ್ಲಾಸಾರ ಬೊಳ್ಳುನ ಅಪ್ಪಂಡ ಕೂಡೆ ರಾಯಭಾರಿ ಚಾಕಾರಿಕ್ ಬುಟ್ಟಿಂವನೇ ಅವಂಡ ಅಣ್ಣ ಪೊನ್ನು. ಪೊನ್ನು ಆರನೆ ಕ್ಲಾಸಾರ. ತಮ್ಮಣನ ಸತ್ಯಾಗ್ರಹಕ್ ಉಳಪಿತ್ ತಾನ್ ಮಾತ್ರ ಮಳ್ಳಿನೆನ್ನಕೆ ಬಾಡೆಕೂ, ಕಯ್ಯಾಲೆಕೂ ಸುತ್ತಿ ಕಳಚಂಡಿಂಜತ್.

ಮೋವ ತಂಗಿ ಸ್ಕೂಲಾಕ್ ಪೋಪಾನ ತಿಮ್ಮಯ್ಯ ಕಂಡತ್. ಕ್ಕಣ್ಣಂಗ ಮಿಂಞ ಪೋಚಿ ಕಾಂಬಾಂದ್ ಮನೆಕ್ ಬಾತ್. ದಂಡ್ ಮೋಂವಂಗಳೂ ಸ್ಕೂಲಾಕ್ ಪೊರಡುವ ಲಕ್ಷಣ ಕಾಂಬಾಲೆ.

"ಏಯ್ ಪೊನ್ನು, ನೇರ ಆಚಿರ ಸ್ಕೂಲಾಕ್ ಪೋಯಿ"ಂದ್ ತಿಮ್ಮಯ್ಯ ಓರ್ ಕೂತ್ ಎಳಕ್ಚಿ. ಅಪ್ಪಂಡ ಕೂತಾರ ಆಳ ಮೋಂವಂಗಳ್ ಗೊತ್ತಿಲ್ಲತದಾ? ಒಮ್ಮ ಜೋರ್ ಎಳಕುವ, ತರ್ಕ ಮಾಡ್ನಕ ಮುಂಡತಾಯಿರುವಾಂದ್ ಎಣ್ಣುವ ಗುಟ್ಟ್ ದಂಡಾಳಕೂ ಗೊತ್ತುಂಡ್.

"ಬೊಳ್ಳು ಕ್ಕಣ್ಣ ಸ್ಕೂಲಾಕ್ ಬಪ್ಪಲೆಲೊ ಪಪ್ಪ. ಅಂವೊ ನೀಡ ಕೂಡೆ ಬಪ್ಪಲೊ. ನಾನೊಬ್ಬನಾಯಿತ್ ಮಾತ್ರ ಪೋಪಾಲೆ. ನಾನೂ ನೀಡ ಕೂಡೆ ಬಪ್ಪಿ"ಂದ್ ಅಪ್ಪಂಡ ನಿಪ್ಪುಕ್ ಕವುಂಜಂಡ್, ಬೋಳಿನ ದಂಡ್ ಕೈಲು ತೊರತ್ ತಬ್ಬಿಯಂಡ್ ಮಂಜಣೆ ಕಳಿಪಕ ಅಪ್ಪಂಡ ಚೆಡಿಯೂ ತಣ್ಂಜತ್.

"ಏ ಅಪ್ಪಿ, ನೋಟ್ ಮಕ್ಕ ಸ್ಕೂಲಾಕ್ ಪೋಪಾಲೆಂದ್ ಎಣ್ಣುವ, ನಾಡ ಕೂಡೆ ಬಪ್ಪಲೊ, ಚೆನ್ನ ಜೋರ್ ಮಾಡ್ ಬಾ"ಂದ್ ಪೊಣ್ಣನ ಕಾಕ್ಚಿ.

"ನಿಂಗ ಮಕ್ಕಕ್ ನಲ್ಲಂವೊನಾಯಿರಿ. ನಾನೊಬ್ಬ ನಿಷ್ಕೂರ್ ಆಯವಿ. ಅಯಿಂಗ ಎನ್ನೇಂಗಿ ಮಾಡಿಯವಡ್, ಅಪ್ಪ ಪೋನ ಬಟ್ಟೆಲ್ ಮಕ್ಕ ಬರತಿಪ್ಪಾ? ಬಪ್ಪೇಂಗಿ ಕೂಟಿಯೋಳಿ. ನಾಲಾಳ್ ಕೂಡ್ನಲ್ಲಿಕ್ ಕೂಡ್ಚೇಂಗಲ್ಲ ಮಕ್ಕ ಚೆನ್ನ ತೆಳಂಗುವೊ"ಂದ್ ಓರ್ ಅಗ್ರಾಣೆ ಇಟ್ಟತ್.

ಪೊನ್ನುರೋ, ಬೊಳ್ಳುರೋ ಕುಸಿನೊಂದು ಎಣ್ಣಂಡ. ಆ ಮಾಸ್ತಾರ ಉರಿದುಂಡ್ ನೋಟುವದೂ ತಪ್ಪಚಿ. ಅಪ್ಪಂಡ ಕೂಡ ಪೊಳೆರ ಕರೆಲ್ ತಿತ್ತಗುಡ್ಡೆಲ್ ಕೋಳಿ ಚುಟ್ಟಂಡ್ ತಿಂಬೊ . . . ಪೊಳೆಲ್ ಮೀಂದುವೊ, ಇನ್ನತ ಸುಖಿತನೆಲ್ಲ ಗೇನ

ಮಾಡಿಯಂಡ್ ದಂಡಾಳೂ ಪೊರಟತ್.

ಇವು ಅಪ್ಪ ಮಕ್ಕ ಎತ್ತಣೆ, ಮಿಂಞ ಬಂದಯಿಂಗ ನಾಲ್ ಕೋಳಿಯಳ ಉರ್ಚಿತ್ ಆಯಿತ್. ತಿತ್ತಗುಡ್ಡೆ ನಲ್ಲ ಕಂಡ ಬುದ್ದಿತ್. ಅವಲಕ್ಕಿ, ಚಕ್ಕುಲಿ, ಚೌಚೌ - ಇಂತಾಂಡ ಬೋರೆ ಬೋರೆ ಗುಡ್ಡೆ ಇಂಜತ್. ಸುಮಾರ್ ಪತ್ತ ಲೀಟರ್‌ರ ಕ್ಯಾನ್‌ಲ್ ಕಾಚ್‌ಂಗಳ್, ಬರಿಲೇ ಎಲ್ಲಾಡೋ ಬಟ್ಟೆ ನೋಟಿಯಂಡಿಂಜತ್. ಈ ಬಲ್ಯಯಿಂಡ ಗುಂಪುಲ್ ಮಕ್ಕ ಮಾತ್ರ ಬೊಳ್ಳು, ಪೊನ್ನು ದಂಡಾಳೆ.

ಪತ್ತಿ ಕಯಿಪಕ್ ಕೂಡ್‌ನಯಿಂಗ ತಿಂದಿತೂ, ಕುಡ್‌ಚಿತೂ ಮರತ್‌ರಡಿಲ್ ಉರ್‌ಂಡಿ ಪೋಚಿ. ಚೆನ್ನ ಕಮ್ಮಿ ಕುಡ್‌ಚಯಿಂಗ ಇಸ್ಪೇಟ್ ಕಳಿ ಸುರು ಮಾಡ್‌ಚಿ. ಬೈಟ್ ಅಂಜಿ ಗಂಟೆಕ್ ಎಲ್ಲಾ ಪೊಳೆಲ್ ಕಾಲ್ ಮೂಡ್ ಕತ್ತಿತ್ ಮನೆಕ್ ಪೊರಟತ್. ಪೊನ್ನು, ಬೊಳ್ಳು ಕಳ್ಳರ ಚೋದರ್‌ಂಜ್‌ಲೇಂಗಿಯೂ, ಬೋಂಡಿಯಚ್ಚಕ್ ತಿಂದತ್. ಪೊಳೆಲ್ ಕುಳ್‌ಚತ್. ಭಾರಿ ಕುಶಿಪಟ್ಟತ್. ಕಳ್ಳ ಕುಡ್‌ಚಯಿಂಡ ತಮಾಸಿ ಕಳಿ ಕಂಡಿತ್, ನಂಗಳೂ ಒಮ್ಮೆನ್ನಂಗ್ ಕುಡ್‌ಚಿ ನೋಟುವಕಾಗಾಂದ್ ಮನಸ್‌ರೊಳಲೇ ಚೆರಿಯೋರ್ ಆಸೆ ಮೊಳತತ್. ಆಚೇಂಗಿ ಚೆರಿಯ ಮಕ್ಕಕ್ ಅನ್ನತ ಧೈರ್ಯ ಬಂದ್‌ಲೆ. ಎಲ್ಲಾಂಗೂಡಿ ಅಂದೋರ್ ವಿಶೇಷ ನಮ್ಮೆ ಕಯಿಚಿತ್ ಬಂದದ್ ಮಾತ್ರ ಮಕ್ಕಡ ಮನಸ್ಸಲ್ ಮಾಜತೆ ನಂದತ್.

ಪಿತ್ಯಾಂದ್ ಸ್ಕೂಲ್‌ಲ್ ಪ್ರಾರ್ಥನೆ ಆಪದು, ಬೊಳ್ಳು, ಪೊನ್ನುಕ್ ಹೆಡ್ಡಾಸ್ಪರಾಡ ಬುಲಾವ್ ಬಾತ್. ಅಯಿಂಗಡ ಕರ್ ಒಮ್ಮೆ ನೆಟ್ವಚಿ. ಆಪದಾಡ್‌ಂದ್ ಧೈರ್ಯತ್‌ಲ್ ಪೋಚಿ.

"ಎನ್ನಂಗ್‌ರೆ ಪೊನ್ನಪ್ಪ ನಿನ್ನಾಂದ್ ಸ್ಕೂಲ್‌ಕ್ ಬಂದಿತಿಲ್ಲೆ? ನಿಂಗ ಅಣ್ಣ ತಮ್ಮಣ್ಣಂಗ ಎಲ್ಲಿಕ್ ಪೋಯೆ"ಂದ್ ಹೆಡ್ಡಾಸ್ಪರ್ ಕೇಟತ್.

"ಸರ್, ನಿನ್ನಾಂದ್ ನಾಡ ಪಪ್ಪಂಗ್ ಎತ್ತ್ ಕುತ್ತಿತ್ ಬೂಕಿತ್ ಗಾಯ ಆಯಿ ಪೋಚಿ. ಅಮ್ಮನೂ, ನಾನೂ ಆಸ್ಪತ್ರೆಕ್ ಕೂಟಿಯಂಡ್ ಪೋಯೆ"ಂದ್ ರೆಡಿಮೇಡ್ ಜವಾಬ್ ಬುಟ್ಟತ್. ಪಾಪ, ಪಡಿರ ಮರೆಲ್ ತಮ್ಮಣ ಬೊಳ್ಳುರ ವಿಚಾರಣೆ ನಡತಿತ್ ಸಂಗತಿನೆಲ್ಲ ಪೊರ ಬೂಕ್‌ನದ್ ಪೊನ್ನುಕೆನ್ನು ಗೊತ್? ತಾಂಡ ಮಾಮೂಲ್ ಪೊಟ್ವಲ್ ಹೆಡ್ಡಾಸ್ಪರ್‌ನ ಕೊಡ ಮರಿಕಲೂಂದ್ ಗೇನ ಮಾಡಿತಿಂಜತ್.

ಪತ್ತಿ ಕಯಿಪಲ್ಲಿಕ್ ಪೋನ ಅಪ್ಪಂಗಡ ಪಿತ್‌ಲಾಟಿ ಮಕ್ಕ ನಡ್‌ಂದ ಸಂಗತಿನ

ನಾವುರ ತುದಿಲ್ ನೇತಿಯಂಡ್ ಬಂದಿತ್ ಮಾಸ್ಪರ್ಕ್ ವರದಿ ಮಾಡಿತಿಂಜತ್! ಬೊಳ್ಳುರೊ, ಪೊನ್ನೂರೊ ಚಣ್ಣೆನ ಚುಟ್ಟು ಬಾಳೆನ್ನೆಕೆ ಮಾಡಿತಿಂಜತ್ ಆ ಪುಚ್ಚ ಹೆಡ್ಡ್ ಮಾಸ್ಪರ್ಕ್! ಮಾಸ್ಪರ್ಡ ತಲ್ಲಾಕ್ಂಞಿ ಮಕ್ಕಡ ಚೇಷ್ಟೆ. "ಪತ್ತಿಕಾರ" ಎಣ್ಣುವ ಅಡ್ಡ ಪೆದ. ಇಂತದೆಲ್ಲ ಮಕ್ಕಳ ಮಂಡತಾತಿ ನಡಪನ್ನೆಕೆ ಮಾಡಿರ್ತ್.

ಪಂಡೇ ಅಚ್ಚಕ್ ಉಶಾರ್. ಅದಂಡ ಕೂಟ್ಕ್ ಇದೋರ್ ಕೇಳಿ ಕೂಡಿರೊಂಜಿ, ದಂಡಾಳು ಸ್ಕೂಲ್ಕ್ ಒಳಿಪಕ್ ಸುರು ಮಾಡ್ಚಿ. ಸ್ಕೂಲ್ಕ್ ಪೋನಕಲೂ ಅಲ್ಲಿ ವರಂಗಟ್ಟಂಡ್, ದಾಡ ಕೂಟ್ಕೂ ಕೂಡತೆ, ತೆರ್ಪ ಇಪ್ಪಯಿಂಜತ್. ಪರೀಕ್ಷೆ ಬಪ್ಪಕ ಅಪ್ಪಂಗ ಚೆನ್ನ ವರ್ಕ್ ಬುಟ್ಟಿತ್ ಸ್ಕೂಲ್ಕ್ ಪೋಯಿತ್, ಅರೆ ತೆಳಿ ತೆಳಾಚಂಡ್ ಮಾಸ್ಪರ್ಕ್ ದಮ್ಮಯ್ಯ ಇಡುವದುಂಡಲ್ಲ! ಅಕ್ಕ ಉಪಾದ್ರಿಯ ಏದೇಂಗೋರ್ ತರತಾರ ಮುಲಾಜಿಲ್ ಕೆಣ್ಂಜಂಡ್, ಸ್ಪಾರ್ಟ್ ಆಗತ ಜೀಪ್ನ ನೂಕಿತ್, ವರ್ಕ್ಶಾಪ್ಕ್ ಇಟ್ಟನ್ನೆಕೆ, ಇನ್ನತ ತಳ್ಳಿ ಮೋಡೆಲ್ ಮಕ್ಕಳ ಪಡನೆಟ್ಟಿ ಪುಡ್ಚಿ ನೂಕಿತ್ ಕೊಡಿಯತ ಕ್ಲಾಸ್ ಅಳಪ್ಚಿರುವ. ಅಕ್ಕ ಮಕ್ಕ ನಾನೂ ಪಾಸಾಯಿಟಿಂದ್ ಒನ್ನಾಂದ್ ದಂಡ್ ದಿನ ಕುಶಿಪಟ್ಟವ. ಅನ್ನನೆ ನೂಕಿತೂ, ಈತಿತೂ ಬೊಳ್ಳು ಏಳಾಂಗೂ, ಪೊನ್ನು ಎಟ್ಟಾಂಗೂ ಎತ್ತಿ ಪೋನದೋರ್ ಪವಾಡ!

ಒನ್ನಾಂದ್ ಚೆನಿಯಾಚೆ ಬೈಟಾಪಕ ಮೊಯ್ಲು ಮಾಪಳೆ ತಿಮ್ಮಯ್ಯಂಡ ಮನೆಕ್ ಬಾತ್. ಮಾಪಳೆರ ಮೂಡ್ ಅಂದ್ ಓರ್ ತರಾ ಉಂಡ್! ಮೊಯ್ಲುರ ಕೈಂಜಿ ತಿಮ್ಮಯ್ಯ ಓರ್ ಬೀಡಿ ಕೇಟಿತ್ ಕತ್ತಚಿಟ್ಟಂಡ್ "ಎನ್ನ ಮೊಯ್ಲು, ಇಚ್ಚ ನೇರಕ್ ಬಂದಿಯಾ? ನೀನ್ ಕಾರ್ಬಾರ್ ಬುಟ್ಟಿತ್ ಬಪ್ಪಂವನಲ್ಲಲ್ಲಾ....?"ಂದ್ ಕೇಟಿತ್.

ಮೊಯ್ಲು ತಕ್ಕನ ಎರಕಿಯಂಡ್ ಎರಕಿಯಂಡ್, ಕುತ್ತೂಮರಿಯೊ ನೋಟಿತ್, "ತಿಮ್ಮಯ್ಯ ಮೋಲಿ, ನಿಂಗಡ ಮಕ್ಕ ಇನ್ನಾಂದ್ ಸ್ಕೂಲ್ಕ್ ಪೋಯಿತಿಂಜತಾ?"ಂದ್ ಕೇಟಿತ್.

"ಪಿಂಞ, ಅವು ಸ್ಕೂಲ್ಕ್ ಪೋತೆ ಇಪ್ಪದುಂಡಾ? ಮನೆ ಪೆಣೆಕೆಣ್ಣಾನಕ ಚೆನ್ನ ತರ್ಕ ಮಾಡು. ಆಚೇಂಗಿ ಸ್ಕೂಲರ ಕಾರ್ಬಾರ್ಲ್ ಮಾತ್ರ ಬೋರೆ ಪೋಲಿ ಮಕ್ಕಳನೆಕೆ ಒಳಿಪದಾಡ್, ಪರೀಕ್ಷೆಲ್ ಫೇಲಾಪದಾಡ್ ಅಯಿಂಗಕ್ ಗೊತ್ತೇ ಇಲ್ಲೆ. ಅದಿರಡ್, ನೀನ್ ಬಂದನೆಕೆ ಎನ್ನಾಂಗ್ ಅನ್ನನೆ ಕೇಟಿಯಾ"ಂದ್ ಕೇಟಿತ್, ತಿಮ್ಮಯ್ಯ.

"ನಿಂಗ ಚೆಡಿ ಮಾಡಿಯವತಿ, ಇನ್ನಾಂದ್ ಬೊಳ್ಳಾಚೆ ಮಜ್ಜಣ ನಾನ್ ಪಳ್ಳಿಕ್

ಪೋಯಿತಿಂಜ. ಬಂದಿತ್ ನೋಟಣೆ ಮುಟ್ಟೆ ಇಡುವಕ್ಂದ್ ಬಲ್ಂಜಿಲ್ ಮುಚ್ಚಿತ್ ಪೋನ ಮುಟ್ಟೆ ಪೋಡೆ ಕಾಂಬಲ್"..... ಎಣ್ಣೆತ್ ತಕ್ಕೇ ನಿಂದಿತಿಲ್ಲೆ.

ಮಾಪಳೆರ ತಕ್ಕನ ಕೇಟಂಡಿಂಜ ಅಪ್ಪಿ, ನರಿಪೂದನ ಕೆಟ್ಟನ ಮಲಿಯನೆನ್ನಕೆ ಕಯ್ಯಾಲೆಕ್ ಪಾರಿತ್ "ನೀಡ ಪೋಡೆ ಕಾಣತಾಂಗೂ, ನಾಡ ಮಕ್ಕಕೂ ಎನ್ನ ಸಮ್ಮಂಧ? ನೀಡ . . . . ಬುದ್ಧಿ ನಾಡ ಕೂಡ ಕಾಟುವಿಯಾ? ನೀನೇ ಕಳ್ಳ. ಇಂಞೊಮ್ಮ ಈ ತಕ್ಕ ಪರಿ. ನೋಟ್, ಕಾಟತಪ್ಪಿ ಕಳ್ಳ ದಾರ್ಂದೆಣ್ಣಿ ವಾನ'ಂದ್ ಊರ್ ರ ಪಾದಿಕ್ ಕೇಪನ್ನಕೆ ಅರ್ಂದ್ ರತ್!

ಮಾಪಳೆ ಸಮಾಧಾನತ್ಲೆ "ಅನ್ನನೆ ನಾನ್ ಎಣ್ಣೆತಿಲ್ಲೆ ಅಪ್ಪ. ನಿಂಗನ್ನಂಂಗ್ ಚೆಡಿ ಮಾಡುವಿರಾ? ಇನ್ನಂದ್ ಸ್ಕೂಲಾರ ಏಳೆಟ್ಟ್ ಮಕ್ಕ ಸ್ಕೂಲಾಕ್ ಪೋಯಿತಿಲ್ಲೆಲೊ. ಮಕ್ಕ ಎಲ್ಲ ಕೂಡಿಯಂಡ್ ಮೇಕಟ್ಟ್ ಪೋಳೆರ ಮಾವು ಕುಂಡ್ ರ ಬರಿಲ್ ಕಾಡ್ ಕಂಬಳ (ಪತ್ತಿ ಕೈಪೊ) ಮಾಡಿತ್ಲೊ. ಮೂಂದ್ ಕೋಳಿ, ಕಳ್ಳ, ಅವಲಕ್ಕಿ ಎಲ್ಲ ಮಾಡಿತಿಂಜತ್ಲೊ. ಇದ್ ನ ಕಂಡ ಬೋರೆ ಮಕ್ಕ ಮಾಸ್ತುಕ್ ಎಣ್ಣೆತ್ ಇಂದ್ ವಿಚಾರಣೆ ನಡತ್ ಚೆಲೊ. ನಿಂಗಡ ಎಳಿಯಂವೊ ತಲ್ಲರ ಉರಿ ತಡ್ ಪಕಯ್ಯತೆ ಬಾಯಿ ಬುಟ್ಟಾರ್ ತಲೊ. ನಿಂಗಡ ಮೋವಂಡ ಕೂಪದಿ ಬಟ್ಟ ಮನೆಲ್ ಉಂಡಾಂದ್ ನೋಟಿ. ಅದ್ ಪೋಳೆರ ಕರೆಲ್ ಕಟ್ಟನಾನ ಬೋರೆ ಮಕ್ಕ ಹೆಡ್ ಮಾಸ್ತುಕ್ ಕೊಡತಿತ್. ಅದಲ್ ಚೆನ್ನ ಚುಟ್ಟಿ ಕೋಳಿ ತುಂಡೂ ಇಂಜಿತ್. ಹೆಡ್ ಮಾಸ್ತುಕ್ ನನ್ನ ಕಾಕಚಿಟ್ಟಿತ್ ಮುಟ್ಟೆಪೋಡೆ ಕಾಣತಾಯಿತಾಂದ್ ಕೇಟತ್. ಈ ಸಂಗತಿನ ನಿಂಗಕ್ ಎಣ್ಣೆತ್ ಪೋಕ, ಚೆನ್ನ ಎಚ್ಚರ ಎಡ್ತೋಳೀಂದ್ ಎಣ್ಣಿವಕ್ ಮಾತ್ರ ನಾನ್ ಬಂದಿಯೆ"ಂದ್ ಎಣ್ಣೆಚಿ.

ಕುಡ್ಕೆರ ಅಡಿ ಒಡ್ಂದಿತ್, ಕತ್ತುವ ಒಲೆಕ್ ನೀರ್ ಬುದ್ಧಿತ್ ತಿತ್ ಅಗ್ಗನೆನ್ನಕೆ ಅಪ್ಪಿರ ಉರಿ ತಣ್ಂಜಿತ್ ಐಸ್ ಕೆಟ್ಟಿಪೋಚಿ!

"ದಮ್ಮಯ್ಯ, ಮೊಯ್ಯ, ದಾಕೇಂಗಿ ಎಣ್ಣೆರತೆ. ಇನ್ನಂದ್ ಮಕ್ಕ ಬಪ್ಪಕ ಇರ್ತಾನದ್ ನೇರೆ. ಸ್ಕೂಲಲ್ ಹಾಕಿ ಮ್ಯಾಚ್ ಇಂಜಾಂಗ್ ತಡುವಾಚಿಂದೆಣ್ಣೆಚಿ. ಸ್ಕೂಲಲ್ ಟೀ ಪಾರ್ಟ್ ಇಂಜತ್. ಕೂಳ್ ಬೋಂಡಾಂದ್ ದಂಡಾಳೂ ಉಂಗತೇ ಬುದ್ಧಂಡದೂ ನೇರೆ. ಇಂದ್ ಇಚ್ಚೆ ನೇರ ಆಚಿ. ಇಂಞೊ ಮನೆಕ್ ಬಂದಿತಿಲ್ಲೆ. ನೀಡ ಕೋಳಿ ನಾನ್ ತಪ್ಪಿ"ಂದ್ ಎಣ್ಣೆತ್ ಮೊಯ್ಯನ ಸಮಾಧಾನ ಮಾಡ್ಚಿ.

"ಕಾಂಬಾ ನಿಂಗ ಅಪ್ಪಂಗಡ ಪತ್ತಿ ಕಯಿಕ್ಲಾನಗುಂಡ್ ಮಕ್ಕ ಏದ್ ಬಟ್ಟೆ ಇಕ್ಕಲೇ



ಪುಡ್‌ಚಿತ್"ಂದ್ ಅವ್ವಿ ವಡಿಯಂಡ ಕೂಡ ರೇಗ್‌ಚಿ. ಮಕ್ಕ ಕಳ್ಳಂಗಳೆನ್ನಕೆ ಮನೆಕ್ ಬಂದಿತೆತ್ತುವಕ ಅಪ್ಪನವ್ವನೂ ದಂಡಾಳೂ ಮಕ್ಕ ಬೊತ್ತಿಯವುಂದ್ ನಡ್‌ಂದ ಸಂಗತಿನ ಮಕ್ಕಕ್ ಎಣ್ಣೊನದೂ ಇಲ್ಲೆ. ಅಯಿಂಗಳ ಕೇಟದೂ ಇಲ್ಲೆ.

ತಿಮ್ಮಯ್ಯಂಡ ತೋಟತರ ಬರಿಲೇ ಪೈಸಾರಿಲ್ ಮನೆ ಕೆಟ್ಟಿಯಂಡಿಂಜ ಜೋಸೆಫ್‌ರಲ್ಲಿಂಜಿಯೆ ತಿಮ್ಮಯ್ಯಂಗುಳ್ಳ ಕಳ್ಳ ಸಪ್ಪೆ. ಇಡೀ ಊರಾರ ಪಾದಿಕ್ ಜೋಸೆಫ್ ಒಬ್ಬನೇ ಸಪ್ಪೆ ಮಾಡುವಯಿಂಜತ್. ಒನ್ನಾಂದ್ ತಿಮ್ಮಯ್ಯ ಮೋಂವೊ ಪೊನ್ನುನ ಕಾಕಿತ್, "ಪೋ ಮೋನೆ, ಜೋಸೆಫ್‌ರಲ್ಲಿಂಜಿ ಓರ್ ಕುಪ್ಪಿ ಕಳ್ಳ ಕೇಟಂಡ್ ಬಾ. ದುಡ್ ಪಪ್ಪ ನಾಳೆ ತಪ್ಪಾಲೊಂದೆಣ್ಣೆ" ಎಣ್ಣೆತ್ ಅಯೆಚತ್.

ಊರಾರ ಎಚ್ಚ ಬಲ್ಯ ಕುಳಕಾರನಾನಕಲೂ, ಜೋಸೆಫ್‌ರ ಪಕ್ಕ ಸಾಲ ವ್ಯಾಪಾರ ಮಾತ್ರ ಇಂಜಾಲೆ. ಕ್ಯಾಶ್ ಅಂಡ್ ಕ್ಯಾರಿ ಬಿಸಿನೆಸ್ ! ಪೊನ್ನು ಖಾಲಿ ಕುಪ್ಪಿ ಎಡ್‌ತ ಬಂದಿತ್ ಐಮರತ್‌ಲ್ ಕುಕ್ಕಿತ್, "ಪಪ್ಪ ಇಂಞಿ ಮಾತ್ರ ಅವಂಡಲ್ಲಿಕ್ ನನ್ನ ಅಯಿಕತೆ. ಅವಂಡ ಮನೆಲ್ ಸುಮಾರ್ ಕೊಡವ ಅಳತಿಂಜತ್. ಅಯಿಂಗಳ ಎದಿಕೆ ನೀಡ ಅಪ್ಪ ಕಯಿಂಜ ತಿಂಗ ಅರೆ ಕುಪ್ಪಿ ಕುಡ್‌ಚಾಂಡ ದುಡ್ ತಂದಿತಿಲ್ಲೆ. ದುಡ್ಡಿಲ್ಲತೆ ಕಳ್ಳ ತಪ್ಪಾಲೊಂದೆಣ್ಣೆ ಪೋಂದ್ ಎಣ್ಣೆಚಿ"ಂದ್ ಮೊರಟತ್.

"ಉಯಿ ಶಿವಾ, ಅವಂಡ ಚೊಕ್ಕೇ? ಅವನ ಪೈಸಾರಿಲ್ ಮನೆ ಕೆಟ್ಟುವಕ್ ಎಣ್ಣೊನವನೇ ನಾನ್. ಮನೆಕುಳ್ಳ ಬುಟ್ಟಿ ಕಬ್ಬು ಎಲ್ಲ ಕೊಡ್‌ತಿತ್ ಬಣ್ಣೆ ಪಿಲ್ಲೂ ಕೊಡ್‌ತ. ಇಕ್ಕ ಪಣ ಚೊಕ್ಕುವಕ ನಾಕೇ ತಿರಿತ್ ನಿಂದತಲ್ಲ. ಇಂಞಿ ಅವಂಡಲ್ಲ ಕಳ್ಳಕ್ ನಾನ್ ಕೊಡವನಾಚೇಂಗಿ ಪೋಪಾಲೆ"ಂದ್ ಆಣೆ ಇಟ್ಟಿತ್; ಪೇಟೆಕ್ ಪೋಯಿತ್, ಅಂಜಿ ಕೆ.ಜಿ. ಪೊಡಿ ಬೆಲ್ಲ ಎಡ್‌ತಂಡ್ ಬಂದಿತ್ ನೀರ್‌ಕಟ್ಟಿತ್. ಬ್ರೆಡ್ ಚೂರ್, ಸಲ್ವೇಟ್ ಎಲ್ಲ ಇಟ್ಟಿತ್ ಅಂಜನೆ ದಿನಕ್ ಭಟ್ಟಿ ಉಳ್‌ಪುವಕ್ ರೆಡಿ ಮಾಡಿರ್‌ತ್. ಜೋಸೆಫ್ ಮಾಡುವಾನೆಲ್ಲ ನೋಟೊನ ಅನುಭವ ಇಂಜಾನಗುಂಡ್, ತಿಮ್ಮಯ್ಯಂಡ ಪ್ರಯೋಗಾಲಯತರ ಉತ್ಪತ್ತಿರ ಗುಣಮಟ್ಟ ಚಾಯಿಲೇ ಇಂಜತ್.

ಮಕ್ಕ ವರಾನ್ ಪಿಂಞ ತಿಮ್ಮಯ್ಯನೂ, ಅವ್ವಿಯೂ ತಂಗಡ ಸ್ವಂತ ನೈಪುರ ಫಲತನ ಕುಡ್‌ಚಿತ್ ಕುಸಿಪಟ್ಟಿತ್. ಜೋಸೆಫ್‌ರ ಅಹಂಕಾರಕ್ ಸೆರಿಯಾನ ಬುದ್ಧಿ ಪಡ್‌ಪ್‌ಚಿಟ್ಟಿಂದ್ ತಾಂಡ ಬೆನ್ನಿನ ತಾನೇ ತಟ್ಟಿಯಂಡ್ "ಈ ಮಾಲ್ ಎನ್ನನೆ ಉಂಡ್ ಅವ್ವಿ"ಂದ್ ಕರ್‌ಂದೊಳಿ ತೆಳೆಚಂಡ್ ಪೊಣ್ಣೊನ ಕೇಟತ್. ಅವ್ವಿಯೂ ನಲ್ಲ ಚೋದರಾಂಜವಳೆ!

"ಆ ಕ್ರಿಸ್ತಾನಿರ ಬ್ಯಾಟ್ರಿ, ಕೋಳಿತ್‌ಲೆಟ.... ಇಟ್ಟಿತ್ ಮಾಡ್‌ನಾಂಗೊಂದು ಕಡೆ ಇಲ್ಲೆ. ಅವಂಡದ್ ಎರಕುವಕ ತೊಂಡೆಕ್ ಕುತ್ತುವ. ಇದ್ ನಲ್ಲ ಬ್ರಾಂಡಿ ಕುಡ್‌ಚನ್ನೆಕ್ ಆಪಾ"ಂದ್ ಫಿಟ್‌ನೆಸ್ ಸರ್ವಿಫಿಕೇಟ್ ಕೊಡ್‌ತತ್. ಕೂಡೆನ್ನೆ" ಅಲ್ಲಾ ಆರ್ ಕುಪ್ಪಿ ಕ್ಕಟ್ಟಿತಲ್ಲ. ಎಲ್ಲ ಕುಡ್‌ಚಿತ್ ತೇತರ್‌ತಿ. ಬೆಲ್ಲಕ್ ಕೊಡ್‌ತ ಅಸ್‌ಲೇಂಗಿ ಬರಂಡ್? ಮೂಂದ್ ಕುಪ್ಪಿನ ಕೂಪ್ ಪಣಿಕಾರಕ್ ಮಾರ್‌ನಕ ಆಪಾಲಿಯಾ"ಂದ್ ನಲ್ಲೋರ್ ಸಲಹೆ ಕೊಡ್‌ತತ್.

ಓರ್ ತಿಂಗತ್‌ರೊಳ್‌ಲಾ ತಿಮ್ಮಯ್ಯಂಡ ಮನೆರ ಪುದಿಯ ಗುಡಿ ಕೈಗಾರಿಕೆ ನಲ್ಲ ಲಾಭತರ್ ಬಟ್ಟೆ ಪುಡ್‌ಚತ್. ತಿಮ್ಮಯ್ಯಂಡ ಪ್ರಾಡಕ್ಟರ್ ಕ್ವಾಲಿಟಿ ಕಂಟ್ರೋಲ್ ಆಫೀಸರ್, ಸೇಲ್ಸ್ ಮೇನೇಜರ್, ಎಕೌಂಟೆಂಟ್ ಎಲ್ಲ ಅವ್ವಿಯೆ. ಕಾಫಿ ಗಿಡತರ್ ಮೊರಡ್‌ಲೆಲ್ಲ ಚೆರಿಯ ಚೆರಿಯ ಕುಂಡ್ ಮಾಂದಿತ್, ಕೊಕ್ಕಲೆ ಮುಚ್ಚಿತ್ ಹೋಲ್‌ಸೇಲ್ ಗೋಡೌನ್ ಮಾಡಿಯಂಡತ್. ರಿಟೇಲ್ ಸೇಲ್‌ಕ್ ಬೋಂಡಿಯಾನ ಮಾತ್ರ ಪುಳ್ಳಿ ಕೀಲ್‌ಲೊ, ಪಿಲ್ ಮುಂಡತ್‌ಲೊ ಬೆಚ್ಚವಯಿಂಜತ್. ವಡಿಯಂಗೂ, ಪೂಣ್ಣ್‌ಕೂ ಪುಲ್ ಟೈಂ ಜಾಬ್ ಆಯಿರ್‌ತ್. ಮನೆರ ಪಣಕಾಸಾರ ತಾಪತ್ರೆಯೆಲ್ಲ ನೀಂಗ್‌ಚಿ. ಮನೆಕ್ ಬೋಂಡಿಯ ಕಟ್ವ ಕಡಿಕೆ, ಬಿರಿಪಕ್, ಪೊದ್‌ಪಕ್, ಮಕ್ಕಕ್ ಬಟ್ಟೆಬರಿ ಎಲ್ಲ ಮಾಡಿಯಂಡತ್.

ಇದ್‌ಂಡಡೆಲ್, ಮೋವ ತಂಗಿಕ್ ಎಸ್.ಎಸ್.ಎಲ್.ಸಿ. ಲ್ ಓರ್ ಕಂಠಕ ಉಂಡ್‌ಂದ್ ಕುರ್‌ಮಾಮ ಶಾಸ್ತ್ರ ಎಣ್ಣೆನದ್ ನೇರಾಯಿ ಪೋಚಿ. ನಾಲ್ ಪಾರ್ಟ್ ಪೋಯಿತ್ ಮನೆಲಳ್‌ತತ್. ಕೇಟಯಿಂಗ್‌ಕೆಲ್ಲ ಓರ್ ಪಾರ್ಟ್‌ಲ್ ಓರ್ ಮಾರ್ಕ್ ಪೋರತಾಯಿರ್‌ತ್‌ಂದ್ ಕಾರಣ ಎಣ್ಣೆಯಂಡ್ ಸುಧಾರ್‌ಚಿಟ್ಟತ್. ತಂಗಿ ತೆಳ್‌ಂಗಿಯಂಡೂ, ಮಿನ್‌ಂಗಿಯಂಡೂ ಬಾತ್. ನಲ್ಲ ತಂದ್ ಬಂದಕ ಉಳ್‌ಪಿರನಾಂದ್ ಮೋವಕುಳ್ಳ ಮಾಲ್‌ಮುಟ ಮಾಡ್‌ಚಿಡುವಕ್ ಸುರು ಮಾಡ್‌ಚಿ.

ಒನ್ನಾಂದ್ ಅವ್ವಿ ತಿಮ್ಮಯ್ಯನ ತೇಂಡಿತ್, "ಅಲ್ಲಾ, ಕೇಟಿರಾ.... ಪೊನ್ನು ಕ್ಕಣ್ಣ ಎಟ್ಟನೇ ಕ್ಲಾಸ್ ಪರೀಕ್ಷೆಕೇ ಅಳತಿಲ್ಲೆಂದ್ ಗಪ್ಪು ಬಾವಂಡ ಮೋಂಪೊ ಎಣ್ಣೆಚಲ್ಲ. ಪೊನ್ನುನ ಕೇಪಕ ಪಾಸಾಯೆಂದ್ ಎಣ್ಣೆರ್‌ತ್. ಒಮ್ಮ ನಿಂಗಲೇ ಸ್ಕೂಲ್‌ಕ್ ಪೋಯಿತ್ ಕೇಟಿತ್ ಬಾರಿ"ಂದ್ ಎಚ್ಚರ ಕೊಡ್‌ತತ್.

"ನಾಕೊಂದು ಕಯ್ಯ, ಕಯ್ಯವೆಂಗಿ ನೀನೇ ಪೋಯಿತ್ ಕೇಳ್. ಅಂವೊ ಪಾಸಾಯಿತ್ ಪಾರ್ತಾರನೊ, ಸುಭೆದಾರನೊ ಆಪದ್ ಅಚ್ಚಕಾಲೆ ಉಂಡ್" ಎಣ್ಣೆತ್ ಆ

ವಿಷಯ ಅಲ್ಲಿಕೇ ಬುಟ್ಟಿತ್. ಅಪ್ಪಂಡವ್ವಂಡ ಕಾರ್ಬಾರ್ಕ್ ಮೋವಂಡ ಸಹಾಯ ಇಲ್ಲತೆ ನೀಸುವಕೂ ಕಷ್ಟ ಆಪಯಿಂಜತ್. ಇಚ್ಚಕಾಕಣೆ ಪೊನ್ನು ಅಪ್ಪಂಡ ಮಟ್ಟಿಕ್ ಎತ್ತಲೇಂಗಿಯೂ ಅವ್ವಂಡ ಸೆರಿಕ್ ಎರಕುವಕ್ ದಾಡದೂ ತರಬೇತ್ ಇಲ್ಲತೆ ಪಡ್ಚಿ ತಿಂಜತ್.

ತಿಮ್ಮಯ್ಯಂಡ ಮನೆ ಇಕ್ಕ ಓರ್ ಸರ್ವಧರ್ಮ ಸಮನ್ವಯ ಕೇಂದ್ರ ಆಚಿ. ತಿಮ್ಮಯ್ಯಂಡಲ್ಲಿ ಮತಭೇದ, ಜಾತಿ ಭೇದ, ಮೇಲ್ ಕೋಳಾರ ಭೇದ, ಬಲ್ಯಂವೊ, ಬಡವೊ ಎಣ್ಣುವ ಭೇದ . . . . . ಒಂದೂ ಇಲ್ಲತೆ, ಅದೋರ್ ಆದರ್ಶ ಧಾರ್ಮಿಕ ಕೇಂದ್ರವೇ ಆಯಿ ಪೋಚಿ. ಕಳ್ಳಕ್ ಬಂದ ಗಿರಾಕಿಯ ಪಲಂಬ್ಟ್ಟಂಡ್ ಇಸ್ಪೇಟ್ ಕಳಿಪದ್ ಮಾಮೂಲಾಯಿಪೋಚಿ. ಇಸ್ಪೇಟ್ಲ್ ತಿಮ್ಮಯ್ಯಂಗ್ ಬಲ್ಯ ಅದೃಷ್ಟ ಇಂಚ್ ಲೇಂಗಿಯೂ, ಅವ್ವಿ ಪಿಂಞ ಪೊನ್ನುಕ್ ನಲ್ಲ ಕಳಿ ಬೂವಯಿಂಜತ್. ಕಳ್ಳರ ಕೂಟ್ಕ್ ಇದೂ ಓರ್ ನಲ್ಲ ಬರುರ ಬಟ್ಟೆ ಆಚಿ. ತುರ್ಕಡ ಓರ್ ಗಾದಿ ಉಂಡ್. ದೇವ ತಪ್ಪಕ ಕುಂಡಿಕ್ ಚವುಟಿ ಚವುಟಿ ತಪ್ಪಾಂದ್. ಅನ್ನನೆ ಇಕ್ಕ ತಿಮ್ಮಯ್ಯಂಡ ಮನೆಲ್ ಬರ್ಕತ್ ರ ಪಡಿ ತೊರಂದ್ ಪೋಚಿ! ಇದ್ಂಡಡಲ್ ಓರಂದ್ ಬಾಲೆಕಾರ ಕಳ್ಳ ಕುಡಿಪಾಲೆ, ಇಸ್ಪೇಟೂ ಕಳಿಪಾಲೆ. ಇಂಞಂತಂಗಾಯಿತ್ ಬಂದಿತ್ ಅಲ್ಲಿ ಪಡ್ಬೂವಂಜತೋ ಆ ಶಿವಂಗೇ ಗೊತ್ತ್ !

ಓರ್ ಪೋಲೀಸ್ ರೈಟ್ರೂ, ಓರ್ ಪೋಲೀಸ್ ಕಾರನೂ ಎಕ್ಕೋಲು ಬಂದಿತ್, ಕೆಲದುಂಬ ಕಾಸ್ ಕೊಡ್ಕತೆ ಕುಡ್ಚಂಡ್ ಪೋಪಯಿಂಜತ್. ತಿಮ್ಮಯ್ಯಂಡ ಉದ್ಯೋಗಕ್ ಅದೋರ್ ಲಾಭ. ಎನ್ನಂಗ್ಂದೆಣ್ಣೆಚೇಂಗಿ, ಮನೆಪಾರಕ್ ನಾಯಿ ಚಾಕ್ನೆನ್ನೆಕೆ ಈ ಪೋಲೀಸ್ ಕಾರ. ಎನ್ನೇಂಗಿ ಅಪಾಯ ಉಂಡ್ಂದಾನಕ ಮಿಂಞಲೇ ಸುಂಯಿಕ್ ಕೊಡ್ತರುವಯಿಂಜತ್.

ಎಲ್ಲಾಡೊ ನಾಟಿಕ್ಳ್ಂಜಕ, ತಿಮ್ಮಯ್ಯಂಡ ಬೇಲ್ಕ್ ಎತ್ತ್ ಕೆಟ್ಟನದೇ ಇಲ್ಲೆ. ಕಂಡವು "ಎನ್ನ ತಿಮ್ಮಯ್ಯಣ್ಣ ಬೇಲ್ ಪಡ್ಬುಡುವದಾ"ಂದ್ ಕೇಟಕ "ಇಲ್ಲೆ ಒಮ್ಮೆ ಕೆ ಟ್ರಾಕ್ಟರ್ ಪೊಯಿಚ್ಚಿತ್, ಟಿಲ್ಲರ್ಲುತ್ತಿತ್ ಎಟ್ತ್ ದಿನತ್ಲಾ ನಟ್ಟಕ ಪೋರಾ...? ನೋಟಿಯಂಡಿರ್"ಂದ್ ಡಂಬಾಸ್ ಎಳಕುವಯಿಂಜತ್. ಆಚೇಂಗಿ ವಡಿಯನೂ, ಪೊಣ್ಣೂ ಭೂಮಿ ನಡ್ಪದ್ ಬೋಂಡಾಂದ್ ತೀರ್ಮಾನ ಮಾಡಿತಿಂಜತ್. ದಂಡ್ ದೋಣಿಲ್ ಕಾಲ್ಟಂಡಕ ಕರೆ ಪತ್ತುವ ಕಯ್ಯಲೆ. ಕೈಲ್ ಕಾಸ್ ಉಂಡೇಂಗಿ ಅಕ್ಕಿಕ್ನ್ನ ಬರ ಎಣ್ಣುವ ತತ್ತ್ತ್ಲಾಲ್ ಭೂಮಿ ಪಡ್ಬುಟ್ಟಿತ್.

ಪ್ರೊಡಕ್ಷನ್ ಸೈಡ್, ಮಾರ್ಕೆಟಿಂಗ್ ಸೈಡ್‌ನಲ್ಲ ಇಕ್ಕ ಪೊನ್ನವೇ ನೋಟಿಯವಚ್ಚಕ್ ಅನುಭವ ಪಡ್‌ಂದಂಡತ್. ಪೈಸಾರಿ ಜೋಸೆಫ್‌ರ ಪಾದಿಕ್ ಪಾದಿ ಗಿರಾಕಿಯ ಈ ಬರಿಕ್ ಪಾಂಜತ್. ಜೋಸೆಫ್‌ರ ಪಿತ್ತ ಕೆದಾರ್‌ಚಿ! ಇಡೀ ತಾಲೂಕ್‌ರ ಅರೇಕ್ ಕಂಟ್ರಾಕ್ಟರ್ ಜೋಸೆಫ್‌ರ ಜಾತಿಕಾರನೆ. ಅನ್ನನಿಪ್ಪಕ ಈ ಕಳ್ಳ, ಡಿಪಾರ್ಟ್‌ಮೆಂಟ್‌ರ ಆಡಳಿತೇ ಅಯಿಂಡ ಜಾತಿಕಾರಡ ಆಯಿತಿಂಜತ್.

ಕೈಲ್‌ಪೋದ್‌ಕ್ ಲಾರ್ಜ್‌ಸೈಲ್ ಪ್ರೊಡಕ್ಷನ್ ಬೋಂಡು. ಅದ್‌ಂಗುಳ್ಳ ಎಲ್ಲಾ ಏರ್ಪಾಡಾಯಿತಿಂಜತ್. ಬಂದಿತ್ ಕೇಟವನ, ಮಾಲ್ ಸ್ಯಾಕಿಲ್ಲೆಂದ್ ಬಯ್ಯಕ್ ಅಯೆಚಿತ್ ನಿರಾಶೆ ಮಾಡುವದ್ ವ್ಯಾಪಾರ ನೀತಿ ಅಲ್ಲಾಂದ್ ತಿಮ್ಮಯ್ಯ ನಲ್ಲೋಣೆ ಅರ್‌ಂಜಂಡಿತಿಂಜತ್. ಚಿಬ್ಬಾರ್ ಒಂದನೆ ಬೈಟ್ ಪತ್ತ್ ಗಂಟೆಕ್ ಕಾರ್ಗಿಲ್‌ಲ್ ಭಾರತತ್‌ರ ಪಡೆ ಶತ್ರುಪಡೆನ ಸುತ್ತಗಟ್ಟಾನೆನ್ನೆಕೆ ತಿಮ್ಮಯ್ಯಂಡ ಮನೆರ ನಾಲಾಬರಿಂಜಿ ಎಕ್ಸಿಸ್ ಸ್ವಾಡ್‌ಕಾರ ಮುತ್ತಚಿ. ಅತ್ತಳ ದೊಡ್ಡಿಕಾಟುವೊ; ಇಸ್ಪೇಟ್‌ಕಾರಳೊ, ತಿಮ್ಮಯ್ಯಂಡ ಸಂಸಾರತ್‌ನೊ ಈತಂಡ ಪೋಚಿ. ಮನೆಲುಳ್ಳ ಚೆಂಬ್‌ಕಲ, ಸೇಕಲ, ಟಿನ್ನ್, ಪ್ಲಾಸ್ಟಿಕ್ ಕ್ಯಾನ್‌ನಲ್ಲ ಪೊರ್‌ಪ್‌ಚಿಟ್ಟಂಡ್ ಪೊರಟದ್ ಬರಗಾಲ ಬಂದ ಊರ್‌ಂಜಿ ಬೋರೆ ಊರ್‌ಕ್ ವಲಸೆ ಪೊರಟೆನ್ನೆಕೆ ಇಂಜತ್! ತಂಗಿರೊ, ಅವ್ವಿರೊ ಮೊರೆನ ನೋಟಿತ್ ಅಯಿಂಗಳ ಮಾತ್ರ ಬುಟ್ಟತ್.

ತಿಮ್ಮಯ್ಯಂಡ ಸೊಪನ ಎಲ್ಲಾ "ತಿರುಕನ ಕನಸು" ಆಯಿಪೋಚಿ! ಕೈಲ್‌ಪೋದ್ ನಮ್ಮ ಕಣ್ಣಿಲ್‌ಲ್ ಕೈಕತ್ತುವಕಾಚಿ! ಈ ಕೇಳಿನಗುಂಡ್ ತಂಗಿಕ್ ಬಂದಿತಿಂಜ ನಲ್ಲೋರ್ ತಂದ್ ಕೈ ತಪ್ಪಿ ಪೋಚಿ. ಮನೆಲಂತೂ ಕರ್‌ಪ ಎಮ್ಮೆ ಬರೆಬುದ್ಧಿತ್ ಚತ್ತ್ ಪೋನನ್ನೆಕೆ ಆಯಿತ್ ಕೈ ಬಾಯಿ ಕೆಟ್ಟಿಪೋಚಿ. ಮನೆಲ್ ಇಸ್ಪೇಟ್ ಕಳಿ ನಡ್‌ಂದಂಡಿಪ್ಪಕ, ಅಪ್ಪ ಮಕ್ಕಕ್ ಬೀಡಿಂಜಿ ತೊಟ್ಟಿತ್ ಕೆಲಕುಳ್ಳ ಕುರ್‌ಕ್ ತೀನಿಕೆತ್ತಣೆ ಕಾಸ್ ಕರ್ಚಿಲ್ಲೆತ್ ಕೊಟ್ಟುವಯಿಂಜತ್.

ತಿಮ್ಮಯ್ಯನೊ, ಕೂಟ್‌ಕಾರಳೊ ಈತಂಡ್ ಪೋನ ಪಿಂಞ ಅವ್ವಿ, ವಡಿಯ ಮಕ್ಕಳ ಜಾಮೀನ್‌ಲ್ ಬುಡ್‌ತುವಕ್ ಕಳ್ಳಕ್ ಬಪ್ಪಯಿಂಜಯಿನೆಲ್ಲ ಪೋಯಿತ್ ಕೇಟತ್. ಎಲ್ಲಾರು ಓರಂದ್ ನೆವನ ಎಣ್ಣೆತ್ ಜಾರಿಯಂಡತ್. ತಿಮ್ಮಯ್ಯಂಡ ಸಂಸಾರತ್‌ರ ಎಲ್ಲಾ ಕಷ್ಟ ಸುಖಿಕ್ ಅಪಯಿಂಜಂವೊ ಸೊಸೈಟಿ ಗಪ್ಪು ಮಾತ್ರ. ಅವ್ವಿ ಗಪ್ಪುರ ಪಕ್ಕ ಪೋಚಿ. "ನೋಟ್ ಅವ್ವಿ, ಕಳ್ಳ ಕಾಚುವೊ, ಮನೆಲ್ ಕೀಳಂಬಾಳಳ ಕೂಟಿಯಂಡ್ ಇಸ್ಪೇಟ್ ಕಳಿಪೊ ಇದೆಲ್ಲ ಕೊಡವಕ್ ಎಣ್ಣೆನದಾ? ಕುಡಿಪ ತೆವ್ವಲ್‌ಕ್

ನಾನೂ ಬಂದಿತಿಕ್ಕು. ಆಚೇಂಗಿ ಇಂತಾಂಗಲ್ಲ ಜಾಮೀನ್‌ಕ್ ಬಂದಕ ಜನ ಎನ್ನತ ಪರಿಯುವಕಿಲ್ಲೆ? ನಾಡ ಪೊಣ್ಣಂತೂ ನನ್ನ ಮನೆಕೇ ಪತ್ತಾಚಿರುವಕಿಲ್ಲೆ. ಇದೋರ್ ವಿಚಾರತ್‌ಲ್ ಮಾಪ್‌ ಮಾಡ್. ಇದ ಖರ್ಚಿಕ್ ಬೆಚ್ಚಿ" ಎಣ್ಣೆತ್ ಐಂಬದುರ್‌ಪಿಯತ್‌ರ ನೋಟ್ ಕಾಟ್‌ಚಿ! ಏದ್ ಕೊಡವನೂ ಜಾಮೀನ್‌ಕ್ ಪೋಯಿಲೆ. ಬೆಂಗಳೂರ್‌ಂಜಿ ಅಪ್ಪಿರ ತಮ್ಮಣ ಬಂದಿತ್ ಜಾಮೀನ್‌ಲ್ ಬುಡ್‌ತ್‌ಚಿ.

ಬೇಜಾರತ್‌ಲೂ, ಪರಿಕೇಡ್‌ಲೂ ಮಂಡೆ ನೇತುವಕ್ ಕಯ್ಯತೆ ತಿಮ್ಮಯ್ಯನೂ, ಅಪ್ಪಿಯೂ ಕಳ್ಳ, ಕುಡಿಪಾನೇ ಬುಟ್ಟಿತ್. ಆಚೇಂಗಿ ದಂಡ್ ಮೋಂವಂಗ ಪಡ್‌ಚ ವಿಧ್ಯತ್‌ನ ಮರಂದ್‌ಲೆ. ದಿನ ದಿನಕ್ ಜಾಸ್ತಿಯಾಯಂಡ್ ಬಾತ್. ಮನೆಲ್ ಉಂಬ ಕೂಳ್‌ಕೇ ಮುಟ್ಟಿ ಪೋಚಿ.

"ಅವಶ್ಯಕತೆ ಕಾನೂನ್‌ನ ಅರಿಯುಲೆ" ಎಣ್ಣಿಟ, ದಂಡನೆ ಮೋಂವೊ ಬೊಳ್ಳು ಅಕ್ಕಂಡ ಮಾಲ್‌ಕೇ ಕೈ ಕೂಟಿತಾಯಿತಿಂಜತ್.

ನೆಮ್ಮದಿಲ್ ಪೊಲ್‌ಂದಂಡಿಂಜ ಮನೆಲ್ ಇಂದ್ ಎಲ್ಲಾ ತರತ್‌ಲೂ ನೆಮ್ಮದಿಕ್ ಭಂಗ ಬಾತ್. ತಂಗಿ ಉಳ್ಳ ದೇವಡಲ್ಲಿಕೆಲ್ಲ ಪೋಚಿ. ಶಾಸ್ತ್ರಕಾರಲೆಲ್ಲ ಕೇಟಿತ್ ಬಾತ್. "ನಿಂಗ ತೊಟ್ಟದೊಂದು ಕೈಪತ್ತುವಕಾಗಾಂದ್ ನಿಂಗಕಾಗತವು ಮಾಟ ಮಾಡಿತ್"ಂದ್ ತಿರ್‌ಂಜಿ ಬಾತ್. ಅದ್‌ಂಗುಳ್ಳ ಅಡ್‌ಕ ಎಲ್ಲಾ ಮಾಡ್‌ಚಿ. ಆಚೇಂಗಿಯೂ ಮಕ್ಕಡ ಬುದ್ಧಿ ದಿನಕೋರ್ ತರ ಆಯಂಡೇ ಬಾತ್.

ವೇಲಾಯುಧ ಎಣ್ಣಿವೊ ಗುರುಸ್ವಾಮಿ ಪೆರ್ತ್ ಕೊಡವಕ್ ಮಾಲೆ ಇಟ್ಟಿತಿಂಜತ್. ಅಪ್ಪನೂ, ದಂಡ್ ಮೋನೆಯಂಗಳೂ ಒತ್ತಿತ್, ಒನ್ನಾಂದ್ ಶಬರಿ ಮಲೆಕ್ ಮಾಲೆ ಇಟ್ಟಿತ್. ಅಂದ್‌ಂಜಿ ತಿಮ್ಮಯ್ಯಂಡ ಮನೆ ಕೊಡಗರ ಮಟ್ಟಿಗೆ ಶಬರಿ ಮಲೆರ ಬ್ರಾಂಚ್ ಆಫೀಸೆ ಆಯಿಪೋಚಿ! ಪಲಚಿ ಮರತ್‌ರಡಿನ ಚಾಣ ಮುಕ್ಕಿತ್ ಅಡಿಗೆ ಮನೆ, ಬುದ್ಧವಕುಳ್ಳ ಜಾಗ, ಪ್ರಾರ್ಥನಾ ಮಂದಿರ . . . ಎಲ್ಲಾ ಮಾಡಿಯಂಡತ್. ಪೊಲಾಕ ನಾಲ್ ಗಂಟೆಕೆದ್ದಿತ್ ಸ್ವಾಮಿನ ಕಾಕುವಕ್ ಸುರು ಮಾಡ್‌ನಕ, ಅಪ್ಪ ಮಕ್ಕಡ ಸದ್ದಡಂಗುವೊ ಇರ್‌ಲ್ ಪನ್ನಂದ್ ಗಂಟೆಕ್! ಸುರೂಲ್ ಆಳ ಬಾಳೆಲೆಲ್ಲ "ಸ್ವಾಮಿ"ಂದ್ ಕಾಕ್‌ಚಿ. ಅಲ್‌ಂಜಿ ಕೊಟ್‌ಲತ್ತಳ, ನಾಯಿ ಪೂಂಇನೆಲ್ಲ ನಾಯಿ ಸ್ವಾಮಿ, ಪೂಂಇನೆಸ್ವಾಮೀಂದ್ ಸುರು ಮಾಡ್‌ಚಿ. ಬಯ್ಯ ಬೀಡಿ ಕೆಟ್‌ನ ಕೂಡಿ ಸ್ವಾಮೀಂದೆ ಸುರು ಮಾಡ್‌ಚಿ ! ತಿಮ್ಮಯ್ಯಂಡಪಂಡೇತ ಕಳ್ಳ, ಕಾಚುವೊ ಮನೆ "ಅಯ್ಯಪ್ಪ ಮಂದಿರ" ಆಯಿತ್ ಬದಲಾಯಿ ಪೋಚಿ! ಮೂಡ್ ಮೇಲ್‌ಡಿಯ ಚಾಂದ್ ಕುರಿ, ಕರ್ತ ಮುಂಡ್, ದಂಡ್ ತೊರೆ ರುದ್ರಾಕ್ಷಿ ಮಾಲೆ, ಅಡಿಂಜಿ

ಕೊಡಿಕ ಓರ್ ಕರ್ಪು ತುಣಿನ ಚಾವುಲ್ ನಿಪ್ಪುತುಣಿ ಕೆಟ್ಟನೆನ್ನೆ ಕೆಟ್ಟಿಯಂಡ್ ಅಳಾತ ಅಪ್ಪ ಮಕ್ಕಳ ನೋಟಾನಕ ಅಯ್ಯಪ್ಪಸ್ವಾಮಿ ಶಬರಿಮಲೆ ಇಳಾಂಜಿ ಬಂದಿತ್, ತಿಮ್ಮಯ್ಯಂಡ ಪಲ್ಲಿ ಮರತಾರಡಿಲ್ ನೆಲೆಗೊಂಡನ್ನೆ ಕಾಂಬಯಿಂಜತ್ ! ಅಪ್ಪ ಮಕ್ಕ ಬೀಡಿ ಬಲಿಪದೊಂದ್ ಬುಟ್ಟಕ ಬಾಕಿ ಏದ್ ವಿಷಯತ್‌ಲೂ ಶಬರಿ ಮಲೆ ಅಯ್ಯಪ್ಪಂಗೂ, ಈ ಅಪ್ಪ ಮಕ್ಕಕೂ ಏದೋರ್ ಭೇದ ಕಾಂಬಯಿಂಜಾಲೆ.

ಇರ್‌ಮುಡಿ ಕೆಟ್ಟಕೆಟ್ಟುವಂದ್ ಭಾರೀ ಬಲ್ಯ ಪೂಜೆಕ್ ಏರ್ಪಾಡ್ ಮಾಡ್‌ಚಿ. ಕಾಗದ ಪ್ರಿಂಟ್ ಮಾಡಿತ್ ಊರ್‌ನಾಡ್‌ಲೂ, ಬೆಂದ್‌ಕಡಲ್ಲಿಕೂ ಅಪ್ಪ ಮಕ್ಕ ಎಡ್‌ತಂಡ್ ಕುದ್ ಪೋಚಿ. ಕಾಗದತಾರ ಅಡಿಲ್ ಓರ್ ಗೆರೆ "ಬಲ್ಯ ಮನಸ್ಸಲ್ ಪಣ ಸಹಾಯ ಮಾಡುವಾನ ಕೃತಜ್ಞತೆಲ್ ಕೇಟವಾ"ಂದ್ ಇಂಜತ್. ಕಳ್ಳ, ಇಸ್ಪೇಟ್, ಕಳ್ಳ ವ್ಯಾಪಾರ ಇನ್ನನೆ ಬಟ್ಟೆ ತಪ್ಪಿತ್ ಇಂಜ ಸಂಸಾರ ಸ್ವಾಮಿ ಭಕ್ತಂಗಳಾನದ್ ಕಂಡಿತ್, ಪೂಜೆರ ಕಾಗದ ಓದಿತ್ ಪ್ರತಿಯೊಬ್ಬನೂ ಐಂಬದೂ ನೂರೂ ಉರ್‌ಪಿಯ ಕೊಡ್‌ತತ್. ಪೂಜೆಕುಳ್ಳ ಅಕ್ಕಿ, ತೆಂಗಿ, ತರಕಾರಿ ಎಲ್ಲ ಸಹಾಯ ಮಾಡ್‌ಚಿ. ಇರ್‌ಮುಡಿ ಕೆಟ್ಟುವಂದ್ ಸುಮಾರ್ ಅಂಗಳಾರಾಳ್ ಕೂಡಿತಿಂಜತ್ ! ಅಯ್ಯಪ್ಪ ಸ್ವಾಮಿ ನಂಬಾನಯಿನ ಕೈ ಬುಡವದುಂಡಾ? ಸುಮಾರ್ ಪತ್ತಾಯಿರ ಊರ್‌ಪಿಯ ಕೆಟ್ಟಿತಿಂಜತ್. ಓರ್ ಜೀಪ್ ಬಾಡಿಗೆ ಮಾಡಿಯಂಡ್ ಒಟ್ಟು ಏಳಾಳ್ ಇರುಮುಡಿ ಕೆಟ್ಟ ಪೊರ್‌ತಂಡ್ ಪೊರಟತ್.

ಮಲೆಂಜಿ ಬಪ್ಪಕ ಮಧುರೆ, ರಾಮೇಶ್ವರ ಕನ್ಯಾ ಕುಮಾರಿಕೆಲ್ಲ ಪೋಯಿತ್ ಬಪ್ಪ ಏರ್ಪಾಡ್‌ಲೇ ಪೊರಟಿಂಜತ್. ಎಲ್ಲಾ ತೀರ್ಥ ಕುಳಚಿತ್ ಬಪ್ಪಕ "ಮಾಹೆ"ಕ್ ಒಮ್ಮ ಪೋಯಿರನಾಂದ್ ಎಲ್ಲಾರು ಪೊರಟತ್. ಮಜ್ಜಣ ಉಂಬಕ್ ಎಲ್ಲಿ ತೇಡ್‌ನಕಲೂ ಪಟ್ಟಂಡ ಹೊಟೇಲ್ ಕೊಟ್ಟನದೇ ಇಲ್ಲೆ. ಕೆಲ ಬೈಪೊ ತಡಪ ಕಯಿಂಜಾಲೆ. "ಕೂಳ್ ದಾಡದಾಚೇಂಗೆನ್ನೆ, ಮಾಪಳೆ ಹೊಟೇಲ್‌ಲೇ ಉಂಗನಲ್ಲಾ"ಂದ್ ತಿಮ್ಮಯ್ಯಸ್ವಾಮಿ ಎಣ್ಣೆ ಚಿ. ಪಪ್ಪಸ್ವಾಮಿ ಎಣ್ಣೆನಾಂಗ್ ಮೋಂವೊಸ್ವಾಮಿಯ ವಿರೋಧ ಪರ್‌ಂದಾಲೆ.

"ಡ್ರೈವರ್ ಸ್ವಾಮಿ, ನಿಂಗ ಪೋಯಿತ್ ಹೊಟೇಲ್‌ಲ್ ಎಂತೆಲ್ಲ ಉಂಡ್‌ಂದ್ ನೋಟಿತ್ ಬಾರಿ"ಂದೆಣ್ಣೆತ್ ಬಾಕಿ ಸ್ವಾಮಿಯ ಜೀಪ್‌ಲಳತಂಡ್ ಬೀಡಿ ಕತ್ತಚಿಟ್ಟತ್. ಡ್ರೈವರ್ ತಿಮ್ಮಯ್ಯನ ಕಾಕಿತ್, "ಇಲ್ಲಿ ಪುಕ್ಕಲಕ್ಕಿರ ಕೂಳ್, ಪರೋಟ ಪಿಂಞ ಮತ್ಯ ಬಲ್ಯಾಂಡ ಕರಿ (ಪೋತ್ ಯರ್ಚಿ!) ಮಾತ್ರ ಉಳ್ಳೊ"ಂದೆಣ್ಣೆ ಚಿ.

"ನಂಗಕ್ ಅಭ್ಯಾಸ ಇಲ್ಲೆಲ್ಲ ಡ್ರೈವರ್ ಸ್ವಾಮಿ, ಎನ್ನನೆ ಎರಕುವೊ"ಂದ್ ಕೇಟತ್, ತಿಮ್ಮಯ್ಯ.

"ಅದ್‌ಂಗೆನ್ನೆ ಸ್ವಾಮಿ ? ಕ್ವಾರ್ಟರ್ ಎರಕಿತ್ ಅಳತಕ ಏದ್ ಯರ್ಚಿಂತ್ ಗೊತ್ ಪುಡಿಪಕೇ ಕಯ್ಯಲೆ. ಅಯಿಂಗಳೆಲ್ಲ ಹೋಟೆಲ್‌ಕ್ ಪೋಪಕೆಣ್ಣಿ, ನಿಂಗ ನಾಡ ಕೂಡ ಬಾರಿ"ಂದೆಣ್ಣೆಚಿ, ಡೈವರ್.

"ನಿಂಗೆಲ್ಲ ಹೋಟೆಲ್‌ಕ್ ಏಳಿ. ಬೋಂಡಿಯಾನ ಎಡ್‌ತೋಳಿ. ನಂಗ ಅಂಜಿ ಮಿನಿಟ್‌ಲ್ ಬಪ್ಪ"ಂದೆಣ್ಣೆತ್ ಮುಂಡ್ ತೆಕ್ಕಿಕೆಟ್ವೆಚಿ ಡೈವರೂ, ತಿಮ್ಮಯ್ಯನೂ.

ಮೀನಾರ್ ಕುಂಞಿಕ್ ಮೀಂದುವಕ್ ಪಡ್‌ಪಾಚಿರಂಡುವಾ....? ಕೋಳಿರ ಕುಂಞಿಕ್ ಕೇಡುವಕ್ ಪಡ್‌ಪಾಚಿರಂಡುವಾ? ಅಪ್ಪಸ್ವಾಮಿರ ಪೋಕ್ ಯಾಲೇಂದ್ ಮೋಂವೊಸ್ವಾಮಿಯಕ್ ಸುಂಯಿಕ್ ಕಟ್ವೆಚಿ. ಮಾಹೆಲ್ ಮಾರ್‌ಕೋರ್ ಬ್ರಾಂಡಿ ಶಾಪ್‌ಂದ್ ಪಂಡೇ ಕೇಳಿ ಉಂಡ್. ಪೊನ್ನು ಸ್ವಾಮಿಯೂ, ಬೊಳ್ಳು ಸ್ವಾಮಿಯೂ ಓರಂದ್ ಓಣೆಲ್ ಕಾಲ್‌ಟ್ಟತ್. ತಿಮ್ಮಯ್ಯ ಅಂಜಿ ಮಿನಿಟ್‌ಲ್ ಬರಣೆ, ಮೋಂವೊಂಗ ಮೂಂದ್ ಮಿನಿಟ್‌ಲೇ ಬಂದಿತ್ ಹೋಟೆಲ್‌ಲ್ ಆರ್ಡರ್ ಕೊಡ್‌ತಿತಿಂಜತ್! ಒಬ್ಬೊ ಇಂಞಿಂಂಬ್ಬಂಡ ಸುದ್ದಿ ಮಾತ್ರ ಕೇಟ್‌ಲೆ. ಕೊಡವ ತಕ್ಕ್ ಮಲೆಯಾಳ ಎಲ್ಲ ಬುಟ್ಟಿತ್ ಬಾಯಿಲ್ ಕೆರಿಯ ಇಂಗ್ಲೀಷ್ ಮಾತ್ರ ಪೊರಡುವೆಯಿಂಜತ್!

ಇಂದ್ ಸ್ವಾಮಿಯ ಬಂದೆತ್ತುವಾಂದ್ ಅಪ್ಪಿ ಕಂಡಿ, ಪಟ್ಟಿ ಓಣೆಕೆಲ್ಲ ಚಾಣ ಮುಕ್ಕಿತ್ ಬೆಚ್ಚತ್. ಮನೆನೆಲ್ಲ ಶುದ್ಧ ಮಾಡಿತ್, ಇಡೀ ದಿನ ನೆಲ್ಲಕ್ಕಿಲ್ ಬೊಳ್ಳಾಚಿ ಕತ್ತಿಯಂಡಿಂಜತ್. ಮನೆಕ್ ಬಂದ ಜನಕೆಲ್ಲ "ದಯಬೆಚ್ಚಿತ್ ಒಳಾಕ್ ಬರತಿ. ಇಂದ್ ಸ್ವಾಮಿಯ ಬಪ್ಪ. ಎರ್ಚಿ ಮೀನ್ ತಿಂದವು ಸ್ವಾಮಿಯ ಮಾಲೆ ಉತ್ತಣೆ ಮನೆಕ್ ಪತ್ತುವ ಕಾಗಾ"ಂದ್ ಅಪ್ಪಿ ಮನೆನ ಅದ್ ಶುದ್ಧತ್‌ಲ್ ಬೆಚ್ಚಂಡ್ ಪಾರ ಕಾತತ್.

ನಾಲ್ ಗಂಟೆ ಆಪಕ ಸೊಸೈಟಿ ಗಪ್ಪು ಬಾತ್. ಅಪ್ಪಿನ ಪೊರಮೆ ಕಾಕ್‌ಚಿ. ಸ್ವಾಮಿಯ ಬಂದಿತ್ ಎತ್ತಿರ್‌ತ್‌ಂದ್ ಅಪ್ಪಿ ಕುಶಿಲ್ "ಗಪ್ಪು ಬಾವ, ಚೆನ್ನ ನಿಂದೋಳಿ. ತಳಿಯತಕ್ಕಿ ಬೊಳ್ಳಾಚಿ, ಪಲಂಬು, ಮುಕ್ಕಾಲಿ ಎಡ್‌ತಂಡ್ ಬಪ್ಪಿ"ಂದ್ ಬಾಡೆಂಜಿ ಕಾಕಿಣ್ಣೆಚಿ.

"ಸದ್ಯಕ್ ಅದೊಂದೂ ಬೋಂಡ ಅಪ್ಪಿ, ನೀನೊಮ್ಮ ಪೊರಮೆ ಬಾ"ಂದ್ ಕಾಕ್‌ಚಿ. ಗಪ್ಪುರ ಸ್ವರತ್‌ಲೂ, ಮೂಡ್‌ಲೂ ಬದಲಾವಣೆ ಕಂಡ ಅಪ್ಪಿ, ಚೆನ್ನ ಗಾಬರಿಲ್ "ಮಲೆರ ಜೀಪ್ ಬಾತ ಬಾವಾ"ಂದ್ ಕೇಟತ್.

"ಅಪ್ಪಿ ಗಾಬರಿ ಮಾಡಿಯವತೆ. ಕಣ್ಣೂರ್ ಪೋಲೀಸ್ ಸ್ಟೇಷನ್‌ಂಜಿ ನಂಗಡ

ಸ್ಟೇಶನ್‌ಕ್ ಪೋನ್ ಬಂದಿತ್‌ಲೊ. K.A. 12 - M 6073 ಜೀಪ್‌ಲ್ ಆರ್ ಪೊಟ್ಟಿ ಮಾಹೆರ ಬ್ಯಾಂಡಿ ದುಂಬ್‌ಚಿಟ್ಟಂಡ್ ಬಂದಂಡಿಂಜ ಸ್ವಾಮಿಯಳ ಗೇಟ್‌ಲ್ ಪುಡ್‌ಚಿತ್ ಕಣ್ಣೂರ್ ಸ್ಟೇಶನ್‌ಲ್ ಲಾಕಪ್‌ಲ್ ಇಟ್ಟಿತ್‌ಲೊ" ಎಣ್ಣೆಚಿ !

ಮಾಹೆಂಜಿ ಕಮ್ಮಿ ರೇಟ್‌ಲ್ ಎಡ್‌ತ ಬಂದಿತ್ ಇಲ್ಲಿ ಚೆನ್ನ ಜಾಸ್ತಿಕ್ ಕೊಡ್‌ತಿತ್ ಪೋನಬಂದ ಕರ್ಚಿನೇಂಗಿ ಭರ್ತಿ ಮಾಡನಾಂದ್ ಗೇನ ಮಾಡಿತ್ ಮಾಡ್‌ನ ನಲ್ಲೊರ್ ಪ್ಲಾನಾನ್ ಕೆಡ್‌ತಿ ಬೆಚ್ಚಿತ್ ಪೋಲೀಸ್‌ಕಾರ. ಇಯಂಗಳೆಲ್ಲ ಬುಡ್‌ತಿಯ ಬರಂಡಿಕ್ ಅವ್ವಿ ಅರೆ ಜೀಂವ ಆಯಿ ಪೋಚಿ. ಈ ಮಾನ ಕೇಡ್‌ನೋ, ಬೇಜಾರತ್‌ನೋ, ಆನ ನಷ್ಟತ್‌ನೋ ಮರ್‌ಪ ಕಾಯಿತ್ ಕಳ್ಳ ಕುಡಿಕತೆ ಬೋರೆ ಬಟ್ಟೇ ಇಂಜಾಲೆ ತಿಮ್ಮಯ್ಯಂಡ ಸಂಸಾರಕ್.

ಪೊನ್ನು, ಬೊಳ್ಳುರ ಬುದ್ಧಿ ಚೆನ್ನ ತಕ್ಕ ಬಡ್‌ಕ್ ಆನಕಲೂ, ಬಾಲೆಕಾರ ನಲ್ಲ ಜಾಯಿಕಾರಂಗ! ಅರಮನೆ ಜೆಟ್ಟಿಯಳೆನ್ನಕೆ ಬೊಳಂದದೋರ್ ಭಾಗ್ಯ! ಪೈಸಾರಿ ಸರ್ವೆ ಮಾಡುವಕ, ಸೊಸೈಟಿ ಗಪ್ಪುರ ಚೆನ್ನ ಜಾಗ ಜೋಸೆಫ್‌ಕ್ ಕೂಡಿ ಪೋಯಿತಿಂಜತ್. ನಲ್ಲ ತಕ್ಕಲ್ ಕೇಟಿತ್ ನೋಟ್‌ಚಿ. ಜೋಸೆಫ್‌ಕ್ ಬುಟ್‌ಕೊಡ್‌ಪಕ್ ಮನಸ್ಸಿಂಜತ್. ಆಚೇಂಗಿ ಸೊಸೈಟಿ ಚುನಾವಣೆಲ್ ಚೋತ ಪಾರ್ಟಿಕಾರ ಪೋಲೀಸ್‌ಲ್ ಕೋರ್ಟ್‌ಲೆಲ್ಲ ಗಪ್ಪುಕೇ ಸೋಲಾಚಿ. ಒನ್ನಾಂದ್ ಗಪ್ಪು ತಿಮ್ಮಯ್ಯಂಡಲ್ಲಿಕ್ ಬಾತ್. ಐಮರತ್‌ಲ್ ಅಳಾತಂಡ್ "ತಿಮ್ಮಯ್ಯ ಪಂಡ್ ನಿನ್ನೋ, ನೀಡ ಸಂಸಾರತ್‌ನೊ ದೊಡ್ಡಿಕ್ ಅತ್ತಳ ಆಟಟ ಸ್ಟೇಶನ್‌ಕ್ ಈಪ್‌ಚಿಟ್ಟಂವೊ ಆ ಜೋಸೆಫ್. ಪಂಡ್ ನೀನೇ ಅವೊ ಪೈಸಾರಿಲ್ ನೆಲೆ ತಾಂಗ್‌ಚಿಟ್ಟಂವೊ. ಇಕ್ಕ ನೋಟ್, ಕಳ್ಳ ನಾಡ ಜಾಗ ಕೂಟಿಯಂಡ್ ಬುಟ್‌ಪ್ಪ ತಪ್ಪಾಲೆ. ನಂಗಡವುವೇ ಅವಂಡ ಕೂಡ ಕೂಡಿಯಂಡತ್. ಎಂಜಿನಕ್ಕಿ ಪೋಲೀಸ್‌ಕಾರಕೂ, ರೆವಿನ್ಯೂಕಾರಕೂ ತಿಂಬ್‌ಚಿಟ್ಟ ಪಣ ಚೆನ್ನಂಗಾ? ಮೈಸೂರ್ ಸೈಡ್‌ಂಜಿ ನಾಲ್ ರಾಡಿಯಳ ಕೂಟಿಯ ಬಂದಿತ್, ಪೋಲೀಸ್‌ಕಾರಕ್ ತಿಂಬ್‌ಚಿಟ್ಟ ಪಣತ್‌ರ ಪಾದಿನ ಕೊಡ್‌ತಿತಿಂಜಕ, ಇಕ್ಕ ನಾಡ ಜಾಗ ನಾಡ ಸ್ವಾಧೀನ ಇಂಜಿತ್ತಿಪ್ಪ"ಂದೆಣ್ಣೆಚಿ, ಗಪ್ಪು.

ಅರೆ ಚೊಕ್ಕಲ್ ಅಳಾತ ಪೊನ್ನುರ ಕೆಮಿ ನೇರೆ ಆಚಿ. ಪಂಡ್ ಜೋಸೆಫ್ ಇಯಂಗಡ ಕೂಳ್‌ರ ಬಟ್ಟೆನ ವುಟ್‌ಚಿಟ್ಟ ಉರಿ ಪೊನ್ನುರ ಎದೆಲ್ ಪೋಯಂದಂಡಿಂಜತ್. ಅಳಾತಲ್ಲಿಂಜಿ ಎದ್ದ ನಿಂದ್‌ರೊಂಜಿ ಪೊನ್ನು "ಗಪ್ಪು ಮಾಂವ, ನೀಡ ಮೈಸೂರ್ ರಾಡಿಯಕೇ ಮೀಸೆ ಮೊಳತಿಯೆದಾ? ನಂಗಳೆಲ್ಲ ಎನ್ನ ಪೊಡಿಯ ಉಡ್‌ತಂಡ್ ಬಳೆ ಇಟ್ಟಂಡಯಿಂಗಳಾ"ಂದ್ ಕೇಟತ್.



"ಅದೂ ನೇರರೆ ಪೊನ್ನು. ನಾಡ ಜಾಗ ನಾಡ ಸ್ವಾಧೀನ ಬಪ್ಪಾಚಿಟ್ಟಕ ಅಂಜಾಯಿರ ಕೊಡ್‌ಪಿ" ಎಣ್ಣೆಚಿ, ಗಪ್ಪು.

"ಎಡ್ ಅಂಞೂರ್ ಅಡ್ವಾನ್ಸ್. ಬಾಕಿ ನಾಳೆಕ್ ರಡಿ ಮಾಡಿತ್ ಬೆಚ್ಚ. ತಕ್ಕ ತಕ್ಕಾಯಿತೇ ಇರಡ್. ಬಯ್ಯ ತಕ್ಕ ಮೇಜಿತ್ ಒಂದಾಂಗ್ ಒಂದರೆ ಮಾಡಿಯವತೆ"ಂದ್ ಓರ್ ಎಚ್ಚರ ಕೊಡ್‌ತೆರೊಂಜಿ, ಅಂಞೂರ್ ಊರ್‌ಪಿಯ ಕೇಟಂಡ್ ಜೋಬ್‌ಕಟ್ಟತ್, ಪೊನ್ನು!

ದಂಡನೇ ದಿನ ಪೊಲಾಕ ಬೊಳ್ಳು ಬಂದಿತ್, "ಗಪ್ಪು ಮಾಂವ, ಮೂಂದ್ ಆಳಳ ಕೂಟಿಯಂಡ್, ದಂಡ್ ರೋಲ್ ತಂತಿ ಎಡ್‌ತಂಡ್ ಕೂಡನ್ನೆ ಪೊರಡ್. ನೀಡ ಜಾಗ ನೀಡ ಸ್ವಾಧೀನ ಎಡ್‌ತ ಕಾರ್ಬಾರೆಲ್ಲ ಆಚಿ"ಂದೆಣ್ಣೆಚಿ. ಪೊನ್ನುರ ನಾಯಕತ್ವತ್‌ಲ್ ಜೋಸೆಫ್‌ನ ಕೆಟ್ಟಿ ಪೊರ್‌ತಿತ್ ನೊಲತಿ ಪಣ್ಣಾಕಿತ್, ಅವನಗುಂಡೆ ಎಳ್‌ದಾಚಿಟ್ಟಿತ್ ಗಪ್ಪುರ ಜಾಗ ಗಪ್ಪುರ ಸ್ವಾಧೀನಕ್ ಬಾತ್! ಉರ್‌ಪಿಯ ಅಂಜಾಯಿರ ಪೊನ್ನು ಪಿಂಞ ಅವಂಡ ಕೂಟ್‌ಕಾರಡ ಜೋಬ್ ದುಂಬಾಚಿ! ಕಾರ್ಗಿಲ್‌ಲ್ ಪಾಕಿಸ್ತಾನ ಪುಡ್‌ಚ ಜಾಗತ್‌ನ ಬಯ್ಯಕ್ ಬಲ್‌ಚೆಚ್ಚಕೇ ಈ ಜೋಸೆಫ್ ಪಿಂಞ ಗಪ್ಪುರ ಪೋರಾಟ ಕೇಳಿ ಪಡ್‌ಂದತ್. ಅಂದೇ ಪೊನ್ನುರೊ, ಬೊಳ್ಳುರೊ ನಾಯಕತ್ವ ಊರ್ ನಾಡ್‌ಲ್ ಸಾಬೀತಾಚಿ. ಈ ನಾಯಕಂಗಕ್ ಡಿಮಾಂಡೋ ಡಿಮಾಂಡ್! ಸಾಲ ವಸೂಲ್ ಮಾಡಿ ಕೊಡ್‌ಪೊ, ಮರ ಕಳ್ಳಂಗಕ್ ರಕ್ಷಣೆ, ಕಳ್ಳ ಕಾಚುವಯಿಂಗಕ್ ಕಾತರ್; ಇನ್ನನೆ ಇಯಂಗಕ್ ಪುಲ್ ಟೈಂ ಚಾಕರಿ ಆಯಿ ಪೋಚಿ. ಊಟ ಉಪಚಾರ, ಕುಡಿ ಕಡಿ ಎಲ್ಲ ಪೊರಮೆ. ಮೋಂವಂಗಡ ಕೇರಾಫ್‌ಲ್ ಅಪ್ಪವ್ವಂಗೂ ಮನೆಕುಳ್ಳ ಯರ್ಚಿ, ಕಳ್ಳ, ಬಂದ್ ಬೂವಯಿಂಜತ್. ಮೋಂವಂಗಡ ಬೋಳೆಲ್ ಪೊನ್ನಾರ ಚೈನ್, ಕೈರ ಬೆರಕೋರ್ ಮೊಯಿರ, ಬಾಯಿಲ್ ಉದ್ದುದ್ದ ಸಿಗರೇಟೆಲ್ಲ ಕಾಂಬಕ ತಿಮ್ಮಯ್ಯಂಡೊ, ಅವ್ವಿರೊ ಕುಸಿನೊಂದು ಎಣ್ಣಂಡ. ಕೈಲ್ ನಾಲ್ ಕಾಸ್ ಓಡಿ ಕಳಿಪಕಲೇ ನಲ್ಲ ಕಾರ್ಬಾರ್ ತೇತವಂಡೊಂದ್ ಬುದ್ಧಿ ಓಡ್‌ಚಿಟ್ಟಿತ್, ತಂಗಿರ ಮಂಗಲ ಕಯಿಚಿತ್ ಮಂಡೆ ಕತ್ತಿಯಂಡತ್.

ತಿಮ್ಮಯ್ಯಂಡ ಮನೆಕ್ ಬರ್ಕತ್ ತೇಡಿಯಂಡ್ ಬಾತ್. ಮೋಂವಂಗ ದಂಡಾಳು ಬುಲ್ಲೆಟ್ ಬೈಕೂ ಎಡ್‌ತಂಡತ್. ದಾವೂದ್ ಇಬ್ರಾಹಿಂ, ಕೊತ್ವಾಲ್ ರಾಮಚಂದ್ರ, ಜಯರಾಜ, ಮುತ್ತಪ್ಪ ರೈ ರನ್ನತಯಿಂಗ ಪೊರಮೆ ಕೇಳಿ ಎಡ್‌ತಕ, ಕೊಡಗರ ಮಟ್ಟಿಗೆ ಪೊನ್ನು, ಬೊಳ್ಳುಂದೆಣ್ಣೆನಕ ಬಲ್ಯ ಕೇಳಿ ಇಂಜತ್. ಇಯಂಗಡ "ರೋಲ್‌ಕಾಲ್" ಭಾರಿ

ಶಿಸ್ತಲ್ ನಡಂದಂಡಿಂಜತ್. ತಿಮ್ಮಯ್ಯಂಡ ಮೋಂವಂಗ ಸರ್ವ  
ವಿದ್ಯಾಪಾರಂಗತಂಗಲಾಯಂಡ್ ಬಾತ್!

ಪೊನ್ನು ಪಿಂಞ ಬೊಳ್ಕುರ ಗುಂಪುರ ರೋಲ್ಕಾಲ್ ಬಿಸ್ನೆಸ್ ನಲ್ಲ ಪಾಯಿದ  
ಉಳ್ಳದಂದ್ ಕಾಂಬಕ ಭಾರೀ ಪೈಪೋಟಿ ಸುರುವಾಚಿ. ಬೋರೆ ಬೋರೆ ಗುಂಪುಕಾರ  
ಮಂಡೆ ನೇತ್‌ಚಿ. ಕೊಂಬಕಾಳೆಯಡ ಸದ್ದಡಕುವಕ್ ಮಂಡಂಗ ಕೆನೆಬೆಪ್ಪಕ್ ಸುರು  
ಮಾಡ್‌ಚಿ. ಈ ಗುಂಪು ಗುಂಪುರೊಳ್‌ಲ್ ವಾರಕ್ ಒಂದ್ ದಂಡ್ ಪೊಯ್ತ್ ಕಳಿ  
ಮಾಮೂಲಾಯಿ ಪೋಚಿ. ಯಾವ ಎಂತ ತಪ್ಪು ಮಾಡಿತುಂಡೇಗಿಯೂ, ಅದ್ ಪೊನ್ನುರ  
ಗ್ಯಾಂಗ್ ಮಾಡಿಯೆಂದೇ ಜನ ಪರೆವಕಾಯಿರ್‌ತ್.

ಮಂಡೆಲ್ ಕಳ್ಳೂ, ಜೋಬ್‌ಲ್ ದುಡ್ಡೂ, ರಟ್ಟೆಲ್ ಬಲೋ ಇಪ್ಪಕ ಎಲ್ಲಿ  
ಉಂಡಕೆನ್ನ, ಎಲ್ಲಿ ಬುದ್ದಂಡ್ ವರಾನಕೆನ್ನ? ಪೊನ್ನು ಎಲ್ಲಿ ಒಳಿವಂಜತೂ ಎನ್ನೊ.  
ದಾರೂ ಅವನ ಕೇಪಕೂ ಪೋಪಯಿಂಜಾಲೆ.

ಒನ್ನಾಂದ್ ಇಂಜ ಇಂಜನ್ನಕೇ ಪೊನ್ನುನ ಕಾಂಬಲೇಂದ್ ಪಳಮೆ ಆಚಿ. ಅಪ್ಪ  
ಪೋಲೀಸ್‌ಕ್ ಪುಕಾರೂ ಕೊಡ್‌ತಿತ್ ಬಾತ್. ಪೋಲೀಸ್‌ಕಾರ ಆಲೆ ಈಲೆ ತೇಡ್‌ನೆನ್ನಕೆ  
ಮಾಡಿತ್ ತಿಮ್ಮಯ್ಯಂಡ ಜೋಬು ಖಾಲಿ ಆಪದು ತೇಡಲ್ ನಿಪ್ಪಾಚಿಟ್ಟತ್.

ಎಟ್ಪಾದಿನ ಕಯ್ಯುವದು ಪೊನ್ನು ಮಂಗಳೂರ್ ಆಸ್ಪತ್ರೆಲುಳ್ಳ ವರ್ತಮಾನ ಬಾತ್.  
ಪೋಯಿತ್ ನೋಟಣೆ ಕಾಲ್ ಕೈಕೆಲ್ಲ ಬ್ಯಾಂಡೇಜ್ ಇಟ್ಟಿತ್ ಬುದ್ದಂಡಿತ್. ಅವಂಡ  
ಆರೇಬಿಕ್ ಪೂಬಾಲಿ ಗುಲಾಬಿಯೂ, ಅವಡ ಮೋವಳೂ ಕೂಡ ಉಂಡ್!

ಪೂಬಾಲಿ ಗುಲಾಬಿರ ಪೆದ ಕೇಕತ ಆಣ್ ಪೊಣ್ಣ್ ಇಲ್ಲೆ. ಅವಡ ಮನೆಕ್  
ಪೋಗತಂವೊ ಆಣೇ ಅಲ್ಲಾಂದ್ ಲೆಕ್ಕ! ಅವಡ ಮೋವ ರೋಸಿ. ರೋಸಿ ಅವ್ವಂಗ್‌ಂಜಿ  
ಓರ್ ಮೊಟ್ಟ್ ಮಿಂಞಾಲೆ! ಎಲ್ಲಾ ಬಾಲೆಕಾರಳೆನ್ನಕೆ ಪೊನ್ನೂ ರೋಸಿರ ಸೇವೆ  
ಮಾಡಿಯಂಡಿಂಜತ್. ರೋಸಿಕ್ ಅಂಜಿ ತಿಂಗ ದುಂಬುವಕ ಕೆಣಿಯಂಗಳೆಲ್ಲ ದೂರ  
ದೂರ ಎಳೀರ್‌ತ್. ಕೈಕ್ ಕೊಟ್ಟನಂವೊ ಪೊನ್ನು!

ಪೂಬಾಲಿ ಗುಲಾಬಿ "ನೀಕ್ ದಾರಾನ ಮೋಳೆ ಕುಸಿ? ದಾರಾನ ಮಂಗಲ  
ಕಯಿಕಂಡು ಎಣ್ಣ್"ಂದ್ ಕೇಟತ್.

"ಮಮ್ಮಿ ಪೊನ್ನು ಒಬ್ಬೊನಲ್ಲತೆ ಬೋರೆ ದಾರೂ ನಾಡ ಮೇಲ್  
ತೊಟ್ಟಿತಿಲ್ಲೆ"ಂದ್ ಡಿಕ್ಲೇರೇಶನ್ ಕೊಡ್‌ತ್‌ರ್‌ತ್.

ಪೊನ್ನು ತಪ್ಪಿಚಿಟ್ಟುಂಡ್ ಓಡಿರೊಂದ್ ಮಿಂಞಲೇ ಎಲ್ಲಾ ಏರ್ಪಾಡ್ ಮಾಡಿತಿಂಜತ್. ಗುಲಾಬಿರ ನಾಲ್ ಅಂಗ ರಕ್ಷಕಂಗಡ ಕೂಡ ಪೊನ್ನು ಒಬ್ಬೊ ಎನ್ನೊ ಮಾಡಲು? ಅಯಿಂಗ ಚೆನ್ನ ರಫ್ ಹ್ಯಾಂಡ್ಲ್ ಮಾಡಿಟದ್ ಕಾಲ್ ಕೈಕ್ ಚೆರಿಯ ಫ್ರಾಕ್ಟರ್ ಆಯಿ ಪೋಚಿ. ಕೂಡೆನ್ನೆ ಬೋಂಡಿಯಾನ ಎಳ್ತ ಕುತ್ತೆಲ್ಲ ಮಾಡಿಯಂಡ್, ಪೊನ್ನುರ ಸೈನ್ ಇಡ್ಚಿಟ್ಟುಂಡ್ ಆಸ್ಪತ್ರೆಕ್ ಎಡ್‌ಮಿಟ್ ಮಾಡಿತಿಂಜತ್. ನರಿರ ಮಾಳಿಂಜಿ ಬೋಂಡಿಕೂ ತಪ್ಪಿಚಿಟ್ಟುಂಡ್ ಬರಲು. ಪೂಬಾಲಿ ಗುಲಾಬಿರ ನಳಪಾಚಲ್ ಬುದ್ದಂವೊ ಅವ ಚಾಕ್‌ನ ನಾಯಿಯಾಯಿತೇ ಇರಂಡು! ಕಾಸ್ ಖರ್ಚಿಲ್ಲತೆ ಪೊನ್ನುರ ಮಂಗಲಾಚಿ! ಅಂವೊ ಓರ್ ಬರಿಲ್ ಕಳ್ಳರ ಗುಲಾಮ, ಆ ಬರಿಲ್ ಮಾಂವಿರ ಗುಲಾಮ, ಈ ಬರಿಯ ಪೊಣ್ಣ್‌ರ ಗುಲಾಮನಾಯಿತ್ ಮೂಲೆಕಾಯಿ ಪೋಚಿ!

ಬೊಳ್ಳು ನೂಲ್ ತುಂಡ್‌ನ ಗಾಳಿಪಟತ್‌ನೆನ್ನೆಕೆ ಆಯಿ ಪೋಚಿ. ಎಲ್ಲಾರು ಅವಂಡ ಕೈ ಬುಟ್ಟುಂಡ್ ಬಾತ್. ಮನೆಲ್ ಕೂಳ್‌ಕೇ ಗತಿ ಇಲ್ಲೆ. ತಿಮ್ಮಯ್ಯ ಒನ್ನಾಂದ್ ಇರ್‌ಲ್ ಕುಡ್‌ಚಿತ್ ಬಪ್ಪಕ ಬರೆಕುತ್ತ ಬುದ್ಧಿತ್ ಎಡತೆ ಬರಿಯೇ ಬರತಾಯಿ ಪೋಚಿ. ಅವ್ವಿ ಒಬ್ಬ ಎಂತ ಮಾಡಲು? ಬರಿ ವಯಂಗ್‌ನ ವಡಿಯನ ಚಾಕುವದಾ? ಕುಡ್‌ಚಂಡ್ ಬುದ್ಧಿ ತಿಪ್ಪ ಮಕ್ಕಳ ಸುಧಾರಿಚಿಡುವದಾ? ಪೊನ್ನುರ ದಂಡ್ ಕುಂಞಿಯಳ ನೋಟಿಯವದಾ....?

ಖರ್ಚಿಕ್ಕುಳ್ಳ ಕಾಸ್ ಕೊಟ್ಟಿತಿಪ್ಪಕ ಅಣ್ಣನೂ, ತಮ್ಮಣನೂ ಮನೆರ ಓರಂದೇ ಸಾಮಾನ್ ಕಡತಿತ್ ಮನೆನ ಬೋಳ್ ಮಾಡ್‌ಚಿ. ಇಯಂಗಳ ತಡ್‌ಪ ಕಯ್ಯತೆ ಮನೆನೋ, ಭೂಮಿನೋ, ಉಳ್ಳ ಚೆನ್ನ ತೋಟತ್‌ನೊ ಪಾಲ್‌ಟ್ಟಿತ್ ಕೊಡ್‌ತತ್. ವರಕ್ ಜೂಂಗುವವಂಗ್ ಕಡಿಕೆ ಬಿರ್‌ಚಿ ಕೊಡ್‌ತೆನ್ನೆಕೆ ಆಚಿ. ಅಯಿಂಡಯಿಂಡ ಪಾಲ್‌ಬೇಲ್‌ನ ಇಂಜಿ ನಡ್‌ಪಕ್ ಕೊಡ್‌ತಿತ್, ಕೊಟ್ಟನ ಪಣ ಎಡ್‌ತಂಡ್ ಬೊಳ್ಳು ಮನೆ ಬುಟ್ಟುಂವೊ ಪುತ್ತರಿಕಾಪಕ ಇಟ್ಟು ಬಟ್ಟೆಲ್ ಎಲ್‌ಂಬ್ ತೋಲಾಯಿತ್ ಬಾತ್! ಎದ್ದ ನಡಪಕೇ ಧಾತ್ ಇಂಚ್‌ಲೆ.

ಪೆತ್ತವ್ವಂಡ ಮನಸ್ ಕೇಟ್‌ಲೆ. ಸಾಲೋಮೂಲೋ ಮಾಡಿತ್ ಎಲ್ಲಾ ಆಸ್ಪತ್ರೆಕ್ ಕಾಟ್‌ಚಿ. ಡಾಕ್ಟರ್ ಓರಬ್ಬ ಓರಂದ್ ತರ ಕಾಯಿಲತ್‌ರ ಪೆದ ಎಣ್ಣೆ ಚಿಲೊ. ಅವ್ವಿ ಮಾತ್ರ ಬರಿಕೈಲ್ ಮೊಳ ಇಟ್ಟುಕ ಎಂತ ಆಕು?

ಪೊನ್ನುರ ಪಾಲ್‌ರ ಭೂಮಿ ಪಿಂಞ ತೋಟತ್‌ನ ಎಳ್‌ದಿ ಕೊಡ್‌ತಿತ್, ಕೊಟ್ಟುವಚ್ಚಕ್ ಪಣ ಎಡ್‌ತಿತ್ ಮುಗ್ಗಿತಾಯಿತಿಂಜತ್. ಬೊಳ್ಳುರ ಜೀಂವ ಕೈಕ್

ಕೊಟ್ಟುಂಡಿಕೆ ಅವಂಡ ಪಾಲಾರ ಬೇಲ್, ಜಾಗ ಕೈಬುಡಂಡು. ಅವಂಡ ಪಾಲಾರ ಆಸ್ತಿಕ್ ನುಪ್ಪದಾಯಿರ ತಪ್ಪಿಂದ್ ಜೋಸೆಫ್ ಮಿಂಞಾಕ್ ಬಾತ್. ಕಷ್ಟೇಂಗಾಡ್, ನಷ್ಟೇಂಗಾಡ್, ಕೊಡವಂಡ ಆಸ್ತಿನ ಪೊರಮೆಕಾರಂಗ್ ಬುಡುಲೇಂದ್ ಸೊಸೈಟಿ ಗಪ್ಪು ನುಪ್ಪತಂಜಾಯಿರಕ್ ಎಳ್‌ದ್‌ಚಿಟ್ಟುಂಡತ್.

ಪೊನ್ನು ಎಲ್ಲಾಡ ಪಾಲಾಕೂ ಮನೆಲಿಂಜಿತೂ ಚತ್ತ ಲೆಕ್ಕ! ಬೊಳ್ಳು ಕೊಟ್ಟಾನ್ ಪಣ ಎಡ್‌ತಂಡ್ ಮೈಸೂರ್‌ಕ್ ಪೊರಾಟತ್. ಅವ್ವ ಬಪ್ಪಿಂದೆಣ್ಣ್‌ಚಿ. "ಬೋಂಡ ಅಮ್ಮ, ನಾಡ ಸಿನೇತಂಗ ಉಂಡ್, ಅವು ಎಲ್ಲ ಎಚ್ಚರ ಎಡ್‌ತವ. ನೀನ್ ಏವಕೇ ಕಯ್ಯತ ಪಪ್ಪನ ನೋಟಿಯಂಡಿರ್. ನಾನ್ ಚಾಯಿ ಕೂಡಿತ್ ಬಪ್ಪಿ. ಇದ್‌ಂಡ ಪತ್ತಪಾಲ್ ಆಸ್ತಿ ನೇಡುವಿ...., ಕಾಗದ ಎಳ್‌ದಿಯಂಡಿಪ್ಪಿ" ಎಣ್ಣೆತ್ ಬಸ್ಸ ಪತ್ತಾಚಿ.

ಕೀತಿಪೋನ ಪೊಡಿಯ ಜಾಕೀಟ್‌ಲೇ ಬಸ್ಸಪತ್ತಾಚಿಟ್ಟು ಅವ್ವನ ನೋಟಿತ್ ಮೋವಂಡ ಕಣ್ಣ್‌ಲ್ ನೀರ್ ದುಂಬ್‌ಚಿ. ಆ ಮನಸ್ಸೊರೊಳ್‌ಲ್ ಎನ್ನತ ಭಾವನೆ ದುಂಬಿತಿಂಜತೊ, ದಾರ್‌ಕ್ ಗೊತ್.....?

ದಿನ ಕಯಿಂಜತ್, ವಾರ ಕಯಿಂಜತ್, ತಿಂಗ ಕಯಿಂಜತ್ ! ಬೊಳ್ಳುರ ಓರೂ ವರ್ತಮಾನ ಬಂದ್‌ಲೆ. ಅವ್ವಿ ಎಲ್ಲಾ ಶಾಸ್ತ್ರಕಾರಳ ಕೇಟತ್. ದೇವನಿಪ್ಪಲ್ಲಿಕೆಲ್ಲ ಪೋಯಿತ್ ಕೇಟತ್. ಅಂಞಾಣ ಬೆಪ್ಪಾಚಿಟ್ಟಿತ್. ಓರಬ್ಬ ಓರಂದ್ ತರ ಎಣ್ಣ್‌ಚಿ. ಪೆದ ಗೊತ್ತುಳ್ಳ ದೇವಕೆಲ್ಲ ಪರಕೆ ಕೆಟ್ಟಾಚಿ. ಅವ್ವಿರ ಮಕ್ಕಡ ಕೇಳಿ ಕೇಟಿಂಜ ಏದ್ ಬೆಂದ್‌ಕಳೂ ತಿರಿತ್ ನೋಟ್‌ಲೆ. ನಾಯಿರ ಬಾಲ್‌ಕ್ ಕೊಳಪೆ ಇಡುವೊ ಪ್ರಯತ್ನ ನಂಗಕೆನ್ನಾಂಗ್‌ಂದ್ ದೂರ ತೆರಂಗ್‌ಚಿ.

ಒನ್ನಾಂದ್ ಕೊಳ್ಳೆಗಾಲ ಸರ್ಕಾರಿ ಆಸ್ಪತ್ರೆಲಿಂಜಿ ಓರ್ ಟೆಲಿಗ್ರಾಂ ತಿಮ್ಮಯ್ಯಂಡ ಪೆದಕ್ ಬಾತ್. "ನಿಂಗಡ ಮೋಂವೊ ಬೊಳ್ಳುನ ಇಂದೇ ಬಂದಿತ್ ಕೂಟಿಯ ಪೋಯಿ. ಸ್ಥಿತಿ ಅಪಾಯ"ಂದ್ ಇಂಜತ್.

ಅವ್ವಿ ಮೊರಟಂಡ್ ಸೊಸೈಟಿ ಗಪ್ಪುರ ಪಕ್ಕೇ ಪೋಚಿ. ಗಪ್ಪು ಚೆನ್ನ ಪಣ ಸರಿ ಮಾಡಿಯಂಡ್, ಅವ್ವಿನ ಕೂಟಿಯಂಡ್ ಕೊಳ್ಳೆಗಾಲ ಆಸ್ಪತ್ರೆಕ್ ಎತ್ತಾಚಿ.

ನರ್ಸ್ ಒಬ್ಬ ಬಂದಿತ್ "ನಿಂಗಡ ಮೋಂವೊನ ಓರ್ ತಿಂಗಕ್ ಬಯ್ಯ ದಂಡ್ ಬಾಲೆಕಾರ ಕೂಟಿಯ ಬಂದಿತ್ ಎಡ್‌ಮಿಟ್ ಮಾಡಿತ್ ಪೋನವು ತಿರಿತ್ ಬಂದ್‌ಲೆ. ಇವಂಡ ಕೈಲ್ ಕಾಸಿಂಜ್‌ಲೆ. ಸಮಯ ಮೀರಿ ಪೋಯಿತ್. ಇದ್ ಪೆರ್ತ್ ಕೆಟ್ಟಿ ಕಾಯಿಲ.

ನಿಂಗ ಇಕ್ಕಲೆ ಕೂಟಿಯಂಡ್ ಪೋಯಿರಿ. ಅಂವೊ ಉಂಡ ತಳಿಯ, ಕುಡ್‌ಚಿ ಕಪ್ಪುನೆಲ್ಲ ನಿಂಗ ಬಳಸತಿ"ಂದ್ ಎಣ್ಣೆಚಿ.

ಬೊಳ್ಳು ಅವ್ವಂಡ ಮೂಡ್‌ನೇ ನೋಟ್‌ಚಿ. ಬಾಯಿಂಜಿ ತಕ್ಕ ಉತ್ತಲೆ. ಸೊಸೈಟಿ ಗಪ್ಪು ಟ್ಯಾಕ್ಸಿ ಮಾಡಿತ್ ಪೊರಟತ್, ಪಿತ್ಯಾಂದ್ ಪೊಲಾಕ ಮನೆಕೆತ್ತಚಿ. ಬೊಳ್ಳುರ ಬರಿಲ್ ಅಳತ ಅಪ್ಪನೊ, ಅಪ್ಪನೊ ಕಣ್ಣ್ ತೊರಂದ್ ನೋಟ್‌ಚಿ. ಮೆಲ್ಲೆ ಕೇಟಿತೂ ಕೇಕತ ಸ್ವರತ್‌ಲ್ "ಪಪ್ಪ, ಅಂದೊಮ್ಮ ಪತ್ತಿಕಯಿಪಲ್ಲಿಕ್ ಬಂದ, ಅಂದೇ ನಾಡ ಬಾಳಕ್ ತಿತ್ತ ಬೆಚ್ಚಂಡ ಅಲ್ಲಾ"?ಂದ್ ಓರ್ ಬರಿಕ್ ತರ್‌ಂಜತ್.

"ಅಪ್ಪಾ ಮೋನೆ, ನಾನ್ ಬಿತ್ತನ ಬೊಳೆನೇ ನಾನ್ ಕೊಜ್ಜ"ಂದೆಣ್ಣೆತ್ ಮೋಂವಂಡ ಎದೆಕ್ ಕವಂಜಂಡತ್!.

- \* - \* - \* -

## ಪ್ರೀತಿ ಅಂತರ ....!

ಮಂದಪ್ಪ ಅವನ ಕೂಟಿಯಂಡ್ ಪೊಲಾಕ ಎಟ್ತ್ ಗಂಟೆಕ್ ಮಡಿಕೇರಿ ಬಸ್ ಸ್ಟಾಂಡ್‌ಕ್ ಎತ್ತ್‌ಚಿ. ಮಿಲ್ಮಿಕಾರ! ಶಿಸ್ತರ ಸಿಪಾಯಿ. ಎಟ್ತ್ ಗಂಟೆ ಎಣ್ಣೆನಕ ಎಟ್ತ್! ಮಿಳ್ಳಾ ಅಲ್ಲ, ಬಯ್ಯೊ ಅಲ್ಲ. ಅವ್ವ, ಕಾಮವ್ವ ನಿಪ್ಪು ತುಣಿ ಕೆಟ್ಟಿಯಂಡಿಂಜತ್. ಮಂದಪ್ಪಂಡ ಮೂಡಲ್ ಪದಾನಂಜಿ ದಿನ ಕೆರಕತ ತಾಡಿ, ಪೋರಿಮೇಂಜ ಗರಿಕೆ ಕುತ್ತಿರ ಮಾದರಿ ಇಂಜತ್.

ಬ್ಯಾಗ್‌ನೊ, ಕೊಡೆನೊ ಅವ್ವಂಡ ಕೈಕ್ ಕೊಡ್‌ತಿತ್ ಬಸ್ ಸ್ಟಾಂಡ್‌ರ ಬೆಂಚಿಲ್ ಅಳಾಪ್‌ಚಿಟ್ಟತ್. ತಾಂಡ ಪೊಣ್ಣ್ ರಾಧನೊ, ಮಾಂವಿ ತಂಗವ್ವನೊ ಬಂದಿತ್ ಇಳಾಂಜಿತಾಂದ್ ಬಸ್ ಸ್ಟಾಂಡ್ ಇಡೀ ತೇಡ್‌ಚಿ.

"ಅನುರಾಧ ಬಸ್ಸು ಬಾತಾ?"ಂದ್ ಕಂಡ ಡ್ರೈವರ್ಸ್‌ಳ, ಏಜೆಂಟಳ ಕೇಟತ್.

"ಆ ಬಸ್ಸು ಏಳೇ ಮುಕ್ಕಾಲ್ ಗಂಟೆಕ್ ಬಂದಿತ್ ಪೋಯಿತಾಚಿ"ಂದ್ ಎಲ್ಲಾರು ಎಣ್ಣೆಚಿ. ಅಂದಕ ನಾಡ ಪೊಣ್ಣ್, ಮಾಂವಿಯೊ ಬಪ್ಪಿಂದೆಣ್ಣಿಯಿಂಗ ಯಾಲೆ ಪೋಚಿ?ಂದ್ ಹೋಟೆಲ್, ಗೂಡಂಗಡಿ ಎಲ್ಲಾ ತೇಡ್‌ಚಿ. ಎಲ್ಲಿಯೊ ಕಾಂಬಲ್. ಆಯಿಂಗ ಬರಂಡಿಯ ಬಸ್ಸು ತಪ್ಪಿ ಪೋಯಿತಿಕ್ಕೊಂದ್ ಗೇನ ಮಾಡ್‌ಚಿ. "ಬಸ್ಸುಕಾರಕ್ ಶಿಸ್ತ, ನಿಯಮ ಎಣ್ಣುವದೇ ಗೊತ್ತಿಲ್ಲೆ"ಂದ್ ಮನಸ್ಸುರೊಳಲೆ ಬಜ್ಜಂಡ್, ಪೊಣ್ಣ್‌ರ ತಾಮನೆರ ಬರಿಂಜ ಬಪ್ಪ ಬೋರೆ ಬೋರೆ ಬಸ್ಸುರ ಪೆದ, ಬಪ್ಪ ನೇರ ಎಲ್ಲ ಕೇಟರ್‌ಂಜಂಡತ್. ಅಕ್ಕಣೆಕ್ ತಲಕಾವೇರಿ ಬಸ್ಸು ಬಂದಿತ್, ಜನಳ ದುಂಬ್‌ಚಿಟ್ಟಂಡ್ "ರೈಟ್" ಎಣ್ಣೆತ್, ಪೀಪಿ ಉರ್‌ಪಿಯಂಡ್ ಪೊರಟಿತ್, ಪೊಗೆ ಕಾರಿಯಂಡ್, ನೆರಕಿಯಂಡ್ ಪೋಸ್ಟಾಫೀಸ್ ಚಡಾವ್ ಪತ್ತಿಯಂಡ್ ಮರೆಯಾಚಿ.

"ಅಯ್ಯೋ ಪಾಪ, ನಾಡ ಪೊಣ್ಣ್‌ಕೂ, ಮಾಂವಿಕೂ ಎಂತ ತೊಂದರೆ ಆಯಿಪೋಚೊ ಎನ್ನೋ?"ಂದ್ ಬೇಜಾರ ಪಟ್ಟಂಡ್ ಬೋನ್‌ಲ್ ಕೆಣ್‌ಂಜ ಎಲಿನನ್ನಕೆ ಬಸ್‌ಸ್ಟಾಂಡ್‌ಲ್ ಅಪ್ಪರೊ ಇಪ್ಪರೊ ಓಡಿಕಳ್‌ಚಂಡಿಂಜತ್. ಅವ್ವ ಕಾಮವ್ವ ಮಾತ್ರ

ಸ್ಥಿತಪ್ರಜ್ಞಳಾಯಿತ್, ಚತ್ವಪೋನ ವಡಿಯಂಡ ಕೂಡೆ ಮಡಿಕೇರಿಕ್ ಬಂದ ದಿನತ್ನೆಲ್ಲ ಗೇನ ಮಾಡಿಯಂಡ್ ಮುಂಡತೆ ಅಳಾತಂಡತ್!

ಮಂದಪ್ಪಂಡ ಅಪ್ಪ ದೇವಯ್ಯ, 28 ಕಾಲ ಮಿಲಿಟರಿಲ್ ಸರ್ವಿಸ್ ಮಾಡ್‌ನಂವ. ಪಾಕಿಸ್ತಾನ ಪಡೆಲ್ ಭಾರಿ ಸಮರ್ತಿಗೆ ಮಾಡಿತ್ ನಲ್ಲ ಪೆದ ನೇಡ್‌ನಂವ. ಅಪ್ಪಂಗ್ ಪಿಂಚಿನ್ ಆಪಕ ಮೋಂವ ಮಿಲಿಟರಿಕ್ ಕೂಡ್‌ಚಿ. ಬೆಂದು ಚೆನ್ನಾ ದಿಯೆಲ್ಲಾ "ಒಂದುಳ್ಳ ಮೋಂವನ ಮಿಲಿಟರಿಕ್ ಕೂಟಿ"ಂದ್ ಪೆರ್ತ್ ಕೇಟಂಡಕಲೂ, ದೇಶಭಕ್ತ ದೇವಯ್ಯ ಒಂದುಳ್ಳ ಮೋಂವನ ತಡ್‌ತಲೆ.

ಮಂದಪ್ಪ 16 ಕಾಲ ಸರ್ವಿಸ್ ಮಾಡ್‌ಚಿ. ನಾಲ್ ತಿಂಗಕ್ ಬಯ್ಯ ಅಪ್ಪ ಚತ್ವಪೋಚಿ. ಕಾಶ್ಮೀರತ್ ಇಂಜಾನಗುಂಡ್ ಅಪ್ಪಂಡ ಚಾವುಕಾಡ್, ಮಾದಕಾಡ್ ಬಂದಿತ್ ಎತ್ತುವ ಕೈಂಜಾಲೆ ಮಂದಪ್ಪಂಗ್. ಕೈಂಜ ಕಾಲ ಅಪ್ಪ ಕಾಯಿಲತ್‌ಲಿಪ್ಪಕ ಬಂದಿತ್ ಚೆನ್ನ ದಿನ ಇಂಜಿತ್ ಪೋಯಿತಿಂಜತ್. ರಜ ತೇಂದಿತ್ ಪೋಪಕ ಅಪ್ಪ, ಮೋಂವನ ಬರಿಲ್ ಅಳಾಪ್‌ಚಿಟ್ಟಂಡ್ "ಮಂದು, ಇದ್ ಕ್ಯಾನ್ಸರ್, ವಾಸಿ ಆಪುಲೆ. ನಾನ್ ಚತ್ತಕ ಅಚ್ಚ ದೂರತ್‌ಂಜಿ ಬರತೆ. ಇನ್ನೊಮ್ಮ ರಜತ್‌ಲ್ ಬಪ್ಪಕ, ಅವ್ವನ ಕೂಟಿಯಂಡ್ ಕಾವೇರಿಕ್ ಪೋಯಿತ್ ಪಿಂಡ ಬೆಚ್ಚಿತ್ ಬಂದ್‌ರ್"ಂದೆನ್ನೆತ್ ಅಯೆಚತ್.

ಮಂದಪ್ಪಂಡ ಮಂಗಲಾಯಿತ್ 5 ಕಾಲ ಆಯಿತಿಂಜತ್. ಓರ್ ಕುಳ್ಳಿನ್ ಏಳ್ ತಿಂಗತ್‌ಲ್ ಪೆತ್ತದ್ ಚತ್ವ ಪೋಯಿತಿಂಜತ್. ಅಕ್ಕಣೆಕ್ ಸುತ್ತುಮುತ್ತ ಕೀತ್‌ಕಿರಿ ಪೊಣ್ಣಾಳಡ ನಾವು ಮುಂಡತಿಪ್ಪ? "ಮಂಗಲಾಯಿತ್ ಆಯದೇ ಆರರೆ ತಿಂಗ. ಅದೆನ್ನೆನೆ ಪೆತ್ತತೊ? ಏಳ್ ತಿಂಗತ್‌ರ ಕುಳ್ಳಿ ಮೂಂದರೆ ಕೆ.ಜಿ., ತೂಂಗುವದುಂಡಾ? ಎನ್ನೊಪ್ಪ ಕಲಿಗಾಲ! ಕಳ್ಳಂಡ ಮಾಯೊ, ಕೊಳ್ಳಿರ ಮಾಯೊ ದಾರ್ಕ್ ಗೊತ್ತ ಎಣ್ಣೆ? ಮಿಲಿಟರಿ ಕಾರಡ ಪೊಮ್ಮ ಕ್ಕಳೆ ಇನ್ನನೆ"ಂದೆಲ್ಲ ಯಾರಾಮೆರ ತಕ್ ಪರಂದಂಡ್, ಒಬ್ಬಂಡ ಮೂಡ್ ಒಬ್ಬ ನೋಟಿಯಂಡ್, ಕಣ್ಣರ ಮೂಲೆಲೇ ಓರ್ ಕೇಡ್‌ರ ಅರೆತೆಳಿ ತೆಳಾಚವ ಇಂಜತ್.

ಆಚೇಂಗಿ ಮಂದಪ್ಪಂಡ ಅಪ್ಪವ್ವ ಪೊಣ್ಣಾಳಡ ಇನ್ನತ ಅರಂಗೇತುವ ತಕ್‌ಕೆಲ್ಲ ಕೆಮಿ ಕೊಡ್‌ಪವು ಅಲ್ಲ.

ಮಂದಪ್ಪಂಗ್, ರಾಧನ ತಂದ್ ಪರಿಯುವಕ ಅಂವಂಡ ಅಪ್ಪ ದೇವಯ್ಯಂಗೂ, ಅವ್ವ ಕಾಮವ್ವಂಗೂ ಬಲ್ಯ ಕುಶಿ ಇಂಜಾಲೆ. ಮಂದಪ್ಪ ಕಾಶ್ಮೀರತ್‌ಲಿಂಜತ್. ತಂದ್‌ಕಾರ ಮೂಡಿರ ಪೋಟೋ ಅಯೆಚಾನ ನೋಟಿತ್, ಮೂಡಿರ ಚಾಯಿಕ್ ಮಂದು ಒತ್ತಂಡತ್.

ಮೂಡಿರ ಗುಣಮನ ಬಿರಿಂಜಿ ನೋಟಿಯಂಡ್ ತೇಡುವಕ್ ಮಿಲ್ವಿಕಾರಂಗ್ ನೇರ ಇಪ್ಪಾ?

ರಾಧಂಡ ಸಂತಾನತ್‌ರ ಗತ ವೈಭವತ್‌ನೆಲ್ಲ ದಾರ್ ದಾರೊ ಕೊಟ್ಟಿ ಪಾಡುವದ್ ಕಾಮವ್ವ ಕೇಟಿತಿಂಜತ್. "ರಾಧಂಡ ಅವ್ವ ತಂಗವ್ವ ನಲ್ಲೋರ್ ಮಾಜಿ ಪಾಂಬಾಟ್‌ಕರ್ತೀಲೊ, ಅವ್ವಂಡ ನೆರಿ ಪುಡ್‌ಚಂಡ್ ಸುತ್ತಿತ್ ಮೋವಳೊ ನಲ್ಲೋರ್ ಪೀಲಿಯಾಟ್‌ಕರ್ತೀ"ಂದ್ ನೆರೆಕರೆ, ಊರ್‌ನಾಡ್‌ರ ಜನ ಪರೆವ ಇಂಜತ್. "ಇದ್‌ನೆಲ್ಲ ನೋಟುವದೇ ಬೋಂಡಾಂದ್ ಮನೆಬುಟ್ಟ್ ಪೋನ ವಡಿಯಂಡ ಚಾವೂ ಬಾವು ಅರಿಂಜ್‌ತ್‌ಲ್ಲೆ"ಂದ್ ಪಳಮೆ.

ಗಂಟೆ ಒಯಿಂಬದರೆ ಆನಕಲೂ ಪೊಣ್ಣ್ ಪಿಳ್ಳಾ ಮಾಂವಿ ಬಂದಿತ್ ಎತ್ತಲೆ.

"ಅವ್ವ, ಇಳ್ಳಿ ನಂಗ ಅಯಿಂಗಳ ಪಾರಕಾತಕ ಆಪ್‌ಲೆ. ಪನ್ನೆರಂಡ್ ಗಂಟೆರೊಳಿಯ ಭಾಗಮಂಡ್ಲಕ್ ಎತ್ತತೆ ಪೋನಕ ಪಟ್ಟಿಂಗ, ಹಜಾಮಂಗಳೆಲ್ಲ ಪೋಯಿರುವ. ಮಹಾಪೂಜೆಯೂ ಕೈಂಜಿ ಪೋಪ. ಪಿಂಡ ಬೆಪ್ಪಕೂ ಕಯ್ಯಲೆ. ನಂಗ ಪೋಕನ ಏಳ್"ಂದ್ ಅವ್ವನ ಕೂಟಿಯಂಡ್ ಭಾಗಮಂಡ್ಲಕ್ ಬಸ್ಸು ಪತ್ತೆಚಿ ಮಂದಪ್ಪ.

ಅಂದ್ ಬೊಳ್‌ಬಾವು. ಕಾವೇರಿಕ್ ಪೋಪಕ್ ಬಸ್ಸಲ್ ಸಕತ್ ರಶ್ ಇಂಜತ್. ಮೂಂದಾಳ್‌ರ ಸೀಟ್ ಪುಡ್‌ಚಕಲೂ ಕಂಡಕ್ಕರ್ ಬಂದಿತ್ "ಚೆನ್ನ ಎಡ್ಲೆಸ್ಸು ಮಾಡಿಯೋಳಿ" ಎಣ್ಣೆತ್ ಇಳ್ಳೋರ್ ದಡ್‌ಚಿನ ಕಾಮವ್ವಂಡ ಎಡೆಕ್ ತುರ್ಕೆಚಿ. ಸಡಲ ಆನ ಗುದ್ದಲಿರ ಕಾವುಕ್, ಆಪು ಇಟ್ಟನ್ನೆಕೆ ಆಚಿ! ಆ ದಡ್‌ಚಿರ ಮೇಲೂ ಮುಂಡತಿಪ್ಪಲೆ, ಕಾಲೂ ಅಡ್‌ಕತಿಪ್ಪಲೆ, ಕೂಟ್‌ಕ್ ನಾವು ಕಿರಿರೊಳ್‌ಲ್ ಅಡ್‌ಂಗಿತಿಪ್ಪದೇ ಇಲ್ಲೆ! ಮೌನತ್ ಅಳ್‌ತ ಕಾಮವ್ವನ ತೊಟ್ಟು ತೊಟ್ಟು ತಕ್ಕ ಪರಿಚಿಡುವ ಇಂಜತ್. ಅವಡ ಕಳಿ, ತಕ್ಕ ಬಾಕೆಲ್ಲ ಕಾಂಬಕ ಮಂದಪ್ಪಂಗ್ ತಾಂಡ ಮಾಂವಿ ತಂಗವ್ವಂಡ ಗೇನ ಬಾತ್. ತಂಗವ್ವನೂ ಹೆಚ್ಚ್ ಕಮ್ಮಿ ಆ ದಡಿಚಿ ಪೊಣ್ಣಾಳ್‌ರ ಕೂಟ್‌ಕರ್ತಿಯೆ!

ನಾಡ ಪೊಣ್ಣೊ, ಮಾಂವಿಯೂ ಬಪ್ಪಾಂದ್ ಅಚ್ಚ ಕಲ್ಲತೆ ಎಣ್ಣೆ ಚಿ. ಖರ್ಚಿಕ್‌ಳ ಪಣ ಎಲ್ಲ ನಂಗಳೆ ಕೊಂಡ ಬಪ್ಪಾಂದೂ ನಾಡ ಜೋಬ್‌ನೆಲ್ಲ ತಂವ್ವತಿತ್ ಎಡ್‌ತಂಡತ್. ಎನ್ನಂಗ್ ಬರತಾಯಿಕ್ಕೊಂದ್ ತಾನೆ ಪಳಿಯ ಅಂಜಿ ಕಾಲತ್‌ರ ಅನುಭವತ್‌ನೆಲ್ಲ ಮೇಚಿ ಕರುಕುವಕ್‌ಳ್‌ಂಜತ್.

ಮಂಗಲಾಯಿತ್ ಎಟ್ವದಿನ ರಾಧ ಬಾಕೆಮನೆಲ್ ಇಂಜವಳಲ್ಲ! ವಡಿಯ



ರಜತ್‌ಲ್ ಬಂದಕ ನಾಲ್ ದಿನಕೊಂಜಿ ಜಾಸ್ತಿ ಅವನ ಅಪ್ಪವ್ವಂಡ ಕೂಡ ಇಪ್ಪಕ್ ಬುಟ್ಟಿವಳಲ್ಲ. ಒಮ್ಮೆ ಮಂದಪ್ಪ ರಜತ್‌ಲ್ ಬಪ್ಪಕ ನೇರೆ ಅಪ್ಪಂಡ ಮನೆಕೇ ಬಂದ್‌ರಾತ್. ಆಕುರಿ ಪೊಣ್ಣೋರೊ, ಮಾಂವಿರೊ ಅವತಾರ ಪಿಳ್ಳಾ ರಂಪ ಕಂಡಿತ್ ಬೊರಂಡಿಪೋಚಿ ಮಂದಪ್ಪ ! ಕಾಶ್ಮೀರತ್ 10 ಕಾಲ ಉರ್ತಮಾರಿಯಳ ಅಡಕಿಯಂಡ್, ಸಹಿಸಿಯಂಡ್ ಇಂಜ ಮಂದುಕ್ ತಾಂಡ ಮಾಂವಿರ ಮಿಳ್ಳಾತ್ ಆ ಪಾಕಿಸ್ತಾನಿ ಉರ್ತಮಾರಿಯಳೆಲ್ಲ ಎಲಿಕುಟ್ಟಿಯಡ ಮಾದರಿ ತೋಂದ್‌ಚಿ ! ಅಲ್ಲಿಂಜಿಪ್ಪರ ಏದ್ ರಜತ್‌ಲ್ ಬಾತೇಂಗಿಯೊ ಮಾಂವಿರಲ್ಲಿಕ್ ಬಂದಿತ್ ದಂಡ್‌ದಿನ ಕೈಂಜ ಪಿಂಳ್ಳಾ ಅವ್ವಂಡ ಪಕ್ಕ ಬಪ್ಪ ಇಂಜತ್!

ಅವ್ವಂಗ್‌ಂದ್ ಎಡ್‌ತಬಂದ ಪೊಡಿಯತ್‌ನ ಬೆಚ್ಚಂಡ್ ತಾಂಡ ಪಳಿಯ ಪೊಡಿಯತ್‌ನ ಡೆಲ್ಲಿರ ಪೆದವುಳ್ಳ ಕವರ್‌ಕ್ ಇಟ್ಟಿತ್, ಬ್ಯಾಗ್‌ಕ್ ತುರ್‌ಕಿ ಕೊಡ್‌ಪ ಇಂಜತ್ ರಾಧ. ಅಪ್ಪಂಗ್‌ಂದ್ ಕೊಂಡ ಬಂದ ಮಿಲ್ವಿ ರಂನೆಲ್ಲ ಎರ್ಕಿರೊಂಜಿ, ಓರ್ ಕ್ವಾರ್ಟರ್ ಕುಪ್ಪಿಕ್ ಕಮ್ಮಿ ಕ್ರಯತ್‌ರ ಏದೋರ್ ಕಳ್ಳನ ದುಂಬ್‌ಚಿಟ್ಟಿತ್. "ಇದಾ ಅಪ್ಪನಲ್ಲ. ಇದ್‌ನ ಕೊಡ್ ಮಂದು. ಏದಾಚೆಂಗೆನ್ನ ? ಮಂಡೆಕ್ ಪತ್ತಾನಕ ಮದಿಯಲ್ಲ ? ಕುಡಿಪಚ್ಚೆಕ್ ಕೊಡ್‌ಪಕ್ ನೀನೆನ್ನ ಕ್ಯಾಪ್ಪನ್ನ ? ಮೇಜರ ? ಮೋಲಿಕ್ ಪೆನ್‌ಶನ್ ಕಾಟ್ಟುವ. ಆಚೇಂಗಿ ಮೈಮಳ ಕಾಕಿತ್ ಇದವ್ವ ಬೆಚ್ಚಾಂದ್ ಕೈನೀಟಿತ್ ನೂರ್ ಉರ್‌ಪಿಯ ಕೊಡ್‌ತ ತೊಂಡನಲ್ಲ ನೀಡಪ್ಪ ಇನ್ನನೆ ಪೆತ್ತ ಅವ್ವನೊ, ಅಪ್ಪನೊ ಬುಡ್‌ಂಜಿ ಪೋಪನ್ನಕೆ ಪರಂದಿತ್ ಮಂದಪ್ಪಂಡ ಕೈಲುಳ್ಳ ಪಣತ್‌ನೆಲ್ಲ ಕೇಟ್ ಬೆಚ್ಚಂಡ್, ಖರ್ಚಿಕ್‌ನ ಮಾತ್ರ ಕೊಡ್‌ತಿತ್ ಅಯಿಪ ಇಂಜತ್. ಮಾಂವಿರೊ, ಪೊಣ್ಣೋರೊ ಎಡೆಲಿಪ್ಪಕ, ಕಾಶ್ಮೀರ ತೆರಿಲಿಪ್ಪದೇ ಸುಖಾಂದ್ ಗೇನ ಮಾಡಿಯಂಡ್ ರಜ ತೇರುವಾನೇ ಪಾರಕಾತಂಡ್ ಇಪ್ಪಂಜತ್ ಮಂದಪ್ಪ!

ಮಂದಪ್ಪ ಕೈಂಜಕುರಿ ರಜ ತೇಂದಿತ್ ಪೋಪಾಂಗ್ ಮಿಳ್ಳಾ ಅಪ್ಪ ದೇವಯ್ಯ, ಮೋಂವನೊ, ಪೊಣ್ಣೊನೊ ಬರಿಲ್ ಅಳ್‌ಪಾಚಿಟ್ಟಂಡ್ "ನಾನ್ ಮಿಲಿಟರಿ ಸರ್ವಿಸ್‌ಲಿಪ್ಪಕ ಮನೆಕಾರ ನಾಡ ಪಾಲ್‌ರ ಜಮ್ಮ ಜಾಗತ್‌ನೆಲ್ಲ ಬಲ್‌ಚಿ ಕೂಟಿಯಂಡೊ, ಪೊರಮೆ ಜನಕ್ ಮಾರಿತೊ ನಾಕ್ ಒಂದೊ ಇಲ್ಲತೆ ಮಾಡಿತಿಂಜತ್. ಕೋರ್ಟ್, ಕಛೇರಿ ಸುತ್ತಿತ್ ನಾಡ ಪಾಲ್ ಜಾಗ ಸ್ವಾಧೀನ ಪಡ್‌ಂದಂಡಿಯೆ. ಕಾಫಿ ಗಿಡೊ ಬೊಳ್‌ತಿಯೆ. ಅಕ್ಕಣೆ ನಾಕ್ ಈ ಕ್ಯಾನ್ಸರ್ ಪುಡ್‌ಚತ್. ನಾನ್ ಚತ್ತ ಪಿಳ್ಳಾ ನೀನ್ ವಾಲಂಟರಿ ರಿಟೈರ್‌ಮೆಂಟ್ ಎಡ್‌ತಂಡ್ ತೋಟ ಮಾಡ್. ಇಲ್ಲೇಂಗಿ, ಮನೆಕಾರ ಆದ್ಯ ಕೈಲಾಕಿಯವು. ತೋಟ

ಮಾಡುವಕುಳ್ಳ ಚೆನ್ನ ಪಣೋ ಬೆಚ್ಚಿಯೆ" ಎಣ್ಣೆ ತಿಂಜತ್.

ದೇವಯ್ಯ ಚತ್ತದು, ಕಾಮವ್ವ ಜಿಲ್ಲಾಧಿಕಾರಿರ ಮೂಲಕ ಮೋಂವಂಡ ವಾಲಂಟರಿ ರಿಟೈರ್‌ಮೆಂಟ್‌ಕ್ ಎಳ್‌ದಿತಿಂಜತ್. ಈ ಕುರಿರ ರಜ ತೇರುವಾಂಡೊಳ್‌ಲೆ ಪಿಂಚಿನ್ ಆಪಾನಗುಂಡ್ ಮಂದಪ್ಪ ತಾಂಡ ಪೊಟ್ಟಿ ಪೋಳಿಯೋಡೆ ಬಂದಿತಿಂಜತ್. ಅದೇ ವಾರ ಕಾರ್ಗಿಲ್ ಪಡೆ ಸುರುವಾಯಿತ್ ಕೊಡಗ್‌ರ ನಾಲ್ ಯೋಧಂಗ ವೀರಮರಣ ಪಡ್‌ಂದಿತಿಂಜತ್.

ಕಾವೇರಿಲ್ ಪಿಂಡ ಬೆಚ್ಚಿತ್ ಬಂದಂದ್ ಮನೆಲ್ ಕಾರಣಂಗ್ ಮೀದಿ ಬೆಚ್ಚಿತ್. ಪಿತ್ಯಾಂದ್ ಪೊಲಾಕ ನೇರ್ತೆ ಕಾವೇರಿ ತೀರ್ಥ, ಚಾಂದ್‌ಕುರಿ, ತೆಂಗೆರೊಡೆ ಎಲ್ಲ ಎಡ್‌ತಂಡ್ ಮಾಂವಿರ ಮನೆಕ್ ಪೊರಟತ್.

ಮಾಂವಿರ ಮನೆಕ್ ಎತ್ತ್‌ಚಿ. ಕಾವೇರಿಕ್ ಪೋಯಿತ್ ಬಂದ ಪದ್ಧತಿ ಪೋಲೆ ಕಾಲ್ ಪುಡ್‌ಚತ್. ರಾಧಂಡ ಕೈಕ್ ಬ್ಯಾಗ್ ಕೊಡ್‌ತಿತ್, 'ಕಾವೇರಿರ ತೀರ್ಥಪ್ರಸಾದ ಎಲ್ಲ ಉಂಡ್. ನಿಂಗ ಎನ್ನಂಗ್ ರಾಧ ನಿನ್ನಾಂದ್ ಬಂದ್‌ಲೆ? ನಂಗ ಎಚ್ಚಿಕ್ ನೇರ ಪಾರಕಾತತ್ ಗೊತ್ತಾ? ಮಾಂವಿಕೆನ್ನೇಂಗಿ ಸೌಖ್ಯ ಇಂಚ್‌ಲಿಯಾ?'ಂದ್ ಕೇಟತ್.

ಬಾಲ್ ಚೌಟಿ ಪೋನ ಪೂಣ್‌ರನ್ನೆಕೆ ಓರ್ ತುಂಯಿಕಲ್ ತುಂಯಿಚಿತ್ ತಂಗವ್ವ "ನಾಕೆಂತ ಗಾಂಡ್ ಬಡ್‌ಚಿಯೆ? ಅದಿರಡ್ ನೀಡ ಅಪ್ಪನ ಸ್ವರ್ಗತ್ ಅಳ್‌ಪ್‌ಚಿಟ್ಟಿತ್ ಬಂದಿಯಾ? ಅಲ್ಲಾ ಬದ್‌ಕ್‌ಚಿಟ್ಟಂಡೆ ಬಂದ್‌ಟಿರಾ? ಪಿಂಡ ಬೆಚ್ಚಿತ್ ಸ್ವರ್ಗಕ್ ಕೂಟಿರೊಲೂಂದ್ ಆನಕ ಮನ್‌ಸಕೊಲ್ಲಿ ವೀರಪ್ಪನೊ ಸ್ವರ್ಗಕ್ ಕೂಟಿರೊಲು. ಅದ್‌ಂಡ ಕೂಟ್‌ಕ್ ನೀಡ ಅವ್ವಂಡದೋರ್ ನಾಟಕ. ಆರ್‌ತಿಂಗ ಬಯ್ಯ ಚತ್ತ ವಡಿಯಂಗ್ ಇಕ್ಕ ನಿಪ್ಪು ತುಣಿ! ಇದೆಲ್ಲ ದಾಡ ಕಣ್ಣ್‌ಕೆಟ್ಟುವಕುಳ್ಳ ಕಳಿಯೋ? ಎಲ್ಲಾ ಪತಿವ್ರತೆಯಳೆ. ಸೀತೆ, ಸಾವಿತ್ರಿ, ದ್ರೌಪದಿಯಳೆಲ್ಲ ನೀಡ ಅವ್ವಂಡ ಮಿಳ್ಳಾಲ್ ಚತ್ತತ್ ಬುಡ್! ಕಾವೇರಿರ ತೆಂಗೆರೊಡೆನೊ ನೀಡ ಅವ್ವಂಗ್ ಕೊಡ್‌ತಿತ್ ಬರೊಲಿಂಜತಲ್ಲ? ನಲ್ಲ ಕೋಳಿಕರಿ ಮಾಡಿತ್ ತಿಂದಿತ್, ಕಂಡ ಬೊಳತಿಯವಲಿಂಜತಲ್ಲಾ"ಂದ್ ರೆಕಾರ್ಡ್ ಮಾಡಿಬೆಚ್ಚಿ ಕ್ಯಾಸೆಟ್ ಇಟ್ಟನ್ನೆಕೆ ಪರಂದತ್.

ಕಾಶ್ಮೀರ ತೆರಿಲ್ ಮಂದಪ್ಪ ಉಗ್ರಗಾಮಿಯಡ ಪೆರ್ತ್ ಅನಿರೀಕ್ಷಿತ ಧಾಳಿಕೂ, ಬಾಂಬ್ ಧಾಳಿಕೂ ಕೆಣ್‌ಂಜ ಅನುಭವಿ ಯೋಧ. ಆಚೇಂಗಿ, ತಾಂಡ ಪೊಣ್ಣ್‌ರವ್ವಂಡ ಇನ್ನತೋರ್ ಅನಿರೀಕ್ಷಿತ ಧಾಳಿಲ್ ತೊಂಬೆಕ್ ಉಂಡೆ ತೆರ್ತವನ್ನೆಕೆ ಕೊಯಂಗಿ ಪೋಚಿ!

ತಕ್ಕ ಉತ್ತತೆ, ತೊಂದ ಕಣ್ಣ ಚಿಮ್ಮತೆ, ಕಳತರ ಬೋಟಿರ ಮಾದರಿ ನಿಂದ್ ಪೋಚಿ!  
 ಈ ಏಕಾಏಕಿ ಧಾಳಿಕ್ ಕಾರಣ ಎಂತೆಂದ್ ಪೋಣ್ಣನೇಂಗಿ ಕೇಕನಾಂದೆಣ್ಣ ಚೇಂಗಿ, ಅವ  
 ಬಾಡೆಲ್ ಪೂಮಾಲೆ ಪೇಪರ್ ಓದಿಯಂಡ್ ಅಳತಿತ್, ವಡಿಯಂಡ ಬ್ಯಾಗ್ ಐಮರತ್ಲೇ  
 ಉಂಡ್!

ಅರೆಗಂಟೆ ಮನೆ ತೇಕೆಮನೆರನ್ನೆಗೆ ಗಪ್‌ಚುಪ್ ಆಯಿಪೋಚಿ. ಮಂದಪ್ಪ  
 ಬೊರಂಡಿತ್ ಐಮರತ್ ಅಳತವಂಡ ಮೇಲ್‌ಲ್ ಕುಳಾರ್ ಪೊರಿ ಪೊಟ್ಟಿ ಪೋಚಿ!

ಸುಮಾರ್ ನೇರ ಸದ್ದೇ ಇಲ್ಲೆ. ತಂಗವ್ವ ಉಂಬಳ ಮನೆರೊಳ್‌ಂಜಿ "ರಾಧ  
 ಎನ್ನ ಮುಂಡತೆ ಅಳತಂಡಕ ಮಜ್ಜಣಕ್ ಕೂಳ್ ಮಾಡಂಡ? ಎನ್ನ ಮಾಡುವಿಯಾ?"  
 ಕೇಟಿತ್.

"ನೀನ್ ನಿನ್ನಾಂದ್ ಪೊಲಾಕ ಎಣ್ಣೆಯಲ್ಲ ಅವ್ವ, ಕಾರ್ಗಿಲ್‌ಕ್ ಪಡೆಪೊತ್ತಿತ್  
 ಚತ್ತಯಿಂಗಕ್ ಎಚ್ಚೆಚ್ಚಕ್ ಪಣ ಕಾಟ್ವಾಚೀಂದ್, ಆ ಸಂಗತಿ ವಿವರೋಡೆ, ಪೂಮಾಲೆ  
 ಪೇಪರ್‌ಲ್ ಬಂದಿತ್. ಅದನ್ ಓದಿಯಂಡುಳ್ಳೊ. ಬಾ ಅವ್ವ ಕೇಳ್, ಓದಿತ್ ಎಣ್ಣುವಿ"  
 ಎಣ್ಣೆ ಚಿ ಮೋವ.

"ಅನ್ನತ ಯೋಗ ನಾಕೂ, ನೀಕೂ ಎಲ್ಲಿ ಉಂಡ್ ಮೋಳೆ? ಹಾಂ.... ಓದ್  
 ನೋಟಿನಾ....."

ರಾಧ ಪೂಮಾಲೆರ ವರದಿನ ಏಂಗಿತ್, ಐಮರತ್‌ಲ್ ಅಳತ ವಡಿಯಂಗ್  
 ಕೇಪನ್ನೆಗೆ ಓದ್‌ಚಿ. ಪಾದಿ ಓದಿತಾಕಣೆ, ತಂಗವ್ವ ಬಾಯಿಟ್ಟಿತ್, "ಮದಿ. ಮದಿ.....  
 ಅಪ್ಪರ ಓದಿತ್ ನಾಡ ಕೆಲ ಉರ್‌ಕತೆ ಮೋಳೆ".

"ಪಣಕಾಸಾರ ಸೌಕರ್ಯ ಇಚ್ಚಕ್. ಬಾಕಿ ಸಂಗತಿ ಕೇಳ್, ಅಯಿಂಡ ಚಾವುನ  
 ಕೊಂಡಬಪ್ಪಕ ಡಿ.ಸಿ., ಮಂತ್ರಿಯ, ಮಿಲ್ಟಿ ಅಧಿಕಾರಿಯ, ಎಣ್ಣೆಯಂಡ್ ಜನಸಾಗರ.  
 ಚಾಂದ್‌ಕುಟ್ಟಾಲೆ ಚಾವು ಚುಟ್ಟಿತ್, ಪೇಟೆ, ಪಟ್ಟಣತರ ರೋಡ್‌ಕೆಲ್ಲ ಚತ್ತಯಿಂಡ  
 ಪೆದ ಬೆಚ್ಚಿತ್. ಚತ್ತಯಿಂಡ ಪೋಣ್ಣ ಪಿಂಞ ಸಾಲ್ ಸಂತಾನತ್‌ನೆಲ್ಲ ಡೆಲ್ಲಿಕ್  
 ಏರೋಪ್ಲೇನ್‌ಲ್ ಕೂಟಿಯ ಪೋಯಿತ್ ಸಾಲ್ ಪೊದ್‌ಪಾಚಿಡುವಲೋ..... ಪ್ರಧಾನಿರ  
 ಕೂಡೆ ನಿಪ್ಪುಚಿಟ್ಟಿತ್ ಪೋಟೋ ಎಡ್‌ಪಲೋ....."

"ನೋಟ್ ಮೋಳೆ ಪುಟ್ಟುವೇಂಗಿ ಪುಟ್ಟುಂಡು ಅಂತವಂಡ ಪೋಣ್ಣಾಯಿತೋ,  
 ಮಾಂವಿಯಾಯಿತೋ. ಚತ್ತ ದುಃಖ ನಾಲಾದಿನಕೆತ್ತಣೆ ಇಕ್ಕು. ಆಚೇಂಗಿ, ಕೇಳಿ

ಎಳೆಕರ್‌ಂದಲೆಕೆತ್ತಣೆ ಇಪ್ಪುಲಿಯಾ? ಅದ್ ಬುಟ್ಟಿತ್ ಎಣ್ಣೆ ಬಪ್ಪಕ ಕಣ್ಣೊ ಮುಚ್ಚಿಯಂಡತ್ ಎಣ್ಣೆಟ, 16 ಕಾಲ ಕೆಟ್ಟಿತಿಟ್ಟಿ ನಾಯಿರನ್ನೆಕೆ ಬಕ್ಕ ಕಾತಿತ್, ಲಡಾಯಿ ಸುರು ಆಪಕ ವಾಲಂಟರಿ ರಿಟೈರ್‌ಮೆಂಟ್‌ಕ್ ಎಳೆದಿತ್ ಬಪ್ಪಯಿಂಗಳೂ ಈ ವೀರನಾಡ್ ಕೊಡಗ್‌ಲುಂಡ್! ಹ್ಂ..... ಹ್ಂ..... ಎಳೆ ಕೂಳೆಕ್ ಅಕ್ಕಿ ಇಡ್" ಎಣ್ಣೆಚಿ ತಂಗವ್ವ.

ಪೊಣ್ಣೊರೊ, ಮಾಂವಿರೊ ಅಭಿಪ್ರಾಯ ಅರ್ಥ ಆಚಿ ಮಂದಪ್ಪಂಗ್. ಕೂಡೆನ್ನೆ ತೆಳಿ ಮೂಡ್ ಮಾಡಿಯಂಡ್ "ಅದೆಂತ ಬಲ್ಯ ಪಣಿ ಮಾಂವಿ? ನಾಳೆ ಬೆಂಗಳೂರ್‌ಕ್ ಪೋಯಿತ್, ನಾಕ್ ಸದ್ಯಕ್ ನಿವೃತ್ತಿ ಬೋಂಡಾ, ವಾರ್‌ಪುಂಟ್‌ಕ್ ಪೋಪೀಂದ್ ಟೆಲಿಗ್ರಾಂ ಮಾಡ್‌ನಕ ಆಚಪ್ಪ. ಕೂಡೆನ್ನೆ ಕಾರ್ಗಿಲ್‌ಕ್ ಕಾಕ್‌ಚಿಡುವ. ನಾನ್ ಇಚ್ಚಕ್ ಕಾಲ ಸರ್ವಿಸ್ ಮಾಡ್‌ನ ಜಾಗ ಅಲ್ಲ ಅದ್?"

ಮೈಮಂಡ ಈ ತಕ್ಕ್ ಕೇಪದು, ಮಾಂವಿರ ಮೂಡ್ ನಡಪಾದ್ರೆಲ್ ಪೊಲಂದನ್ನೆಕೆ ಆಯಿಪೋಚಿ. ತೇಕೆ ಮನೆರನ್ನೆಕೆ ಇಂಜದ್ ಮಂಗಲ ವರಂದ ಮನೆರನ್ನೆಕೆ ಆಯಿಪೋಚಿ! ಮಾಂವಿ ಅಡ್ಡಿ ಮಲ್ಲಂಗೋಳಿನ ನೆರಾಚಿತ್ ಮಜ್ಜಣಕ್ ಪಾಪುಟ್ಪ್ ಕೋಳಿಕರಿ ಮಾಡ್‌ಚಿ! ಅಂದ್ ಎಲ್ಲರೂ ಊಟ ಉಂಡಿತ್ ಬುದ್ಧಂಡತ್.

ಪಿತ್ಯಾಂದ್ ಪೊಲಾಕ ಮಂದು ಎದ್ದಂವನೆ ಬಟ್ಟೆ ಇಟ್ಟಿತ್, "ಮಾಂವಿ, ಇಕ್ಕ ನಾನ್ ನಾಡ ಮನೆಕ್ ಪೋನಕ, ನಾಡ ಅಭಿಪ್ರಾಯಕ್ ಮುದಾಕಿ ಬೆಲಕುವಕೂ ಮದಿ. ನಾನ್ ನೇರೆ ಬೆಂಗಳೂರ್‌ಕೇ ಪೋಪಿ. ನಾಡ ಪಳಿಯ ಅರ್ಜಿನ ಕ್ಯಾನ್ಸಲ್ ಮಾಡ್‌ಚಿಟ್ಟಿತ್, ಬೆರಿಯ ಆರ್ಡರ್ ಅಯಿಪಾಚಿರಂಡಿಕ್ ಆಫೀಸರ್ ಪಿಣ್ಣ ಕ್ಲಾರ್ಕ್‌ದ ಕೈ ಬೆಕ್ಕೆ ಮಾಡಂಡಿಯಾಪ. ಉಳ್ಳ ಪಣ ತಾರಿ. ಎಲ್ಲ ಖರ್ಚ್ ಮಾಡುಲೆ. ಬಾಕಿ ಆನಾನ ಬಯ್ಯಕ್ ತಪ್ಪಿ" ಎಣ್ಣೆಚಿ.

ತಂಗವ್ವ ತಟ್ಟಿ ತವುಡಿ ಅಂಜಾಯಿರ ಉರ್‌ಪಿಯ ಮಾಡಿಕೊಡ್‌ತತ್. ಮಾಂವಿರ ಕಾಲ್‌ಪುಡ್‌ಚಿತ್ ಪೊರಡುವಕ "ಮಾಂವಿ, ನಾನ್ ಬೆಂಗಳೂರ್‌ಕ್ ಪೊರಟ ಸಂಗತಿ ನಾಡ ಅವ್ವಂಡ ಕೆಮಿಕ್ ಬೂವತನ್ನೆಕೆ ಎಚ್ಚರತಿರಿ"ಂದ್, ಎಚ್ಚರ ಕೊಡ್‌ತಿತ್ ಬಸ್ಸ್ ಪತ್ತಾಚಿ ಮಂದಪ್ಪ.

ಪೋನ ಮಂದುರ ಸದ್ದಿಲ್ಲೆ. ನಾಲನೆ ದಿನ ಮಜ್ಜಣ ಓರ್ ಟೆಲಿಗ್ರಾಂ ಬಾತ್. ರಾಧನೇ ಎಡ್‌ತಂಡತ್. ಒಡತ್ ಓದ್‌ಚಿ. ಮಿಲಿಟರಿ ಹೆಡ್‌ಕ್ವಾರ್ಟರ್ಸ್‌ಂಚಿ. "ಈ

ಟೆಲಿಗ್ರಾಂ ಕ್ಷಿಪ್ರ ಅಂಜನೇ ದಿನತಲ್ ಕಾರ್ಗಿಲ್ ವಾರ್‌ಪ್ರಂಟ್‌ಕ್ ಎತ್ತಿತ್ ರಿಪೋರ್ಟ್ ಮಾಡೊಂಡು. ಟ್ರೇನ್ ಚಾರ್ಜೆಲ್ಲ ಬಂದಿತ್ ಎತ್ತನ ಪಿಳ್ಳಾ ಪಡಂದವಲೂ"ಂದ್ ಇಂಜತ್.

ಏದೊಂಗೂ ಮಂದಪ್ಪಂಡ ಸುದ್ದಿಯೇ ಇಲ್ಲೆ. ತಂಗವ್ವಂಗೂ, ರಾಧಂಗೂ ನಮ್ಮದಿಯೇ ಇಲ್ಲತಾಯಿಪೋಚಿ. ಬೈಟ್ ಅಂಜಿ ಗಂಟೆಕ್ ಚೋತಿತ್ ಚುಣ್ಣ ಆಯಿತಿಂಜ ಮಂದಪ್ಪ ಬಂದೆತ್ತಚಿ. ಓರ್ ಕಪ್ ಕುಡಿಪಕ್ ಕೊಡಪಾಂಗ್ ಮುಪ್ಪಡೇ ಟೆಲಿಗ್ರಾಂನ ಅಂವಂಡ ಕೈಕ್ ಕೊಡತತ್!

"ಅಯ್ಯೋ ನಾಕಿಂಜಿ ಮಿಳ್ಳಾ ಟೆಲಿಗ್ರಾಂ ಬಂದಿತ್ ಎತ್ತಿರ್‌ತಾ? ಅಚ್ಚಕಾಂಗ್ ನಾನ್ ಪಟ್ಟಿ ಗೋಳನ ದಾಡ ಕೂಡೆ ಎಣ್ಣೆಡ್? ನಿಂಗ ತಂದ ಅಂಜಾಯಿರ ಉರ್‌ಪಿಯತ್‌ರ ಕೂಟ್‌ಕ್ ಪತ್ತಾಯಿರ ಜಾಸ್ತಿ ಕೊಡಕೊಂಡು. ಈ ಟೆಲಿಗ್ರಾಂ ಕಾಟಿತ್ ಆರ್ಡರ್ ಕೈಲೆಡ್‌ತವಂಡು. ಅದೊಂಗ್ ಅಫೀಸರ್‌ರ ಸೈನ್ ಆಂಡಿಕ್ ಅಂವಂಗೂ ಪತ್ತಾಯಿರ ಕೊಡಕೊಂಡು. ನಾಡ ಅವ್ವಂಗಣ್ಣೆ ಚೇಂಗಿ, ಆ ಮುದೊಕಿ ಬಿಲ್‌ಕುಲ್ ನನ್ನ ಪೋಪಕ್ ಬುಡುಲೆ"ಂದೆಣ್ಣೆತ್ ಮಂಡೆಕ್ ಕೈಕೊಡತಂಡ್ ಕುರ್ಚಿರ ಓರ್ ಬರಿಕ್ ತರಂಜಂಡತ್.

ಪುನಃ ಎದ್ದಿತ್ "ಏದೊಂಗೂ ನಾನ್ ಪೊರಡಂಡಿಯ ಸಂಗತಿನೊಮ್ಮ ನಾಡ ಅವ್ವಂಗ್ ಅರೀಪು ಕೊಡತಿತ್ ಪೊಲಾಕ ನೇರ್ತೆ ಬಂದೆತ್ತಿರುವೀ"ಂದೆಣ್ಣೆತ್ ಅವ್ವಂಡ ಪಕ್ಕ ಪೊರಟತ್ ಮಂದು.

ಮೋಂವನ ಕಾಂಬದು ಅವ್ವ, ಕಾಮವ್ವ ಬೆರಿಯ ಕೂಳ್ ಇಟ್ಕೊ ಕೊಡತತ್. ಮಂದಪ್ಪ ಅವ್ವನ ಪಕ್ಕ ಕಾಕಿತ್, "ಅವ್ವ ಕಾರ್ಗಿಲ್ ವಾರ್ ತೀರಣೆ ವಾಲಂಟರಿ ರಿಟೈರ್‌ಮೆಂಟ್ ತಪ್ಪಲೆ. ನಾಕ್ ಪಡೆಭೂಮಿಕ್, ಕೂಡೆನ್ನೆ ಪೋಪಕ್ ಟೆಲಿಗ್ರಾಂ ಬಂದಿತ್. ನೀನ್ ಬೊತ್ತಿಯವತೆ. ಪಡೆಲ್ ಚತ್ತ ಗ್‌ತ್ತ್ ಪೋನಕ ಏಳ್ ಕರಂದಲೆಕೆತ್ತಣೆ ಅಳ್‌ತ್ ತಿಂಬಚ್ಚಕ್ ಪಣ ಕಾಟ್ಟುವ! ಬಲ್ಯ ಕೇಳಿಯೂ ಇಪ್ಪ. ನೀಡ ಆಶೀರ್ವಾದ ಮಾತ್ರ ನಾಕ್ ಬೋಂಡು" ಎಣ್ಣೆಚಿ.

"ಛೂ, ಎಂತ ಕೋಳ್ ಮಟ್ಟಿತ್‌ರ ತಕ್ಕ ಪರಂದೊಟಿಯ ಮೋನೆ ನೀನ್? ಪಡೆಲ್ ಚತ್ತಿತ್ ಕಾಟ್ಟುವ ಪಣತ್‌ಲ್ ಸುಖ ಪಡುವಕಾಯಿತ್ ನಿನ್ನ ಪೆತ್ತ ಚಾಕನಾನ? ನೀಡಪ್ಪ ಮಿಲ್ಮಿ ದೇವಯ್ಯಂದೇ ಪೆದ ನೇಡನಂವ. ಅಂತ ಅವ್ವಂಡ ಮೋಂವ ನೀನ್. ದೇಶರಕ್ಷಣೆಕ್ ಪೋಪಕ ನಾನ್ ತಡೆಪದುಂಡಾ? ಆಚೆಂಗಿ, ಅವ್ವಂಡ ಪ್ರೀತಿನ ನೀನ್ ಪಣತ್‌ಲ್

ಅಳಂದದ್ ಮಾತ್ರ ನಾಕ್ ನೊಂಬಲಾಚಿ. ನೀನನ್ನೇಂಗಿ ವೀರಮರಣ ಪಡ್‌ಂದಕ ನೀಡ ನೈಪುರ ಪ್ರತಿಕಾಸನೊ ಕೂಟಿತ್ ನೀಡ ಪೆದತ್‌ಲ್ ಅನಾಥಾಶ್ರಮ ಕೆಟ್ಟುವಿ. ಪೋ ಮೋನೆ. ಗೆದ್ದಿತ್ ಬಾ"ಂದ್ ತಬ್ಬಿಯಂಡ್ ಪೊಡಿಯ ಸೆರಗ್‌ಲ್ ಕಣ್ಣ್ ನೀರ್ ತೇಟಿಯಂಡತ್.

ಪಿತ್ಯಾಂದ್, ಮಾಂವಿರಲ್ಲಿಕ್ ಬಂದಿತೆತ್ತಣೆ, ಅವ್ವನೂ, ಮೋವಳೂ ಮನೆಲುಳ್ಳ ಮಾಲ್‌ಮಟತ್‌ನೆಲ್ಲ ಅಡು ಬೆಚ್ಚಿತ್ ಪತ್ತಾಯಿರ ಉರ್‌ಪಿಯ ಮಾಡಿಬೆಚ್ಚಿತಿಂಜತ್! ಪಣ ಕೊಡ್‌ತಿತ್ ತಂಗವ್ವ, "ಮಂದು, ನೀನ್ ಕಾವೇರಿಕ್ ಪೋನ ಪಿತ್ಯಾಂದ್ ನಂಗ ಪರಂದ ತಕ್ಕ್‌ಕ್ ಬೇಜಾರ ಮಾಡಿಯವತೆ. ಎನ್ನೊ ಐಲಾಟಕ್ ಪರಂದತ್. ನೀನ್ ಪಡೆಲ್ ಗೆದ್ದಿತ್ ಬಾ" ಎಣ್ಣೆತ್, ಮಡಿಕೇರಿ ಬಸ್‌ಸ್ವಾಂಟ್‌ಲ್ ಬಸ್ಸ್ ಪೊರಡಣೆ ನಿಂದಿತಿಂಜತ್.

ಪದಾನಂಜಿ ದಿನ ಕೈಂಜದು, ರಾಧಂಡ ಎಡ್ರೆಸ್‌ಕ್ ಓರ್ ರಿಡಿಸ್ಪರ್ಡ್ ಕಾಗದ ಬಾತ್. ಒಡತಿತ್ ಅವ್ವನೂ, ಮೋವಳೂ, ಓದ್‌ಚಿ. ಮಿಲಿಟರಿ ಆಫೀಸರ್‌ರ ಸೀಲೋಡೆ ಇನ್ನನೆ ಟೈಪಾಯಿತಿಂಜತ್.

"ಹವಲ್ದಾರ್ ಮಂದಪ್ಪ ಕಾಶ್ಮೀರತ್‌ಲ್ ಭಾರಿ ಪಣ ದುರುಪಯೋಗ ಮಾಡ್‌ನದಲ್ಲತೆ, ಅಧಿಕಾರಿರ ಪಿಸ್ತೂಲ್‌ನೋ ಕಟ್ಟಂಡ್, ಓಡಿಪೋಯಿತಿಂಜಂವನ ಬೆಂಗಳೂರ್‌ಲ್ ಕೈಂಜ ವಾರ ಪುಡ್‌ಚಿತ್ ವಿಚಾರಣೆಕ್ ಕೊಂಡಪೋಪಕ, ತಪ್ಪಾಚಿಟ್ಟವ ಪ್ರಯತ್ನತ್‌ಲ್ ರೈಲ್‌ಂಜಿ ಪಾರುವಕ ರೈಲ್‌ರಡಿಕೆ ಕೆಣ್‌ಂಜಿತ್ ಮಂದಪ್ಪ ಚತ್ತ್‌ಪೋಚಿ. ಅವ ಬಲ್ಯ ಅಪರಾಧಿ ಅನಾನಗುಂಡ್ ಅವಂಡ ವಾರೀಸ್‌ದಾರಕ್ ಏದೋರ್ ಸವಲತ್ತು ಕೊಟ್ಟುಲೆ!"

ಈ ಕಾದ ಓದಿತಾಪಕ ತಂಗವ್ವನೂ, ರಾಧನೂ ಆಕಾಶತ್‌ಲ್ ಕೆಟ್ಟಿಯಂಡಿಂಜ ಅರಮನೆ ಆಯೋಡೆ ಬುದ್ದಿತ್ ಮಣ್ಣಾಯಿ ಪೋಚಿ. ಕರಪ ಪಯ್ಯುರ ಕೆತ್ತ ಅರತನ್ನಕೆ ಆಯಿಪೋಚಿ. ಅಡಿ ಆಕಾಶ ಇಲ್ಲತಾಯಿಪೋಚಿ. ಮಂಡೆ ಪೊಜ್ಜಂಡ್ ಮೊರಟತ್. ಮಂದಪ್ಪ ಚತ್ತಾಂಗಲ್ಲ ಮೊರಟಿಯೆ. ಕೈಲಿಂಜ ಪಣ ಪಿಳ್ಳಾ ಮಾಲ್‌ಮಟೋ ಕೈತಪ್ಪಿ ಪೋಚೆಲ್ಲಾಂದ್! ಆಚೀಂಗಿ, ಮಂದಪ್ಪ ಚತ್ತಸುದ್ದಿ, ಕಾಗದ ಬಂದಾನ ಮಾತ್ರ ಪೊರ್‌ಮೆ ಗುಟ್‌ಬುಟ್ಟದೇ ಇಲ್ಲೆ!

ಮಂದಪ್ಪಂಡ ಚಾವು ಸುದ್ದಿ ಬಂದಿತ್ ಚೆನ್ನಂಗ್ ದಿನತ್‌ಲ್ ರಾಧ, ನೂಲ್ ತುಂಡ್‌ನ ಗಾಳಿಪಟತ್‌ರನ್ನಕೆ ಆಯಿಪೋಚಿ! ಕೆಲಕ್ ಕೂಳ್‌ಕೇ ಮುಟ್ಟಿಪೋಪಕ ತಾಂಡ ಪಳಿಯ ಚಾಲ್‌ಕೇ ಇಳಿಯಂಡಿಯಾಚಿ. ಮೈಮಂಡ ಕೇರಾಫಲೆ ಬದ್‌ಕಿಯಂಡಿಂಜ ತಂಗವ್ವ,

ಚಾಯಿಲಿಪ್ಪಕ ಸುತ್ತ ಮುತ್ತ ಇಂಜಯಿನ ಪಕ್ಕ ಅಡ್‌ಪ್‌ಚಿಟ್ಟವಳಲ್ಲ! ಕಷ್ಟತುಳುವು ಕಷ್ಟ ಪರಂದಂಡ್ ಬಂದಕ ಚುಟ್ಟು ಚುಣ್ಣ ಕೊಡ್‌ತವಳಲ್ಲ! ಇಕ್ಕ ಅವಡ ಮೂಡ್‌ಕ್ ದಾರಾಕು?

ಅವ್ವಂಗೂ, ಮೋವಕು ಎಕ್ಕಲೂ ಲಡಾಯ ಸುರು ಆಚಿ. ಅಯಿಂಡ ಮನೆಯೇ ಕಾರ್ಗಿಲ್ ಪಡೆಭೂಮಿಯಾಚಿ. "ಪೆದಕ್ಕೆಂಗಿ ನಾಕೋರ್ ವಡಿಯನಿಂಜತ್. ಅವನ ದವುತುವಕ್ ನೀಡ ದುರಾಸೆಯೇ ಕಾರಣ"ಂದ್ ಮೋವ ತಿತ್ತ್ ಪಾರ್‌ನಕ, "ವಡಿಯನ ಸಮಾಧಾನ ಪರಂದಿತ್ ಕೂಡ ಆಕಿಯವ ಕಯ್ಯತವ ನೀನೋರ್ ಪೊಣ್ಣಾ?" ಎಂದ್ ಅವ್ವಂಡ ಪ್ರತಿಧಾಳಿ

ಒನ್ನಾಂದ್ ದಾಡೊ ಕೂಡೆ ಮನೆಬುಟ್ಟ್ ಪೋನ ರಾಧ ತಿರ್‌ಚಿ ಬಂದ್‌ಲೆ! ಅವ ಏದ್ ಬಟ್ಟೆಲ್ ಪೋಚಿಂದ್ ಕಂಡಂವನಿಂಜ್‌ಲೆ. ತಂಗವ್ವ ಎಲ್‌ಂಬ್‌ಗೂಡ್‌ಕ್ ತೋಲ್ ಪೊದ್‌ಂಜನ್ನಕೆ ಕಾಂಬಕಾಯಿಪೋಚಿ!

ರಾಧ ಪತ್ತೆ ಇಲ್ಲತಾಯಿತ್ ಆರ್ ತಿಂಗ ಕೈಂಜ ಪಿಂಞ ಒನ್ನಾಂದ್ ಮಂದಪ್ಪನೂ, ಕಾಮವ್ವಂಡ ಪಕ್ಕ ತಿಂಗಕ್ಕೊಮ್ಮ ಬಂದಿತ್ ಪೋಪ ಇಂಜಂವನೂ ಮನೆಕ್ ಬಾತ್. ಆ ಪುದಿಯ ಮನುಷ್ಯ ಮಂದಪ್ಪಂಡ ಕೂಡೆ 16 ಕಾಲ ಒಕ್ಕಚೇ ಇಂಜ ಶಿವನ್ ಎಣ್ಣುವ ಮಲೆಯಾಳಿ. ನಕ್ಕೇರನ್ ಸಂಪಾದಕ ಗೋಪಾಲ್, ವೀರಪ್ಪ ಪಿಂಞ ಸರಕಾರತ್‌ರ ನಡುಲ್ ಏಜೆಂಟ್ ಚಾಕರಿ ಮಾಡ್‌ನನ್ನಕೆ, ಈ ಶಿವನ್, ಮಂದಪ್ಪ ಪಿಂಞ ಕಾಮವ್ವಂಡ ನಡುಲ್ ಕಾರ್ಬಾರ್ ಮಾಡಿಯಂಡಿಂಜತ್. ದುರಾಸೆರ ಮಾಂವಿಕೂ, ನೀತಿಗೆಟ್ಟ ಪೊಣ್ಣ್ ಕೂ ಪಾರ ಪಡ್‌ಪ್‌ಚಿಡುವಕ್ ಇವು ದಂಡಾಳು ಕೂಡಿತ್ ಈ ತರ ನಾಟಕ ಮಾಡಿತಿಂಜತ್.

ತಂಗವ್ವಂಡ ಇಕ್ಕತ್‌ರ ಸ್ಥಿತಿಗತಿನ ಕೇಟರ್‌ಂಜ ಕಾಮವ್ವಂಡ ಮನಸ್ಸ್ ಕರಿ ಪೋಚಿ. ನನ್ನೆನ್ನಕೆ ಓರ್ ಪೊಣ್ಣ್‌ಜನ್ಮ ಆಕುಲಾಂದ್ ತಾನೆ ಖುದ್ ಪೋಯಿತ್ ಅವಳ ಮನೆಕ್ ಕೂಟಿಯಂಡ್ ಬಾತ್!

ಮೈಮಂಡೆದಿಕೆ ಮಂಡೆಕುಂಬ್‌ಟ್ ನಿಂದ ಎಲ್‌ಂಬ್ ಗೂಡ್‌ರ ಮಾಂವಿನ ಕಾಂಬಕ ಮಂದಪ್ಪಂಗ್, ನರಿಯಾಯಿತಿಂಜಿತ್ ನಾಯಿಯಾನ ಮಾಂವಿರ ಮೀದ ಕನಿಕರ ಬಂದಿತ್ ಮೂಂದ್‌ಕುರಿ ಕಾಲ್ ಪುಡ್‌ಚತ್! ಕಣ್ಣೋನಿರ್ ತೇಟಿಯಂಡ್ ನಿಂದ ತಂಗವ್ವನ ಅವ್ವನೂ, ಮೋಂವನೂ ಕೈಪುಡ್‌ಚಿ ಅಳ್‌ಪ್‌ಚಿಟ್ಟತ್.

"ತಂಗವ್ವ, ಎನ್ನೊ ಆಪದೆಲ್ಲ ಆಯಿಪೋಚಿ. ನೀನ್ ನಂಗಡ ಕೂಡೆ ಇಂಜಿರ್. ನಂಗ ಉಂಬ ಕೂಳ್‌ಲೇ ನೀಕ್ ಓರ್ ಪುಡಿಕೂಳ್ ತಪ್ಪದ್ ನಂಗಕೊಂದೂ ಕಷ್ಟ ಇಲ್ಲೆ!" ಎಣ್ಣ್‌ಚಿ ಕಾಮವ್ವ.

ಮಾಂವಿ, ಮೈಮಂಡ ಕೈ ಪುಡ್‌ಚಂಡ್ "ಮಾಪು ಮಾಡ್ ಮೋನೆ. ಇದೇ ನೋಟ್ ಅಪ್ಪಂಡ ಮನಕೂ, ಮಾಂವಿರ ಗುಣಕೂ ಉಳ್ಳ ವ್ಯತ್ಯಾಸ. ಎಲ್ಲಾರೂ ಓಂದೇ ಅಲ್ಲ. ನೀಡವ್ವಂಡಂತ ಮಾಂವಿಯಳೂ ಇಕ್ಕು!" ಎಣ್ಣೆತ್, ಒಳ್‌ಕ್ ಎದ್ದ ಪೋಚಿ.

ಓರ್ ತಿಂಗ ಕೈಂಜಿತಿಂಜತ್. ಒನ್ನಾಂದ್ ಮಜ್ಜಣ ಓರ್ ಪೊಣ್ಣಾಳ್ ಮನೆಕ್ ಬಪ್ಪಾನ ದೂರತಿಂಜ ಕಂಡ ಮಂದಪ್ಪ ನೆಬ್ಬಿ ನೋಟ್‌ಚಿ. ದುಂಡ್ ಚುಟ್ಟಿ ಬೈನೆರನ್ನಕೆ ಆಯಿತ್, ಮೇಲಾರ ತೋಲೆಲ್ಲ ಪರಂಗಿ ಪುಡ್‌ಚ. ನಾಯಿರನ್ನಕೆ ಆಯಿತ್! ತಕ್ಕ ಪರಿಯುವಕೂ ದಾತಿಲ್ಲೆಂಗಿಯೂ ಬದ್‌ಕೊಂಡೂ ಎಣ್ಣುವ ಆಸೆನ ಪುಡ್‌ಚಂಡ ಬಂದವ ರಾಧ!"

ಚಪ್ಪಿತ್ ಚಾಡ್‌ನ ಕೈಬು ದಾಕ್ ಬೋಂಡು? ಕೆಟ್ಟಿಯಂಡಂವ ಬುಟ್ಟಿತ್ ಓಡಿಪೋಚಿಲೋ! ಬೋರೆ ದಾರೂ ಕಣ್ಣಲ್ ನೋಟುವಕೂ ಹೇಸಿಗೆ ಆಪಂತ ಸ್ಥಿತಿಲ್ ಬಾವಕ್ ಬಟ್ಟೆ ಕಾಣತೆ, ಚಾವಕೂ ಧೈರ್ಯ ಬರತೆ ಅವ್ವನ ತೇಡಿಯಂಡ್ ಬಂದಿತಿಂಜತ್!

ಮಂದಪ್ಪಂಡ ಕೈ ಪುಡ್‌ಚಂಡ್ "ಮಂದು ನಾಡ ಕಣ್ಣೆದಿಕೆ, ನಾನ್ ಚಾವಾಂಗ್ ಮಿಳ್ಳಾ ನೀನ್ ಬೋರೆ ಮಂಗಲ ಕೈಪಾನ ನೋಟಂಡು. ನಾಡ ಇದೋರ್ ಕಡೇ ಆಸೆನ ನೀನೂ, ಮಾಂವಿಯೂ ನಡತಿ ತರೊಂಡೂ"ಂದ್ ಮಾಂವಿರ ಕಾಲನ ತಬ್ಬಿ ಪುಡ್‌ಚಂಡ್ ಅಲ್ಲಿಯೇ ಅಳ್‌ತ್‌ಪೋಚಿ ರಾಧ!!

- \* - \* - \* -



## ರಾಯಲ್ ಆಂಟಿ

ನಂಗಡ ರಾಯಲ್ ಆಂಟಿ, ನಾಕ್ ಏದ್ ಚಾಚಿಲೂ ಆಂಟಿ ಅಲ್ಲ. ಎಲ್ಲಾ ಕಾಕುವಾಂದ್ ನಾನೂ ಕಾಕುವೊ. ನಾನ್ ಕಾಕುವಾಂದ್ ಬಾಕಿ ಉಳ್ಳವೂ ಕಾಕುವ. ವಡಿಯ ಮಾತ್ರ "ಕಾಮಿ"ಂದ್ ಕಾಕುವ ಇಂಜತ್. ಅವಡ ನೇರಾನ ಪೆದ ನಂಗಕ್ ದಾರ್ಕೂ ಗೊತ್ತಿಲ್ಲೆ. ಎನ್ನನೆ ಗೊತ್ತಾಪೊ. ನಾಲಾಳ್ ಕೂಡ್‌ನಲ್ಲಿ ಕೂಡೊಂಡು. ಜನಡ ಕಷ್ಟ ಸುಖಕೂ ಆಂಡು. ಚತ್ತಾಂಗ್ ಪೆತ್ತಾಂಗ್ ಮಂಗಲ ಮುಂಜಿ ನಮ್ಮೆ ನಾಳ್‌ಂದ್ ಕೂಡಿಯಾಡ್‌ನಕ ಪತ್ತಾಳ್‌ರ ಕಣ್ಣ್ ಬೂವ. ಪೆದವೂ ಗೊತ್ತಾಪ. ಗುಣ ಮನೋ ಅರಿಯುವ. ಪುತ್ತಲ್ ಕರಡಿನನ್ನೆ ಕೂಡಿಯಂಡ್ ಮನೆಕ್ ಬಂದಂವನ ಕಡಿಕೆರೊಳಿಯ ತಕ್ಕ್ ಪರಂದಿತ್ ಅಯೆಚಕ ಇಂತಯಿಂಗಡ ಕಷ್ಟ ಸುಖಕ್ ದಾರ್ ಆಕು?

ತಕ್ಕೆಡ್‌ತಕ "ನಾನ್ ರಾಯಲ್ ಫ್ಯಾಮಿಲಿಕರ್ತಿ. ನಾಡ ಅಪ್ಪ ಅನ್ನನೆ, ಇನ್ನನೆ. ನಾಡ ಬೆಂದು ಚೆಜ್ಜಾದಿಯ ಎಲ್ಲಾ ರಾಯಲ್ ಫ್ಯಾಮಿಲಿಯಾ"ಂದ್ ಡಂಬ್ ಅಳ್‌ಕನಕ ಈ ಕಾಲತ್ ದಾರ್‌ಕೂಟಾಕುವೊ? ಇನ್ನನೆ ಕಳ್‌ಚಾಂಗೇ ಇವಡ ಮೂಂದ್ ಅಕ್ಕಂಗ ಮುದಿ ಪುಡ್‌ಚಿತ್ ಪಲ್ಲೆಲ್ಲಾ ಒಲ್‌ಂಜಿತ್, ತಾಮನೆಲ್ ಕುಕ್ಕರ್ ಬಡ್‌ಚಿಯೆ!

ಪಂಡ್ ಬಾಲ್ಯತ್ ಮೇಲ್ ಮೂಡ್ ದುಂಬಿತ್ ಚೆನ್ನ ಚಾಯಿ ಇಪ್ಪ ಕಾಲತ್ ಓರಂದೀರಂಡ್ ತಂದ್ ಬಂದಿತಿಂಜತ್. ತಂದ್‌ಕಾರನೋ, ಮಂಗಲಕುಳ್ಳ ಕಣ್ಣನೋ, ಕಯ್ಯಾಲೆಲ್ ಅಳ್‌ಪ್‌ಚ್ಚೆಟ್ ಕೋಂಬರೆ ಕಡಿಕೆರೊಳ್‌ಂಜ ಉಳಿ ನೋಟಿಯಂಡ್ ಬಂದಯಿಂಗಡ ಮನೆಪೆದತನ ಚೇಷ್ಟೆಕ್ ತಪ್ಪ್ ತಪ್ಪ್ ಎಣ್ಣಿಯಂಡ್ ಕಿಟಿ ಕಿಟಿ ತೆಳಿಪೊ. ನೀ ಒತ್ತರೇ ನೀ ಒತ್ತರೇ.....ಂದೇ ನಾಲ್ ಅಕ್ಕ ತಂಗಯ ಅಯಿಂಗಡಯಿಂಗಡ ಬೆನ್ನೆಕೇ ಗುದ್ದಿಯಂಡ್ ತೆಳ್‌ಚಾಂಗೇ, ಬೆನ್ನೆಟ್ ಪೋನವು ಮೂಡ್‌ಟ್ ಬಂದ್‌ಲೆ. ಇನ್ನನೆ ಪರಿಕೇಡ್ ಪಟ್ಟಂಡ್ ಪೋನವು ಮುಂಡತೆ ಇಪ್ಪ? ಈ ಸಂತಾನತಾರ ಗುಣತನ ಊರ್‌ನಾಡ್‌ಲೆಲ್ಲಾ ಕೊಟ್ಟಿ ಪಾಡ್‌ಚಿ.

ಪಾಪತ ಅಪ್ಪ ಮೋಳಿಯಳ ಉಳ್‌ಪಿರುವಂಡು, ಮನೆಪೆದ ಏದಾಚೇಂಗನ್ನೆ

ಎಲ್ಲಾ ಕೊಡವಳನ್ನೆ, ಆಣ್ಣರ ಗುಣ ಮನಕಲ್ಲತ ಮನೆಪೆದ ಕೊದ್‌ಚಂಡ್ ಅಳ್ತಕ ಮೋಳಿಯ ಪಡ್‌ಬುದ್ ಪೋಕೂಂದ್ ಅವ್ವಂಗೂ ಮೋಳಿಯಕೂ ಎಚ್ಚರ ಕೊಡ್‌ತಂಡ್ ಇಂಜತ್.

ಮನೆಲ್ ಮೂಂದ್ ನೇರ ಉಂಬಕ್ ತಿಂಬಕೇಂಗಿ ಉಂಡಾ. ಅದೂ ಇಲ್ಲೆ ! ನೈಚಕಲ್ಲಾ, ಪತ್ತಾಯ ದುಂಬುವೋ? ನಂಗಡ ಅಜ್ಜ, ದಿವಾನಲೋ, ನಾಡ ಅವ್ವಂಡಪ್ಪ ಹೆಡ್‌ಮುನ್ನಿಲೋ, ನಾಡ ತಮ್ಮಾವಂಡ ಮನೆಲೇ ಕೊಡಗ್ ರಾಜ ಬಂದಿತ್ ಒಳ್‌ಂಜಿತ್‌ಪೋಪ ಇಂಜತಲೋಂದ್ ಪಳೆಯ ಪುರಾಣ ಪರ್‌ಂದಂಡೇ ಬಾಲ್ಯತ್‌ನ ಕಯಿಚಿತ್ 'ನಾಲ್ ಮೂಡಿಯ' "ಬೋರೆ ಕೊಡವ ನೈಪ ಎಣ್ಣೆಚೇಂಗಿ ನಂಗಳೂ ನೈಕೊಂಡುವಾ? ಅಯಿಂಗ ಪಂಡ್ ನಂಗಡ ಅಜ್ಜಂಡ ಕಾಲತಲೂ ಯರವ ಕುರುಬಡನ್ನೆ ನೈಚವು, ಇಕ್ಕ ನೈಕತೆನ್ನ, ನಂಗಡ ಮನಸ್ಥಾನ ಏದ್, ನಂಗಳೂ ಅಯಿಂಗಳೂ ಒಂದೆಯಾ"ಂದ್ ಪಂಡೇತ ವೈಭವತ್‌ನ ಪರ್‌ಂದಂಡೇ ಕಾಲ ಉರ್‌ಂಡ್‌ನದೇ ಗೊತ್ತಾಯಿಲೆ. ಕೊಟ್ಟಕ್ಕತ್ತಿ ಬಂದ್‌ಲೆ. ಕೊಯಿಕ್ಕತ್ತಿತ್ ಕೊಡ್‌ತಲೆ!

ಇದೇ ಬೇಜಾರತ್ ಈ ರಾಯಲ್ ಆಂಟಿರ ಅಪ್ಪ ಚತ್ತತ್. ಅವ್ವ, ಮೋಳಿಯ ತುಳ್ಳುಚ್ಚೆಟ್ಟನ್ನೆ ತುಳ್ಳುವವಳೆ! ಪೆರಿಯವು ಮೂಂದಾಂಡ ಕೊದೆ ತಗ್ಗಿಯಂಡ್ ಬಾತ್. ಕ್ಯೂಲ್ ನಾಲನೆಯವಕ್ ಚೆನ್ನ ನೆಳಿಯಲ್ ಜಾಸ್ತಿ ಇಂಜಾನಗುಂಡ್ ಅರ್ಯಾಕ್ ಮಂದಯ್ಯಂಗ್ ಕೊಯ್‌ಂದಂಡತ್. ಅರ್ಯಾಕ್ ಮಂದಯ್ಯಂಗ್ ಕಂಪೆನಿ ತೋಟತ್ ರೈಟರ್ ಚಾಕ್ರಿ. ಬೈಟ್ ಅಂಜಿ ಗಂಟೆ ಕೈಂಜಪಿಳ್ಳಾ ಅರ್ಯಾಕ್ ಶಾಪ್‌ಲೇ ಇಂವಂಡ ಕಾರ್ಬಾರ್. ಅವನೂ ಎದೋ ಓರ್ ರಾಯಲ್ ಫ್ಯಾಮಿಲಿಕಾರನಲೋ! ಇಪ್ಪಕ್ ಮನೆಯಿಲ್ಲೆ, ಬೊತ್‌ಕುತ್ತುವಕ್ ಬೇಲ್‌ಇಲ್ಲೆ, ಎಲ್ಲಾ ಮಾರಿತ್ ಚೈಂತ್ ಎರ್‌ಕಿತಾಯಿತ್. ಪೆದ ಮಾತ್ರ ರಾಯಲ್ ಫ್ಯಾಮಿಲಿ ಮಂದಯ್ಯ!

ಎಲ್ಲಾಂಗೂಡಿ ರಾಯಲ್ ಆಂಟಿಕೂ ಅರ್ಯಾಕ್ ಮಂದಯ್ಯಂಗೂ ಮಂಗಲಾಚಿ. ಪೊಣ್ಣರ ಮೂಂದ್ ಅಕ್ಕಂಗಳೂ, ಮಾಂವಿಯೂ ಬಂದಿತ್ ಕೂಡಿಯಂಡ್ ಮಂದಯ್ಯಂಡ ಸಂಸಾರ ಓರ್ ಕೂಡ್‌ಕುಟುಂಬ ಆಚಿ. ಮಂದಯ್ಯ ಅರ್ಯಾಕ್ ಪ್ಯಾಕೇಟ್‌ಲೆ ತೈಪ್ತಿ ಪಟ್ಟಕಲೂ ಮಾಂವಿ, ಪೊಣ್ಣ್ ಪಿಂಳ್ಳಾ ಮಂಗಲಾಕತ ಪೊಮ್ಮಕ್ಕಕ್ ಮಾತ್ರ ಬ್ಯಾಂಡಿ ಬೀರೆ ಬೋಂಡು. ಎಲ್ಲೆಲ್ಲಿಯೂ ರಾಯಲ್ ಕಳಿ!

ಮಂದಯ್ಯ, ಕಳ್ಳರಾಸೆಕೂ ಕಾಸ್‌ರಾಸೆಕೂ ಎಲ್ಲಾಡೊ ಕೂಡ ಕೂಡಿರುವಯಿಂಜತ್. ಮನೆರ ಪೊರ್‌ಮೆ ಚೆನ್ನ ಎರ್‌ಕಿತಾಪಕ ದಾರ್ ಬೋಂಡಿಕೂ

ಆಕು. ಆಚೇಂಗಿ ಮನೆಕ್ ಮಾತ್ರ ದಾರ್ನೋ ಕೂಟಿಯ ಪೋಪ ಧೈರ್ಯ ಇಂಜಾಲೆ!

ಇಯಂಗಡ ಮನೆಲ್ ರಾಯಲ್ ಫ್ಯಾಮಿಲಿಕಾರಡ ಓರ್ ಪಟ್ಟಿಯೇ ಇಂಜತ್. ಇಯಂಗಡ ಪಟ್ಟಿಪೋಲೆ ಬಾರೀ ಮನಸ್ಸಾನಕಾರಡ ಮನೆಪೆದ, ಮಂಡೆಪುಡಿಯಂಡ, ಒಕ್ಕಚದಿಯಂಡ, ಕೊರನೆಕ್ಕಿರ, ಊರ್‌ಮುಡಿಯಂಡ, ಕಜ್ಜಿಮಾಂದಿರ, ಎದ್ದೊಬುದ್ದಂಡ, ಪಿತ್‌ಲಾಟಿರ, ಪಿಚ್ಚೋಳೆ ಕೆಮಿಯಂಡ..... ಇನ್ನನೆ ಸುಮಾರಿಂಜತ್. ಇಯಂಗಡ ಡಿಕ್ಸನರಿ ಪ್ರಕಾರ ಊರ್‌ನಾಡ್‌ರ ಮರ್ಯಾದಸ್ಥಂಗಳೆಲ್ಲಾ ಕಮ್ಮಿ ಕುಳಕಾರ. ಸತ್ಯಂಗಡ, ಧರ್ಮೆಂಗಡ, ನೀತಮಾಡ, ನೈಪಂಗಡ, ಕೆಜ್ಜಿನೇಡಿರ, ಧೀರೇಂಗಡ, ಇದೆಲ್ಲಾ ರಾಯಲ್ ಪಟ್ಟಿಕ್ ಕೂಡತವು. ಮಂದಯ್ಯಂಗ್ ದಂಡ್ ಮಕ್ಕಳಾಚಿ. ಒರ್ ಕ್ಕಣ್ಣ ಓರ್ ಮೊಡಿ, ಮಕ್ಕ ಹೈಸ್ಕೂಲ್ ಪತ್‌ಚಿ. ಮಂದಯ್ಯಂಡ ಮೋಂವೊ ಕಿಟ್ಟು ಚೆನ್ನ ಅಪ್ಪಂಡ ಮಾದರಿ. ಬಲ್ಯಂವೊ ಚೆರಿಯಂವೊಂದೆಣ್ಣುವ ಭಿನ್ನಬೇಧ ಕಮ್ಮಿ. ಅವ್ವಂಡೋ, ಆಂಟಿಯಡೋ ದೌಲತ್‌ಕಳಿ ಅಂವಂಗ್ ಸರಿಬಪ್ಪಯಿಂಜಾಲೆ. ಆಚೇಂಗಿ ಮಂದಯ್ಯಂಡ ಮೋವ ಮುತ್ತಿ ಮಾತ್ರ ಅವ್ವಂಡ ಚೆರಾಕ್ಸ್ ಕಾಪಿ!

ಒನ್ನಾಂದ್ ಮಂದಯ್ಯಂಡ ಕಂಪೆನಿರ ಓರ್ ಕೊಡವ ಮೇನೇಜರೂ, ಓರ್ ರೈಟರೂ ಮಂದಯ್ಯಂಡ ಮನೆಕ್ ಬಾತ್. ಮಂದಯ್ಯ ಪೋಣ್ಣ ಮಕ್ಕಳ ಪರಿಚಯ ಮಾಡಿ ಕೊಡ್ತತ್. "ಇವು ನೀತಿಮಾಡ ಪೊನ್ನಪ್ಪ. ನಂಗಡ ಮ್ಯಾನೇಜರ್. ಅಯಿಂಗ ಕೊರನೆಕ್ಕಿರ ಮುತ್ತಣ್ಣ ರೈಟರ್"ಂದೆಣ್ಣೆಚಿ. "ಓ...ಹೋ..... ಕೊರನೆಕ್ಕಿರಲ್ಲಿಕ್ ನಾಡ ಅವ್ವಂಡ ವಾಂವಿನ ಕೊಡ್ತಿಯೆ. ಅಲ್ಲಿ ಕೊಡಗ್‌ರಾಜ ಬಂದಿತ್ ಪೋಪಯಿಂಜತ್‌ಲೋ. ಎಲ್ಲಾ ನಂಗಡ ಬೆಂದ್‌ಕಳೆ. ಬಾರಿ ಮಕ್ಕಳೆ ಅಂಕಲಾರ ಕಾಲ್‌ಪುಡಿರೀ"ಂದ್ ತಾನೂ ಕಾಲ್‌ಪುಡ್‌ಚಿತ್ ಮಕ್ಕಳುಂಡ್ ಕಾಲ್ ಪುಡ್‌ಪ್‌ಚ್ಚಿತ್. ಮ್ಯಾನೇಜರ್ ನೀತಿಮಾಡ ಪೊನ್ನಪ್ಪನ ತೆರಮೆ ನೋಟುವಂಜಿ ಒಳ್ಳಕ್ ಪೋಯಿರ್‌ತ್. ಇದ್‌ನ ಕಂಡಿತ್ ಮಂದಯ್ಯಂಗ್ ಬೆದೆಕುತ್ತಾ ತೂರಿಯಂಡನ್ನೆ ಆಯಿಪೋಚಿ! ಮ್ಯಾನೇಜರ್‌ಕ್ ಚೀಪೆಲ್ ತಲ್ಲ ಕೆಟ್ಟಿಯಂಡ ಅನುಭವ ಆಚಿ! ಓರ್ ಬಟ್ಟ ಕಾಫಿಕ್ಕೂ ನಿಕ್ಕತೆ ಮ್ಯಾನೇಜರ್, "ಪೋಕನಾ"ಂದ್ ಪೊರಾಟತ್. ಮ್ಯಾನೇಜರ್‌ರ ಎದಿಕೆ ನಾಡ ಕಾಲ್ ಪುಡ್‌ಚಿತ್ ನಾಕ್‌ಇಲ್ಲಿ ಬಯತ್‌ಲೂ, ಅಧಿಕಾರತ್‌ಲೂ ಪೆರಿಯಂವನ ಅವಮಾನ ಮಾಡ್‌ನಾನ ಕಂಡಿತ್ ಕೊರನೆಕ್ಕಿರ ಮುತ್ತಣ್ಣ ರೈಟರ್‌ಕೂ ಇರ್ತಕೇಡಾಚಿ.

ಮಂದಯ್ಯ, ಕೂಡೆನ್ನೆ ಒಳ್ಳಕ್ ಪೋಯಿತ್ ಅಡಿಗಮನೆಲಿಂಜ ಪೋಣ್ಣನ ಕಾಕಿತ್ "ಎಂಥ ಕಾಮಿ ಇದ್, ನಾಡ ಮಾನ ಎಡ್‌ತೊಟಿಯಾ ಅಲ್ಲಾ.... ರೈಟರ್‌ರ ಕಾಲ್

ಪುಡ್‌ಚಿತ್ ಮ್ಯಾನೇಜರ್‌ನ ಮಾನ ಕಳ್‌ಂದಿಯಲ್ಲಾ "ಂದ್ ಕಣ್ಣ್ ಮರ್‌ಚತ್. ಪೊಣ್ಣ್ ಕಾಮಿ ತಿರಿತ್ ಕಣ್ಣ್ ಮರಿಕಣೆ ಮಂದಯ್ಯಂಡ ಬಾಲ್ ತುರ್‌ಂಡಿಪೋಚಿ. ಪೊರ್‌ಮೆ ಅಳ್‌ತಯಿಂಗಕ್ ಕೇಪನ್ನಕೆ, "ಕೊಡವ ಎಣ್ಣೆಕ ಎಲ್ಲಾ ಒಂದೇಯಾ....?" ಮ್ಯಾನೇಜರ್ ಆಯಿಟಕ ಅವನೇದ್ ಮನಸ್ಥಾನಕಾರ. ನಾಡ ತಾಮನೆಲ್ ಏಳೆಟ್ ಮನಸ್ಥಾನಕಾರ ಮಾತ್ರ ಕಂಬ್ ಐಮರತೂ, ಕುರ್ಚಿಲ್ ಅಳ್‌ತಂಡಿಂಜತ್. ಬಾಕಿ ಕಮ್ಮಿ ಮನಸ್ಥಾನಕಾರ ಬೆಲ್‌ಕ ಐಮರತೂ, ಬೆಂಚಿಲೂ ಅಳ್‌ತಂಡಿಂಜತ್. ಎಚ್ಚಕ್ ಬಯತಾನಕಲೂ ಅಂಥ ಮನೆಕಾರಳ ನಂಗ ಏಕವಚನತೇ ಕಾಕುವ ಪದ್ಧತಿ. ಅಯಿಂಡಲ್ಲಿಕೆಲ್ಲಾ ಇಕ್ಕಾಕಣೆ ಪೊಣ್ಣ್ ಕೊಡ್‌ಪದಾಡ್ ಕೊಂಡಬಪ್ಪದಾಡ್ ನಡ್‌ಂದಿತಿಲ್ಲೆ. ಅನ್ನನೆ ಇಪ್ಪಕ ನಾನ್ ಅವಂಡ ಕಾಲ್ ಪುಡಿಕಡಾ? ಮ್ಯಾನೇಜರ್ ನೀಕಾಯಿತಿಕ್ಕು ನಾಕ್ ಅಂವೊ ಮ್ಯಾನೇಜರಾ?"ಂದ್ ಭಾಷಣ ಸುರುಮಾಡ್‌ಚಿ. ಪಾಪತ್‌ರ ಮಂದಯ್ಯಂಡ ನಾವೇ ಉರ್‌ಂಡ್‌ಲೆ. ಅಡಿಕೆ ಕತ್ತರಿಲ್ ಕೆಣ್‌ಂಜನ್ನಕೆ ಆಯಿಪೋಚಿ. ಕುಡಿಪಕ್ ಕಾಫಿ ಎಡ್‌ತಂಡ್ ಬಾಂದೆಣ್ಣಿತ್ ಪೊರ್‌ಮೆ ಬರಣೆಕ್ ಬಂದ ದಂಡಾಳೂ ಮೊಟ್ಟಿಳ್‌ಂಜಿತ್ ಗೇಟ್‌ಕ್ ಎತ್ತಿತಿಂಜತ್. ಮಂದಯ್ಯಂಡ ಪರಿಸ್ಥಿತಿ ಕಂಡಿತ್ ದಂಡಾಳುಕೂ ಕನಿಕರ ಪುಟ್ಟಿತಿಂಜತ್. ಮೂಂದಾಳಾರ ಮೂಡೂ ಚುಟ್ಟು ಬಾಳೆರನ್ನಕೆ ಇಂಜತ್.

ಅಕ್ಕಣೆ, ರಾಯಲ್ ಆಂಟಿ ಟ್ರೇಲ್ ಕಾಫಿ ಎಡ್‌ತಂಡ್ ಬಾತ್, ಓರ್ ಕಪ್‌ಸಾಸರ್ ಬಾಕಿ ದಂಡ್ ಸ್ಪೀಲ್ ಗ್ಲಾಸ್, ಕಪ್‌ಸಾಸರ್‌ನ ಕೊರನೆಕ್ಕಿರ ಮುತ್ತಣ್ಣಿಂಗ್ ಎಡ್‌ತ್ ಕೊಡ್‌ತತ್. ಬಾಕಿ ದಂಡ್ ಸ್ಪೀಲ್ ಗ್ಲಾಸ್ ಕಂಡಿತ್ ರೈಟರ್ ಮುತ್ತಣ್ಣಿ, "ಸಾರಿ, ನಾನ್ ಕಾಫಿ ಟೀ ಕುಡಿಪುಲೇಂದ್ ಬಯ್ಯಕ್‌ಟ್ಟಿತ್ ಮ್ಯಾನೇಜರ್ ಪೊನ್ನಪ್ಪ ಮೂಡ್ ತಿರಾಕಿತ್ ಗೇಟ್ ದಾಟ್‌ಚಿ.

ಅವು ದಂಡಾಳೂ ಪೋನಪಿಣ್ಣಾ ಎಂದೂ ಪೊಣ್ಣ್‌ಕ್ ಕೈನೇತತ ಮಂದಯ್ಯ ಅಂದ್ ಮಾತ್ರ ಧೈರ್ಯ ಮಾಡಿತ್ ಪೊಣ್ಣ್‌ರ ದುಂಡ್‌ಕ್ ಒಂದ್ ಇಡ್‌ಚತ್. ಆಚೇಂಗಿ ಬಡ್ಡಿಯೋಡೆ ಮೂಂದ್ ಕೆಟ್ಟಿಯಂಡತ್! ಅಂದ್‌ಂಜ ಮಂದಯ್ಯ ಓರ್ ಮಾನಸಿಕ ರೋಗಿ ಆಯಿಪೋಚಿ. ಪೊಣ್ಣ್‌ರ ರಾಯಲ್ ಕಳಿ ಮಂದಯ್ಯಂಡ ಬುದ್ಧಿನ ಕೆಡ್‌ತ್‌ಚಿ. ಮನಸ್ಸ್ ಬಂದಕ ತೋಟತ್ ಚಾಕ್ರಿಕ್ ಪೋಪಯಿಂಜತ್. ಇಲ್ಲೇಂಗಿ ಪೊರ್‌ಮೆ ಸುತ್ತಿಯಂಡ್ ಕಾಲ ಕಯಿಪಯಿಂಜತ್. ಪೊಣ್ಣ್‌ರ ದೌಲತ್ ಕಳಿನಗುಂಡ್ ಮಂದಯ್ಯಂಡ ಕೂಟ್‌ಕಾರ ಕೊಡವಳೆಲ್ಲಾ ಅವನ ತೆರ್ಪ್ ಬೆಚ್ಚತ್. ರಾಯಲ್ ಆಂಟಿರ ವಡಿಯೇಂದೇ ಮಂದಯ್ಯಂಗ್ ಅಡ್ಡಪೆದ ಬುದ್ಧತ್. ಇಕ್ಕ ಮಂದಯ್ಯಂಡ ಸುರಾಲ್

ಜೋಬುಲೆ ಅರ್ಯಾಕ್ ಪ್ಯಾಕೆಟ್. ಮಂದಯ್ಯ ಸೆರಿಕ್ ಚಾಕ್ರಿಕ್ ಪೋಕತೆ ದಂಡ್‌ತಿಂಗ ಸಂಬಳ ಕ್‌ಟ್ಪಾಲೆ.

ಒನ್ನಾಂದ್ ಮ್ಯಾನೇಜರ್ ಪೊನ್ನಪ್ಪ ಮಂದಯ್ಯನ ಕಾಕ್‌ಚ್‌ಟ್ಪತ್. "ಎನ್ನಾಂಗ್ ಸೆರಿಕ್ ಚಾಕ್ರಿಕ್ ಬಪ್ಪುಲೆ"ಂದ್ ಕೇಟತ್. ಪೊಣ್ಣಾರ ರಾಯಲ್ ಕಳಿನಗುಂಡ್ ಕೂಟ್‌ಕಾರಡ ಕೂಡೆ ಮಂಡೆ ನೇತುವಕಯ್ಯತೆ, ಕಳ್ಳರ ದಾಸನಾನದ್ ಮ್ಯಾನೇಜರ್‌ಕ್ ಗೊತ್ತಾಯಿತಿಂಜತ್. "ಮಂದಯ್ಯಾ, ಅಂದ್ ನೀಡ ಮನೆಲ್ ನೀಡ ಪೊಣ್ಣಾ ನನ್ನ ಅವಮಾನ ಪಡ್‌ತನಲ್ಲಿಂಜ ನೀನೋರ್ ಮಾನಸಿಕ ರೋಗಿ ಆನ ಸಂಗತಿನ ಓರ್ ಜನ ನಾಕ್ ಎಣ್ಣಾ ಚಿ. ಅದ್‌ಂಗಾಯಿತ್ ನೀನ್ ಬೇಚಾರ ಮಾಡತೆ. ಕಳ್ಳ ಕುಡ್‌ಚಂಡ್ ನೀಡ ಬದ್‌ಕ್‌ನ ಪಾಳು ಮಾಡಿರಾತೆ. ಇಂಥದೆಲ್ಲಾ ನಾಕ್ ದುಂಬಾ ಅನುಭವ ಉಂಡ್".

"ಅಲ್ಲಾ ಸಾರ್ ನಿಂಗ್‌ಕ್‌ಞ್ಚಿ ಓರ್ ಎಳಿಯ ರೈಟರಾನ್ ಕಾಲ್ ಪುಡ್‌ಚಿತ್, ಮನೆಪೆದತಾರ ಆಧಾರತ್ ಕಾಲ್‌ಪುಡಿಕತೆ ಅವಮಾನ ಮಾಡ್‌ನ ಪೊಣ್ಣಾರ ಕೂಡೆ ನಾನೆನ್ನೆನೆ ಬಾಳಡ್" ಈ ಪಾಳಾನ ಮನೆಪೆದಕ್ ಕೊಡ್‌ಪ ಮರ್ಯಾದೆನ್, ಈ ಕೊಡವ ಮನುಷ್ಯಂಡ ಗುಣ ನಡತೆ, ವಿದ್ಯೆ ಯೋಗ್ಯತೆಕ್ ಕೊಡ್‌ಪುಲೆ. ಇನ್ನನಾಯಿತ್ ನಾಡ ಪೊಣ್ಣಾರ ಮೂಂದ್ ಅಕ್ಕಂಗ ಮಂಗಲಾಕತೆ ಪಡ್‌ಬುದ್ಧಿಯೇ"ಂದ್ ಮಂದಯ್ಯ ಬೇಚಾರತ್ ಎಣ್ಣಾ ಚಿ.

"ಅಕ್ಕು ಮಂದಯ್ಯ, ಬೋರೀ ಪೊಣ್ಣಾಳ ಮಾತ್ರ ಅಲ್ಲ. ಆಣಾಳ ಇದ್‌ಂಡ ಅಪ್ಪಂಗ, ನಾಕ್ ಈ ಚಾಕ್ರಿ ಕ್‌ಟ್ಪಂಡಿಕೆ ಕೊಡವ ಮ್ಯಾನೇಜರ್‌ನೇ ಇಂಜಿಯೆ. ಮನೆಪೆದ ಕೇಟಿತ್ ಚಾಕ್ರಿ ಕೊಡ್‌ಪಯಿಂಜತ್. ನನ್ನಂತ ಒಕ್ಕ ಪೆದಕಾರಳ ಜನರಲ್ ಮ್ಯಾನೇಜರ್‌ನ ಕಾಂಬಕ್ ಬುಡತೆ, ಪೋಯಿತ್ "ಬೇಲ್ ಉಪ್ಪಕೆನ್ನರೇ, ಅತ್ತ ಮೇಪಂವೊ ದಾರ್‌ರೇಂದ್ ದೌತಿರುವಯಿಂಜತ್. ಈ ರಾಯಲ್ ಕೊಡವಡ ಕಣ್ಣ ತಪ್ಪ್‌ಚ್‌ಟ್ಪಿತ್ ಈ ಚಾಕ್ರಿ ಕ್‌ಟ್ಪುವಕ್ ಓರ್ ಕ್ರಿಸ್ತಾನಿ ಮ್ಯಾನೇಜರ್ ಕಾರಣ. ಇಕ್ಕ ಈ ರಾಯಲ್‌ಳೆಲ್ಲಾ ಪರಂಗಿ ಪುಡ್‌ಚಿ ನಾಯಿಯೂ ಮೂಸುಲೆ. ಅನ್ನೆ ಇಪ್ಪಕ ನೀಡ ಪೊಣ್ಣಾರ ಕಳಿನ ಕೂಟಾಕತೆ ಕಳ್ಳಕುಡಿ ಬುಟ್ಟಿತ್ ನಾಳೆಂಜಿ ಚಾಕ್ರಿಕ್ ಬಾ"ಂದ್ ಸಮಾಧಾನ ಎಣ್ಣೆತ್ ಅಯೆಚಿತ್.

ಮಂದಯ್ಯಂಗ್ ದಂಡ್ ತಿಂಗ ಸಂಬಳ ಇಲ್ಲತೆ ಓರ್ ಪುಡಿ ಅಕ್ಕಿಕೂ ಗತಿ ಇಲ್ಲತೆ ಆಯಿಪೋಚಿ. ಚಾಕ್ರಿಕ್ ಪೋಕತೆ ಸಸ್ಪೆಂಡ್ ಆಚಿ. ಚೆನ್ನ ದಿನತ್ ಕಾಯಿಲ ಬುದ್ಧಾನಗುಂಡ್ ಕಂಪೆನಿರ ಖರ್ಚಲ್ ಆಸ್ಪತ್ರೆಕ್ ಕೂಟ್‌ಚಿ. ಇಕ್ಕ ರಾಯಲ್ ಆಂಟಿರ ಚೆನ್ನ ಕೊಡೆ ತಗ್ಗ್‌ಚಿ. ಕೆಲಕ್ ಕೂಳ್‌ಕೇ ಮುಟ್ಟಿಪೋಚಿ. ಮಂದಯ್ಯಂಡ ಆಸ್ಪತ್ರೆರ ಬಿಲ್ ಕೊಡ್‌ತಕ ಕಂಪೆನಿಯೇ

ಪಣ ತಪ್ಪಾಂದ್ ಕೂಟ್ಕರ್ತಿಯ ಎಣ್ಣೆ ಚಿ. ಈಂಗಾಯಿತ್ ಮಂದಯ್ಯಂಡ ಪೊಣ್ಣೆ ಆಫೀಸರ್ ಪೋಯಿತ್ ಸೈನ್ ಇಟ್ಟಿತ್ ಚೆಕ್ ಕೇಟವಂಡಿಂಜತ್. ಓರ್ ಕಮ್ಮಿ ಮನಸ್ಸಾನಕಾರಂಡ ಮಿಳ್ಳಾಲ್ ಪೋಯಿತ್ ನಿಪ್ಪದ್ ಅವಡ ಸ್ವಾಭಿಮಾನತಾನ ಕೆಣಕಚಿ. ತಾಂಡ ಮೋಂವನ ಪೊನ್ನಪ್ಪಂಡ ಆಫೀಸರ್ ಅಯೆಚತ್.

ಪೊನ್ನಪ್ಪ ಕಾಣ್ಣಾನ ಕಾಕಿತ್ "ನೀಡ ಅವ್ವಂಡದೇ ಸೈನ್ ಬೋಂಡು. ನೀಡ ಅವ್ವಂಗ್ ನಂಗಡ ಆಫೀಸರ್ ಬಪ್ಪಕ್ ಬೇಜಾರ ಬೋಂಡ, ಏಳ್ ನಾನ್ ನೀಡ ಅವ್ವಂಡ ಪಕ್ಕ ಬಪ್ಪೀಂದೆಣ್ಣೆತ್ ಅಯೆಚತ್. ಚೆನ್ನಂಗೇ ನೇರತ್, ಮ್ಯಾನೇಜರ್ ಪೊನ್ನಪ್ಪ ಕಾಮಿರಲ್ಲಿಕ್ ಪೋಯಿತ್ ಗೇಟ್‌ರಲ್ಲಿ ನಿಂದಂಡ್, "ಚೆಕ್ ಎಡ್‌ತೋಳಿ, ಈ ರೆಕಾರ್ಡ್‌ಕೆಲ್ಲಾ ಸೈನ್ ಇಟ್ಟಿತ್ ತಾರೀ"ಂದೆಣ್ಣೆ ಚಿ. ಇಕ್ಕ ರಾಯಲ್ ಆಂಟಿಕ್ ತೊಂಡ ಕೆಟ್ಟಿಪೋನನ್ನಕೆ ಆಚಿ. ಪೊನ್ನಪ್ಪಂಡ ಕಾಲ್ ಪುಡಿಪನ್ನಕೆ ಬಗ್ಗಿ ಕಳ್‌ಚತ್. ಮ್ಯಾನೇಜರ್ ಮೊಟ್ ಬಯ್ಯಕ್ ಎಡ್‌ತಿತ್, "ಛೇ, ಛೇ.... ಕಾಲ್‌ಪುಡಿಕತಿ. ನಿಂಗಡ ರಾಯಲ್ ಫ್ಯಾಮಿಲಿರ ಜಾತಿ ಪೋಯಿರೂ, ಮಂದಯ್ಯ ಕಷ್ಟ್‌ಲುಳ್ಳಾಂಗ್, ನಾನೋರ್ ಕೊಡವನಾಯಿತ್ ಕೈಲಾಪ ಸಹಾಯ ಮಾಡನಾಂದ್ ನಿಂಗಡ ಮನೆಕೇ ಚೆಕ್ ಎಡ್‌ತಬಂದಿಯೆ. ಇದತ್ ನಾಕೊಂದೂ ಅವಮಾನ ಇಲ್ಲೆ" ಎಣ್ಣೆತ್ ಚೆಕ್ ಕೊಡ್‌ತತ್.

"ಸಾರಿ ಅಂಕಲ್, ಕಾಫಿ ಕುಡ್‌ಚಿತ್ ಪೋಯೀ"ಂದೆಣ್ಣೆ ಚಿ ಕಾಮಿ.

"ಬೋಂಡಕ್ಕ ನಾಡ ಮನೆಲ್ ಕಪ್ ಸಾಸರ್ ಉಂಡ್. ಸ್ಪೀಲ್ ಕಪಲ್ ಕುಡಿಕಂಡಿಯಂತ ಗತಿಕೇಡ್ ನಾಕಿಳ್ಳಾ ಬಂದಿತಿಲ್ಲೆ. ನಿಂಗಳಂತ ರಾಯಲ್ಸ್‌ಕ್ ಬುದ್ಧಿ ಬರಣೆ ಕೊಡವಾಂದೆಣ್ಣುವ ಜಾತಿ ಚರಿತ್ರರ ಪಾಳೆಲಡ್‌ಂಗಿಪೋಪಾ..... "ನಾ ಬಪ್ಪೀ"ಂದೆಣ್ಣೆಯಂಡ್ ಪೊರ್‌ಟ್ ಬಾತ್.

ಮ್ಯಾನೇಜರ್, ಮಂದಯ್ಯಂಡ ಮನೆಕ್ ಪೋಯಿತ್ ಸಹಾಯ ಮಾಡ್‌ನದ್ ಕಂಪೆನಿಲುಳ್ಳ ಎಲ್ಲಾರ್‌ಕೂ ಗೊತ್ತಾಚಿ. ತಾಂಡವ್ವಂಡ ರಾಯಲ್ ಕಳಿ, ಅಪ್ಪಂಡ ಕಾಯಿಲ ಕಂಡಿತ್ ಹೈಸ್ಕೂಲ್ ಓದಿಯಂಡಿಂಜ ಮಂದಯ್ಯಂಡ ಮೋಂವೋ ಕಿಟ್ಟುಕ್ ಅವ್ವಂಡ ಮೀದ ಅಸಮಧಾನ ಸುರುವಾಚಿ.

ಓರಾಂಡೆಕೆತ್ತಣೆ ನೆರ್‌ಂಗ್‌ನ ಮಂದಯ್ಯ ಚತ್ತತ್. ಮಂದಯ್ಯಂಗ್ ಕಂಪೆನಿಂಜ ಕೊಟ್ಟಿಂಡಿಂಜ ಪರಿಹಾರ ಪಣ ಕೊಟ್‌ಚಿ. ಅದ್‌ನ ಬ್ಯಾಂಕ್‌ಲಾಟ್ವಂಡ್ ಕಾಮಿ ದಿನ ಕಯಿಚಂಡಿಂಜತ್.

ರಾಯಲ್ ಆಂಟಿರ ಮೋವೊ ಕಿಟ್ಟು ನಲ್ಲ ಹಾಕಿ ಕಳಿಕಾರ. ಅವಂಡ ಕೂಡೆ ಮನೆಕ್ ಬಪ್ಪಯಿಂಜ ಮಕ್ಕಳ ಮನೆಪೆದ ಕೇಟಿತ್ ಅಯಿಂಗಳ ಕಮ್ಮಿ ತರತ್ ಕಾಂಬದ್ ರಾಯಲ್ ಅಂಟಿ ಪಿಳ್ಳಾ ಮೋವ ಮುತ್ತಿರ ಪುಟ್ಟಾಗುಣ ಆಯಿತಿಂಜತ್. ಮಂದಯ್ಯಂಡ ಮಕ್ಕ ಹೈಸ್ಕೂಲ್ ಕಡ್ಂದತ್. ಮಂದಯ್ಯಂಡ ತಮ್ಮಣನೊಬ್ಬ, ಮಕ್ಕ ಇಲ್ಲತಂವೊ ಬೆಂಗಳೂರ್ಲ್ ಇಂಜತ್. ಅವನೇ ದಂಡ್ ಮಕ್ಕಳ ಕೂಟಿಯಂಡ್ ಪೋಯಿತ್ ಬೆಂಗಳೂರ್ಲ್ ಕಾಲೇಜ್ ಕೂಟ್ಚಿ. ಮುತ್ತಿರ ಮೇಲ್ ತೆಳಂಗಿಯಂಡ್ ಬಾತ್.

ಎಣೆಗೊಡ್ಡಿರ ಪೂವಿ, ಕಾಮಿರ ಪಕ್ಕ ಅಕ್ಕಕ್ಕ ಬಂದಿತ್, "ನೀಡ ಅಕ್ಕಂಗ ಮೂಂದಾಳು ಮಂಗಲ ಆಕತೇ ಆಯಿಟದ್ ಗೊತ್ತುಂಡಲ್ಲಾ? ಮೂಡಿಯಳ ದುಂಬಾ ಬಯತಾಕಣೆ ಬೆಚ್ಚಕ, ಚಾಯಿ ಪಾಳಾಯಿಪೋಪ. ನಲ್ಲ ತಂದ್ ಬಾತೇಂಗಿ ಕೊಡ್"ಂದ್ ನಲ್ಲ ತಕ್ಕ ಪರಂದತ್.

"ನಲ್ಲ ಮನಸ್ಥಾನಕಾರ ಕ್ಕಣ್ಣಂಗ ಉಂಡೇಂಗಿ ನೋಟ್ಂದೆಣ್ಣ್ಚಿ. ಒನ್ನಾಂದ್ ಪೂವಿ, ಕುಶೀಲ್ ಓರ್ ಚಾಯಿಕರ್ತಿ ಪೊಣ್ಣಾಳಾರ ಕೂಡೆ ಕಾಮಿರ ಮನೆಕ್ ಬಾತ್. ಕೂಡೆ ಬಂದವಳ ಹಾಲ್ಲ್ ಅಳಪ್ಪಾಚ್ಚಿತ್ ಪೂವಿ ಕೋಂಬರೆಕ್ ಪೋಚಿ. "ಕಾಮಿ ಎಣ್ಣೆ ಬಪ್ಪಕ ಕಣ್ಣ್ ಮುಚ್ಚಿಯವಕಾಗಲೋ, ನೀಡ ಮೋವಡ ಅದ್ಯಷ್ಟ ತೆಳಂಗ್ಚಿ. ಭಾಗ್ಯ ದೇವತೆ ನೀಡ ಮನೆರ ಪಡಿ ತಟ್ಟಿಯಂಡುಂಡ್".

"ಅದೆಂತಪ್ಪಾ ಅಂತೋರ್ ಭಾಗ್ಯ ಬಂದ್ ಟ ಸಂಗತಿ? ಎಣ್ಣ್ ನೋಟಂಗಾ"ದೆಣ್ಣ್ಚಿ.

"ನೀಡ ಮೋವಕೋರ್ ತಂದ್ ಉಂಡ್. ನಲ್ಲ ಗುಣಕಾರ, ಚಾಯಿಕಾರ, ಕೆ.ಎ.ಎಸ್. ಪಾಸಾಯಿತ್ ಇನ್ಕಂ ಟ್ಯಾಕ್ಸ್ ಆಫೀಸರ್. ಮನೆಲೂ ಬೋಂಡಿಯಚ್ಚಕ್ ತೋಟ ತೊಡಿಯ ಉಂಡ್. ಅವನೇ ನೀಡ ಮೋವಳ ನೋಟಿತ್ ಕುಶಿಪಟ್ಟಿತ್ ಎಣ್ಣಿತ್ ಅಯೆಚಿತ್. ನಾಡ ಕೂಡೆ ಬಂದವ ಕ್ಕಣ್ಣ್ಂಡ ಅಕ್ಕ. ಅವಳೂ ಅವಡ ವಡಿಯ ದಂಡಾಳೂ ಲೆಕ್ಕರರ್".

"ಅಕ್ಕುವಾ ಪೂವಿ. ಅವ ಎಂಥಾ ಚಾಯಿಕರ್ತಿಯಲ್ಲಾ, ಕ್ಕಣ್ಣ ಅನ್ನನೇ ಇಕ್ಕುವಲ್ಲಾ. ಇನ್ಕಂ ಟ್ಯಾಕ್ಸ್ ಆಫೀಸರ್ ಎಣ್ಣನ ಪಿಳ್ಳಾ ಪಣ ಮಾಡ್ನಾಂಗ್ ಕಣಕ್ ಇಕ್ಕುವಾ..... ಅದಿರಡ್ ಪೂವಿ, ಕ್ಕಣ್ಣ ದಾಡ, ಅವಂಡಕ್ಕನ ಎಲ್ಲಿಕ್ ಕೊಡ್ತಿಯೆ?"

"ಕಣ್ಣಂಡ ಮನೆಪೆದ ಮನಬಲ್ಯಂಡ, ಅವಂಡಕ್ಕನ ಗುಣಕಾರಂಡಲ್ಲಿಕ್ ಕೊಡ್ತಿಯೆ. ಊರ್ ನಾಡ್‌ಲೆಲ್ಲಾ ನಲ್ಲ ಮರ್ಯಾದಸ್ಸಂಗ".

"ಢೂ, ಎಂತ ಪೂವಿ, ಪಣಬಲ್ಯಂಡ ಮನೆಪೆದ ಕೇಟಿಯೆ. ಅದ್ ರಾಯಲ್ ಫ್ಯಾಮಿಲಿ. ಮನಬಲ್ಯಂಡ, ಗುಣಕಾರಂಡ ಎಂತಾ ಮನೆಪೆದ? ನಾನ್ ಇಂದಾಕಣೆ ಕೇಟಿತಿಲ್ಲೆ. ನಾಡ ಸಾಲ್ ಸಂತಾನ ಇನ್ನತ ಮನೆಪೆದ ಕೇಟಕ ತೆಳಿಕು. ನೀನ್ ಇನ್ನತಯಿಂಗಡ ತಂದೆಲ್ಲಾ ಕೊಂಡಬರತೆ, ಮುತ್ತಿರ ಮಂಗಲ ನಾಲ್ ಕಾಲ ಮಿಳ್ಳಾಕ್ ಪೋನಕೋ ಪರೋಲ್ಲೆ, ನಲ್ಲ ಮನಸ್ಸಾನಕೇ ನಾನ್ ಮುತ್ತಿನ ಕೊಡ್‌ಪೋ"ಂದ್ ತಂದ್‌ಕರ್ತಿರ ಮೂಡ್‌ಕ್ ತುಪ್ಪಾನನ್ನಕೆ ಪರಂದ್‌ರತ್.

"ಇಞ್ಚಿ ನೀಡ ಮೋವಕ್ ತಂದ್ ಮಾಡುವ ಕಾರ್ಬಾರ್ ನಾಕ್ ಬೋಂಡಾ"ಂದ್ ಮನಸ್ಸಲೇ ಗೇನ ಮಾಡಿಯಂಡ್ ಕೂಡೆ ಬಂದವಳ ಕೂಟಿಯಂಡ್ ಪೊರ್‌ಟ್‌ರತ್ ಪೂವಿ. ಇದಾಯಿತ್ ನಾಲ್ ತಿಂಗಕೆತ್ತಣೆ ಪೂವಿ ಆ ದಿಕ್ಕಕೇ ಪೋಯಿಲೆ.

ಒನ್ನಾಂದ್ ರಾಯಲ್ ಕಾಮಿ, ಅವಡ ಮುದಿಬುದ್ಧ ಅಕ್ಕಂಗಳ ಕೂಟಿಯಂಡ್ ಪೂವಿರಲ್ಲಿಕ್ ಬಾತ್. "ಎನ್ನ ರಾಯಲ್ ಫ್ಯಾಮಿಲಿಕಾರ ನನ್ನಂತವಡ ಮನೆಕ್ ಬಂದ್‌ಟಿಯೇ?"ಂದ್ ಓರ್ ಕುಯಂದಲ್ ಕುಯಿಂದ್‌ಚಿ ಪೂವಿ!

"ನಾಡ ಮೋವ ಮುತ್ತಿರ ಮಂಗಲ ಕಾಗದ ತಪ್ಪಕ್ ಬಂದಿಯೆ ಪೂವಿ, ಅವಡ ಲವ್ ಮ್ಯಾರೆಜ್"ಂದೆಣ್ಣೆಚಿ.

"ಸ್ವಾಮಿ ಇಗ್ಗತ್ತಪ್ಪಾ, ಎನ್ನೇಂಗಾಡ್, ನೀ ಬಯಂದ ರಾಯಲ್ ಫ್ಯಾಮಿಲಿಕಾರ ಕ್‌ಟ್‌ಚಿಲ್ಲಾ, ಕಂಗ್ರಾಜುಲೇಷನ್ ಕಾಮಿ, ಎಲ್ಲಿಯಾ ಮಂಗಲ ಕಾಗದ ತಾ"ಂದ್ ಅವಡ ಕೈಂಜ ಬಲ್‌ಚಂಡ್ ಓದ್‌ಚಿ.

ರಾಹುಲ್ ಪೀಟರ್

ವೆಡ್ಸ್

ಮರ್ಸಿ ಪೀಟರ್

ಜಾಗ ಸೇಂಟ್ ಪೀಟರ್ ಚರ್ಚ್, ಚೆನ್ನೈಂದ್ ಓದಿತ್ ಒಂದೂ ಅರ್ಥ ಆಕತೆ, "ಕಣ್ಣ ದಾಡಾ?"ಂದ್ ಪೂವಿ ಕೇಟಿತ್.

"ಅವ ಕೊಡವನಲ್ಲಾ.... ಆಚೇಂಗಿ ಭಾರೀ ಬಲ್ಯ ಮನುಷ್ಯ. ನಾಲ್ ಸ್ವಂತ



ಫ್ಯಾಕ್ಟರಿ ಉಂಡ್‌ಲೋ, ಬಲ್ಯ ಎಕ್ಸ್‌ಪೋರ್ಟ್ ಇಂಪೋರ್ಟ್ ಕಂಪೆನಿ ಉಂಡ್, ಆಚೇಂಗಿ ಅವ ಕ್ರಿಸ್ತಾನಿ, ಮುತ್ತಿನ ಕನ್‌ವರ್ಟ್ ಮಾಡಿತ್, ಮುತ್ತಿನ ಮರ್ಸಿ ಪೀಟರ್‌ಂದ್ ಪೆದ ಮಾತಿತ್".

"ಅಕ್ಕ ನೀಡ ರಾಯಲ್ ಫ್ಯಾಮಿಲಿ ಎನ್ನಾಚಿ ಕಾಮಿ? ಈ ಕ್ರಿಸ್ತಾನಿ ರಾಯಲ್ ಫ್ಯಾಮಿಲಿಕಾರನಾ?"ಂದ್ ದುಂಡ್ ಇರ್‌ಟ್‌ಕೂಟಿಯಂಡೇ ಕೇಟತ್ ಪೂವಿ.

"ಅನ್ನನೆ ಅಲ್ಲ ಪೂವಿ, ಕೊಡವಡಲ್ಲಿ ನಲ್ಲ ಯೋಗ್ಯ ಬಾಲೆಕಾರ ಎಲ್ಲಿ ಉಂಡ್‌ಂದೆಣ್ಣ್, ಪೊಲಾಕತ್‌ಂಜ ಬಾರ್‌ಲಳತ್‌ಂಡ್ ಕಳ್ಳ ಕುಡಿಪವು, ಕ್ಲಬ್‌ಲ್ ಇಸ್ಪೋರ್ಟ್ ಕಳಿಪವು, ಅಪ್ಪವ್ವ ನೈಚಿ ಪಣತ್ ಕಾರ್ ಎಡ್‌ತಂಡ್ ಬೆಂಗಳೂರ್ ಮೈಸೂರ್‌ಲ್ ತುಕ್ಕಿಯಂಡಿಂಪ್ಪಂತವು ಅಲ್ಲತೆ ಮರ್ಯಾದಸ್ಥ ಕೊಡವ ಬಾಲೆಕಾರಳ ಎಲ್ಲಿ ಕ್ಷುಬ್ಧಾ ಎಣ್ಣ್? ಬಂಪರ್ ಲಾಟರಿ ಪೊಜ್ಜನ್ನೆಕೆ ಇಂತೋರ್ ಸಮ್ಪಂಧ ಕ್ಷುಬ್ಧಕ ಜಾತಿ ನೀತಿನ ನೋಟನಕ ಆಪಾಂದೆಣ್ಣ್".

"ಸೆರಿ ಕಾಮಿ, ನೀನ್ ದಾರ್‌ಕೇಂಗಿ ಕೊಡ್‌ತ; ಆಚೇಂಗಿ ನೀನೂ ನೀಡ ಮೋವಳೂ ಈ ಮಟ್ಟಕ್ ಇಳಂಜಾಂಗ್ ಕೊಡವ ಬಾಲೆಕಾರಳ ಎನ್ನಂಗ್ ಬಯ್ಯುವೊ? ಕಯ್ಯವೇಂಗಿ ನೀನೂ ಕನ್‌ವರ್ಟ್ ಆಯಂಡ್ ಓರ್ ಪೊಣ್ಣೆಚಿತ್ತ ರಾಬರ್ಟ್‌ನ ಕೂಡಿಯಾ..... ನಿನ್ನಂತವು ಕೊಡವ ಜಾತಿಂಜ ದೂರ ನೀಂಗುವದೇ ಕೊಡಗ್‌ಕ್ ಕ್ಷೇಮ. ಕಯ್ಯವೇಂಗಿ ನೀಡ ಪಡ್‌ಬುದ್ಧ ಅಕ್ಕಂಗಕೂ ಓರಂದ್ ಕ್ರಿಸ್ತಾನಿ ತೊಂಡಂಗಳ ತೇಡಿತ್ ಎಲ್ಲಾಡೊ ಮಂಗಲ ಓರ್ ಊಟತ್ ತೇರ್‌. ಇದಾ ನೀಡ ಮೋವಡ ಮಂಗಲ ಕಾಗದ ನೀನೇ ಬೆಚ್ಚಾ"ಂದ್ ಕೊಡ್‌ತತ್.

ಕಾಮಿ ಮೂಡ್ ತೇಟಿಯಂಡ್ ಮೊಟ್ಟ್‌ಳಂಜತ್. ಮಂಗಲಕ್ ಓರ್ ವ್ಯಾನ್ ಮಾಡಿತ್ ಚೆನ್ನೆಕ್ ಪೋಚಿ. ಮೋವಡ ಮಂಗಲತರ ಪೊರೆ ಇಳಂಜ ಪಿಳ್ಳಾ ಕಾಮಿಕ್ ನೆಮ್ಮದಿಯಾಚಿ. ಮನೆ ಮೊಟ್ಟುವಕ್ ಬಂದಲ್ಲಿ ಪತ್ತದಿನ ಕೊಡಗ್‌ಡೀ ಸುತ್ತಚಿಟ್ಟತ್. ಇಂಗ್ಲಿಷ್ ಗೊತ್ತುಳ್ಳಯಿಂಗಡ ಮನೆಕೆಲ್ಲಾ ಮೋವಳ, ಮೈಮನ ಕಾರ್‌ಲೇ ಕೂಟಿಯಂಡ್ ಸುತ್ತಚಿ. ತಾಂಡ ಸ್ವಂತಕಾರ ರಾಯಲ್ ಫ್ಯಾಮಿಲಿರ ಮನೆಕೂ ಕಾಕಿಯಂಡ್ ಪೋಚಿ. ಈ ರಾಯಲ್ ಫ್ಯಾಮಿಲಿಕಾರಳೆಲ್ಲಾ ಕೊಡವಳಲ್ಲತಯಿಂಡ ಬಯ್ಯ ಓಡಿಪೋಯಿತೋ, ಕೂಡಿಯಂಡೋ ಉಳ್ಳವು. ಮೈಮ ಪೀಟರ್, ಕಾಮಿನ ಮಾಂವೀಂದ್ ಕಾಕತೇ ಓರ್ ತರಾ ಮಜಣೆಲ್, ಮಮ್ಮೀಂದ್ ಕಾಕುವಯಿಂಜಾನುಂಡ್ ಕಾಮಿಕ್ ಕೆಲ

ದುಂಬವಯಿಂಜತ್. "ಕೊಡವ ಬಾಲೆಕಾರ ದಾರ್ ಇನ್ನನೆ ಕಾಕುವಾ? ನಾಡ ಮೋಂವನೂ ಕಾಕುಲೇ"ಂದ್ ಎಣ್ಣುವಯಿಂಜತ್.

ಮೈಮಂಡ ನಾಲ್ ಫ್ಯಾಕ್ಟರಿನ ಪಿಳ್ಳಾ ಎಕ್ಸ್‌ಪೋರ್ಟ್ ಕಂಪೆನಿನ ನೋಟೊಂಡೂಂದ್ ಕಾಮಿಕ್ ದುಂಬಾ ಆಸೆ. ಕೊಡಗಲುಳ್ಳ ಬೆಂದುಚಜಾದಿಯಡ ಕೂಡೆಲ್ಲಾ ಮೈಮಂಡ ಕಂಪೆನಿ, ಫ್ಯಾಕ್ಟರಿರದೇ ಪಳೆಮೆ. ಬೆಂದ್‌ಕಕೆಲ್ಲಾ ಈ ಮೈಮಂಡ ಪುರಾಣ ಕೇಟಿತ್ ಬುಡ್‌ಂಜಿಪೋಯಿತಿಂಜತ್.

ಮೈಮಂಗ್ ಕಂಪೆನಿ ವ್ಯವಹಾರತ್‌ನುಂಡ್ ಅಕ್ಕಕ್ಕ ಫಾರೀನ್ ಟೂರ್ ಇಪ್ಪಯಿಂಜತ್. ಇನ್ನನಾಯಿತ್ ಅವಂಡ ಫ್ಯಾಕ್ಟರಿ, ಕಂಪೆನಿನ ಕಾಮಿಕ್ ನೋಟುವಕ್ ಚ್ಯಾನ್ಸೇ ಕ್ವೆಟ್‌ಲೇ! ಓರಮ್ಮ ಚೆನ್ನೆಕ್ ಫೋನ್ ಮಾಡಿತ್ ಮೋವಡ ಕೂಡೆ ತಕ್ಕ್ ಪರಿಯೋಕ, ಪೀಟರ್ ಫಾರೀನ್ ಟೂರ್‌ಲುಂಡ್ ಮಮ್ಮಿ, ನಾನ್ ಮಾಂವ ಮಾಂವಿರ ಕೂಡೆ ಉಳ್ಳಾಂದ್ ಉತ್ತರ ಬಪ್ಪದೇ ಮಾಮೂಲ್ ಪಾಟಾಯಿರ್ತ್."

ಕಾಮಿಕ್ ಮೋವಳ ನೋಟುವಕ್ ಆಸೆ ಆಯಿಪೋಚಿ. ಮೈಮೊ ದುಂಬಾ ಬಿಸಿ ಇಪ್ಪಾನಗುಂಡ್ ನಾನೇ ಚೆನ್ನೆಕ್ ಪೋಯಿತ್ ಮೋವಳ ನೋಟಿತ್ ಪತ್ತ್ ದಿನ ಇಂಜಿತ್ ಬಪ್ಪೀಂದ್ ಗೇನ ಮಾಡಿತ್ ಮೋಂವೊ ಕಿಟ್ಟುಕ್ ಎಣ್ಣೆಚಿ. ಅವೊ, ಆಂ., ಂದೂ ಎಣ್ಣೆಲೆ, ಹ್ಂ.. ಂದೂ ಎಣ್ಣೆಲೆ! ಕೈಲ್ ಪೂಳ್ ಕೈಂಜಾಂಡ ಪಿತ್ಯಾಂದ್ ನಾಲ್ ಕೇಜಿ ಪಂದಿಯರ್ಚಿನ ಬರ್‌ತಂಡ್, ಮೋವಕ್ ಇಷ್ಟ ಉಳ್ಳಾನೆಲ್ಲಾ ಪ್ಯಾಕ್ ಮಾಡಿಯಂಡ್ ಪೊರ್‌ಟತ್.

ಮಂಗಲಾಯಿತ್ ತಿಂಗ ನಾಲಾಯಿತಿಂಜತ್. ಮೋವಡ ತಡಿಲೂ ಕೆಲತೂ ಎನ್ನೇಂಗಿ ಪ್ರೋಗ್ರೆಸ್ ಉಂಡಾಂದ್ ನೋಟುವಕಾಯಿತ್ ಬಂದ ಕಾಮಿಕ್ ಮೋವಡ ಒಣ್ಣೆಂಗಿಪೋನ ತಡಿನ ಕಂಡಿತ್ ಬೇಜಾರಾಚಿ. ಚೆನ್ನೆರ ಸೆಖೆ, ಕೂಟ್‌ಕ್ ಪುದಿಯ ಜಾಗ ಒಗ್ಗಣೆಕ್ ಚೆನ್ನ ದಿನ ಬೋಂಡಿಯಾಪಾಂದ್ ಮುತ್ತಿರ ಮಾಂವಿ ಸಮಾಧಾನ ಎಣ್ಣೆಚಿ.

ಅಂದ್ ಬೈಟ್ ಪೀಟರ್‌ರ ಪೋನ್ ಬಾತ್. ಜಪಾನ್‌ಂಜ ತಕ್ಕ್ ಪರ್‌ಂದಿತ್, ಮಾಂವಿ ಬಂದ ಸುದ್ದಿ ಕೇಟಿತ್ ಮಾಂವಿರ ಕೂಡೆ, "ಮಮ್ಮಿ ನಿಂಗ ಬಂದದ್ ದುಂಬಾ ಕುಶಿ, ನಾಕ್ ಇಲ್ಲಿ ಪಿಳ್ಳಾ ಸಿಂಗಾಪುರತ್ ನಾಲ್ ದಿನ ಕೆಲಸ ಉಂಡ್, ಆಚೇಂಗಿಯೂ ಪರೋಲೆ, ಇಂದೇತ ಫ್ಲೈಟ್‌ಲ್ ಪೊರ್‌ಡುವಿ, ನಾಳೆ ಪೊಲಾಕ ಎತ್ತುವಿ, ನಾಡ ನೆಕ್ಸ್ಟ್ ಟ್ರಿಪ್‌ಲ್ ನಿಂಗಳೋ ಮರ್ಸಿನೋ ಇಲ್ಲಿಕ್ ಕೂಟಿಯ ಬಪ್ಪಕುಳ್ಳ ಏರ್ಪಾಡ್

ಮಾಡಿತಾಯಿತ್"ಂದೆಣ್ಣೆತ್ ಪೋನ್ ಬೆಚ್ಚತ್. ಮೋವಡ ಕೂಡ ದುಂಬಾ ತಕ್ಕ ಪರೆಯೊಂಡೊಂದ್ ಆಸೆ, ಕಾಮಿಕ್. ಆಚೇಂಗಿ ಮೋವಡ ಮಾಂವಿಯೂ ಅದೇ ಕೋಂಬರಲ್ ಬುದ್ದಂಡಾನಗುಂಡ್ ತಕ್ಕ ಬಾಕ್ಕ್ ಕಯ್ಯತಾಚಿ. ಪಿತ್ಯಾಂದ್ ಪೀಟರ್ ಬಂದಿತೆತ್ತ್ ಚಿ.

ಮುತ್ತಿಕ್ ಚೆನ್ನ ದಿನತಂಜ ಓರ್ ತರಾ ಕೆಲನೊಂಬಲ. ಒಮ್ಮೆ ಚೆಕ್‌ಅಪ್ ಮಾಡ್‌ಚ್ಚೊಟ್ಟೊಂಡ್ ಬಪ್ಪದ್ ನಲ್ಲದೊಂದ್ ಅಕ್ಕಕ್ಕ ಅವಡ ಮಾಂವಿ ಎಣ್ಣೆವಯಿಂಜತ್. ಏದೊಂಗೂ ಕೊಡಗ್ ಪೋಕ..... ಚೆನ್ನ ಹವಾ ಬದಲಾನನ್ನೆ ಆಪಾ..... ಮಡಿಕೇರಿಲೇ ಚೆಕಪ್ ಮಾಡ್‌ಚಿಡಲೊಂದ್ ಕಾಮಿ ಎಣ್ಣಾನಾಂಗ್ ಪೀಟರೂ ಒತ್ತಂಡತ್. ಮೂಂದಾಳೂ ಕೊಡಗ್‌ಕೇ ಬಾತ್.

ಮಡಿಕೇರಿಲ್ ಚೆಕಪ್ ಮಾಡ್‌ನ ಡಾಕ್ಟರ್, "ಇಲ್ಲಿ ಆಪುಲೆ, ಕೂಡೆನ್ನೆ ಮಂಗಳೂರ್‌ಕ್ ಕೂಟಿಯಪೋಯಿ, ಅರ್ಜೆಂಟ್ ಆಪರೇಶನ್ ಅಂಡೂ"ಂದೆಣ್ಣೆತ್ ಮಂಗಳೂರ್ ಡಾಕ್ಟರ್‌ರ ಅಡ್ರೆಸ್ ಕೊಡ್‌ತತ್.

ಪಿತ್ಯಾಂದ್ ಮೂಂದಾಳೂ ಮಂಗಳೂರ್‌ಕ್ ಪೋಯಿತ್ ಮುತ್ತಿನ ಅಡ್ಮಿಟ್ ಮಾಡ್‌ಚಿ. ಅವ್ವನೂ ಮೋವಳೂ ಆಸ್ಸತ್ರೆ ವಾರ್ಡ್‌ಲ್ ಇಂಜತ್. ಆಪರೇಶನ್‌ಕ್ ಇಣ್ಣೊ ನಾಲ್ ದಿನ ಇಂಜತ್. ಮುತ್ತಿಕ್ ಚೋರೆ ಕೊಡ್‌ಕಂಡಿಯಾಪಾಂದ್ ಡಾಕ್ಟರ್ ಎಣ್ಣೆ ಚಿ. ಪೀಟರ್‌ರ ಚೋರೆ ಓ ಪಾಸಿಟಿವ್ ಆಯಿತಿಂಜಾನುಂಡ್ ಅವಂಡದೇ ಕೊಡ್‌ಕೊಲಿಂಜತ್.

ಪೀಟರ್ ಆಸ್ಸತ್ರೆರ ಪಕ್ಕತ ಓರ್ ಬಲ್ಯ ಹೋಟೆಲ್‌ಲ್ ರೂಮ್ ಮಾಡಿಯಂಡಿಂಜತ್. ಕಾಮಿಕ್ ಆಸ್ಸತ್ರೆಲ್ ಕುಳಿಪದ್ ಸೆರಿಯಾಪುಲೇಂದ್ ಪೀಟರ್‌ರ ರೂಮ್‌ಕ್ ಪೋಯಿತ್ ಕುಳಿಪಯಿಂಜತ್. ಈ ನೇರತ್ ಪೀಟರ್ ಆಸ್ಸತ್ರೆ ವಾರ್ಡ್‌ಲ್ ಇಪ್ಪಯಿಂಜತ್.

ಒನ್ನಾಂದ್ ಕಾಮಿ ರೂಮ್‌ರ ಪಡಿ ತೊರ್‌ಪಕ, ಪಕ್ಕತ ರೂಮ್‌ಂಜ ದಂಡ್ ಕೊಡವ ಬಾಲೆಕಾರ ಪೊರ್‌ಡುವದೂ, ಎದ್‌ಮುಟ್ಟಿಪೋಚಿ. "ಏ.... ಇವ ನಾಡ ಪಪ್ಪಂಡ ರೈಟರ್ ಆಯಿತಿಂಜ ಮಂದಯ್ಯಂಡ ಪೊಣ್ಣ್ ರಾಯಲ್ ಆಂಟಿ ಅಲ್ಲರೇ?"ಂದ್ ಒಬ್ಬ ಕೇಟತ್. ಕೇಟಂವೊ ಮ್ಯಾನೇಜರ್ ಪೊನ್ನಪ್ಪಂಡ ಮೋಂವೊ ರಂಜು. ಕಾಮಿ ಮಾತ್ರ ದುಂಡ್ ತಿರ್‌ಕಿಯಂಡ್ ರೂಮ್‌ರೊಳಕ್ ಕೂಡಿಯಂಡತ್. ಓರ್ ಬಾಲೆಕಾರಂಡ ಅವ್ವನ

ಆಸ್ಪತ್ರೆ ಅಡ್ಮಿಟ್ ಮಾಡಿತಿಂಜಾಂಗ್ ಅವು ದಂಡಾಳೂ ಆ ಹೋಟೆಲ್‌ಲೇ ಇಂಜತ್.

ನಾಲನೆ ದಿನ ಮರ್ಸಿ ಪೀಟರ್‌ರ ಆಪರೇಶನ್. ಪೀಟರ್‌ರ ಚೋರೆ ಎಡ್‌ತಿತ್ ಬೆಚ್ಚಿತಿಂಜತ್, ಅಂದ್ ಬೈಟ್ ಡಾಕ್ಟರ್ ಕಾಮಿನ ಕಾಕಿತ್, "ನಿಂಗಡ ಮೋವಡ ಆಪರೇಷನ್ ಮೂಂದ್ ದಿನ ಮಿಳ್ಳಾಕ್ ತೆರಕಿತ್. ಪೀಟರ್‌ರ ಚೋರೆ ಆಪುಲೆ, ಬೋರೆ ಚೋರೆಕ್ ಏರ್ಪಾಡ್ ಮಾಡೊಂಡೂ"ಂದ್ ಎಣ್ಣೆತ್ ಪೋಯಿರ್‌ತ್. ಅಕ್ಕಣೆಕ್ ಪೀಟರ್ ಬಂದಂವೊ ಮಾಂವಿನ ಹೋಟೆಲ್‌ಕ್ ಪೋಯಿತ್ ಕುಳ್‌ಚಿತ್ ಬಾರೀಂದ್ ಅಯೆಚತ್. ಮಾಂವಿ ಹೋಟೆಲ್‌ಕ್ ಪೋನದು, ಪೀಟರ್ "ಚೆನ್ನ ಪುಟ್ಸ್ ಎಡ್‌ತಂಡ್ ಬಪ್ಪಿ"ಂದ್ ಮರ್ಸಿರ ಮೂಡ್‌ನೊಮ್ಮ ಕುಶೀಲ್ ತಾಟಿರುವಂಜಿ ಪೊರಾಮೆ ಪೊರಾಟತ್.

ಮ್ಯಾನೇಜರ್ ಪೊನ್ನಪ್ಪಂಡ ಮೋಂವೊ ರಂಜು ಪಿಳ್ಳಾ ಅವಂಡ ಸಿನೇತ ಏಳ್ ಗಂಟೆಕ್ ರೂಮ್‌ಕ್ ಬಪ್ಪಕ ರಾಯಲ್ ಆಂಟಿರ ರೂಮ್‌ಲ್ ತಕ್ಕ್ ಕೇಪ. ಪೊಣ್ಣಾಳ್‌ರ ಮೊರೆ ಕೇಪ. ಮೊರ್‌ಟಂಡ್, "ದಮ್ಮಯ್ಯ ಪೀಟರ್, ಬುಟ್ಪರ್ ನೀಡ ಅವ್ವಂಡನ್ನಕೆ ನಾನ್, ದಾರೂ ನಾಕ್ ಗೆತಿ ಇಲ್ಲತ ಈ ಊರ್‌ಲ್ ನಿನ್ನ ನಾಡ ಮೋಂವೋಂದೆ ಗೇನ ಮಾಡಿತ್ ಬಂದ. ಇಂತ ಅನ್ಯಾಯ ಮಾಡುವೀಂದ್ ಗೇನ ಬೆಚ್ಚಂಡ್ ನೀನ್ ನನ್ನ ಮಮ್ಮೀಂದ್ ಕಾಕುವಂಡಿಂಜತಾ? ನಾನ್ ಕೂತ್‌ಕೊಡ್‌ತಿತ್ ರಂಪ ಇಟ್ಟಿತ್ ನೀಡ ಚೋರೆ ಊತಿರುವಕಿಂಜ. ಆಚೇಂಗಿ ನಾಡ ಮೋವಕ್ ದಿಕ್ಕ್ ದೆಸೆ ಇಲ್ಲತಾಯಿಪೋಪಲ್ಲಾ.... ದಮ್ಮಯ್ಯ ನಾನ್ ದಾರ್‌ಕೂ ಎಣ್ಣಲೆ.... ನನ್ನ ಬುಟ್ಪರ್"ಂದ್ ಚೋರ್‌ತೆ ಮೊರ್‌ಡುವದ್ ಕೇಪಯಿಂಜತ್.

"ಮಮ್ಮೀಂದ್ ಬಾಯಿಲ್ ಕಾಕಿಟಮಾತ್ರಕ್ ನೀನ್ ನಾಡ ಅವ್ವನೊಂದು ಆಯಿಪೋಪುಲೆ. ನೀಕೆನ್ನ ಅಚ್ಚ ಬಲ್ಯ ಬಯತಾಯಿಟಿತಾ? ಮೋವಕ್‌ಳ್ಳಿ ಪುಡ್‌ಜನೆ ಚಾಯಿತುಳ್ಳಿಯಾ.... ಮಾಂವಿಯಾನಕೆನ್ನ.... ಪ್ರೀತಿ ಪ್ರೇಮಕ್ ಜಾತಿ, ಚಾಚೆ, ಬಯತ್‌ರ ಕೆಟ್ಟುಂಡಾ.... ಎನ್ನನೆಯೂ ನಿನ್ನ ತೊಟ್ಟಿತಾಚಿ. ನಿಂಗ ಅವ್ವನೂ ಮೋವಳೂ ಜಾತಿ ಬುಟ್ಟಿತಾಚಿ. ಇಳ್ಳಿ ನೀತಿ ಎಂತ ಎಣ್ಣುವಕುಳ್ಳಿ. ಪೊರಾಮೆ ಜನಕ್ ಎಣ್ಣಾನಕ ನೀಡ ಪೆದೋಪಾಳ್, ನೀಡ ಮೋವಡ ಬಾಳೂ ಪಾಳ್, ನಾಕೆನ್ನ ನಾನೋರ್ ಕಣ್ಣ, ಮುಂಡತೀರ್?ಂದೆಣ್ಣೆತ್ ಪುಡ್‌ಚಿ ಬರಿ ಮಾಡುವ ಸದ್ ಕೇಟತ್.

ಇದ್‌ನ ಚೆನ್ನ ಚೆನ್ನ ಕೇಟ ಕೊಡವ ಬಾಲೆಕಾರಡ ಚೋರೆ ಕೊದ್‌ಚತ್. ರಾಯಲ್ ಆಂಟಿ ಪಂಡ್ ಕಳ್‌ಚದೆಲ್ಲಾ ಗೇನ ಮಾಡುವಕ ಅವಕ್ ಅನ್ನನೇ ಆಂಡೊಂದಾಚಿ. ಆಚೇಂಗಿ

ಓರ್ ಕೊಡವತೀಂದೆಣ್ಣುವ ಅಭಿಮಾನತ್ ಮಕ್ಕ ಓರ್ ಕೂತ್ ಕೊಡತುರುವಂಜಿ ಪಡಿಕೊಂದ್ ಚೌಟ್‌ಚಿ. ಬೋಲ್ವ ತೆರಚಿತ್ ಪಡಿ ತೊರ್‌ಂದತ್. ಚೆಲ್ಲಾಪಿಲ್ಲಿ ಜಾರಿ ಬುದ್ಧ ಪೊಡಿಯ ತೊರ್‌ತಂಡ್, ಬೆತ್ತಲೆ ಮೇಲ್ ಮುಚ್ಚಿಯಂಡ್, ಬಾತ್‌ರೂಮ್‌ಲ್ ರಾಯಲ್ ಆಂಟಿ ತುರ್‌ಂಡಿಯಂಡತ್. ಬಾಲೆಕಾರ ಮೂಡ್‌ಮುಸುಣೆ ನೋಟತೆ ಪೀಟರ್‌ಕ್ ಬಾಟಿತ್ ಅರೆಜಿಂವ ಮಾಡಣೆ ಹೋಟೆಲ್‌ಕಾರಳೆಲ್ಲಾ ಬಂದ್ ಕೂಡ್‌ಚಿ. ಕೇಟ್‌ಪುಡ್‌ಚಿತಾಕಣೆ, ಇವು ಮಾಂವಿಯೂ ಮೈಮನೂಂದ್ ಗೊತ್ತಾಚಿ. ಕೊಡವ ಬಾಲೆಕಾರ, "ಇಂವನೇ ನಿಂಗಡ ರಾಯಲ್ ಮೈಮನ ಆಂಟೀ?"ಂದ್ ಕೇಪಕ, ಆಂಟಿ ರಂಜುರ ಕೈ ಪುಡ್‌ಚೆಂಡ್ ದುಃಖ್‌ಚಿಟ್ಟೆಂಡ್ ಮೊರಟತ್. ಅಕ್ಕಣೆ ಪೊಲೀಸ್‌ಕಾರಳೂ ಬಂದಿತೆತ್ತಾಚಿ. ಪೀಟರ್‌ನ ನೋಟ್‌ನ ಪೊಲೀಸ್‌ಕಾರ, ನಾಲ್ ಕಾಲಕ್ ಬಯ್ಯ ಸ್ಪೇಷನ್‌ಂಜ ತಪ್ಪುಚ್ಚೆಟ್ಟೆಂಡ್ ಓಡ್‌ನ ಆಸಾಮಿ ಇಂವನೇಂದೆಣ್ಣೆತ್ ಕೈಕ್ ಇರ್‌ಂಬು ಬಳೆ ಇಟ್ಟತ್. ಸ್ಪೇಷನ್‌ಲ್ ಅವಂಡ ಜಾತಕ ಓದುವಕ, ಅವೊ ಏದ್ ಘಾಕ್ಚರಿ ಓನರೂ ಅಲ್ಲ, ಎಕ್ಸ್‌ಪೋರ್ಟ್ ಕಂಪೆನಿಕಾರನೂ ಅಲ್ಲ, ಅವಂಡ ಅಪ್ಪ ಮಾತ್ರ ಓರ್ ಕಂಪೆನಿಲ್ ಚಾಕರಿಲಿಂಜಂವೊ. ಆಂಟಿರ ಮೋವ ಮುತ್ತಿಕ್ ಅಯಿಂಗಡ ಸಂಸಾರತೊರ ಗುಟ್ಚೆ ಚೆನ್ನ ದಿನಕ್ ಮಿಳ್ಳಾಲೇ ಗೊತ್ತಾನಕಲೂ ಅವ್ವಂಗ್ ಬಾಯಿಬುಡುವಕ್ ಮಡ್‌ಚೆಂಡಿಂಜತ್.

ಎಲ್ಲಾರೂ ಆಸ್ಪತ್ರೆಲುಳ್ಳ ಮರ್ಸಿ ಪೀಟರ್‌ನ ನೋಟುವಕ್ ಬಾತ್. ಡಾಕ್ಟರ್ ಗೋಪಾಲ್‌ರಾವ್ ಕಾಮಿನ ಕಾಕಿತ್, "ಅಮ್ಮಾ ನಿಂಗಡ ಮೋವಕ್ ಆಪರೇಷನ್ ಬೋಂಡ, ಅವಡ ವಡಿಯಂಗ್ ಏಡ್ಸ್ ಉಂಡ್. ಅದ್ ಇವಡ ತಡಿಕೂ ಪತ್ತಿಪೋಯಿತ್, ಕೂಟಿಯಂಡ್ ಪೋಯಿ"ಂದೆಣ್ಣೆ ಚಿ.

ಕಾಮಿ, ರಂಜುರ ಕೈ ಪುಡ್‌ಚೆಂಡ್, "ಇದೆಲ್ಲಾ ನಾಡ ರಾಯಲ್ ಕಳಿರ ಫಲ ಮೋನೆ, ನನ್ನ ಕಂಡಿತೆಂಗಿ ಕೊಡವ, ಸಮಾನತೆರ ಬಟ್ಟೆ ಪುಡಿಕಡ್"ಂದ್ ಮಂಡೆ ಕುಂಬ್‌ಟ್ಟತ್.

## ಮಾರ್ ಕೂಡ್‌ನ ತಿತ್ತ

ಅಂದಿಮುಂದಿ ನೇರ. ಬಸಪ್ಪಂಡ ವರ್ಕಾಪಾರ ಎದಿಕೆ ಎಂತೋ ರಂಪ ಕೇಟತ್. ನಾಲಾಳಾರ ಗುಂಪು ಕಂಡಕ ನಾಪದಾಳ್ ಕೂಡಿರುವ. ಎನ್, ಯಾಲೆ, ಎತ್, ಎನ್ನಾಚಿ - ಇದಾನೆಲ್ಲ ದಾರೂ ಸೆರಿಕ್ ಅರಂಜವುಲೆ. ದಾರೋ ಒಂದ್ ಎಣ್ಣಾಂಗ್ ದಂಡ್ ಕೂಟಿತ್ ಜನ ಪರಂದಂಡ್ ಪೋನನ್ನೆ ಗುಂಪೂ ಬಲ್ಯದಾಪ, ಕತೆಯೂ ಬಲ್ಯದಾಪ.

ವರ್ಕಾಪಾ ಬಸಪ್ಪ ಖಾದ್ರಿ ಕೈಯಿಂಜ ಓರ್ ಇಂಪೋರ್ಟೆಡ್ ವಾಚಿನ, ಕಂತ್ ಪ್ರಕಾರ ದುಡ್ಡ್ ತಪ್ಪಿಂಜ್ ಎಡ್‌ತಂಡಿಂಜತ್. ಪಣ ಕೊಡ್‌ತಿತ್ ಲೆಕ್ಕ ತೇಪ ದಿನ, ತಕ್ಕಾಕ್ ತಕ್ಕಾಯಿತ್ ಅಪ್ಪರಿಪ್ಪರ ಉಂದಿಕಳ್‌ಚಿತ್, ಖಾದ್ರಿ ಕೈಕಡ್‌ತಿರ್‌ತ್. ಬಸಪ್ಪಂಡ ಮೂಕ್‌ಲ್ ಚೆನ್ನ ಚೋರೆ ಬಾತ್. ವರ್ಕಾಪಾರ ಚೆರಿಯ ಕುಟ್ಟಿಯ ಬೊತ್ತಿತ್ ಓಡಿ ಪೋಯಿತ್ ನೆರೆಕರೆ ಜನಕ್ ಎಣ್ಣಾಚಿ. ಜನ ಗುಂಪು ಕೂಡ್‌ಚಿ.

ಈ ಖಾದ್ರಿ ದಾರಂದ್ ಅವಂಡ ಮಿಂಞ ಬಯ್ಯ ಒಂದೂ ಜನಕ್ ಗೊತ್ತಿಲ್ಲೆ. ನಲ್ಲ ಪಣ್ಣಾ ಚೌತೆರನ್ನತ ರಂಗ್, ಕಡ್‌ಂಬುಟ್ಟಾರನ್ನತ ದವಡೆ, ಚಾಕರ ಬಾಯಿರನ್ನತ ಇಸ್ತಿ ಪೊಳಿಯತ ಬಟ್ಟೆ ಇಟ್ಟಂಡ್ ನೀಲ ಕಾರಲ್ ಸುತ್ತವಾನ ಚೆನ್ನ ದಿನತ್‌ಂಜಿ ಜನ ಕಂಡಿತಿಂಜತ್. ಅಂವೊ ಬಾಡಿಗೇಕಿಂಜ "ಮುಬಾರಕ್" ಲಾಡ್‌ರ ರೂಂಲ್ ಮಾತ್ರ ಜನ ಗುಡ್ಡೆ ಕೂಡಿತಿಪ್ಪಯಿಂಜತ್. ದಾರ್ ದಾರ್ ಎಂತೆಂತಾಂಗ್ ಬಪ್ಪಯಿಂಜತೋ ದಾಕ್ ಗೊತ್ತ್? ಆ ರೂಂರ ಎದಿಕೆ ಇಂಜ ಸೆಲೂನ್‌ಕಾರ, ಟೈಲರ್ ಅಂಗಡಿಕಾರ, ಬೇಕರಿಕಾರಳೆಲ್ಲ ಖಾದ್ರಿರ ಮೀದ ಓರಬ್ಬ ಓರಂದ್ ತರ ಕತೆ ಕೆಟ್ಟಿತ್ ಪರೆವಯಿಂಜತ್.

ಭಾರ್ಬರ್ ರಂಗಪ್ಪಂಡ ಸಿದ್ಧಾಂತ ಪೋಲೆ, ಲಾಡ್‌ರ ಯಜಮಾನ ಹಮೀದಂಡ ಮೋವಳ ಖಾದ್ರಿಕ್ ಕೊಡ್‌ಪಾಂದ್; ಈ ಸಿದ್ಧಾಂತಕ್ ದಾಸಪ್ಪಂಡ ಓರ್ ಅಗ್ರಣೆ - "ಹಮೀದಂಡ ಮೋವ ಜುಬೇದ ಖಾದ್ರಿರ ಕಾರಲ್ ಕಾಲೇಜ್‌ಕ್ ಪೋನದ್ ಕಂಡದ್!"

ಇನ್ನೆ ಕತೆ ನೆಜ್ಜಿತ್‌ಡುವಕ್ ಜನಕೆನ್ನ ಬರ. ಓರ್ ತಿಂಗತ್‌ರೊಳಲ್ ಖಾದ್ರಿ ಎಲ್ಲಾಡ ಬಾಯಿಕ್ ಬುದ್ಧತ್. ಇವಂಡ ಆದಿಮೂಲ, ಆರಬೇರ ಅರಂಜವು ದಾರೂ

ಇಲ್ಲೆ. ಸಬ್ ಇನ್ಸ್ಪೆಕ್ಟರ್ ಪುಕ್ಕಟೆ ಓರ್ ಟಿ.ವಿ., ಪೋಲೀಸ್‌ಕಾರ ಪುಕ್ಕಟೆ ವಾಚಿ, ಪಾಕೆಟ್ ರೇಡಿಯೋ ಎಲ್ಲ ನೇಡ್‌ನದ್ ಗುಟ್ಟಾಯಿತೇ ನಿಂದ್‌ಲೆ.

ನೇರಾನ ಸಂಗತಿ ಎನ್ನಂದೆಣ್ಣೆನಕ - ಖಾದ್ರಿ ತಲಚೇರಿರ ಓರ್ ಪುಂಡಕ್‌ಣ್ಣಿ. ಚುನಾವಣೆರ ಸಮಯತ್‌ಲ್ ಇನ್ನತ ಪುಂಡಂಗೆಲ್ಲ ಭಾರಿ ಡಿಮಾಂಡಿಪ್ಪ. ಕೇರಳ ಚುನಾವಣೆರ ಸಮಯತ್ ಈ ಖಾದ್ರಿ ಭಾರೀ ಕೇಳಿಪಟ್ಟವನಾಚಿ. ಚುನಾವಣೆರ ಕಾಚ ತಣ್‌ಂಜ ಪಿಂಞ ಕಾಸರಗೋಡ್‌ರ ಕಳ್ಳ ಕಡ್‌ತಲ್‌ಕಾರ ಅಬ್ಬುಲ್ಲಂಡ ಕೂಡ ಕೂಡಿಯಂಡ್ ಅಬ್ಬುಲ್ಲಂಡ ಬಲತ್ ಕೈ ಆಚಿ. 'ವೀಸಾ' ಕಾನೂಲ್‌ಲ್ ಅಬ್ಬುಲ್ಲನ ಪುಡ್‌ಚಿ ಕೂಟ್‌ವಕ, ಖಾದ್ರಿ ಸ್ವತಂತ್ರ ವ್ಯಾಪಾರಿ ಆಚಿ. ಖಾದ್ರಿರ ಸೂಟ್‌ಕೇಸ್‌ಲ್ ಇಲ್ಲತ ಕಳ್ಳಮಾಲ್ ಪಿಂಞಲ್ಲಿ ಕೊಟ್ಟು? ಅದ್‌ಂಗೇ ಅವಂಡ ರೂಮ್‌ಲ್ ಎಕ್ಸ್ಟ್ರೀಲು ಚತ್ತೆ ಕೂಡುವಯಿಂಜಿಯೆ.....!

ಲಾಡ್‌ರ ಯಜಮಾನ ಹಮೀದ, ಪಂಡ್ ರಾಮಪ್ಪ ಎಣ್ಣುವ - ಚತ್ತೆ ಚತ್ತೆ ಸುತ್ತಿತ್ ವ್ಯಾಪಾರ ಮಾಡುವವಂಡ ಪಣಿಕಾರ. ಪಣಿಕಾರನಾನಕಲೂ ಅಪ್ಪ ಮೋಂವಂದೆ ಬೋರೆ ಜನಕ್ ಗೊತ್ತ್. ಪದ್‌ನಂಜಿ ಕಾಲ ಇವು ಒಕ್ಕಚೇ ವ್ಯಾಪಾರ ಮಾಡ್‌ನವು. ಹಮೀದ್ ಅಪ್ಪನವ್ವನಿಲ್ಲತ ತಬ್ಬಲಿ. ರಾಮಪ್ಪನೇ ಅವಂಡ ಅಪ್ಪ ಅಪ್ಪ ಎಲ್ಲಾ.

ರಾಮಪ್ಪ ಬಲ್ಯ ಪಣಿಕಾರನಾಯಿತ್ ಕಾಫಿ-ತೋಟ ಎಡ್‌ತಂಡತ್. ತಾಂಡ ವ್ಯಾಪಾರತ್‌ನ ಹಮೀದ್‌ಕೇ ಬುಟ್ಪಾರ್ತ್. ಹಮೀದ್‌ಕ್ ಲಾರಿ ಎಡ್‌ಪಕೂ ರಾಮಪ್ಪ ಪಣ ಕೊಡ್‌ತತ್. ವ್ಯಾಪಾರ ಭಾರಿ ಚಾಯಾಚಿ. ಹಮೀದ್ ಬಲ್ಯ ಲಾಡ್ ಕೆಟ್ಪಚಿ. ಮಂಗಲಾಯಿತ್, ಮಕ್ಕ-ಮರಿಯಾಯಿತ್ ಲಾಡ್‌ರ ಬಯ್ಯಲೆ ಮನೆ ಕೆಟ್ಟಿಯಂಡ್ ಇಂಜತ್. ಹಮೀದ ಮನೆಲಿಪ್ಪದೇ ಕಮ್ಮಿ. ಪೊರ ಊರ್‌ಕ್ ಲಾರಿಲ್ ಪೋನಕ ನಾಲ್ ಅಂಜಿ ದಿನ ಕಯಿಂಜಿತ್ ಬಪ್ಪದೇ ಮಾಮೂಲ್. ಹಮೀದಂಡ ಏದೇ ನಮ್ಮೆ-ನಾಳ್ ಬರಡ್, ಅವಂಡ ಮನೆರ ಬಿರಿಯಾನಿ ರಾಮಪ್ಪಂಡ ಮೇಚಿಲಿಕ್ಕು. ಅನ್ನನೇ ರಾಮಪ್ಪಂಡ ಮನೆರ ನಮ್ಮೆಕ್ ಹಮೀದ್ ಹಾಜರಾಪಯಿಂಜತ್.

ಹಮೀದಂಡ ಮಚ್ಚಿಣ ಜಬ್ಬಾರ್ ರಾಮಪ್ಪಂಡ ತೋಟತ್‌ಲ್ ಪಣಿಕಿಂಜತ್. ಇಕ್ಕ ಹಾಸನತ್‌ರ ಪಕ್ಕ ರೋಡ್‌ರ ಕರೆಲೋರ್ ಹೋಟೆಲ್ ಬೆಚ್ಚಂಡ್ ಬದ್‌ಕಿಯಂಡಿಂಜತ್.

\* \* \*

ಬಸಪ್ಪಂಡ ವರ್ಕಶಾಪ್‌ರ ಪಕ್ಕ ಗಲಾಟೆ ನಡ್‌ಂದಂದ್ ಬೈಟ್ ಸುಮಾರ್

ಇರುವದಾಳ್‌ರ ಓರ್ ಗುಂಪು, ತಂಡ್ ಬಡಿಯ ಆಯಿತ್ ಮುಬಾರಕ್ ಲಾಡ್‌ರ ಬರಿಯ ಸುತ್ತಿ ಕಳ್‌ಚತ್. ಖಾದ್ರಿ, ಎಲ್ಲಿಯಾಂದ್ ಕೇಟಂಡಿರಣೆ, ಅಪಾಯ ಅರ್‌ಂಜ ಓರ್ ಕ್‌ಣ್ಣ ಖಾದ್ರಿ ಯಾಲೆ ಪೋಚೀಂದ್ ಸೆರಿಕ್ ಎಣ್ಣೆ ತಂದ್‌ಲೇಂದ್, ಗುಂಪ್‌ಲಿಂಜ ಒಬ್ಬ ಅವಂಗ್ ದಂಡ್ ಬುಟ್ಟತ್. ಆ ಗುಂಪ್ ಬಾರೀ ಯುದ್ಧ ಗೆದ್ದಯಿಂಗಳನೆಕೆ ಓರಬ್ಬ ಅಯಿಂಡಯಿಂಡ ಬೀರ್ಯತ್‌ನ ಕೊಚ್ಚಿಯಂಡ್ ಖಾದ್ರಿ ಸಂಗತಿ ಮರ್‌ಂದ್‌ರ್‌ವಂಜಿ ಮನೆಕ್ ಕೂಡಿಯಂಡತ್.

ಲಾಡ್‌ರ ಕುಟ್ಟಿಯಕ್ ಎಲ್ಲಾ ಪೊಜ್ಜಿತ್ ರಂಪ ಮಾಡಿತ್‌ಲೇಂದ್ ಜನ ಗುಸು ಗುಸು ಪರ್‌ಂದತ್. ಪೋಲೀಸ್‌ಕ್ ಪುಕಾರೂ ಕೊಡ್‌ತತ್.

ಪಿತ್ಯಾಂದ್ ಸಬ್‌ಇನ್ಸ್‌ಪೆಕ್ಟರ್ ಬಾಷ, ವರ್ಕ್‌ಶಾಪ್ ಬಸಪ್ಪನೊ ಕೂಟಿತ್ ಚೆನ್ನಂಗಾಳ್‌ನ ಸ್ಪೇಶನ್‌ಕ್ ಕಾಕ್‌ಚಿಟ್ಟತ್. ಅಕ್ಕಲೇ ವಿಷಕಾತ್ ಬೀಜುವಕ್ ಸುರುವಾಚಿ. ಬಾಷ ಹಮೀದ್‌ರ ಕಡೆಕಾರ ಆನಾನಗುಂಡ್ ನಂಗಡಯಿಂಗಳ್ ನ್ಯಾಯ ಕ್‌ಟ್ಟುವದುಂಡಾ ಎಣ್ಣೆಯಂಡ್ ಸ್ಪೇಶನ್‌ಕ್ ಪೋಗತೆ ಉಳ್ಳವು ಪರ್‌ಂದತ್.

ಒಬ್ಬೊ ಎಣ್ಣೆಚಿ - "ಪ್ಲಾಂಟರ್ ರಾಮಪ್ಪನೇ ಹಮೀದ ಕೊಡಿಕ್ ಬಂದಾನ ಸಹಿಸೋ ಕಯ್ಯತೆ ತಾಂಡ ಜನಳ ಬುಟ್ಟಿತ್ ಲಾಡ್‌ಕ್ ನುಗ್ಗೆ ಚಿಟ್ಟಿತ್ ಪೊಯ್ಯ ಚಿಟ್ಟಿಯೇಂದ್....!"

ಇನ್ನನೆ ಒಬ್ಬನೊಬ್ಬೊ ಅರಂಗೇತುವೊ ಪಳಮೆರ ಅಲೆ ಎದ್ದತ್. ಅಕ್ಕಣೆ ಬಾರ್ಬರ್ ರಂಗಪ್ಪಂಡ ಅಂಗಡಿಲ್ "ಸ್ಪೇಶನ್‌ಲ್ ಸಬ್‌ಇನ್ಸ್‌ಪೆಕ್ಟರ್ ಬಾಷ, ಸ್ಪೇಶನ್‌ಕ್ ಪೋನಯಿನ ಬೂಟ್‌ಲ್ ಚವುಟಿತೂ, ಪೊಜ್ಜಿತೂ ತೋಲ್ ಉಳ್‌ಕಿತ್‌ಂದ್ ಮಕ್ಕ ತಳ್‌ಚಂಡ್ ತುಳ್ಳಿ ಕಳಿಪಯಿಂಜತ್"ಂದ್ ಪಳಮೆ ಪುಟ್‌ಚಿ. ಈ ಪಳಮೆ ಪೇಟೆಲೆಲ್ಲ ಬಾಯಿಂಜಿ ಬಾಯಿಕ್ ಪಬ್ಬಿರ್‌ತ್.

ಚೆನ್ನಂಗೇ ನೇರತ್ ಓರ್ ಮನೆಕ್ ದಂಡ್ ಕಲ್ಲ ಬುದ್ದತ್‌ಲೊ. ಇಂಞೊ ಚೆನ್ನಂಗೇ ನೇರತ್ ಮಕ್ಕ ಗುಂಪು ಕೂಡಿತ್ ವರ್ಕ್‌ಶಾಪ್ ಬಸಪ್ಪಂಡ ಮನೆಕ್ ಕಲ್ಲ ಕನಿಚತ್. ಕೂಡೆನ್ನೆ ಪೋಲಿಸ್ ಬರಣೆ ಗುಂಪೆಲ್ಲ ಚದಾರಿತ್ ಓಡಿ ಪೋಚಿ. ಸ್ಪೇಶನ್‌ಕ್ ಪೋನಯಿಂಡ ತೋಲೂ ಉಳ್‌ಕಿತಿಲ್ಲೆ, ನಡುನೋ ಪೊಳ್‌ಚಿತಿಲ್ಲೆ. ರಾಜಿ ತೀರ್ಮಾನ ಮಾಡಿತ್ ಅಯಿಚಿತಿಂಜತ್. ಆಚೇಂಗಿ ಖಾದ್ರಿ, ಎಲ್ಲಿಯಾಂದ್ ಮಾತ್ರ ತೇಡಿ ಕಳಿಪಯಿಂಜತ್ ಪೋಲೀಸ್‌ಕಾರ.



ಕತ್ತನ ತಿತ್ತ ಅಲ್ಲಿಕೇ ಕೆಟ್ಟಲೆ. ಪ್ರಿಯಂದಂಡೇ ಇಂಜತ್. ದಂಡ್ ಗುಂಪಾಕಾರಡ ಚರ್ಚಿ ನಡಂದಂಡಿಂಜತ್. ಎಲ್ಲಾ ರಾಮಪ್ಪನೇ ಮಾಡ್ಚಿಟ್ಟಿಯೇಂದ್ ಒರ್ ಕೋಮುಕಾರ ಪರ್ಂದತ್. ಇಂಞೋರ್ ಕೋಮುಕಾರ "ಇದೆಲ್ಲ ಹಮೀದನೇ ಮಾಡ್ಚಿಟ್ಟಿಯೇ"ಂದ್ ಕತೆ ಕೆಟ್ಟಚಿ. ಹಮೀದ ತಿಪಟೂರ್ಂಜಿ ತೆಂಗಲೋಡ್ ಎಡ್ತ ಬಪ್ಪಕ್ ಪೋಯಿತ್ ನಾಲ್ ದಿನ ಆಯಿತಿಂಜತ್.

ಅಂದೇ ಇರ್ ಓರ್ ಗುಂಪು ರಾಮಪ್ಪಂಡ ಮನೆಕ್ ಪೋಚಿ. ರಾಮಪ್ಪಂಡ ಪೂಣ್ಣ ಬೆಂಗಳೂರ್ಲ್ ತಾಮನೆಲಿಂಜತ್. ಪೇಟೆಲ್ ನಡಂದ ಸಂಗತಿಕ್ ಪತ್ತ ಕೂಟಿತ್ ಎಣ್ಣೆಚಿ. "ಇದೆಲ್ಲ ರಾಮಪ್ಪನಗುಂಡೇ ನಡಂದಿಯೇಂದ್ ಹಮೀದ ಎಣ್ಣೆಯಂಡುಂಡ್. ಹಮೀದಂಡ ಕೂಟಾಕಾರ ಗುಂಪು ಕೂಡಿಯಂಡ್ ಉಂಡ್"ಂದ್ ಎಣ್ಣೆಚಿ. ರಾಮಪ್ಪಂಡ ಮೇಲೆ ಇನ್ನತ ಕೆಟ್ಟ ಪೆದ ಹಮೀದ್ ಇಟ್ಟದ್ ಕೇಟಿತ್ ರಾಮಪ್ಪಂಡ ಕೆಮಿಕ್ ಇರ್ಂಬ್ ಕಾಚಿ ಬೂಕ್ನೆನ್ನೆ ಆಚಿ. ತಾಂಡ ಕೂಳ್ ಉಂಡಿತ್ ಬೊಳ್ಂದಂವೊ ಇಚ್ಚಕ್ ಮಿಂಞಕ್ ಪೋಕೂಂದ್ ಗೇನ ಮಾಡಿತಿಂಜಲೆ.

ಅಕ್ಕಣೆ ಅಲ್ಲಿಕ್ ಬಂದ ನಾಲಂಜಿ ಮಕ್ಕ "ರಾಮಪ್ಪಂಡ ತೋಟಕ್ ತಿತ್ತ ಬೆಚ್ಚಿತ್ ಮನೆನ ಪ್ರೊಡಿಪಾತನ ಎಣ್ಣೆಯಂಡ್ ಬೇಕರಿಲ್ ಓರ್ ಗುಂಪು ಪರ್ಂದಂಡುಂಡಲೋ"ಂದ್ ಎಣ್ಣೆಚಿ. ಎಲ್ಲಾ 'ಲೊ' ಪಳಮೆ ದುಂಬ್ಚಿ. ಈ ತಕ್ಕ ಕೇಟಿತ್ ರಾಮಪ್ಪಂಡ ಚೋರೆ ಪದಾರ್ಚಿ. "ಇಕ್ಕ ಪೋಯಿತ್ ಹಮೀದನ ಕಾಕಿತ್ ಕೇಪೀ"ಂದ್ ಎದ್ದತ್. ಜನ ಬುಟ್ಟಲೆ. "ಇಚ್ಚಕ್ ಮಾಡ್ನವಂಡ ಪಕ್ಕ ನಿಂಗ ಪೋಪದಾ? ಅಂವೊ ಮನೆಂಜಿ ಪೊರಡತೆ ಒಳ್ಲಲ್ ಕೂಡಿಯಂಡ್ ಇದೆಲ್ಲ ನಡತಿಯಂಡುಂಡ್"; ಕತ್ತುವ ತಿತ್ತಕ್ ಎಣ್ಣೆ ಬೂಕ್ಚಿ.

"ಅಕ್ಕು, ಇಚ್ಚಕ್ ಮಿಂಞಕ್ ಎತ್ತಿಟ ಪಿಂಞ ನಾನ್ ಕೈಕಟ್ಟಿ ಅಳತಕ ಎನ್ನನೇ"ಂದ್ ರಾಮಪ್ಪ ಬೇರ್ಚಿಟ್ಟತ್. ಹಮೀದಂಗ್ ಪಡ್ಪಾಚಿಡಂಡೂಂದ್ ಓರಬ್ಬ ಓರಂದ್ ಸಲಹೆ ಕೊಡ್ತತ್. ಒಂದಾಂಗಂಜಿ ಒಂದ್ ಮೇಲ್ ನೆಟ್ಟುವನ್ನತದ್. ಬಂದ ಅಪಾಯತನ ಸೆರಿಯಾನ ಬಟ್ಟೆಲ್ ನೀಕಿಯವಕುಳ್ಳ ಸಲಹೆ ಮಾತ್ರ ದಾರೂ ಕೊಡ್ತಲೆ. ಅನ್ನತಾ ನಲ್ಲ ಸಲಹೆ ಕೊಡ್ಪವು ಈ ತರ ಗುಂಪಾಕ್ ಕೂಡುವದೂ ಇಲ್ಲೆ. ನಲ್ಲ ಸಲಹೆಕ್ ಇನ್ನತ ಗುಂಪಾಕಾರ ಕೆಮಿ ಕೊಡ್ಪದೂ ಇಲ್ಲೆ.

ಬಲ್ಯ ಅನುಭವ ಪಡ್ಂದ ಜಯಂಡ ಸಲಹೆ ಎಲ್ಲಾಕೂ ಒತ್ತಬುದ್ದತ್. ಚುನಾವಣೆರ ಸಮಯತ್ಲೆಲ್ಲ ಜಯಂಡ ಸಲಹೆ ಕೇಕತಂವನೇ ಇಲ್ಲೆ. ಅಂವೊ ಕೊಡ್ತ

ಸಲಹೆನ ಎಡ್‌ಕತಂವನೂ ಇಲ್ಲೆ.

"ಇಂದ್ ಇರ್‌ಲೇ ಬೆಂಗಳೂರ್‌ಕ್ ರಾಮಪ್ಪಂಡ ಜೀಪ್‌ಲ್ ಪೋಕ. ಇರ್ ಪೊಲಣೆಕ್ ಟೈಂಬಾಂಬ್ ಮಾಡ್‌ಚಿಟ್ಟಂಡ್ ಬಕ್ಕನ. ಮುಬಾರಕ್ ಲಾಡ್‌ಲ್ ಬೆಪ್ಪಿಚಿಡನ. ಬಾಕಿ ಸಂಗತಿ ನಾನ್ ನೋಟಿಯವಿ" ಇದೇ ಜಯಂಡ ಆಖೀರಿ ತೀರ್ಮಾನ.

ಇದ್ ಕೇಪಕ ರಾಮಪ್ಪಂಡ ಕೈಕಾಲ್ ಗ್‌ಡ್‌ಪಕಾಚಿ. ಈ ಕಾರ್ಬಾರೆಲ್ಲ ಬೋಂಡಾಂದ್ ಪೆರ್ತ್ ಎಣ್ಣೆಚಿ. ದಾರೂ ಕೇಟ್‌ಲೆ. "ನಿಂಗ ಜೀಪ್ ತಾರಿ. ನಿಂಗಲೂ ಬಾರಿ. ನಿಂಗ ಮೂಂದ್ ದಿನಕ್ ಮಿಂಞ ಆಸ್ಪತ್ರೆಲ್ ಎಡ್‌ಮಿಟ್ ಆನೆನ್ನೆಕೆ ನಂಗ ಎಡ್‌ಮಿಟ್ ಮಾಡುವ. ಡಾಕ್ಟರ್‌ಕ್ ಪಣ ಕೊಡ್‌ತಕ ಎಲ್ಲಾ ಆಪ. ನಿಂಗ ಊರ್‌ಲಿಲ್ಲತ ಪಿಂಞ ನಿಂಗಕೆನ್ನ ಪೋಡಿ! ನಿಂಗಡ ಜೀಪ್‌ನ ಪೊಲಣೆಕ್ ಶೆಡ್ಡಲ್ ನಿಪ್ಪಿಚಿಟ್ಟಿತಿಪ್ಪ. ಬಾಕಿ ಸಂಗತಿ ನಂಗ ನೋಟಿಯವ" ಎಣ್ಣೆಚಿ.

ರೌಡಿ ಜಯನ ಎದ್‌ಪಾಕ್‌ಟ್ಟವಕ್ ರಾಮಪ್ಪಂಗೂ ಧೈರ್ಯ ಪೋರ. ಮನಸಿಲ್ಲತ ಮನಸ್‌ಲ್ ಬರ್ ಊಜಳೆ ಬುಟ್ಟದೇ ಒಪ್ಪಿಗೆ ಕ್‌ಟ್ವಾನೆನ್ನೆಕೆ ಆಚಿ.

ಬೆಂಗಳೂರ್‌ಲ್ ಟೈಂಬಾಂಬ್ ಮಾಡಿತ್ ಕೊಡ್‌ಪ ಜಾಗ ಜಯಂಗ್ ಮಾತ್ರ ಗೊತ್ತ್. ಡೈವಿಂಗ್ ಗೊತ್ತುಳ್ಳ ದಂಡಾಳ್, ಜಯ ಪಿಂಞ ರಾಮಪ್ಪ ಜೀಪ್ ಪತ್ತೆಚಿ. ಆಸ್ಪತ್ರೆಕ್ ಬೋಂಡಿಯ ಪ್ಲಾಸ್ಕ್, ಪಂಚೆ, ಟವಲ್, ಸೋಪ್, ಸೂಟ್‌ಕೇಸ್ - ಎಲ್ಲಾ ಎಡ್‌ತಿತ್ ಜಯನೇ ಪ್ಯಾಕ್ ಮಾಡ್‌ಚಿ. ರಾಮಪ್ಪಂಡ ಪಕ್ಕ ಇಂಜ ಕ್ಯಾಪ್ ಪತ್ತಾಯಿರ ಎಡ್‌ತಂಡ್ ಪೊರ್‌ಟತ್. ರಾಮಪ್ಪ ಬೆಂಗಳೂರ್ ಆಸ್ಪತ್ರೆಲಿಪ್ಪ, ಗುಂಪ್‌ರ ಚೆನ್ನಂಗಾಳ್ ರಾಮಪ್ಪಂಡ ಮನೆಲಿಂಜಂಡ್, ಅಪಾಯ ಬರತೆನ್ನೆಕೆ ಕಾಪೊ. ಟೈಂಬಾಂಬ್ ಬಂದೆತ್ತನದು ದಾರ್ ದಾರ್ ಎಂತ ಕಾರ್ಬಾರ್ ಮಾಡಂಡೂಂದ್ ಸೆರಿಯಾನ ಯೋಜನೆ ರೂಪ್‌ಚಿಟ್ಟಿತ್.

ಇಯಂಡ ಈ ಓಟ್‌ಗಳಿ, ರಾಮಪ್ಪಂಡ ಮನೆಲ್ ಸಭೆ ನಡೆಂದದ್, ಜೀಪ್ ಇರ್‌ಲ್ ಪೊರ್‌ಟದ್, ಇದ್‌ನೆಲ್ಲ ಇಂಞೋರ್ ಗುಂಪ್‌ಕಾರ ಪೆರ್ತ್ ಎಚ್ಚರತ್‌ಲ್ ನೋಟಿಯಂಡೇ ಇಂಜತ್. ಎಂತೋ ಸಂಗತಿ ನಡೆಂದಂಡುಂಡೆಂದ್ ಅಯಿಂಡಯಿಂಡ ಮನಸ್‌ಕ್ ತೋಂದಾನೆನ್ನೆಕೆ ಕಲ್ಪನೆ ಮಾಡ್‌ಚಿ.

ಬೆಂಗಳೂರ್‌ಕ್ ಜೀಪ್ ಎತ್ತನದು, ರಾಮಪ್ಪಂಗ್ ನೆಟ್ಟಲ್ ಸುರು ಆಚಿ. ಈ ಬಾಲೆಕಾರಡ ಪುಚ್ಚಿ ತಕ್ಕ ಕೇಟಂಡ್ ನಾನ್ ಬಂದದ್ ಸೆರಿಯಲ್ಲಾಂದ್ ಮನಸ್‌ಕ್ ತೋಂದ್‌ಚಿ. ಪೋಡಿ ಪೋಡಿ ಆಚಿ. ಮನಸ್‌ರ ಪಿಕ್ಕಿರಿ ತಡ್‌ಪ ಕಯ್ಯತೆ ಚೆನ್ನ ಧೈರ್ಯ

ಬರಡ್ಂದ್ ಓರ್ ಬಾರ್ಕ್ ತಾನೊಬ್ಬನೆ ನುಗ್ಗಿ. ಕೂಡ ಉಳ್ಳವು "ನಂಗ ಅರ ಗಂಟಲ್ ಬಪ್ಪ"ಂದೆಣ್ಣೆತ್ ಜೀಪ್ ಎಡ್ತಂಡ್ ಏಲೆಯೋ ಪೋಚಿ. ಚೆನ್ನ ಕುಡ್ಚಿತಾಪದು ರಾಮಪ್ಪ "ನಾನ್ ಈ ಬಾಲೆಕಾರಡ ತಕ್ಕ ಕೇಟಂಡ್ ಬೆಂಗಳೂರ್ಲಾ ನಿಂದ್‌ಟಕ, ಅಲ್ಲೇಂಗಿ, ಆಸ್ಪತ್ರೆಲ್ ಅಡ್‌ಮಿಟ್ ಆಯಿಟಕ ಅಪಾಯ ಜಾಸ್ತಿ. ಬೆರಿಯ ಬಯ್ಯಕೇ ಪೋಯಿತ್ ಈ ಮಕ್ಕಡ ಪೊಟ್ತ್ ತೆರ್‌ಪಾರ ಯೋಜನೆನ ರದ್ದ್ ಮಾಡುವದೊಂದೇ ಬಟ್ಟೇ"ಂದ್ ಗೇನ ಮಾಡಿಯಂಡ್ ಆಖೀರಿ ಪೆಗ್ಗ್ ಎರ್‌ಕೆಚಿ. ಅಕ್ಕಣೆಕ್ ಜಯ ಜೀಪ್ ಎಡ್‌ತಂಡ್ ಬಾತ್. ಜಯಂಡ ಮೂಡಲ್ ಪೋಡಿರ ಗುರತೇ ಇಂಜಾಲೆ. ತಾನ್ ಗೆದ್ದ್‌ಟ ಎಣ್ಣುವನೆಕೆ ಕುಸಿಲ್ ಇಂಜತ್.

ಜಯ ತೊಂಡೆರ ಕೊತ್‌ಕೆತ್ತಣೆ ಕುಡ್‌ಚತ್. ದಂಡ್ ಡೈವಿಂಗ್ ಮಾಡುವವು ಚೆನ್ನ ಚೆನ್ನ ಕುಡ್‌ಚೋಳೀಂದ್ ಜಯನೇ ಬೂಕಿ ಕೊಡ್‌ತತ್. ಪೊಲಾಕ ಬೋಳಿ ಪಾಯುವಾಂಗ್ ಮಿಂಞ ಊರ್‌ಕ್ ಎತ್ತಂಡು, ಬೆರಿಯ ಪೊರಡಿಲೆಂದ್ ಒಪ್ಪಾಚಿ. ರಾಮಪ್ಪ ಮಾತ್ರ ಬೋಳೆ ಅರ್‌ತಕಲೂ ನಾನಿಲ್ಲಿ ಇಪ್ಪಾಲೆ. ನಾನೂ ಬಯ್ಯಕೇ ಬಪ್ಪೀಂದ್ ಪೊರಾಟತ್. ಪಾಪ ಅವೊ ಅಳತ ಜೀಪ್‌ರೊಳಲ್ ಒರ್ ಕಟ್ಟಡತ್‌ನ ಪೊಡಿಪಾತುವನ್ನತ ಸಾಮಾನ್ ಉಂಡ್‌ಂದ್ ಅವಂಗ್ ದಾರೂ ಎಣ್ಣಾನದೂ ಇಲ್ಲೆ. ಕಳ್ಳ ಚೊಕ್ಕನ ಪಿಂಞ ಅವನೂ ಕೇಪಕ್ ಮರ್‌ಂದತ್.

ಜೀಪ್ ಓಡ್‌ಚಿ. ಎಂತೋ ಓರ್ ತರ ನೆಟ್ಟಲಾಲೇ ಇಂಜ ರಾಮಪ್ಪ, ಚೆನ್ನ ದೂರ ಬಪ್ಪದು ಕಣ್ಣ್ ಮುಚ್ಚಿಯಂಡ್ ಅಳತತ್. ಚೆನ್ನ ವರ್‌ಕ್ ಪತ್‌ಚಿ. "ಡಬ್"ಂದ್ ಓರ್ ಸದ್ದ್ ಕೇಟತ್. ಅಪ್ಪರ ಎನ್ನಾಚೀಂದ್ ಗೊತ್ತಾಯಿಲೆ.

ಊರ್‌ಲ್ ರಾಮಪ್ಪಂಡ ಜೀಪ್ ಬಕ್ಕೂಂದ್ ಪಾರಕಾತವು ಎಣ್ಣಾನ ನೇರಕ್ ಜೀಪ್ ಬಂದಿತ್ ಎತ್ತಿಪ್ಪಕ, ಮುಳ್ಳಾರ ಮೇಲೆ ನಿಂದನೆಕೆ ಕಳಚಂಡ್ ಕಡ್‌ಕೆರೊಳಿಯ ನೋಟುವಯಿಂಜತ್.

ಜೀಪ್ ಒರ್ ಮೋರಿಕ್ ಇಡ್‌ಚಿತ್ ಉರ್‌ಂಡಿ ಬುದ್ದತ್. ರೋಡ್ ಸೈಡ್‌ಲ್ ಹೊಟೇಲ್ ಬೆಚ್ಚ ಹಮೀದ್‌ರ ಮೈಮೊ ಜಬ್ಬಾರ್ ಹೋಟೇಲ್‌ರ ಪಕ್ಕಲೇ ಈ ಸಂಗತಿ ನಡ್‌ಂದತ್. ಅಲ್ಲಿ ಬೋರೆ ಅಂಗಡಿಯೊಂದೂ ಇಲ್ಲೆ. ಇರ್‌ಲ್ ಪೋಪ ಲಾರಿಕಾರ ಟೀ ಕುಡಿಪಕ್ ನಿಪ್ಪಾಚಿಡುವಯಿಂಜತ್. ಎನ್ನತ ಸದ್ದ್‌ಂದ್ ಜಬ್ಬರ್ ಜೀಪ್ ಬುದ್ದಲ್ಲಿಕ್ ಬಂದ್ ನೋಟುಚಿ. ಜಯಂಗೂ, ರಾಮಪ್ಪಂಗೂ ಸೋಯ ಇಂಜಾಲೆ. ಬಾಕಿ ದಂಡಾಳಕ್ ಚೆನ್ನ ಗಾಯ ಆಯಿತಿಂಜತ್.

ಆ ಇರ್‌ಟಲ್, ಜಬ್ಬಾರ್ ಪಳೆಯ ಮುಂಡ್ ಬಟ್ಟೆ ಎಲ್ಲ ಕೊಂಡ ಬಂದಿತ್ ಗಾಯಕ್ ಕೆಟ್ಚಿ. ದಂಡಾಳ್‌ರ ಮೇಲೂ ಚೋರೆಲ್ ಮುಕ್ಕಿತ್ ಎಡ್‌ತನ್ನೆಕೆ ಇಂಜತ್. ಬೊಳ್‌ಚ ಬೊಳ್‌ಲ ಮೂಡ್‌ನ ಚಾಯಿಲ್ ನೋಟ್‌ಚಿ ಜಬ್ಬಾರ್. ತನ್ನ ಸ್ವಂತ ಮಕ್ಕಳೆನ್ನೆಕೆ ಚಾಕಿ ಬೊಳ್‌ತನ ರಾಮಪ್ಪಂಡ ಮೂಡ್ ಕಂಡಿತ್ ಅಯ್ಯೋಂದ್ ಕೂತ್ ಉತ್ತಿಪೋಚಿ. ಜಬ್ಬಾರ್ ಮಕ್ಕಳೆನ್ನೆಕೆ ಮೊರ್‌ಟತ್. ಅಲ್ಲಲ್ಲಿ ತೇಡಿತ್ ಕೆಟ್ಚಿನ ದುಡ್ಡೆನೆಲ್ಲ ಕೂಟಿತ್ ಜೋಬ್‌ಕೆಟ್ಟಂಡತ್. "ಇಯಂಗಳ ಚೆನ್ನ ನೋಟಿಯಾ"ಂದ್ ಪೋಣ್ಣ್‌ಕ್ ಎಣ್ಣೆತ್ ಟ್ಯಾಕ್ಸಿ ಕೊಂಡ ಬರನಾಂದ್ ಚೆನ್ನ ದೂರತ್‌ರ ಹೊಳೆನರಸಿಪುರಕ್ ಇರ್‌ಟಲ್ ಓಡ್‌ಚಿ.

ಸುಮಾರ್ ಅರೆ ಮೈಲ್ ಓಡಣೆ, ಎದ್‌ಕೆ ಬರಿಂಜಿ ಓರ್ ಲೋಡ್ ಲಾರಿ ಬಂದಂಡಿಂಜತ್. ಆಪದಾಡ್‌ಂದ್ ರೋಡ್‌ರ ನಡುಲ್ ನಿಂದಿತ್ ದಂಡ್ ಕೈನ ಬೀತಿಯಂಡ್ ನಿಂದಂಡ್ ಕೂತ್ ಕೊಡ್‌ತತ್. ಲಾರಿ ನಿಂದತ್, ಡ್ರೈವರ್ ಅವಂಡ ಶಬ್ದಕೋಶತುಳ್ಳ ಎಲ್ಲಾ ಶಬ್ದ ಕೂಟಿತ್ ಜಬ್ಬಾರ್‌ನ ಬಜ್ಜತ್. ಡ್ರೈವರ್ ಜೋರ್ ಕೇಟಿತ್ ವರಿಯಂಡಿಂಜ ಲಾರಿರ ಯಜಮಾನ ಎಚ್ಚರಾಯಿತ್ ನೋಟ್‌ಚಿ. ರೋಡ್ ನಡುಲ್ ಅಡ್ಡ ಇಟ್ಟಿತ್ ಲಾರಿ ತಡ್‌ತಂವೊ ಬೋರೆ ದಾರೂ ಅಲ್ಲ. ತಾಂಡ ಸ್ವಂತ ಮಚ್ಚಿಣ ಜಬ್ಬಾರ್!

ಬಾವ ಹಮೀದಂಗ್ ರಾಮಪ್ಪಂಡ ಜೀಪ್ ಮರ್‌ಂಜಿತ್ ಆನ ಸಂಗತಿನ ಎಣ್ಣೆಚಿ. ಕೂಡೆನ್ನೆ ಲಾರಿ ಓಡ್‌ಚೆಟ್ಟಂಡ್ ಬಂದಿತ್ ನೋಟಣೆ ರಾಮಪ್ಪ ಪಿಂಞ ಜಯ. ದಂಡಾಳ್‌ಕೂ ಸೋಯ ಬಂದಿತಿಂಜಿಲೆ. ತಡ ಮಾಡ್‌ಚೇಂಗಿ ಕೆಲಸ ಕೆಟ್ಚೆಪೋಕೊಂದ್ ಎಲ್ಲಾರ್‌ನೊ ಲಾರಿಲ್ ಇಟ್ಟಂಡ್ ಹೊಳೆನರಸಿಪುರ ಕೆತ್ತಣೆ ಬಂದಿತ್, ಟ್ಯಾಕ್ಸಿ ಎಡ್‌ತಂಡ್ ಪೋಯಿತ್ ಗಾಯ ಆನಯಿಂಗಳೂ ಜಬ್ಬಾರ್‌ನೂ ಕೂಟಿಯಂಡ್ ಬೆಂಗಳೂರ್‌ಕ್ ಪೋಚಿ.

ಎಮರ್ಜೆನ್ಸಿ ವಾರ್ಡ್‌ಕ್ ಕೂಟ್‌ಚಿ. ಕೂಡೆನ್ನೆ ಚೋರೆ ಕೊಡ್‌ತಾಲೇಂಗಿ ದಂಡಾಳ್‌ನ ಬದ್‌ಕುಲೇಂದ್ ಡಾಕ್ಟರ್ ಎಣ್ಣೆಚಿ. ಏದ್ ಬ್ಲಡ್ ಬ್ಯಾಂಕ್ ತೇಡ್‌ನಕಲೂ ರಾಮಪ್ಪಂಡ ಬ್ಲಡ್ ಗ್ರೂಪ್‌ಕ್ ಸೆರಿಯಾನ ಚೋರೆ ಸ್ಪಾಕ್ ಇಂಜಾಲೆ. ಹಮೀದ ಬೆಂಗಳೂರೆಲ್ಲ ಸುತ್ತನಕಲೂ ಚೋರೆ ಕೆಟ್ಚಲೆ.

ಆಖೀರಿಕ್ ತಾಂಡದೇ ಚೋರೆ ಆಪ ನೋಟೇಂದ್ ಡಾಕ್ಟರ್‌ನ ಒರಾತ ಮಾಡ್‌ಚಿ. ನೋಟಣೆ ರಾಮಪ್ಪಂಡ ಚೋರೆ ಗುಂಪ್‌ಕ್ ಸೆರಿ ಬುದ್ಧತ್. "ಆಚೇಂಗಿ, ರಾಮಪ್ಪಂಗ್ ಮೂಂದ್ ಕುಪ್ಪಿ ಚೋರೆ ಇಲ್ಲತೆ ಪೋಚೇಂಗಿ ಚೋರೆ ಕೊಡ್‌ತಿತೂ ಫಲ ಇಲ್ಲೆ. ನೀಡ

ಒಬ್ಬಂಡ ತಡಿಂಜಿ ಅಚ್ಚಕೆಲ್ಲ ಚೋರೆ ಎಡ್ತಕ ಬಲ್ಯ ಅಪಾಯ ಉಂಡ್"ಂದ್ ಡಾಕ್ಟರ್ ಕೈಬಲ್ಚತ್.

"ಡಾಕ್ಟರ್, ನಾಡ ತಡಿ ಬೊಳಂದಿಯದೇ ಇಯನಗುಂಡ್. ತಬ್ಬಲಿನ ಚಾಕಿತ್ ಪೋತ್ನ ಇಯಂಗಕಲ್ಲತೆ ಇಂಞಿ ದಾಕ್ ನಾನ್ ತ್ಯಾಗ ಮಾಡ್ಡ್? ಎಂತ ತೊಂದರೆ ಬಂದಕಲೂ ಪರೋಲೆ. ಇಕ್ಕಲೆ ನಾಡ ತಡಿಂಜಿ ಬೋಂಡಿಯಚ್ಚಕ್ ಚೋರೆ ಎಡ್ತಿತ್ ನಾಡ ಯಜಮಾನನ ಬದ್ಕಿಚಿಡಿ"ಂದ್ ಎಣ್ಣೆಚಿ. ಇದೆಲ್ಲ ದೇವಡ ನಾಟಕ ಎಣ್ಣುವೆ ಮಾಡರಿ ಜಬ್ಬರ್ ಚೋರೆ ಜಯಂಡಾಂಗ್ ಒತ್ ಬುದ್ಧದೋರ್ ಕಾಕತಾಳೀಯ ಆಚಿ. ಕಷ್ಟ ಕರ್ಚಿ ಒಂದಾನೊ ಕೂಟಾಕತೆ ಹಮೀದ್ ಪಿಂಞ ಜಬ್ಬರ್ ಇಯಂಗಡ ಆರೈಕೆ ಮಾಡಿಯಂಡ್ ಇಂಜತ್.

ಪೊಲಣೆಕೂ ಜೀಪ್ ಬರತಾಪಕ ರಾಮಪ್ಪಂಡ ಮನೆಲ್ ಇಂಜಿ ಬಾಲೆಕಾರಕ್ ನೆಮ್ಮದಿ ಇಲ್ಲತಾಚಿ. ಜೀಪ್ ಬರಡ್, ಬರತೇ ಪೋಡ್, ನಂಗ ಇನ್ನಾಂದ್ ರೂಪ್ಚಿಟ್ಟಿ ಯೋಜನೆ ಪೋಲೆ ಕಾರ್ಬಾರ್ ಮಾಡ್ಲೇಂಗಿ ಇಚ್ಚಕ್ ನಯಿಚಿತ್ ಎನ್ನ ಫಲ. ಆಪದಾಡ್, ಪೊಲಾಕ ನೇರ್ತೆ ಜನ ಎದ್ದಿತ್ ಗುಡ್ಡೆ ಕೂಡುವಾಂಗ್ ಮಿಂಞಲೇ ಮುಬಾರಕ್ ಲಾಡ್ಲನ ಪೊಡಿ ತಟ್ಟಿರನಾಂದ್ ತೀರ್ಮಾನ ಮಾಡಿತ್, ಬಂದ ಪತ್ತ ಪದ್ನಂಜಾಳಾರ ಗುಂಪ್ ಲಾಡ್ಲನ ಪತ್ತೇ ಮಿನಿಟ್ಲ ಪೊಡಿತ್ತಿತ್, ಎದ್ಕೆ ಕ್ಷಾನ್ತನಯಿನ ಬಡ್ಕಿ ತಟ್ಟಿತ್ ಓಡಿ ಒಳಚತ್. ಇದ್ ಇಚ್ಚಕಾಪದು ಇಂಞೋರ್ ಗುಂಪ್ ರಾಮಪ್ಪಂಡ ಮನೆಕ್ ಪೋಯಿತ್ ತಿತ್ ಕೊಡ್ತತ್. ತೋಟಕೂ ತಿತ್ ಕೊಡ್ತಿತ್ ಮರೆಯಾಚಿ. ಸಂಗತಿ ಅರಂಜಿ ಪೋಲೀಸ್ಕಾರಳೂ ಜನಳೂ ಪಾದಿ ಬೆಂಜಿ ತೋಟ ಪಿಂಞ ಮನೆರ ತಿತ್ ಕೆಡ್ತಚಿ.

ಹೊಳೆನರಸೀಪುರತ್ ಪಕ್ಕ ಬುದ್ಧ ಜೀಪ್ಂಜಿ ಪೊಲಾಕ ಏಳ್ ಗಂಟೆಕ್ ಕೆಮಿ ಅಡಂದ್ ಪೋಪನ್ನತ ಒರ್ ಸದ್ ಕೇಟಿತ್ಲೋ. ಅಲ್ಲಿಯೇ ಪಕ್ಕಲ್ ಇರ್ಲಾ ಕೊಟ್ಟಕ್ ಕೂಡತೆ ಕಾಡೊಳಚಿತ್ ಬುದ್ಧಂಡಿಂಜಿ ನಾಲ್ ಅತ್ತ ಚತ್ತಿತ್ ತುಂಡ್ ತುಂಡಾಯಿಪೋಚಿಲೊ. ಜೀಪ್ ತಿತ್ ಕತ್ತಿತ್ ಒಂದೂ ಇಂಜಲೆಲೊ.

ಅಂದ್ ಬೈಟ್ ರಾಮಪ್ಪಂಗ್ ಸೋಯಿ ಬಾತ್. ಕಣ್ಣ್ ತೊರ್ಂದ್ ನೋಟಿಚಿ. ಹಮೀದಂಡ ತೊಡೆರ ಮೀದ ತಾಂಡ ಮಂಡೆ ಇಂಜತ್. ತಕ್ಕ ಪರೆವಕ್ ಕಯಿಂಜಲೇಂಗಿಯೂ ಕಣ್ಣ್ ನೀರ್ ಒಕ್ಕಿತ್ ಹಮೀದ್ ತೊಡೆ ಪುಂಡೆ ಆಯಿತಿಂಜತ್.

"ಇವು ದಂಡಾಳ್‌ರ ಚೋರೆ ಇಲ್ಲತೆ ಪೋಯಿ ತಿಂಜಕ ಇಚ್ಚ ನೇರತ್ ನಿಂಗ ದಂಡಾಳ್‌ರ ಪೋಸ್ತ್ ಮಾಟಂ ಆಯಿತ್ ದಫನ ಆಯಿಪೋಪಕಿಂಜತ್"ಂದ್ ಡಾಕ್ಟರ್ ಎಣ್ಣೆಚಿ. ಇದ್‌ನ ಕೇಟಿತ್ ಜಯ ಜಬ್ಬರ್‌ನ ತಬ್ಬಿಯಂಡ್ ಚೆರಿಯ ಮಕ್ಕಳನ್ನೆಕೆ ಮೊರ್‌ಟತ್.

ಹಮೀದ್ ಊರ್‌ಕ್ ಪೋನ್ ಮಾಡಿತ್ ದಂಡ್ ದಿನ ಕಯಿಂಜಿತ್ ಬಪ್ಪೀಂದ್ ಅರಿಚಿಟ್ಟತ್. ಊರ್‌ಂಜಿ ಉತ್ತರ ಬಾತ್ - "ಇನ್ನಾಂದ್ ಬೈಟ್ ಖಾದರ್ ಜಬೀನಳ ಕೂಟಿಯಂಡ್ ಓಡಿ ಪೋಯಿರ್‌ತ್. ಪೋಲೀಸ್‌ಕಾರ ಸುದ್ದಿ ಅರ್‌ಂಜಿತ್ ತೇಡಿತ್ ಮೈಸೂರ್‌ಂಜಿ ಅರೆಸ್ತ್ ಮಾಡಿಯಂಡ್ ಬಂದಿತ್. ಇಂದ್ ಪೊಲಾಕ ರಾಮಪ್ಪಂಡ ಕಡೆಕಾರ ಬಾಲೆಕಾರ ಲಾಡ್‌ನ ಪೊಡಿ ತಟ್ಟಿತ್. ನಂಗಡ ಬಾಲೆಕಾರಳೂ ರಾಮಪ್ಪಂಗ್ ತಕ್ಕ ಪಾಠ ಪಡ್‌ಪ್‌ಚಿಟ್ಟಿತ್, ಬೆರಿಯ ಬಾರಿ" ಎಣ್ಣೆತ್ ಪೋನ್ ಬೆಚ್ಚಿತ್.

ಏದ್ ಖಾದ್ರಿ, ಎಲ್ಲ್‌ಂಜಿ ಬಂದಿಯೆ, ಎನ್ನಾಂಗ್ ಬಂದಿಯೆ? ಎಲ್ಲಿ ಇಂಜಂವೊ? ಇದೊಂದೂ ಅರಿಯತ ಹಮೀದ್ ಜಬ್ಬರ್‌ಕೆನ್ನೇಂಗಿ ಗೊತ್ತುಂಡಾಂದ್ ಕೇಪದ್ ರಾಮಪ್ಪಂಗ್ ಕೇಟತ್.

"ಎಲ್ಲಾ ಎಣ್ಣೆತಪ್ಪಿ ಹಮೀದ್, ಬೆರಿಯ ಟ್ಯಾಕ್ಸಿ ಮಾಡಿಯ ಬಾ. ನಂಗ ಊರ್‌ಕ್ ಪೋಯಿತ್ ಅಲ್ಲಿ ಎಡ್‌ಮಿಟ್ ಆಕನ. ಎಲ್ಲ ಸತ್ಯ ಸಂಗತಿ ಬಟ್ಟೆಲ್ ಎಣ್ಣಿವಿ" ಎಣ್ಣೆಚಿ. ಕೂಡೆನ್ನೆ ಟ್ಯಾಕ್ಸಿ ಮಾಡಿತ್ ಊರ್‌ಕ್ ಬಂದಿತ್ ಆಸ್ಪತ್ರೆಲ್ ಎಡ್‌ಮಿಟ್ ಆಚಿ. ರಾಮಪ್ಪ ಪಿಂಞ ಹಮೀದ್ ದಂಡಾಳೂ ಆಸ್ಪತ್ರೆಲ್ ಉಳ್ಳ ಸುದ್ದಿ ಪಬ್ಬೆಚಿ. ದಂಡ್ ಕಡೆರ ಜನಳೂ ತಂಗಡ ನಾಯಕಂಗಳ ನೋಟುವಕ್ ಆಸ್ಪತ್ರೆಕ್ ಬಾತ್. ಹಮೀದಂಡ ತೊಡೆಲ್ ಮಂಡೆ ಬೆಚ್ಚಂಡ್ ರಾಮಪ್ಪ ಮೊರಡುವಯಿಂಜತ್. ಜಯ ಕವಂಜಿ ಬುದ್ದಂಡ್ ತಪ್ಪಾನ ಒತ್ತಂಡವನನ್ನೆಕೆ ಕಣ್ಣ್ ತೇಟ್‌ಚಿ.

ಆ ಕಣ್ಣೇರ್ ಮಾರ್ ಕೂಡಿ ಕತ್ತನ ತಿತ್ತನ ಕೆಡ್‌ತುವನ್ನೆಕೆ ಎಲ್ಲಾಡೊ ಮನತಲಿಂಜ ದ್ವೇಷತಾರ ತಿತ್ತನ ಕೆಡ್‌ತುವಯಿಂಜತ್.

1935ನೇ ಇಸವಿ, ರಾಜು ಒನ್ನಾಂದ್ ಮದನಪಳ್ಳಿಲ್ ಒರ್ ಕ್ರಿಕೆಟ್ ಕಳಿ ನೋಟಿಯಂಡಿಂಜತ್. ಅವಂಡ ಬರಿಲೆ ಒರ್ ಆಣಾಳು ಪೊಣ್ಣಾಳು ಒಕ್ಕಚೆ ನಿಂದಿತಿಂಜತ್. ಪೊಣ್ಣಾಳಾರ ಪೊರಪಾಡ್ ನೋಟಿತ್ ರಾಜುಕ್ ಇದ್ ಏದ್ ದೇಶಕಾರಾಂದ್ ಅರಿಯಂಡೂಂದ್ ಆಚಿ. ಬಯ್ಯಕ್ ನೆರಿ, ನೆತ್ತಿಕ್ ಕುರಿ, ಕೈದುಂಬ ಜಾಕೀಟ್, ಎತ್ತರೊ ಬಣ್ಣ ಕು ಒತ್ತ ಪೊಣ್ಣ್. ಎಡೆ ವಯಸ್, ದುಂಬಾನ ಮೂಡ್, ಬೋಳೆಲ್ ಕರಾತಮಣಿ, ನಲ್ಲೋರ್ ಚಾಯಿಕರ್ತಿಯು. ಒಡೆಯನೂ ನಲ್ಲ ಬಿಲ್ ನೀಟ ಆಳ್.

ರಾಜು ಅಕ್ಕ ಇಂಟರ್ ಮೀಡಿಯೇಟ್ ಓದುವಯಿಂಜತ್. ಈ ಪೊರಪಾಡ್ ಇಂದಾಕಣೆ ಕಂಡಿತೂ ಇಲ್ಲೆ, ಕೇಟಿತೂ ಇಲ್ಲೆ. ಇಕ್ಕ ದಾರ್ನ ಕೇಟರಿವ್? ಚೆನ್ನ ನೇರ ಜೋಡಿನ ನೋಟಿಯಂಡಿಂಜತ್. ನೋಟನಚ್ಚಕೂ ಬುಡ್ಗಡೆ ಆಯಿಲೆ. ಅವು ಪೂರ್ಟ್ ಪೋನ ಪಿಂಞ ಅಯಿಂಡ ಬಯ್ಯೆನ್ನೆ ಪೋಚಿ. ಅವು ಒರ್ ಪೂ ತೋಟಿತ್ ಅಳ್ತತ್.

ಎನ್ನೇಂಗಿ ಆಡ್, ಧೈರ್ಯ ಮಾಡಿತ್ ಕೇಪೀಂದ್ ಇಂಗ್ಲಿಷ್ ಕೇಟಿತ್. ನಿಂಗ ಎಲ್ಲಿ ಉಳ್ಳ? ನಿಂಗ ಏದ್ ದೇಶಕಾರ? ಒಂದಾಂಡ ಬಯ್ಯ ಒಂದ್ ಪ್ರಶ್ನೆ. ಆ ಪ್ರಶ್ನೆಕ್ ಚಾಯೋಡೆ ಉತ್ತರೊ ಕೊಡ್ತತ್ - ಒಡಿಯನೂ ಪೊಣ್ಣೂ.

ಆ ಕಾಲತ್ ಪೊಣ್ಣಾಳೆಲ್ಲ ಅಚ್ಚಕ್ ಚಾಯಿಲ್ ಇಂಗ್ಲಿಷ್ ಪರೆವದ್ ಪೋಡ್, ಆಣಾಳಾರ ಕೂಡ ಪೊರಮೆ ತಿರುಗುವದೂ ಕಾಂಬಯಿಂಜಿಲೆ. ದೊರೆಯ, ದೊರಸಾನಿಯ ಇಂತವು ಮಾತ್ರ ಬಯಿಟ್ ಪೂ ತೋಟಿಕ್ ಬಪ್ಪಯಿಂಜತ್.

"ನಂಗ ಕೊಡಗ್ಕಾರ, ಕೊಡವ, ಇಲ್ಲಿ ಚಾಕರಿಲ್ ಉಳ್ಳವು. ಕೊಡಗ್ ಹಿಂದೂದೇಶತ್ಲೆ ಉಳ್ಳ ಒರ್ ರಾಜ್ಯ" ಎಂದೆಣ್ಣ್ ಚಿ.

ಈ ಬಾಲೆಕಾರಂಡ ನಲ್ಲರಿಕೆ, ಗುಣತಾರ ತಕ್ಕ, ಆಸಕ್ತಿನ ನೋಟಿತ್ ಅವಂಡ ಎಲ್ಲಾ ಪ್ರಶ್ನೆಕೂ ಉತ್ತರ ಎಣ್ಣೆತ್ ತೃಪ್ತಿ ಪಡ್ತಚಿ. ಆ ಕೊಡವ ದಂಪತಿಯಡ ಪೆದ ಆಡ್, ಚಾಕರಿಂಜ ಜಾಗ ಆಡ್ ಇಂದ್ ರಾಜುಕ್ ಗೇನ ಇಲ್ಲೆ, ಮರಂದಿತ್.

ಕಾಲ ಎಚ್ಚಕೊ ಕಯಿಂಜತ್. ರಾಜು ಬಲ್ಯವನಾಯಿತ್ ರೈಲ್ವೇಸ್‌ಲ್ ಚಾಕರಿಕ್ ಕೂಡ್‌ಚಿ. ಅಪ್ಪ ಮಕ್ಕ ಬಂದಿತ್ ಹೈದರಬಾದ್‌ಲ್ ಕೂಡ್‌ಚಿ. ಅಪ್ಪಂಗ್ ಪಿಂಚಿನಾಪಾಂಗ್ ಓರಾಂಡೆಕ್ ಮಿಂಞಾಂಜಿ ಮೋಂವಂಗ್ ಪೊಣ್ಣ್ ತೇಡ್‌ವಕ್ ಸುರು ಮಾಡ್‌ಚಿ. ಮೋಂವಂಡ ಗುಣ ಪವುನ್‌ನಂತದ್. ಒರ್ ಕೆಟ್ಟ ಅಭ್ಯಾಸ ಇಲ್ಲೆ. ಅಪ್ಪ ಅಪ್ಪನ ದೇವಾಂದ್ ಪೂಜೆ ಮಾಡುವ. ಬಲ್ಯ ಬಲ್ಯವು ಪೊಣ್ಣ್ ಕೊಡ್‌ಪಕ್ ಬಾತೇಂಗಿಯೂ ಒತ್ತವಲೆ. ಒರೇ ತಕ್ಕ್ "ನಾನ್ ಕೊಡಗ್‌ರ ಒರ್ ಕೊಡವತಿನ ಮಂಗಲ ಕಯಿಕಂಡು, ನಾನ್ ಕೊಡವಡ ಆಚಾರ, ವಿಚಾರ, ನಡಪುನೆಲ್ಲ ಪಡ್‌ಚಿತ್, ಆ ಕೊಡವತಿ ಪೊಡೆಯ ಉಡ್‌ತ ಪೊಣ್ಣ್‌ರ ಕೂಡ ಬಾವಂಡು" ಎಣ್ಣ್‌ವದ್ ಅವಂಡ ಪುಡಿಚಿ ಪುಡಿರ ತಕ್ಕಾಯಿ ತಿಂಜತ್.

"ನೀನ್ ಜಾತಿ ಬುಟ್ಟ್ ಪೋಚೇಂಗಿ ನೀಡ ಅಕ್ಕ ತಂಗೆಯಡ ಗತಿ ಎನ್ನಾ? ನಂಗಡ ಯಾದವ ಜಾತಿಕಾರ ಬಕ್ಕುವಾ? ಅದೆಲ್ಲ ಆಪಕುಳ್ಳದಾ ಪೋಪಕುಳ್ಳದಾಂದ್" ಅಪ್ಪ ಎಚ್ಚಕೊ ಎಣ್ಣ್‌ಚಿ.

ನಾಡ ಅಕ್ಕತಂಗೆಯಡ ಮಂಗಲ ಕಯ್ಯಣೆ ನಾನ್ ಮಂಗಲ ಕಯ್ಯಲೆ. ಅಕ್ಕಣೆಕ್ ಕೊಡಗ್‌ರ ಚರಿತ್ರೆ, ಕೊಡವಡ ನಡಪುನೆಲ್ಲ ಅಭ್ಯಾಸ ಮಾಡಿಯಂಡಿಪ್ಪಿ. ಕೊಡವತಿನ ಕಯಿಚಿ ಬಾವಕಯ್ಯತೆ ಪೋಚೇಂಗಿ ನಾಕ್ ಮಂಗಲ ಬೋಂಡೇ ಬೋಂಡ" ಎಂದೆಣ್ಣೆತ್ ಹಠ ಪುಡ್‌ಚತ್.

ಅಕ್ಕಣೆಕ್ ಹೈದರಬಾದ್‌ಲ್ ಚೆನ್ನ ಮಿಲಿಟರಿಕಾರಡ ಕೊಡವತಿ ಪೊಣ್ಣಾಳ್‌ನೊ ಕಂಡಿತಿಂಜತ್. ಹೈದರಬಾದ್ ಬೆಂಗಳೂರ್‌ಲೆಲ್ಲಾ ಸುತ್ತಿತ್ ಕೊಡಗ್‌ಕ್ ಸಂಬಂಧಪಟ್ಟಿ ಪುಸ್ತಕ ಎಲ್ಲಾ ಎಡ್‌ತಂಡ್ ನೋಟ್‌ಚಿ. ಪಟ್ಟೋಲೆ ಪಳಮೆ ಪುಸ್ತಕತ್‌ನೊ ಎಡ್‌ತಂಡತ್. ತೆಲುಗು ಪಿಂಞ ಕನ್ನಡ ಲಿಪಿ ಚೆನ್ನ ಒರೆ ತರ. ಓದಲು, ಆಚೇಂಗಿ ಅರ್ಥ ಆಪ್‌ಲೆ. ಅವನೊ ಇವನೊ ಕೇಟಿತ್ ಚೆನ್ನ ಚೆನ್ನ ಪಡಿಚತ್.

1955ನೇ ಇಸವಿಕೆತ್‌ವಕ ಅಕ್ಕ ತಂಗೆಯಡೆಲ್ಲ ಮಂಗಲ ಕಯಿಂಜತ್. ತಮ್ಮಣಂಗ್ ನಲ್ಲ ಚಾಕರಿಯೂ ಕೊಟ್ಟೆಚಿ. ಎನ್ನಾಚೇಂಗಿಯೂ ರಾಜು ತಾಂಡ ಹಠ ಮಾತ್ರ ಬುಟ್ಟಲೆ. ಅಕ್ಕಣೆಕ್ ಮಾಡ್‌ನ ಪ್ರಯತ್ನ ಒಂದೂ ಕೈಗೂಡತೆ ಇಂಜಾನಗುಂಡ್, ಕೊಡವತಿ ಮೂಡಿ ಬೋಂಡೂಂದ್ ಪೇಪರ್‌ಲ್ ಜಾಹೀರಾತ್ ಪೊರಡಿಚಿಟ್ಟಿತ್. ಆಂಗ್ ಕೊಟ್ಟನ ಉತ್ತರ. "ನೀನ್ ಕೊಡವತಿನ ಮಂಗಲ ಕಯಿಪಿಯ? ನೀಕ್ ಬದಕಂಡೂಂದ್ ಆಸೆ ಉಂಡಾ? ಮಡಿಕೇರಿ ಬಸ್‌ಸ್ಟೇಂಡಕ್ ಬಾ. ನೀಡ ಎದೆಕ್ ಬೋಡಿ ಆಪ, ಎಚ್ಚರ!"



ಇಂಥ ಚೆನ್ನ ಕಾಗದ ಮೂಡಿಯಲೇ ಒತ್ತಿತ್ ಎಳೆದೊನ್ನಕೆ ದಾರ್ ದಾರೋ ಕಣ್ಣಿಂಗ ಎಳೆದೊಚಿ. ಇನ್ನನೆ ರಾಜುನ ಬೊತ್ತಚಿಟ್ಟಿತ್ ಎಳೆದೊನಾಂಗ್ ಕೈಕಣಕೊಂದು ಇಲ್ಲೆ. ಇಚ್ಚಕಾಕಣೆ ಪೇಪರರ ಸಂಪಾದಕಂಗಕ್ಕೂ ವಿಳಾಸ ಇಲ್ಲತ ಬೊತ್ತಚಿರುವ ಕಾಗದ ಪೋಪಕಾಚಿ.

ಏದ್ ಬೊತ್ತಚಿರಲೂ ಬೊರೊಂಡ್ಚಿರಲೂ ರಾಜುರ ಮನಸೊನ ತಿರೊಕುವಕ್ ಕಯಿಂಜಿಲೆ. ಚತ್ತಕ ಕೊಡವನಾಯಿತ್ ಚಾವಿ, ಅಲ್ಲೇಂಗಿ ಕೊಡವನಾಪ ಪ್ರಯತ್ನತ್ ಚಾವಿ, ಅನ್ನನಾಚೇಂಗಿ ಇಂಥೋರ ಜನ್ಮತ್ ಕೊಡವನಾಯಿತ್ ಪುಟ್ಟಲೂಂದ್ ತಾಂಗಿ ನಿಂದತ್. ವಯಸೂ ನಾಪತ್ತೇಳ್ ಎತ್ತಚಿ. ಕೊಡವ ತಕ್ಕ ಗೊತ್ತಿಲ್ಲೇಂಗಿಯೂ ಎಲ್ಲಾ ಮುಖ್ಯ ಶಬ್ದತರ ಅರ್ಥತನ ಎಳೆದಿಚಿಟ್ಟಿಂಡ್ ಪಡ್ಚತ್. ಪೊಣ್ಣ್ ಮಾತ್ರ ಕೊಟ್ಟಲೆ!

ಅಪ್ಪಚ್ಚು ಮಾಸ್ಪರಕ್ 'ಮೆಟ್ರಿಮೋನಿಯಲ್ ಸಂಸ್ಥೆ' ಕೈಲ್ಲಾ ಕಾಗದ ಎಳೆದೊವ ಒರ್ ಅಭ್ಯಾಸ. ತಮಾಸಿಕೊ ಕಾರ್ಯಕೊ ಗೊತ್ತಿಲೆ. ಪಾಂಡಿಚೇರಿರ ಇನ್ನತ ಒರ್ ತಂದ್ ನಡತ್ವ ಸಂಸ್ಥೆಕ್ ಕಾಗದ ಎಳೆದಿತ್ ಮೆಂಬರಾಚಿ. ಆನ ಅಲ್ಲಿಕೆ ಬುಟ್ಟಿತ್.

ಅತ್ತಟಿ - ಎಲ್ಲಿಯೂ ಆಗತೆ ಪಾಂಡಿಚೇರಿ ತಂದ್ ಸಂಸ್ಥೆಕ್ ರಾಜು ಒರ್ ಮೆಂಬರಾಯಿತ್ ಒರ್ ಕೊಡವತಿನ ಏರ್ಪಾಡ್ ಮಾಡಂಡೂಂದ್ ಎಳೆದೊಚಿ. ಆ ಸಂಸ್ಥೆಲ್ ಅನ್ನತ ಒರೂ ಮೆಂಬರ ಇಲ್ಲತೆ ಅಪ್ಪಚ್ಚು ಮಾಸ್ಪರರ ಅಡ್ರೆಸ್ ರಾಜುಕ್ ಅಯಿಚತ್. ರಾಜು ಅಪ್ಪಚ್ಚುಕ್ ಕಾಗದ ಎಳೆದೊಚಿ. ಅಪ್ಪರಿಪ್ಪರ ಕಾಗದ ಎಳೆದಿಯಂಡ್ ದಂಡಾಳ್ ಬಾರಿ ಸಿನೇತಂಗಳಾಚಿ. ರಾಜು ಕೊಡಗ್ಕೂ ಬಾತ್. ಅಪ್ಪಚ್ಚುರ ಕೂಡ ತಲಕಾವೇರಿ, ನಾಲಂಜಿ ಕೊಡವಡ ಮನೆ, ಪುತ್ತರಿನಮ್ಮ ಎಲ್ಲ ನೋಟಿತ್ ಕೊಡವ ತಕ್ಕರ ಅಗತ್ಯ ಬೋಂಡಿಯ ವಾಕ್ಯತನೆಲ್ಲ ಟೇಪ್ ರೆಕಾರ್ಡ್ ಮಾಡಿಯಂಡ್ ಪೋಚಿ. ಏದ್ ಪ್ರಯತ್ನತಲೂ ಮೂಡಿ ಆಯಿಲೆ!

ಅಪ್ಪಚ್ಚುಕೂ ಕೊಡವಳ ಬಾಯಿ ಬುಟ್ಟ್ ಕೇಪಕ್ ಕಷ್ಟ. 69ನೇ ಇಸವಿಲ್ ಅಪ್ಪಚ್ಚುರ ಮಂಗಲಕೂ ರಾಜು ಬಾತ್. ಅಲ್ಲಿಂಜಿ ಪೋಪಕ ಮೈಸೂರ್ಲ್ ದಂಡ್ ಕೊಡಗ್ಕಾರಳ ಎನ್ನನೆ ರಾಜುಕ್ ಪರಿಚಯ ಆಚೊ ಗೊತ್ತಿಲೆ.

ಅಪ್ಪಚ್ಚುಕ್ ರಾಜುರ ಕಾಗದ ಬಾತ್ "ನಾನ್ 28ಕಾಲತಿಂಜಿ ಮಾಡ್ನ ಪ್ರಯತ್ನ ಇಂದ್ ಕೈಗೊಡ್ಚಿ. ನಾಕ್ ಕೊಡಗ್ಂಜಿ ಮೂಡಿ ಆಚಿ. ಮೂಡಿನ ನೋಟಿಯೆ, ಎತ್ತರ ಕಮ್ಮಿ, ಆಚೇಂಗಿಯೂ ಬೊಳ್ತಿತೆ, ಚೆರಿಯ ವಯಸಾರ ಮೂಡಿ. ಎಳೆತ್ ಚೆನ್ನ

ಪಡ್‌ಚಿತ್‌ಲೊ" ಇಂತ ಊರ್ ಅಪ್ಪಂಡ ಪೆದ ಎಲ್ಲಾ ಎಳ್‌ದಿತ್ ಅಯಿಚತ್!

ಸೆರಿ. ಬೊಳ್‌ಪ್‌ಕುಪ್ಪಿಯ ಪೊಲ್‌ಚಿರುವಕ್ ಅಪ್ಪಚ್ಚುಕ್ ಪಣೊ ಅಯಿಚತ್. ಪತ್ತೇ ಆಳ್ ಕೂಟ್‌ಚೇಂಗಿಯೂ ಕೊಡವ ನಡುಪ್‌ಲೇ ಮಂಗಲ ಆಂಡೂಂದ್ ರಾಜುರ ಆಸೆ. ಮೂಡಿರ ಅಪ್ಪ ದುಂಬ ಗರೀಬನಾನಾಂಗ್ ಖರ್ಚಿಕ್‌ಳ್ಳ ಪಣೊ ಅಯಿಚಿ ಕೊಡ್‌ತತ್. ಮೈಸೂರ್‌ಲ್ ತಂದ್‌ಕಾರಂಡಲ್ಲಿ ಮಂಗಲಾಯಿತ್ ಕಾವೇರಿಕ್ ಪೋಯಿತ್ ಮೂಡಿರಲ್ಲಿಕ್ ಬಪ್ಪಾಂದ್ ತೀರ್ಮಾನ ಆಚಿ.

ಕಾಗದ ಓದಿತ್ ಅಪ್ಪಚ್ಚುಕ್ ಪೆರ್ತ್ ಕುಸಿ ಆಚಿ. ಅವನೂ 8 ಕಾಲತಿಂಜಿ ಆಪಚ್ಚಕೂ ಪೇಚಾಡಿತ್. ದಂಡ್ ಮೂಂದ್ ಕುರಿ ಕಾಗದ ಓದಿತ್ ನೋಟಣೆ, ಅದ್ ಕೊಡವಡ ಮನೆಪೆದ ಆಯಿತ್ ಕಂಡ್‌ಲೆ. ಕೊಡವಡ ಆಚಾರತ್‌ಲೆ ಉಳ್ಳ ಒರ್ ಉಪಚಾತಿರ ಮನೆಪೆದ. ಇದ್‌ನ ರಾಜುಕ್ ಎಳ್‌ದ್‌ವದ ಬುಡ್‌ವದಾಂದ್ ಗೊತ್ತಾಯಿಲೆ. ಎನ್ನೇಂಗಿ ಆಡ್, ಅವಂಗ್ ಬೋಂಡಿಯೆ ಕೊಡವ ತಕ್ಕ್ ಪರಂದಂಡ್ ಕೊಡವತಿ ಪೊಡೆಯ ಉಡ್‌ತಂಡ್, ಕೊಡವಡ ಆಚಾರ ನಡುಪ್‌ನ ನಡತಿಯಂಡ್ ಪೋಪಂತ ಮೂಡಿ. ಒಳಜಾತಿ ಆಚೇಂಗೆನ್ನ!

ರಾಜುರ ಮಂಗಲ ಕಯಿಂಜತ್. ಅಪ್ಪನೂ ಅಪ್ಪನೂ ಮೂಡಿಯೂ ಒತ್ತಲೇಂಗಿಯೂ ಕೊಡವ ಪದ್ಧತಿಕ್ ಧಕ್ಕೆ ಬರತನಕೆ ಎಲ್ಲಾ ಕ್ರಮತ್‌ನೋ ಅವನೇ ಮಾಡ್‌ಚಿ. ಮಾವಂಡಲ್ಲಿ ಕಾರಣಂಗ್‌ಟ್ಟಿತ್ ಕಾವೇರಿಕ್ ಪೋಯಿತ್ ಪೊಣ್ಣ್‌ನ ಕೂಟಿಯಂಡ್ ಪೊರಟತ್.

ಮೈಸೂರ್‌ಲ್ ರೈಲ್ ಪತ್ತುವಕ ಮೂಡಿ ಕನ್ನಡ ಪೊಡಿಯ ಉಡ್‌ತತ್. ಅಕ್ಕಲೆ ರಾಜುರ ಮನಸ್ ಚತ್ತತ್. ಇದಂಗಾಯಿತ್ 28 ಕಾಲತಿಂಜಿ ಎಚ್ಚಕೊ ಆಯಿರ ಉರ್‌ಪಿಯ ಖರ್ಚಿ ಮಾಡಿತ್ ಕಂಡ್ ಕೇಕತ ಊರ್‌ಂಜಿ ಮಂಗಲ ಆಂಡಿಂಜತ ನಾಡ ಒರೇ ಒರ್ ಆಸೆ-ನೀನ್ ಕೊಡವತಿ ಆಯಿತೇ ಇಂಜಿತ್ ನನ್ನೊ ಕೊಡವನಾಯಿತ್ ಮಾಡಂಡೂಂದ್. ತಾಂಗ್ ಗೊತ್ತುಳಚ್ಚಕ್ ಕನ್ನಡತ್‌ಲ್ ಎಳ್‌ದ್‌ನ ಒರ್ ಚೀಟಿ ಕೊಡ್‌ತತ್. ಕಾವೇರಿ (ಬೋರೆ ಇಂಜ ಪೆದತ್‌ನ ಕಾವೇರಿಂದ್ ರಾಜುವೇ ಬದಲಾಯಿಚಿಟ್ಟಿದ್) ನಾಕ್ ಓದುವಕ್ ಗೊತ್ತಿಲ್ಲೆಂದ್ ಎಣ್ಣೆ ಚಿ. ಅವ ಸ್ಕೂಲಾರ ಮೊಟ್ಪಪತ್‌ನವಳೂ ಅಲ್ಲ.

ಊರ್‌ಕೆತ್ತ್‌ನ ಪಿಂಞ ಸರಿಯಾಕೂಂದ್ ರಾಜುರ ಗೇನ. ಚೆನ್ನ ದಿನತ್‌ಲ್ ಕೊಡವತಿ ಅಲ್ಲಾಂದೆಣ್ಣುವದ್ ಅವಂಗ್ ಗೊತ್ತಾಚಿ. ಅದ್‌ನ ಬಲ್ಯದಾಯಿತ್

ಎಡ್ತಂಡಾಲೆ. ಪುದ್ಕಕ್ ಒರ್ ಚೆನ್ನದಿನ ಕೊಡವ ಪೊಡಿಯ ಉಡ್ತತ್. ರಾಜುರ ಪಣತಾರ ಬಲತ್ಲ ಪುದಿಯ ಶೋಕಿಯೂ ಪಡ್ಚತ್. ದಂಡ್ ಮಕ್ಕಳೂ ಆಚಿ.

ಅಪ್ಪಚ್ಚುಕ್ ಮೊನಿಯಾಂದ್ ಬಂದ ಕಾಗದ ಇನ್ನನಿಂಜತ್. ನಾಡ ಪೊಣ್ಣ್ ಕೈಲ್ಪೊಳ್ಳಲಾಂಚೆಂಗಿಯೂ ಕೊಡವ ಪೊಡಿಯ ಉಡ್ತಿತ್ ನಾಡ ಜೀವನತಾರ ಆಸೆನ ತೀಕಡ್ಂದ್ ಪುದಿಯ ಪೊಡಿಯೊ ಜಾಕೀಟು ಎಡ್ತ ಬಂದಿತ್ ಕೊಡ್ತಿತ್ ಕೈ ತೊತ್ತಿತ್ ಎಣ್ಣಾನ. ಆಚೆಂಗಿಯೂ ನಾಡ ಇಡೀ ಜೀವನತಾರ ಆಸೆ ಎತ್ತತಾಚಿ. ನಾಕ್ ಇಣಾಪಾಂದ್ ಎಣ್ಣಿತ್ ನನ್ನ ಕೇಕತೆ ಸಿನಿಮಾಕ್ ಪೋಚಿ. ಎಂದಿತೂ ರಾಜುರ ಆಶೆ ಎತ್ತಲೆ!

- \* - \* - \* -

(ಓರಾಂಡೆಕೊಮ್ಮ ಕೊಡಗ್ ಬಂದಿತ್ ಕಾವೇರಿ ಕುಳ್ಚಿತ್ ಇಕ್ಕಲೂ ಪೋಯಂಡುಂಡ್)

## ಚೂರ್ತನವು ಚಿಕ್ಕತರ!

ಸೂಚನೆ : 1969ನೇ ಇಸವಿಲ್ ಕೊಡಗಲ್ ನಡಂದ ಕತೆ. ಪೆದಮಾತ್ರ ಬೋರೆ

ಎನ್ನೊ ಅಪ್ಪಂಡ ಗರೀಬತನಕಾಯಿತ್ ಅವ್ವಿನ ತೋಟಕಾರ ಮುತ್ತಪ್ಪಂಡಲ್ಲಿ ಅಡಿಗೇಕ್ ಆಕಚಿ. ಮೂಂದ್ ಕಾಲತ್‌ಲ್ ಮೇಲ್ ತೆಳ್‌ಂಗಿತಾಪಕ ಅಪ್ಪಿ ನಲ್ಲ ಪುಡಬನೆ ಒಮ್ಮ ಕಂಡಂವ ತಿರಿ ತಿರಿ ನೋಟುವಚ್ಚಕ್ ಬಾಯಿ ಕೂಡ್‌ಚಿ. ಗಪ್ಪು ಕ್ಕಣ್ಣಿಂಗ್ ಇವಳ ಎನ್ನನೆ ಪರಿಚಯ ಆಚೋ, ಎಲ್ಲಿ ಕಂಡಿತ್, ತಕ್ಕಬಾಕ್ ಪರಂದತೊ ಎನ್ನೆಲ್ಲಾ ನಡಂದತೊ, ಇದೆಲ್ಲ ಮುತ್ತಪ್ಪಂಗಾಡ್, ಅಪ್ಪಿರ ಅಪ್ಪ ಕುಟ್ಟಪ್ಪಂಗಾಡ್ ಒಂದೂ ಗೊತ್ತಿಲ್ಲೆ.

ಜನಡ ಬಾಯಿ ಮುಂಡತಿಪ್ಪ? "ಎನ್ನೊ ಕುಟ್ಟಪ್ಪ, ಮೋವಡ ಮಂಗಲ ಕಯಿಪಾಲಿಯಾ"ಂದ್ ಸುರು ಮಾಡ್‌ಚಿ.

ತಂದ್ ಬಾತೇಂಗಿ ಕಯಿಕಂಡು, ಎಳಿಯವ ಪೂವಿಯೂ ನೇಂದತ್. ಪೆರಿಯವಳ ನಾಲ್‌ಕುರು ಅಕ್ಕಿ ಇಟ್ಟಿತ್ ಉಳ್‌ಪಂಡು, ಪಣ ಆಂಡುಲ", ಎಣ್ಣೆಚಿ ಕುಟ್ಟಪ್ಪ.

ಪೂವಣ್ಣ ಕುಟ್ಟಪ್ಪಿಂಗ್ ಬೆಂದು ಸಾಲ್ ಅಲ್ಲೇಂಗಿಯೂ ಬೋಂಡಿಯಾನವನೆ. "ಕುಟ್ಟಪ್ಪ; ಒರ್‌ಕ್‌ಣ್ಣ ಉಂಡ್, ರಿಸರ್ವ್ ಪೊಲೀಸ್‌ಲ್, ಚೆನ್ನ ಗರೀಬ, ಬಾವ ಬದುಕುವಕ್ ತೊಂದರೆ ಇಲ್ಲೆ, ತಬ್ಬಲಿ ಕ್ಕಣ್ಣ, ಪೋಲಿಪೊರ್‌ಕಿಯಡ ಕೂಡ ಕೂಡ್‌ನವನಲ್ಲ. ಚಾಕರಿ ಕ್ಕಟ್ಟಿತ್ ಮೂಂದ್ ಕಾಲತ್ ಆರ್‌ನೂರ್-ಎಳ್‌ನೂರ್ ಉರ್‌ಪಿಯ ಮಂಗಲಕ್ ಬೆಚ್ಚಿತ್. ಚೆನ್ನ ಕೈ ಮರಿಕಂಡಿಯ ಬಕ್ಕು".

"ನೀಕ್ ಒಪ್ಪೇಂಗಿ ಕೊಡ್‌ಪದೆ ಪೂವಣ್ಣ. ಬಂದ ತಂದ್ ಬುಡುವದಾ?"

ತಕ್ಕಬಾಕೂ ಆಚಿ, ಮುತ್ತಪ್ಪಿಂಗ್ ಸಂಗತಿ ಎತ್ತ್‌ಚಿ, ಪಣಕೆನ್ನ ಮಾಡುವ? ಮುತ್ತಪ್ಪಣ್ಣನೇ ಕೇಟತ್. ಮುತ್ತಪ್ಪಣ್ಣಂಡ ಪಕ್ಕ ಕಾರ್ಯ ಬುಟ್ಟ್ ಕಳಿ ಇಲ್ಲೆ.

"ಕುಟ್ಟಪ್ಪ, ಪಣ ಎನ್ನೋ ತರಲು, ನೀಡ ಮೋವಡ ನಲ್ಲ ಕಾರ್ಯಕ್ ತಪ್ಪಾಲೇಂದ್ ಎಣ್ಣುವದೂ ಧರ್ಮ ಅಲ್ಲ. ಆಚೇಂಗಿ ಈ ಅಂಞೂರ್ ತೇರಣೆ ನೀಡ

ಎಳಿಯವಳ ನಾಡಲ್ಲಿ ಆಕಂಡು" ಎಂದೆಣ್ಣೆತ್ ಧರ್ಮತ್‌ನೊ ಕಾರ್ಯತ್‌ನೋ ಕೂಟಿ ಪರಂದತ್. ಅಂತೂ, ಎನ್ನನೆಲ್ಲೋ ಮಂಗಲಕ್ಕುಳ್ಳದೆಲ್ಲ ಸುಧಾರಣೆ ಆಚಿ.

ಮಂಗಲಕಾರ ಮಣಿ, ಕೆ.ಎಸ್.ಆರ್.ಪಿ. ಲುಳ್ಳ ಎಲ್ಲಾ ಕೊಡವ ಬಾಲೆಕಾರಡ ಕೈಯಿಂಜಿ ಐಂಬದೂ ನೂರು ಕೈಮರಾಚಿತ್, ಪತ್ತಾಲ್ ಅಂಜಾಳ್ ಒಪ್ಪುವನ್ನೆ ಕೆ ಮಂಗಲಕಯಿಚತ್, ಕ್ಕಣ್ಣ ಮೂಡಿರಲ್ಲಿಕ್ ಮಂಗಲಾಡಿಬಾತ್.

ಮೂಡಿರ ಮನೆಲ್ ಎಲ್ಲಾ ಓಟ್‌ಗಳಿ ಗಪ್ಪುರದೆ. ಮೂಡಿರ ಕೋಂಬರೆರೊಳ್‌ಲ್ ಎಲ್ಲಾ ಕಾರ್ಬಾರೂ ಗಪ್ಪುರದೆ. ಊರ್‌ಕೂಡುವಂದ್ ಪೊಲಾಕತ್‌ಂಜಿ ಅವನೇ ಕೊರುವಕಾರ. ದಾರೋ ಪಕ್ಕತ ಬೆಂದು ಆಯಿತ್ತಿಕ್ಕೊಂದ್ ಎಲ್ಲಾಡೋ ಗೇನ. ಎನ್ನನೆ ಕೇಟ್‌ರುವೊ, ದಾರೂ ಕೇಟ್‌ಲೆ, ಪೆರಿಯಯಿಂಗಳ ಮಾಂವ, ಅಜ್ಜ, ಕುಳ್ಳಾವ್ವ, ಬಾವಂದೆಲ್ಲ ಸಾಲ್ ಬೆಚ್ಚಿ ಕಾಕುವಾಲೊಂದೂ ಗಪ್ಪುರ ಬಾಯಿಕ್ ಬಡಸ್ಸಾನ ಇಲ್ಲೆ.

ದಂಪತಿ ಮುಹೂರ್ತ ಕಯಿಂಜತ್, ಮೂಡಿನ ಉಳ್‌ಪಾಚಿ. ಮೂಡಿರ ಕೂಡ ಪೋಪಕ್ ದಂಡ್ ಮೂಂದಾಳ್ ಬೋಂಡುಲ್ಲ. ನೀನ್ ಪೋ, ನೀನ್ ಪೊರಡ್‌ಂದ್ ಎಣ್ಣೆ ಕಳಿಕಣೆ ಗಪ್ಪು ಬಸ್ ಪತ್ತಿತ್ ತಾಂಗಿ ಅಳತಿತ್ತೂ ಆಚಿ, ಕೊರವಕಾರನಾಯಿತ್ ತಂದ್‌ಕಾರ ಪೂವಣ್ಣನೇ ಪೊರಟತ್, ಮೂಡಿರ ಮಾವಿಯೂ ಪೊರಟತ್.

ಬಸ್ಸೆಲೂ, ಪಾಲ್‌ಕಂಡ ಪೂಣ್‌ನನ್ನೆ ಅವ್ವಿರ ಬರಿಬುಟ್ಟಿತ್ ಅನುಂಗುಲೆ ಗಪ್ಪು! ಮಂಗಲಕಾರ ಮಣಿ ಬಲ್ಲೋರ್ ಪಡಿಪುಳ್ಳ ಕ್ಕಣ್ಣನಲ್ಲ.

ಕೂಡ ಬಂದ ತೇಂಜ ಬಾಲೆಕಾರ ಮುಂಡತಿಪ್ಪಾ? ಪೂವಣ್ಣನೇ ಕೇಟತ್ "ಬೆಂದ್‌ಕಳೆ, ಆ ಗಪ್ಪು ಮೂಡಿಕೆನ್ನಾಂಡಿಯೆ?"

"ಅಮ್ಮ, ನಾಕ್ ನಲ್ಲೋಣೆ ಗೊತ್ತಿಲ್ಲೆ, ಇನ್ನಾಂದ್‌ಂಜಿ ಓಡಿ ಕಳಿಯೆಲ್ಲ ಅವಂಡದೆ"ಂದೆಣ್ಣೆಚಿ ಪೂವಣ್ಣ.

ಗಪ್ಪು ಮಣಿರ ಕೂಡೋ ಎಡೆಮೇಂಗಿ ಕಳಿಪಕ್ಕಾಚಿ. ಕ್ಕಣ್ಣಂಡಲ್ಲಿಕೆತ್ತಿತ್ ನೀರ್‌ಚಾಣ ಕಯಿಪಕ, ತಡ್‌ತ್ ಆಡುವದುಂಡಲ್ಲಾ? ಅಕ್ಕ ಮಣಿನ ಕಾಕಿತ್ ಗಪ್ಪು ಭಾರೀ ಅನುಭವಸ್ಥನೆನ್ನೆ ನಾಲ್ ನಲ್ಲ ತಕ್ಕೂ ಪರಂದತ್.

ನೋಟ್ ಮಣಿ, ಇಂಞಿ ನಂಗೆಲ್ಲ ಒಂದೆ ಅಕ್ಕೂಲ. ಮೂಡಿರ ಅಪ್ಪ ಎಣ್ಣೆಚಿ,

ಮೂಡಿ ಇಂದ್ ಪೊರಮೆ ಆಯಿತ್ (ಕುಳಿಪಕ್ಕಾಯಿತ್) ನೀನ್ ಅವಳ ಬೋರೆ ಕೋಂಬರೆಲ್ ಬುದ್ದವಕ್ಕಾಕ್, ಅದ್‌ಂಗಾಯಿತೇ ಅವಡ ಮಾವಿನೇ ಅಯಿಚಿಯೆಂದೆಣ್ಣೆಚಿ.

ಕೋಂಬರೆಕ್ ಕೂಟುವ ಶಾಸ್ತ್ರ ಆಚಿ. ಬಂದ ಬಾಲೆಕಾರಳೆಲ್ಲ ಉಂಡ್‌ಕುಡ್‌ಚಿ, ಕಳಚಿ, ತೆಳಚಿ ಪಿಂಗ್‌ಚಿ. ಮಣಿಯೇ ಬಾಯಿ ಬುಟ್ಟ್ ಅವ್ವಿನ ಕೇಟಿತ್ "ಎಲ್ಲಿ ಬುದ್ದವಿಯಾ?"

"ನಾಕ್ ಸೌಖ್ಯ ಇಲ್ಲೆ, ಮಾವಿರ ಕೂಡ ಬುದ್ದವಿ"ಂದೆಣ್ಣೆಚಿ.

ಮಣಿ ನೇರ್‌ಂದೂ ನಂಬ್‌ಚಿ. ಇಚ್ಚ ದಿನ ಕಯಿಂಜನ್ನನೆ ಇಂಇಸೊರ್ ಮೂಂದ್ ದಿನಾಂದ್ ಬುದ್ದಂಡತ್.

ದಂಡ್ ದಿನತ್ತಿಂಜಿ ವರ್ಕ್‌ಮಾನ ಕೆಟ್ಟದಲ್ಲ; ಕ್ವಾಟ್‌ಕ್ವಾಟ್‌ನಲ್ಲಿ ಬುದ್ದಂಡತ್, ಮೂಡಿರ ಮಾವಿ ಪೊಲಾಕ ನೇರ್ತ್ ಎದ್ದಿತ್ ಅವ್ವಿನ ಕಾಕನಾಂದ್ ತೇಡಿಕ್ಕಳಿಪ. ಪೂವಣ್ಣನ ಕೇಟಿತ್. "ಎಲ್ಲೆಂಗಿ ಗುಡ್ಡಕೋ, ಪೊರಮೆಯೋ ಪೋಯಿತಿಕ್ಕೂ"ಂದೆಣ್ಣೆಚಿ.

ಏಳ್ ಗಂಟೆ ಆಪಕ ಎಲ್ಲ ಗುಜುಗುಜು ತಕ್ಕೆ, ಗಪ್ಪುನೋ ಕಾಂಬಾಲೆ, ಮೂಡಿನೋ ಕಾಂಬಾಲೆ. ಪಳಮೆ ಮನೆ ದುಂಬ್‌ಚಿ. ನೆರೆಮನೆಕ್ಕೂ ಎತ್ತ್‌ಚಿ; ಮೂಡಿಯೂ ಇಲ್ಲೆ, ಎರಂದಿತ್ ಇಟ್ಟು ಮಾಲ್ ಮಟೋ ಇಲ್ಲೆ! ಪೂವಣ್ಣಂಗ್ ಅಡಿಯೂ ಇಲ್ಲೆ, ಆಕಾಶೋ ಇಲ್ಲೆ!

ಕ್ಣಂಡ ಕಡೆಕಾರ ಪೂವಣ್ಣನ ಮುರ್ಕಿ ಪುಡ್‌ಚಿತ್. ಪಂಚಾತಿಗೆಕ್ ನಾಲಾಳೂ ಕೂಡ್‌ಚಿ. ತೋಟಕಾರ ಮುತ್ತಪ್ಪಣ್ಣಂಗ್ ಪಳಮೆ ಎತ್ತ್‌ಚಿ. ಜೀಪ್ ಎಡ್‌ತಂಡ್ ಮಜ್ಜಣಾಕಣೆ ತೇಡಿತೂ ಆಚಿ.

ಪೊಲಾಕ ಅಂಜರೆ ಗಂಟೆಕ್ ಆರನೆ ಕಲ್ ಮಾಂಗಿ ಮರತ್‌ರಲ್ಲಿ ದಂಡಾಳ್ ಓರ್ ಲಾರಿಪತ್ತಿಚೀಂದ್ ಮೈದುಮಾಪಳೆ ಎಣ್ಣುವಕ, ಸಂಗತಿ ಗೊತ್ತಾಚಿ. ಪಾರ್‌ನ ಪಕ್ಷಿನ ತೇಡುವದ್ ಫಲೋ ಇಲ್ಲೆ, ಮಾನಕೇಡ್ ಬೋರೆ!

ಓರ್ ಚಿರಿಯ ಶಾಸ್ತ್ರ ಮಾಡಿತ್ ದಂಡನೆ ಮೂಡಿ ಪೂವಿನ ಕೊಡ್‌ಪಂದ್ ಆಚಿ. ಪೂವಣ್ಣ ಪೋಯಿತ್ ಪೂವಿನೋ ಮೂಡಿರಪ್ಪನೋ ಕೂಟಿಯಂಡ್ ಬರಂಡು. ಅಕ್ಕಣೆಕ್ ಮೂಡಿರ ಮಾವಿ ಕ್ಣಂಡಲ್ಲಿ ಒತ್ತೆಯಾಳಾಯಿತ್ ಇರಂಡೂಂದ್ ಆಚಿ, ಪೂವಣ್ಣಂಡ

ಕೂಡ ಕಾಣ್ಣಂಡಲ್ಲಿಂಜಿ ನಲ್ಲ ದಂಡ್ ಎಡೆವಯಸ್ಕಾರಳೂ ಪೊರಟತ್.

ಮಣಿಕ್ ಇದೆಲ್ಲ ಸ್ವಪ್ನ ಕಂಡನೆಕೆ ಆಪ. ಮಂಡೆಕ್ ಮರಬುದ್ದನ್ನಕೆ ಅಳತವ ಎದ್ದಾಲೆ. ಪೆರಿಯವು ಮಾಡ್ನಾಂಗ್ ತಿರಿತೂ ಪರಂದಾಲೆ.

ದಂಡನೆ ಮೂಡಿನ ಕೊಡ್ಪಂದೆಣ್ಣುವ ಪಳಮೆ ಗೊತ್ತಾಪದು ಮುತ್ತಪ್ಪಣ್ಣಂಗ್ ಮಂಗಲಕ್ ಕೊಡ್ತ ಅಞ್ಜೂರ್ಲುರ್ಪಿಯ ಸಾಲತರ ಗೇನ ಬಾತ್. ಕೆಲಸ ಕೆಡುವದ್ ನೇರೇಂದೆಣ್ಣೆತ್, ಮೂಡಿರಪ್ಪಂಡಲ್ಲಿಕ್ ಜೀಪ್ ಎಡ್ತಂಡ್ ಅಳಚಿ.

ಪೂವಣ್ಣ ದಂಡ್ ಮೂಂದ್ ಬಸ್ಸಬದಲ್ ಮಾಡಿತ್ ಬರಂಡುಲ್ಲ. ಮುತ್ತಪ್ಪಣ್ಣ ಎನ್ನಂಗಾಯಿತ್ ಬಾತ್ಂದ್ ಗೇನ ಮಾಡಣೆ ಮುತ್ತಪ್ಪನೇ ಎಣ್ಣೆಚಿ "ಕುಟ್ಟಪ್ಪ, ನಾಡ ಮೋವ ಇನ್ನಾಂದ್ ಬುದ್ದಿತ್ ಕಾಲರ ಮೂಳೆ ಪೊಟ್ಟಿತ್ ಮೈಸೂರ್ ಆಸ್ತೆಲುಂಡ್, ಮನೆಲ್ದಾರೂ ಇಲ್ಲೆ, ಪೂವಿನ ಇಕ್ಕ ಅಯಿಚಿ ತಾ, ಮತ್ಯಾಂದ್ ಕೂಟಿಯಂಡ್ ಬಪ್ಪಿ, ಒರ್ ತಿಂಗ ಕಯಿಂಜ ಪಿಂಞ ಕೂಟಿಯ ಪೋಪಿ".

ಸಾಲತರ ಮುಲಾಜಿಕ್ ಕಯ್ ಎಣ್ಣುವ ಕಯ್ಯುವಾ? ಪೂವಿನ ಜೀಪ್ಲ್ ಎಲ್ಲಿಕ್ ಸಾಗ್ಚ್ಚೆತ್ತೋ!

ಕಾಣ್ಣನು ಮೂಡಿಯು ಮನೆ ಮೊಟ್ಟುವಕ್ ಬಪ್ಪಾಂದ್ ಕಾತಂಡಿರಣೆ ಪೂವಣ್ಣನೂ ಕಾಣ್ಣಂಡ ಕಡೆಕಾರಳೂ ಬಂದ್ ಎತ್ತಿತ್ ತಕ್ಕಬಾಕ್ ಸುರು ಆಚಿ. ಮೇಕಿಯ ಮನೆ ಚಂಗೂನೋ ಬಪ್ಪಕೆಣ್ಣೆಚಿ. ಪರಂದ್ ಪರಂದ್ ಕುಟ್ಟಪ್ಪ ಒಕ್ಕತೆ ಬೋರೆ ಬಟ್ಟೇ ಇಲ್ಲೆ. ಬೈಟೂ ಆಚಿ. ಮುತ್ತಪ್ಪಂಡ ಅಞ್ಜೂರಾಲ್ ಮುನ್ನೂರ್ ಚಂಗೂ ಇರ್ನೂರ್ ಪೂವಣ್ಣನೂ ಸೆರಿಮಾಡಿತ್ ಕೊಡ್ತಿತ್ ಪೂವಿನ ನಾಳೆ ಕೂಟಿಯಂಡ್ ಬಪ್ಪಂದಾಚಿ.

ಬೆಂದ್ಕ ಅಲ್ಲಿಯೇ ಬುದ್ದಂಡತ್. ಪೂವಣ್ಣ ಮನೆ ಬುಟ್ಟಿತ್ ದಂಡ್‌ದಿನ ಆನದಲ್ಲ. ಮನೆಕ್ ಪೊರಟತ್. ಚಂಗು ಚೆನ್ನ ಕುಡಿಕಾರ. " ಈ ಬೈಟ್ ನೇರತ್ ಎನ್ನನೆ ಚಂಗು ಪೋಪ? ಬಾ ನಾಡಲ್ಲಿ ಬುದ್ದ. ಪೊಲಾಕಪೋಲು"ಂದೆಣ್ಣೆಚಿ ಪೂವಣ್ಣ. ಚಂಗುರ ಕಾಲೂ ತೆರಿಪ್ಪ!

ಪೂವಣ್ಣಂಡ ಪೊಣ್ಣ್ ಚೋಂದುಕ್ ವರ್ಕ್ ಇಲ್ಲತ್ತದಲ್ಲ. ಕಡೆಕೆ ಮಾಡಿತ್ ಕೊಡ್ಪಂಜಿ ಬುದ್ದಂಡತ್, ವರ್ಕೂ ಪತ್ತಿರತ್.

ಪೂವಣ್ಣ ಬೀಡಿ ಎಲ್ಲ ಬಲ್ಚಿತ್ ಬುದ್ದವಕ್ಕ ಚಂಗುಕ್ ಪೊರಮೆ

ಪೋಂಡಿಯಾಚಿ. ಪೊರಮೆ ಪೋಯಿತ್ ಬಂದಿತ್ ಕೋಟ್ ಉತ್ತನಾಂದ್ ಚೋಂದು ಬುದ್ದಂಡ ಕೋಂಬರೆಲ್ ತವುಡಿಯಂಡ್ ಕೂಡ್‌ಚಿ. ಕೋಟ್ ತೂಕುವಕ್ ಕೊಕ್ಕೆ ತೇಡುವಕ್ ಬೊಳ್‌ಚೊ ಇಲ್ಲೆ. ನಿಪ್ಪಕೂ ಕಯ್ಯುಲೆ. ತವುಡಿಯೇಂಡ್ ನೇರ ಎಚ್ಚಕೋ ಆಚಿ.

ಪೂವಣ್ಣಂಗ್ ತಡ್‌ಪಕಯ್ಯತೆ, ಮೆಲ್ಲೆ ಕೋಂಬರೆಕ್ ಪೋಯಿತ್, ತಿತ್ತ್‌ಪೊಟ್ಟಿ ಕತ್ತ್‌ಚಿರುವದೂ, ಚಂಗು ಚೋಂದುರ ಕಟ್ಪಲ್ ತವುಡಿ ಕಳಿಪದೂ ಜೋಡಾಚಿ. ಪಿತ್ತ ಕೆದಾರ್‌ಚಿ. ತಿತ್ತ್ ಬೊಳಿ ಕಾಂಬದು ಒಂದೂ ಅರಿಯತ ಚೋಂದು ಎದ್ದಳತತ್ತ್. ಅವಡ ಜಡೆ ಪುಡ್‌ಚಿ ಮರಕುಟ್ಟೆನ ಈತನ್ನಕೆ ಬಲ್‌ಚಂಡ್ ಬಂದಿತ್ ಕೈಕ್ ಕಾಟ್ಟಿನ ಪುಳ್ಳಿ ತುಂಡಲ್ ಬಡ್‌ಚಿತ್, ಬಾಳೆಕುಂಡಾರ ಬರಿಕೆತ್ತುವಕ ನೂಕಿ ಇಟ್ಟಿತ್ ಬಡ್‌ಚಿತ್. ಎನ್ನಾಚೀಂದೂ ನೋಟ್‌ಲೆ. ಪಡಿಕ್ ತಾಳ ಇಟ್ಟಿತ್ ಬುದ್ದಂಡತ್. ಅಕ್ಕಣೆ ಚಂಗು ಕೋಟ್‌ನ ಅಲ್ಲಿಯೇ ಬುಟ್ಟಿತ್ ಏಲೆ ದಾಟ್‌ಚೋ ಗೊತ್ತಿಲ್ಲೆ. ಒರ್‌ನ ಮಕ್ಕಕ್ ಸಂಗತಿ ಒಂದೂ ಗೊತ್ತಿಲ್ಲೆ.

ಪೊಲಾಕ ಮಕ್ಕ ಅವ್ವ ಎಲ್ಲಿಯಾಂದ್ ತೇಡಿತ್ ಅಪ್ಪನ ಕಾಕ್‌ಚಿ. ಬಾಳೆ ಕುಂಡಲ್ ಬುದ್ದ ಚೋಂದು ಅಂದೂ ಎದ್ದಾಲೆ, ಎಂದೂ ಎದ್ದಾಲೆ. ಊರ್‌ಕಾರ ಕೂಡ್‌ಚಿ. ಚಂಗುಕಲ್ಲತೆ ಈ ಸಂಗತಿ ದಾಕೂ ಗೊತ್ತು ಇಲ್ಲೆ! ಇದ್ ಕೇಪಕ ಮಂಗಲಕಾರಂಡಲ್ಲಿಂಜಿ ಬಂದವು ಪೊರಟ್ ಪೋಚಿ. ಮಂಗಲಕಾರ ಮಣಿ ಇದೆಲ್ಲ ಅರಿವದು ಅಂದೇ ಬೆಂಗಳೂರ್‌ಕ್ ಬಸ್ ಪತ್‌ಚಿ.

ಗಪ್ಪು ಅವ್ವಿಯೂ ಸಕಲೇಶಪುರಕೆತ್ತಿತ್ ಅಲ್ಲಿ ವೋಳ್‌ಕೇರತೆ ದಂಡ್ ತಿಂಗತ್ತಲ್ ಸೋಮವಾರ ಪೇಟೆಲ್ ಓರ್ ತೋಟತ್‌ಲ್ ಕೂಡ್‌ಚಿ. ಇಯಂಗಡ ಸಂಗತಿ ಪದಾನಂಜಿ ದಿನತ್‌ಲ್ ಸಾವುಕಾರಂಗ್ ಅರಿವದು ಕೆಲಸತ್ತ್‌ಂಜಿ ಎಡ್‌ತತ್. ಪಿತ್ಯಾಂದ್ ತೋಟತ್, ಆಳ್ ಒಬ್ಬ ಬಂದಿತ್ತ್ ಎಣ್ಣುವ - ಒಬ್ಬ ಮರತ್‌ಲ್ ನೇಂದಿತ್ ಚತ್ತಿತ್‌ಂದ್.

ಅವ್ವಿ ದಾಡೋ ಕೂಡೆ ಎಲ್ಲಿಕೋ ಪೋಚೀಂದ್ ಪಳಮೆ. ಇಂದಾಕಣೆ ಕಂಡವನಿಲ್ಲೆ!

(ನಡಂದಕತೆ)



## ಮಾಚುರ ಮರಾಯಣ !

ದೇವಯ್ಯ ಅಂದ್ ಚತ್ತಲ್ ಆಲೆ ಈಲೆ ಸುತ್ತಿತ್ ತಾಂಡ ಕಾರ್ಬಾರ್ ತೇಕಣೆ ಬಸ್ಸೆಲ್ಲ ದಾಟಿರಾತ್. ಮನೆಕೆನ್ನೆನೆ ಎತ್ತಡ್? ಅತ್ತಳ ಕೂಟ್ಚೊ ಎನ್ನೋ! ಬೇಲ್ಲ್ ನೀರ್ ಎನ್ನಾಚೊ! ಇರಾಲ್ ಪನ್ನೆರಂಡ್ ಗಂಟೆ ಆಚೇಂಗಿಯೂ ಸೆರಿ. ಮನೆಕೆತ್ತತೆ ಕಯ್ಯ. ಮಡಿಕೇರಿಲ್ ದಾಡಲ್ಲಿ ಒಳಿಯುವೊ? ಹೊಟೇಲ್ ರೂಮ್, ಕೊಡ್ಪ ದುಡ್ಡಲ್ ಒರ್ ವಾರಕುಳ್ಳ ಸಾಮಾನ್ ಬಕ್ಕೊಂದ್ ಗೇನ ಮಾಡಿಯಂಡ್ ನಿಂದಿ ತಾಕಣೆ ಮಾಚುರ ಬೈಕ್ ಕಂಡತ್.

ದೇವಯ್ಯ, ಮಾಚುರ ಬಲ್ಯಪ್ಪಂಡ ಮೋವನೆ. ಪಕ್ಕ ಪಕ್ಕಲೇ ಮನೆ. ಮಾಚುಕ್ ಎಚ್ಚಕೋ ಸಹಾಯ ಮಾಡಿತ್. ಮಾಚು ಮರತ್ಂಜಿ ಬುದ್ಧಿತ್ ಕಾಲ್ರ ಮೂಳೆ ತಪ್ಪಿತಿಪ್ಪಕ ಒರ್ ತಿಂಗ ಮಂಗಳೂರಲ್ ಅವಂಡ ಕೂಡ ಇಂಜಿತ್ ಆರೈಕೆ ಮಾಡಿತ್. ದೇವಯ್ಯ ದುಂಬ ತಕ್ಕಾಕಾರನಲ್ಲ. ತಾನಾಚಿ, ತಾಂಡ ಬೇಲ್ ತೋಟ, ಅತ್ತಕಡ್ಚಿ ಎಣ್ಣೆಯಂಡ್ ಅಡಕತಲಿಪ್ಪಂವೊ. ಒಬ್ಬನ ಓರ್ ಮಂಜಕೊಂಬ್ ಮದ್ದಾಕ್ ಕೇಪಂವೊನಲ್ಲ.

ಅಂದ್ ಮಾತ್ರ ಮಾಚುನ ಮೋಟಾರ್ ಸೈಕಲ್ ಓರ್ ಲಿಫ್ಟ್ ಕೇಕಂಡಿಯಬಾತ್. ಮನಸಿಲ್ಲತ ಮನಸಲ್ ಪಕ್ಕ ಪೋಯಿತ್ -

"ಬಸ್ಸೆಲ್ಲ ಪೋಯೆರ್ತಲ್ಲ ಮಾಚು, ನೀನೊಬ್ಬನೆ ಪೋಪಂದಾಚೇಂಗಿ ನಾನೊ ಬರಡಾ?"

"ನಾನಿಕ್ಕಲೇ ಪೋಪಾಲೆ, ಚೆನ್ನ ನೇರ ಉಂಡ್ ದೇವಯ್ಯ" ತಪ್ಪಾಚಿರುವಕ್ ಮೊಳಿ ತೇಡ್ಚಿ.

"ನೇರಾಚೇಂಗಿ ಪರವಯಿಲ್ಲೆ, ನಾಕ್ ಮನೆಕೆತ್ತಾಚೇಂಗಿ ಮದಿ ಮಾಚು".

"ಅಲ್ಲಾ, ನೀನ್ ಇಂದ್ ಇಲ್ಲಿ ಎಲ್ಲೆಂಗಿ ಬುದ್ಧಂಡ್ ಪೊಲಾಕ ನೇರ್ತೆ ಬಪ್ಪಕ್ಕೆನ್ನಂದ್" ದೇವಯ್ಯಂಗ್ ಗೊತ್ತೇಯಿಲ್ಲತಂತ ಪುದಿಯ ಸಲಹೆ ಕೊಡ್ತತ್.

ದೇವಯ್ಯಂಡ ಮೇಲ್ಕಾಕ್ ಪಚ್ಚೆನೀರ್ ಬೂಕ್‌ನನ್ನೆ ಆಚಿ. ತಾಂಡ ಸ್ವಾಭಿಮಾನ ಬುಡತೆ -

"ಇಲ್ಲೆ ಮಾಚು, ಮನೆಕ್ ಎತ್ತತೆ ಕಯ್ಯ. ನೀಕ್ ತೊಂದರೆ ಆಪೇಂಗಿ ನೀ ಪೋ. ನಾನ್ ಏದೇಂಗಿ ಲಾರಿ ಗೀರಿ ಕಾಟ್ವಾಚೇಂಗಿ ಬಪ್ಪಿಂ"ದ್ ಎಣ್ಣೆ ಚಿ.

ದೇವಯ್ಯಂಗ್ ಬೇಜಾರ ಆನದ್ ಮಾಚುಕ್ ಗೊತ್ತಾಚಿ. "ಅನ್ನನೆ ಅಲ್ಲ. ಚೆನ್ನೆ ಕೆಲಸ ಉಂಡ್. ಇಲ್ಲಿಯೇ ನಿಂದ, ಬೆರಿಯ ಬಪ್ಪಿ. ನೀಡ ಕೈಲುಳ್ಳ ಬ್ಯಾಗ್‌ನ ಬೈಕ್‌ರ ಪೊಟ್ಟಿಲ್ ಬೆಚ್ಚಾರಾಂದ್" ಕೇಟಿತ್ ತಾನೆ ಬೆಚ್ಚಿತ್.

ಬೈಕ್ ಈಸ್ಟೆಂಡ್ ಹೋಟೇಲಾರ ಬಟ್ಟೆ ಪುಡಾಚಿತ್. ಮಾಚುನ ಕಾತ್ ಕಾತ್ ಇರ್‌ಲ್ ಎಟ್ವಾ ಗಂಟೆ ಆಚಿ. ಅಕ್ಕಣೆಕ್ ಕೂಡ ಕೂಡ ದಂಡ್ ಲಾರಿಯ ಪೋಚಿ. ಡ್ರೈವರ್ ಬಪ್ಪಿರಾಂದೂ ಕೇಟಿತ್. ಮಾಚುನ ಬುಟ್ಟಿತ್ ಎನ್ನನೆ ಪೋಪೊ?

ಸುಮಾರ್ ಎಟ್ವಾ ಗಂಟೆಕ್ ಮಾಚು ಅವಂಡ ಬಯ್ಯಲ್ ಓರ್ ಮಲಯಾಳಕಾರನೋ ಅಳ್‌ಪಾಚಿಟ್ಟಿಂಡ್ ಬಾತ್. ದೇವಯ್ಯಂಡ ಜಿಂವ ಚಿತ್ತತ್. ಮಾಚು ಬಂದವನೆ ನಿಪ್ಪಾಚಿಟ್ಟಿತ್ "ಸಾರಿ ದೇವಯ್ಯ, ಇಂವೊ ನಾಡ ಸಿನೇತ, ಬಲ್ಯ ಸಾವುಕಾರ, ಮರ ವ್ಯಾಪಾರಿ, ಮನೆಕ್ ಬಪ್ಪಲೊ, ಇಕ್ಕ ನೀನೆನ್ನಾ ಮಾಡುವಿಯಾ? ಇದ ನೀಡ ಬ್ಯಾಗ್‌ಂದ್ ಕೊಡ್‌ಪಂಜೀ, ಇಂದ್ ಎನ್ನನೇಂಗಿ ಇಲ್ಲಿಂಜಿತ್ ನಾಳೆ ಬಪ್ಪಿಯಾಂದ್ ಕನಿಕರ ಕಾಟಾವವನನ್ನೆ ಎಣ್ಣೆ ಚಿ.

"ಆಕು ಪೋಂ"ದ್ ಸಮಧಾನತ್‌ಲೇ ಎಣ್ಣೆ ಚಿ, ದೇವಯ್ಯ. ಮಾಚುರ ನಾವು ನೇರೆ ಉರ್‌ಂಡ್‌ಲೆ, ಇಂಞ ಇವಂಡ ಬೈಕ್‌ರ ಚಕ್ರ ಏಲೆಲ್ಲ ಉರುಂಡುವಕುಂಡೊ, ನಾನ್ ಪತ್ತ್ ಮೈಲ್ ನಡಂದಿತೇಂಗಿ ಮನೆ ಕೆತ್ತುವೀಂದ್ ದೇವಯ್ಯ ಅರೆ ಮೈಲ್ ನಡಾಕಣೆ ಒರ್ ಲಾರಿ ಬಾತ್. ಅದಲ್ ಪತ್ತಿತ್ ಸುಮಾರ್ ಆರ್ ಮೈಲ್ ಬಪ್ಪಕ ಬೈಕ್ ನಿಂದದ್ ಕಂಡತ್. ದೇವಯ್ಯ ಬಂದಿತ್ ಮನೆಕೆತ್ತಾಚಿ. ಮಾಚು ಅಂದ್ ಮನೆಕೆತ್ತಲೆ. ಎಕ್ಕ ಬಾತೋ, ಕೇಪಕೂ ಪೋಯಿಲೆ, ದೇವಯ್ಯ.

ಮುತ್ತಣ್ಣಜ್ಜಂಗ್ ಮಾಚು ಒಬ್ಬನೆ ಮೋಂವೊ. ಇಂಞೋರ್ ಮೂಡಿ ಕುಂಞಿ ದೇಚು. ಮಾಚುನ ಕಾಲೇಜಾಕ್ ಕೂಟಂಡೂಂದ್ ಪೆರ್ತ್ ಆಸೆಲಿಂಜತ್. ಎಚ್ಚಕ್ ಟ್ಯೂಶನ್ ಕೊಡ್‌ತಕಲೂ ಎಸ್.ಎಸ್.ಎಲ್.ಸಿ. ದಾಟಲೆ. ಅಕ್ಕಣೆಕ್ ಮುತ್ತಣ್ಣಜ್ಜಂಗ್ ಒರ್ ಕಾಲ್ ಬರತಾಯಿತ್ ಮೊಟ್ಟೆಡ್‌ಪಕಯ್ಯತೆ ಬುದ್ಧಂಡಲ್ಲಿಯೆ ಆಚಿ. ಅವ್ವನಿಲ್ಲತೆ

ಮಕ್ಕಳ ನೊಂಬಲೆಚಿರತೆ ಚಾಕಿಯಂಡ್ ಬಾತ್.

ಒನ್ನಾಂದ್ ಮಾಚುಕ್ ಮಡಿಕೇರಿಂಚಿ ಬಪ್ಪಕ ಮರ ವ್ಯಾಪಾರಿ ಖಾದರ್‌ರ ಜೀಪ್ ಕೊಟ್ಟೆಚಿ. ಆ ಜೀಪ್‌ಲ್ ಮಿಂಞಾತ್ ರೇಂಜರ್, ಬಯ್ಯಲ್ ಗಾರ್ಡ್ ಎಲ್ಲ ಅಳೆತಿತ್. ಒರ್ ಸೆರೆಲ್ ಮಾಚು ಅಳೆತತ್. ಖಾದರ್‌ರ ಪಣತ್‌ರ ಚೀಲ, ಅವಂಡ ಗತ್ತರ ಕಳಿ ಎಲ್ಲ ಕಾಂಬಕ ಮಾಚುಕ್ ಎನ್ನೆಲ್ಲೋ ಪುದಿಯ ಪುದಿಯ ಆಲೋಚನೆ ಬಪ್ಪಕ್ಕಾಚಿ. ಜಮ್ಮತ್ತಲ್ ಇಚ್ಚಕ್ ಮರ ಇಂಜಿತೂ ಒರ್ ಪ್ರಯೋಜನ ಇಲ್ಲೆ. ಯಾಂವಡೇಂವಡೋ ಕಾಡ್ ಎಡ್‌ತ್ ಮರ ಮಾರಿತ್ ಈ ಖಾದರ್ ರೇಂಜರ್‌ನಂತ ಅಧಿಕಾರಿಯಳ ಒಟ್ಟಿಚೂರ್ ಕಾಟಿತ್ ನಾಯಿಕುಟ್ಟಿನ ತುಳ್ಳುಚ್ಚೆಟ್ಟನ್ನೆಕೇ ತುಳ್ಳುಚಿರುವಲ್ಲಾ!

ಖಾದರ್, ಅಂದ್ ಚಿಟ್ಟಿಯಪ್ಪಂಡ ಕೂಪ್ ಎಡ್‌ಪಕ್ಕ ಬಪ್ಪಕ ಕೀತ್ ಮುಂಡಲ್ ನಡಂದ್ ಬಂದಂವೊ ಇಂದ್ ಫಾರೆಸ್ತ್ ಅಧಿಕಾರಿಯಳ ಅಳೆ ಎಣ್ಣುವಕ ಅಳೆಪ್ಪೆಚಿರುವ, ನಿಲ್ಲ ಎಣ್ಣುವಕ ನಿಪ್ಪೆಚಿರುವ. ಫಾರೆಸ್ತ್‌ಕಾರಳೂ ಅವಂಡ ದುಡ್ಡ್‌ಕ್ ಅಲಂದಿತ್ ಜಲ್ಲ ಉಳುಕುವ ನಾಯಿಯಳಾಯಿತ್.

ಅಪ್ಪಂಡ ಕಾಲ್ ನೊಂಬಲಕ್ಕ ಕೇರಳತ್‌ಲ್ ನಲ್ಲ ಎಣ್ಣೆ ಮದ್ ಕೊಟ್ಟುವಾಂದ್ ಎಲ್ಲಾರು ಎಣ್ಣೆ ಚಿ. ಮಾಚು ಕೇರಳಕ್ ಪೋನವನಲ್ಲ. ಖಾದರ್ ಅಕ್ಕಕ್ಕ ಪೋಪಲ್ಲಾ, "ಒಮ್ಮ ಕೇಟ್ ನೋಟ್‌ರಾ"ಂದ್ ಮುತ್ತಣ್ಣಜ್ಜ ಎಣ್ಣೆ ಚಿ.

ಖಾದರ್ ಚಿಟ್ಟಿಯಪ್ಪಂಡ ಕೂಪ್‌ಕ್ ಬಂದಂದ್ ಮಾಚು ಪೋಯಿತ್ ಅಪ್ಪಂಡ ಕಾಯಿಲತ್‌ರ ಸಂಗತಿ ಎಣ್ಣೆ ಚಿ. "ಬಪ್ಪೇಂಗಿ ಬಾ, ನಾ ಪೋಪಿ"ಂದ್ ಖಾದರ್ ಎಣ್ಣೆ ಚಿ. ಪಿತ್ಯಾಂದ್ ಮಾಚು ಪೊರಟತ್. ಮದ್ದೆಲ್ಲ ಎಡ್‌ತಂಡ್ ಖಾದರ್‌ರ ಮನೆಲೆ ಇಂಜಿತ್ ಬಯ್ಯಕ್ ಬಪ್ಪಕ ಮಾಕೂಟ ಗೇಟ್‌ಲ್ ನಾಲಂಜಿ ಮರ ಲಾರಿ ನಿಂದದ್ ಕಂಡತ್.

ಮಾಚುಕ್ ಎನ್ನಾಚೋ - "ಸಾವುಕಾರ, ನಂಗಡ ಕಾಡ್‌ಲ್ ದುಂಬ ಮರ ಉಂಡ್. ಮಾರ್‌ಚೇಂಗಿ ಆಪಕಿಲ್ಲೆಯಾ"ಂದ್ ಕೇಟತ್. ಖಾದರ್ ವರ್‌ಕ್ ನೆಟ್ಟೊನವನನ್ನೆಕೆ ಒಮ್ಮಕೇ ನೇರೆ ಅಳೆತತ್. ಬಂಪರ್ ಲಾಟ್ರಿ ಪೊಜ್ಜನ್ನೆಕೆ ತೋಂದ್‌ಚಿ. ಈ ಚಾನ್ಸ್ ಬುಡುವಕ್ ಅಂವೊ ಮಾಪಳೆ ಅಲ್ಲತಾಂಡು! ತಾಂಡ ಮಾಪಳೆ ಕೆಣಿ ಎಡ್‌ತತ್.

ಇಕ್ಕಣೆಕ್ ಮಾಚುನ ಅಳೆ ಕುಟ್ಟಿನನ್ನೆಕೆ ಕಂಡಂವೊ ಕೂಡೆನ್ನೇ 'ಬಾಯಿಕೆನ್ನ ಬಡಸ್ಸನಾಂದ್' "ಯಜಮಾನ, ಎಚ್ಚಕ್ ಏಕ್ರೆ ಕಾಡ್ ಉಂಡ್"ಂದ್ ಕೇಟತ್. ಅವಂಗ್ ಬೋಂಡಿಯೆ ವಿವರ ಎಲ್ಲ ಕೇಟಿತಾಕಣೆ ವೀರಾಜಪೇಟೆಕ್ ಜೀಪ್ ಎತ್ತಾಚಿ. ನೇರೆ

ಹೊಟೇಲ್‌ನ ಕೂಟಿಯ ಪೋಯಿತ್ ಮಾಡಿಲ್ ಅಳ್‌ಪ್‌ಚ್‌ಟ್ತ್ಯತ್. ಬೀರ್ ಬ್ರಾಂಡಿ ಎರ್ಚಿ ಬರ್ತ್‌ದ್‌ಂದ್ ಮೇಜಿ ದುಂಬ್‌ಚಿ. ಖಾದರ್‌ರ ರೈಟರ್, ಅಂವೊ ಇಂವೊಂದ್ ಮೂಂದ್ ನಾಲಾಳ್ ಕೂಡ್‌ಚಿ, ಮಾಚುಕ್ ರಾಜೋಪಚಾರ ಆಚಿ.

ಖಾದರ್ ಕಳ್ಳಗ್‌ಳ್ಳಕ್ ಆಳಲ್ಲ. ಎರೆಪುಳು ಕೊಯತಿತ್ ಗಾಣಕ್ ಮೀನ್ ಬೂಕ್‌ನನ್ನೆ ಮಾಚುನಂತವನ ಬಗ್‌ಲಾಕ್‌ಡುವಾಲ್ ಅವಂಗ್ ಪಡಪ್‌ಚ್‌ರಂಡ. "ಇಂದ್ ಪೋಯಿತ್ ನೋಟನಲ್ಲಾ, ಮಾಚು ಯಜಮಾನ" ಎಣ್ಣೆಚಿ.

ಜೀಪ್ ಮಾಚುರ ಮನೆಕೆತ್‌ಚಿ. ಖಾದರೇ ಮಿಂಞ ಇಳಿಂಜಿತ್ ಮುತ್ತಣ್ಣಜ್ಜಂಡ ಕಾಲ್ ನೊಂಬಲತರ ವಿಚಾರಣೆ ಮಾಡಿತ್ ಮದ್ದೆಲ್ಲ ಕೊಡ್‌ತಿತ್ "ಯಜಮಾನ ಪದ್‌ನಂಜಿ ದಿನ ಈ ಮದ್ದ್ ನೋಟನ, ಬಲ್ಯಗುಣ ಕಂಡ್‌ಲೇಂಗಿ ನಿಂಗಳ ನಾನೇ ಕೇರಳಕ್ ಕೂಟಿಯ ಪೋಪಿ. ಇದೆಲ್ಲ ಒರ್ ಬಲ್ಯ ಕಾಯಿಲನಾ" ಎಣ್ಣೆತ್ ಕಾಲ್‌ಕ್ ಎಣ್ಣೆ ಉದ್ದಿತ್ ನೀಂಬ್‌ಚಿ.

ಮರ ಸಾಹುಕಾರಂಡ ಗುಣ ಕಂಡಿತ್ ಮುತ್ತಣ್ಣಜ್ಜಂಗೂ ಮುಲಾಜ್ ಬಪ್ಪಕಾಚಿ. ಮಾಚು ಅವುಲ್‌ರ ಧೈರ್ಯತ್ ಮರಕಾಡ್‌ರ ಸಂಗತಿನ ಅಪ್ಪಂಗ್ ಎಣ್ಣೆಚಿ. ಮುತ್ತಣ್ಣಜ್ಜಂಡ ಎದೆಕ್ ಚಾಕ್ ಇಟ್ಟನ್ನೆ ಆಚಿ. "ಪಾಲಾಕರ್‌ಪ ಪಯ್ಯುರ ಕೆತ್ತ ಅರಪದಾ?"ಂದ್ ಕೇಟತ್.

ಖಾದರ್‌ಕ್ ತಕ್ಕ ಪಡ್‌ಪ್‌ಚಿರಂಡುವಾ? ಎಂತೆಂತ ಕೊಡವಳ ಕುಂಡ್‌ಕ್‌ಟ್ಟಿ ಅನುಭವ ಇಲ್ಲೆ! ತಕ್ಕಕ್‌ಚಿಂಜತ್ - "ಮರ ಮಾರುವೊ ಎಣ್ಣೆಚೇಂಗಿ ಇಡೀ ಕಾಡ್‌ನ ಕೆತ್ತುವಕ್ ಸರಕಾರ ಬುಡುವ ಯಜಮಾನ? ಒರ್ ಏಕ್ರೆಲ್ ತೇಡ್‌ಚೇಂಗಿ ಕೆತ್ತುವಕ್ಕಾನ ಒರ್ ಮರಕಟ್ಟು. ಬೊಳಚಿ ನಿಂದ ಮರತನ ಮಾತ್ರ ಕೆತ್ತುವಕ್ ಹುಕುಂ ಉಳ್ಳೊ. ಕೆತ್ತುವಕ ಬೋರೆ ಮರ ನಷ್ಟ ಆಪಕಯ್ಯ. ಇನ್ನೆಲ್ಲ ಫಾರೆಸ್ತ್ ಕಾನೂನ್ ಉಂಡ್, ಏದ್‌ಂಗೂ ನಂಗ ನೋಟಿತ್ ಬಪ್ಪ".

ಇನ್ನೆ ಎಣ್ಣೆತ್ ಕಾಡ್‌ಕ್ ಪೊರಟತ್. ಮಾಚುರ ಲೆಕ್ಕಚಾರೇ ಬೋರೆ, ಖಾದರ್‌ರ ಲೆಕ್ಕಚಾರೇ ಬೋರೆ. ಮಾಚು ಆತನ ಬಲ್ಯ ಬಲ್ಯ ಮರತರ ತಡಿನ ಲೆಕ್ಕ ಇಟ್ಟಕ ಖಾದರ್ ಕೆತ್ತುವ ಮರ, ಮರತರ ಬೇರ್, ಕೊಂಬ್, ಅದ್‌ಲಾಪ ಮಸಿ, ಪುಳ್ಳಿ, ಆಮರ ಬೂವಕ ಏದೆಲ್ಲ ಲೆಕ್ಕಕಿಲ್ಲತ ಮರ ಬೂವ, ಅದ್‌ಲೆಚ್ಚಕ್ ಲೋಡ್ ಲೋಡ್ ಆಕು, ಎಲ್ಲಾ ಕೂಟಿತ್ ತೀರ್ಮಾನಕ್ ಬಾತ್. ಮಾಚುರ ಲೆಕ್ಕ ಪ್ರಕಾರ ಅರ್‌ವದೋ ಎಳ್‌ವದೋ

ಮರ. ಖಾದರಾರ ಲೆಕ್ಕ ಆರನೂರ ಕಡಂದತ್. ಆ ಜಾಗತಾರ ಕೂಡ ಉಳ್ಳ ಪೈಸಾರಿರ ಮರತಾರ ಲೆಕ್ಕೋ, ಖಾದರಾರ ಲೆಕ್ಕಕ್ ಕೂಡ್ಚಿ. ಈ ಮುತ್ತಣ್ಣಜ್ಜಂಡ ಕೂಪ್ ಬುಟ್ಟಕ ನಾನ್ ಕೇರಳತ್‌ಲ್ ಪುಟ್ವಾನಾಂಗ್ ಸಾರ್ಥಕ ಆಪಾಲೆ, ಕೂಟ್‌ಪೊಳೆ ದಾಟಿ ಬಂದದ್ ಸಾರ್ಥಕ ಅಲ್ಲಾಂದ್ ತೀರ್ಮಾನ ಮಾಡ್ಚಿ ಖಾದರಾ !

ಅಂದ್‌ಂಜಿ ಮಾಚು ಬಸ್ಸು ಪತ್ತಾನವನಲ್ಲ. ಜೀಪು ಕಾರ್‌ಲೇ ಓಟ್‌ಂಗಳಿ. ಖಾದರಾರ ಬರಿಲೇ ಊಟ ಉಪಚಾರ. ಏದೇದೋ ಫಾರೆಸ್ಟ್ ಅಧಿಕಾರಿಯಡ ಕೂಡ ತಿರ್‌ಗ್‌ಚಿ, ಕುಡ್‌ಚತ್, ಕಳ್‌ಚತ್. ಖಾದರಾನ ಕಾಂಬಕ ಡಿ.ಎಫ್.ಒ ನೇ ಕುರ್ಚಿಂಜಿ ಎದ್ದ್ ಬಂದಿತ್ ಶೇಕೇಂಡ್ ಮಾಡುವ. ಪಣತಾರ ಮಿಂಞ ಈ ಅಧಿಕಾರಿಯ ಎಲ್ಲ ನಾಯಿ ಕುಟ್ಟಿಯ. ಪೋನ ಆಫೀಸ್‌ಲೆಲ್ಲ ಮಾಚುಕ್ಕೂ ಓರ್ ಕುರ್ಚಿ, ಕರ್ಚಿಯೆಲ್ಲ ಖಾದರಾರ.

ಊರ್‌ಲ್ ಉಳ್ಳ ಕೋಳಿಯ ಎಲ್ಲ ತೀಂದತ್. ಪದಾನಂಜಿ ಉರ್‌ಪಿಯತಾರ ಕೋಳಿಕ್ ನುಪ್ಪದ್ ಉರ್‌ಪಿಯ ಆಚಿ. ಕೂಪ್‌ಕ್ ಬಪ್ಪ ಫಾರೆಸ್ಟ್‌ಕಾರಕ್ ಎಡೆ ಇಡುವಕ್ ಬೋಂಡುವಲ್ಲಾ. ಮುತ್ತಣ್ಣಜ್ಜ ಮಾಚುನ ಕಾಕಿತ್ ಎಣ್ಣುವಚ್ಚಕ್ ಎಣ್ಣ್‌ಚಿ. ನೆರೆಮನೆರ ಪೆರಿಯಂವೊ ಎಣ್ಣೆನೋಟ್‌ಚಿ. ಈ ಮುದಿಯಂಗಡ ಉಪದೇಶ, ಮೂಢ ನಂಬಿಕೆಕ್ಕೆಲ್ಲ ಕೆಮಿ ಕೊಡ್‌ತೀ ಕೊಡವ ಇಚ್ಚಕ್ ಬಯ್ಯಲುಳ್ಳಂದ್ ವಯಸ್ಸಂಗಕ್ ಮಾಚು ವ್ಯವಹಾರ ಜ್ಞಾನ ಎಣ್ಣೆತ್ ಬುಟ್ಟತ್.

ಒರ್ ತಿಂಗತ್ ಫಾರೆಸ್ಟ್‌ಕಾರಡ ಹುಕುಂ ಕ್‌ಚ್ಚಿತ್ ಎಲ್ಲಾ ಏರ್ಪಾಡೂ ಆಚಿ. ಅಡ್ವಾನ್ಸ್, ದುಡ್ಡ್ ಕ್‌ಚ್ಚಿಣೆಕ್ ಮಾಚು ಮೋಟಾರ್ ಕಾರ್‌ಕ್ ಅಡ್ವಾನ್ಸ್ ಮಾಡಿತಾಯಿತ್. ಮೋಟಾರ್ ಕಾರ್ ಬಪ್ಪಕ ಮಾಚುಕ್ ಭಾಗ್ಯಲಕ್ಷ್ಮಿ-ಬಂದನ್ನೆ ಆಚಿ. ಇಕ್ಕ ಪಂಡೇತ ಮಾಚು ಅಲ್ಲ, ಸಾಹುಕಾರ ಮಾಚು! ಮಾಚುರ ಮೋಟಾರ್ ಕಾರ್ ಬಪ್ಪಕ ನೆರೆಮನೆ ಮಕ್ಕ ಎಲ್ಲ ಮುಖ್ಯಮಂತ್ರಿರ ಹೆಲಿಕಾಪ್ಟರ್ ನೋಟುವಕ್ ಬಪ್ಪನ್ನೆ ಬಪ್ಪಕ್ಕಾಚಿ. ಮಕ್ಕಳೇ ಧೂಳ್ ತೇಟಿತ್ ಬೆಪ್ಪಯಿಂಜತ್. ಕೂಪುಕ್ ಬಂದ ಆನೆಯಳ ನೋಟುವಕ್ ಆಣೂ ಪೊಣ್ಣೂ ಕೂಡುವಯಿಂಜತ್. ಮಾಚುಕ್ ಮಾತ್ರ ಈ ಮನೆಕಾರ, ನೆರೆಮನೆಕಾರ ಎಲ್ಲ ಕೂಪ್‌ಕೆತ್ತುವ ಮರ್ತಂಗಳನ್ನೆ ತೋಂದುವಕ್ಕಾಚಿ!

ಕೂಪ್‌ಲಾಮರ ಬೂವ ಸದ್ ಕೇಟಿತ್ ಮುತ್ತಣ್ಣಜ್ಜ ತಾಂಡ ಮೋವ ದೇಚಿನ ಕಾಕಿತ್ - "ಅವ್ವ ಅದಾ, ನಾಡ ಚಾವು ಬೊಡಿ ಅದ್, ಕೇಪಾ ನೀಕ್"?ಂದ್ ಸಂಗಟತ್‌ಲ್ ಎಣ್ಣ್‌ಚಿ.

ದಂಡ್ ತಿಂಗತ್ ಮುತ್ತಣ್ಣಜ್ಜಂಡ ಕಾಡ್ ತೇಂದಿತ್ ಬರಿಲುಳ್ಳ ಪೈಸಾರಿರ ಜಾತಿ ಮರ ಎಲ್ಲ ತರ್‌ಂಜಿ ಬುದ್ಧತ್. ಊರ್‌ಕಾರ ಪುಕಾರ್ ಮಾಡ್‌ಚಿ, ಪೇಪರ್‌ಲೂ ಎಳ್‌ದ್‌ಚಿ. ನಾಲಂಜಿ ಕಾಕಿ ಬಟ್ಟೆಕಾರಳು ಬಾತ್. ಊರ್‌ಲ್ ಕೂವಕ್ ಬುಟ್ಟು ಮಲ್ಲಂಗಳೊ, ಮುಟ್ಟೆ ಪೋಡೆಯಳೊ ತೇತಿತ್ ಪೋಚಿ. ದಿನಕ್ಕ ಪತ್ತಿರುವದ್ ಲಾರಿಯ ಬಪ್ಪಕ್ಕಾಚಿ. ಊರ್‌ಕಾರಕ್ ಮಳೆಗಾಲಕುಳ್ಳ ಬೆಲ್ಲಮೂಟೆ, ಉಪ್ಪು, ಪುದಿಯಮನೆ ಕೆಟ್ಟುವಯಿಂಗಳ್ ಹಂಚಿ, ಸಿಮೆಂಟ್ ಎಲ್ಲ ಮಾಚುರ ಶಿಫಾರಸ್‌ಲ್ ಕಮ್ಮಿ ಬಾಡಿಗೇಕ್ ಬಪ್ಪಕ್ಕಾನಾನಗುಂಡ್ ಪೈಸಾರಿ ಮರ ಪೋಪಾನ ಬಲ್ಯದಾಯಿತ್ ದಾರೂ ಎಡ್‌ತಂಡ್‌ಲೆ. ಎನ್ನೇಂಗಿ ಚಾವಡ್, ನಾಕ್ ಒರ್ ಲೋಡ್ ಹಂಚಿ ಸಾಗ್‌ಚಿಟ್ತ್ ತಪ್ಪಲೊ. ನಾಡ ಉಪ್ಪು, ಬೆಲ್ಲ ಮೂಟೆನ ಬೊಳ್ಳಾಚಿ ಲಾರಿಲ್ ಇಟ್ಟು ಬಪ್ಪಲೊ. ನಂಗಕೆನ್ನ ಬೋಂಡು ಕೋರ್ಟ್ ಕಚೇರಿ ವ್ಯವಹಾರಾಂದ್ ಜನ ಮುಂಡತಾಚಿ.

ಮಾಚುಕ್ ಪಣ ಎಚ್ಚಕ್ ಕೊಟ್ಟೊಚೊ ಎಚ್ಚಕ್ ಪೋಚೋ! ಆಚೇಂಗಿ ಅಪ್ಪಂಗಳ್ ಎಣ್ಣೆ ಮದ್ದ್, ಎಸ್.ಎಸ್.ಎಲ್.ಸಿ. ಪಾಸಾನ ದೇಚುನ ಕಾಲೇಜ್‌ಕ್ ಕೂಟುವದ್, ದೇಚುಕ್, ಚಪ್ಪಲ್, ಯೂನಿಫಾರಂ ಎಲ್ಲ ಎಡ್‌ತ್ ಕೊಡ್‌ತದೆಲ್ಲ ಮಾಚುರ ಬಲ್ಯ ಸಾಧನೆ. ಇದಲ್ಲತೆ ಮನೆಲ್ ಬಿಸ್ಕೆಟ್, ದಂಡ್ ಮೂಂದ್ ತರತಾರ ಚೌ ಚೌ ತಪ್ಪುವಯಿಂಜಿಲೆ. ಬೆಂದ್‌ಕಕ್‌ಂದ್ ಅಲ್ಲ. ಮಾಚುರ ಕೂಟಾಳಿಯ ಬಪ್ಪಕ ಕುಡಿಪ ಕಳಿಪಕ ಬಾಯಿಕೆನ್ನೇಂಗಿ ಬೋಂಡುವಲ್ಲ, ಅದ್‌ಂಗ್.

ಮುತ್ತಣ್ಣಜ್ಜಂಡ ಕಾಲ್ ನೊಂಬಲ ಜಾಸ್ತಿ ಆಯಂಡೇ ಬಾತ್. ಒನ್ನಾಂದ್ ಖಾದರೇ ಎಣ್ಣೆ ಚಿ - "ಯಜಮಾನ ನಿಂಗ ಚೆನ್ನದಿನ ಕೇರಳತ್‌ಲ್ ಇರಂಡು. ಇಕ್ಕ ನಿಂಗಡ ಎಚ್ಚರ ಎಡ್‌ಪಕ್ ಮೋವಕ್ ರಜೋ ಉಂಡ್. ಎಲ್ಲ ಏರ್ಪಾಡ್ ನಾನ್ ಮಾಡುವಿ"

"ಪಣ ಇಲ್ಲೆಲ್ಲಾ, ಮನೆಲ್ ದಾರಾನ ಬುಟ್ಟಿತ್ ಪೋಪೋ"?

ಅದ್‌ಂಗೆಲ್ಲ ಏರ್ಪಾಡ್ ಮಾಡನ, ನಾಳೆನ್ನೇ ಪೊರಡೀಂದೆಣ್ಣೆತ್ ಚೆನ್ನ ಪಣೋ ಕೊಡ್‌ತಿತ್ ಪೋಚಿ. ಪಿತ್ಯಾಂದ್ ಖಾದರ್‌ರ ಜೀಪ್‌ಲೇ ಅಪ್ಪನೂ ಮಕ್ಕಳೂ ಪೋಚಿ. ಒರ್ ವೈದ್ಯಂಡ ಮನೆರ ಪಕ್ಕಲೇ ಒರ್ ಹೊಟೇಲ್‌ಲ್ ರೂಮು ಮಾಡಿತ್ ಆರೈಕೆಕ್ ಏರ್ಪಾಡ್ ಮಾಡ್‌ಚಿ. ಅಜ್ಜಂಡ ಮೇಲ್‌ಕ್ ಪೊಲಾಕ ಎಣ್ಣೆ ನೀಂಬಿತ್ ನಾಲ್ ಗಂಟೆಕೆತ್ತಣೆ ವೈದ್ಯಂಡಲ್ಲಿ ಅಳಕಂಡು. ಅಕ್ಕಣೆ ದೇಚು ಒಬ್ಬಳೇ ರೂಂಲಿರಂಡು. ಮಾಚು ಪೊಲಾಕೆದ್ದಿತ್ ಪೋಚೇಂಗಿ ದಂಡೊ ಮೂಂದೋ ದಿನಕ್ಕೊಮ್ಮೆ ಬಪ್ಪ.

ನಾಲ್ಕನೇ ಕಯಿಂಜಿತಾನದು ಒನ್ನಾಂದ್ ಖಾದರ್ ರೂಮ್‌ಕ್ ಬಂದಿತ್ ದೇಚುರ ನಿಪ್ಪುಕ್ ಕೈಇಟ್ಟುಂಡು ಕಷ್ಟಸುಖ ಕೇಟತ್. ದೇಚುಕ್ ಚೆನ್ನ ಪುದಿಯ ಬಟ್ಟೆನೋ ಎಡ್‌ತಂಡ್ ಬಂದಿತಿಂಜತ್. ಖಾದರ್‌ರ ಕಳಿ ಕಂಡಿತ್ ದೇಚುಕ್ ನರಿರ ಗವಿಲ್ ಕೆಣ್‌ಂಜ ಪಯ್ಯುನನ್ನೆಕೆ ಆಚಿ. ರೂಮ್‌ಕೇ ಖಾದರ್ ಕೂಳೂ ಎಡ್‌ತ ಬಪ್ಪೆಚಿಟ್ಟತ್.

ದೇಚು ತಾಂಡ ಪಾಡ್‌ನ ದಾಕ್ ಎಣ್ಣುವೊ? ಖಾದರ್‌ರ ಉಪಾಯೋ ಬಲಾತ್ಕಾರೋ ಎಲ್ಲಾ ನೋಟನ ದೇಚು ರೂಮ್‌ರ ಕಕ್ಕುಸ್‌ಕ್ ಕೂಡಿತ್ ಪಡಿ ಇಟ್ಟುಂಡ್ - "ನನ್ನ ಬಲಾತ್ಕಾರ ಮಾಡುವೇಂಗಿ ಇಂಞ್ ನಾಡ ಚಾವುರ ಕೂಡ ಕಳ್‌ಚೆ"ಂದ್ ಮಾತ್ರ ಎಣ್ಣಿತ್ ಪಡಿ ತೊರಂದ್‌ಲೆ. ಖಾದರ್‌ಕ್ ಎನ್ನಾಚೊ - "ತಪ್ಪಾಚಿ, ಬೊತ್ತತೆ ಬಾ, ನಾ ಪೋಪಿ"ಂದ್ ಎಚ್ಚಕ್ ಎಣ್ಣ್ ಚೀಂಗಿಯೂ ಪೊರಮೆ ಬಂದ್‌ಲೆ. ಅವೊ ಎಕ್ಕ ಪೋಚೋ ಅದೂ ಗೊತ್ತಿಲ್ಲೆ!

ದಂಡ್‌ದಿನ ಬರತಿಂಜ ಮಾಚು ಅಂದ್ ಬಾತ್. ರೂಮ್‌ಲ್ ಮಜ್ಜಣತ್‌ರ ಕೂಳ್‌ಕರಿ ಎಲ್ಲ ಅನ್ನನೇ ಉಂಡ್. ದೇಚುನ ಕಾಕ್‌ಚಿ. ದೇಚು ಕಕ್ಕುಸ್‌ರ ಪಡಿ ತೊರಂದಿತ್ ಮೊರಟಂಡ್ ನಡಂದ ಸಂಗತಿನ ಎಣ್ಣ್ ಚಿ. ಮಾಚು ಚೆನ್ನ ನೇರ ಅನ್ನನೇ ಇಂಜಂವೊ -

"ಅದೆಲ್ಲ ಚೆರಿಯ ಸಂಗತಿ. ಆಂಗೆಲ್ಲ ಅನ್ನನೆ ಕಳ್‌ಚಕ ಆಪಾ? ಆನೆಲ್ಲ ಬಲ್ಯದಾಯಿತ್ ಎಡ್‌ತವತೆ" ಎಣ್ಣ್ ಚಿ.

"ಇದ್‌ಂಗ್‌ಂಜಿ ಬಲ್ಯ ಸಂಗತಿ ಇಂಞ್ ಏದ್ ಅಣ್ಣಯ್ಯ?"ಂದ್ ಕೇಟತ್.

"ಅಯ್ಯೋ ನೀಕ್ ಅನುಭವ ಇಲ್ಲೆ. ಇಕ್ಕ ಬಲ್ಯ ಬಲ್ಯಯಿಂಡ ಸಂಗತಿನೆಲ್ಲ ಕೇಟಕ ನೀನ್ ಎನ್ನಣ್ಣು? ನಂಗಡ ಖಾದರ್ ಸಾಹುಕಾರ ಅಂತ ಪಾಳ್ ಮನುಷ್ಯನಲ್ಲ. ನಾಕ್ ಗೊತ್ತಿಲ್ಲಿಯಾ ಅವನ"ಂದ್ ಸಮಾಧಾನ ಎಣ್ಣ್ ಚಿ.

ಸರಿ ! ನಾಡ ಅಣ್ಣಯ್ಯ ಏದ್ ಮಟ್ಟಕ್ ಎತ್‌ಚೀಂದ್ ದೇಚುಕ್ ಗೊತ್ತಾಚಿ. ಇಂಞ್ ದಾಡ ಕೂಡ ಎಣ್ಣಲು? ಮಾಚು ಎಲ್ಲಿಕೋ ಪೋಚಿ. ಅಂದ್ ಬೈಟ್ ಅಪ್ಪಂಡ ಕೂಡ ಮೊರಟಂಡ್ ಎಣ್ಣ್ ಚಿ. ಇದ್ ಕೇಟ ಮುತ್ತಣ್ಣಜ್ಜ ಇಂಞ್ ಬದ್‌ಕಂಡು ಎಣ್ಣುವ ಆಶೆ ಬುಟ್ಟತ್, ನಾಳೆನ್ನೆ ಮನೆಕ್ ಪೋಕಾಂದ್ ಏರ್ಪಾಡಾಚಿ. ಎನ್ನನೆಯೋ ಪುಟ್ಟನ ಮಣ್ಣ್‌ಕ್ ಬಂದಿತ್ ಬುದ್ಧತ್. ದೇಚುರ ಮನಸ್ಸಲ್ ಮಾತ್ರ ಈ ನೊಂಬಲ ಎಂದೂ ಮಾಯತ ಪುಣ್ಣಾಯಿತ್ ನಿಂದತ್.

ಇನ್ನನೆ ಅಂಜಾರ್ ತಿಂಗ ಕಯಿಂಜತ್. ಮಾಚು ಎಕ್ಕಲು ಮನೆಕ್ ಬಪ್ಪುಲೆ. ಬಲ್ಯ ಹೊಟೇಲ್‌ಲ್ ಓರ್ ಖಾಯಂ ರೂಂ. ಆಂಡ ಎದ್‌ಕೆ "ಟಿಂಬರ್ ಮರ್ಚೆಂಟ್ ಮಾಚಯ್ಯ"ಂದ್ ಬೋರ್ಡ್! ಜಮ್ಮತ್‌ಂಜಿ ಮರ ಮಾರ್‌ನದಲ್ಲತೆ ಇಂವೊನೆಕ್ ಮರ್ಚೆಂಟ್ ಆಯೇಂದ್ ದಾಕೂ ಗೊತ್ತಿಲ್ಲೆ. ಇಕ್ಕ ಸಾಧಾರಣ ತೋಯಂಗಳೆಲ್ಲ ಮಾಚುನ ತಕ್ಕ್‌ಪರ್‌ಚಿರಂಡಿಕೆ ಬೇರ್‌ಚಿರಂಡು!

\* \* \*

ದೇವಯ್ಯ ಮಣ್ಣ್‌ಲೇ ನಯಿಚಿತ್ ಉಂಬಕ್ ತಿಂಬಕ್ ತೊಂದರೆಯಿಲ್ಲೆ. ಆಚೇಂಗು ತಾಂಡ ತೋಟತ್ ಫಸಲ್ ಬರಂಡಿಕೆ ಇಂಞೂ ದಂಡ್‌ಕಾಲ ಬೋಂಡು. ಮನೆಲುಳ್ಳ ಮೂಡಿರ ಮಂಗಲ ಕಯಿಕತೆ ಬೆಚ್ಚವ ಕಯ್ಯುವೆ? ನಲ್ಲೋರ್ ತಂದೂ ಬಂದಿತ್ ಮಂಗಲತ್‌ರ ವಿರ್ಪಾಡಾಚಿ. ಎಲ್ಲಾ ಕೊರು ತೇಂದತ್. ಮೋವಕ್ ಪತ್ತಾಕ್ ಒಂದ್ ಮಾತ್ರ ಆಯಿಲೆ.

ದೇವಯ್ಯಂಡ ಪೊಣ್ಣ್ ಎಣ್ಣ್‌ಚಿ - "ಮಾಚು ಬಾವನ ಕೇಟ್‌ನೋಟಿ. ಚೆನ್ನ ದಿನಕ್ಕೆನ್ನೆ! ಮೂರ್ತ ಕಯಿಂಜಾಂಡ ಪಿತ್ಯಾಂದ್ ಮೂಡಿರ ಕೈಕ್ ಕ್‌ಟ್ವೊನ ಪಣತಾನ ಕೊಡ್‌ತರನ. ಅಯಿಂಗಕ್ ಮರತ್‌ಲ್ ಈ ಮಾದರಿ ದುಡ್ಡ್‌ಕ್‌ಟ್ವೊಚಿ. ಅವಂಡ ದಿನತ್‌ರ ಖರ್ಚೆ ಇನ್ನೂರಾಂಗ್ ಕಮ್ಮಿಯಿಲ್ಲೆ, ಏದ್‌ಂಗೂ ಒರ್ ಆಯಿರ ಕೇಳಿ."

ಅಂದ್ ಮೋಟಾರ್ ಸೈಕಲ್‌ಂಜಿ ಉಳ್‌ಪಿತ್ ಬಂದಂವೊ ಪಣ ತಪ್ಪದುಂಡಾ? ಮಂಗಲ ಬಂದ್ ಮೂಡ್‌ಕ್ ಮುಟ್ಟಿ ಪೋಚಿ. ಎನ್ನೇಂಗಾಡ್, ನೋಟುವೀಂದ್ ಮಡಿಕೇರಿಕ್ ತಂಗೆನೊ ಕೂಟಿಯಂಡ್ ಬಂದಿತ್ ಮಾಚುನ ಒನ್ನಾಂದ್‌ಡೀ ಪಾರಕಾತಿತ್, ಬಂಡ ಬುದ್ಧಿತ್ ದೇವಯ್ಯ ತಾಂಡ ಪೊಣ್ಣ್ ಎಣ್ಣ್‌ನ ಸಂಗತಿನ ಮಾಚುಕೆಣ್ಣ್‌ಚಿ.

ಚೆನ್ನ ಗೇನ ಮಾಡಿತ್ ಮಾಚು - "ದೇವಯ್ಯ, ಪಣ ತಪ್ಪದ್ ಬಲ್ಯದಲ್ಲ. ಆಚೇಂಗಿ ನೋಟ್, ಪೊದಪಕ್ ಉಳ್ಳಚ್ಚಕ್ ಕಾಲ್ ನೋಟಂಡು. ನೀಡ ಕೈಲಿಲ್ಲತ ಪಿಂಞ ಸಾಲ ಸೋಲ ಮಾಡುವಕ್ಕಾಗ. ಉಳ್ಳಾಲ್ ಸುಧಾರಿಚಿರುವಕ್ ಪಡಿಕಂಡು. ನೀಡ ತಂಗೆ ಪೊನ್ನಾರ ಮಾಲ್‌ಟ್ವೊಟ ಮಾತ್ರಕ್ ಬಲ್ಯ ಸಾವುಕಾರಂಡ ತಂಗೆ ಆಯಿರುವಾ? ಇನ್ನನೇ ಕೊಡವ ಪಾಳಾಯೆ. ಕೈಲ್ ಇಲ್ಲೇಂಗಿಯೂ ಬೋಡಿತ್ ಮಾಲ್ ಮಟಾಂದ್ ಮನೆ ತಂವುತ್ತಿಯವ. ಪೋಪ ಮೂಡಿಯಕ್ಕೆನ್ನೆ, ಮನೆ ಒಡ್‌ಕಿಯೆಂಡೇ ಪೋಯಿರುವ. ನೀನ್ ಗೇನ ಮಾಡಂಡ. ಇಕ್ಕ ಬಲ್ಯ ಬಲ್ಯವು ಎಲ್ಲ ಪೊನ್ನಾರ ಪೂದಿ ಬುಟ್ಟಿತ್, ರಿಜಿಸ್ಟರ್ ಮಂಗಲಕ್‌ಚಿತ್.



ಕೈಲ್ ಬಾಯಿಲ್ ಇಲ್ಲತ ದರಿದ್ರಂಗೆ ಆ ಪೂದಿ ಬುಟ್ಟಿತಿಲ್ಲೆ. ಅಲ್ಲಾ, ನಲ್ಲೋಣೆ ಗೇನ ಮಾಡ್"ಂದ್, ಕೊಡವಳೆಲ್ಲ ಕೂಟತ್ತೇ ಬಜ್ಜಿತ್ ದೇವಯ್ಯಂಗ್ ನಾಲ್ ಉಪದೇಶತ್ ತಕ್ಕ್ ಪರಂದತ್.

ಮಂಗಲಕರ್ತಿನ ನೋಟಿತ್ "ನೀನ್ ಚೆನ್ನ ಗೇನ ಮಾಡವ್ವ. ಅಣ್ಣಂಡ ಮನೆ ತಂವುತಿತ್ ಮಾಲ್ ಇಟ್ಪಟಕ ನೀನೆಂತ ಬಲ್ಯ ಉದ್ದಾರ ಆಯಿರುವೊ. ನೀನೂ ಹಟ ಪುಡಿಪದ್ ಚಾಯಿಯು"?ಂದ್ ಕೇಟಿತ್.

ಅನ್ನನೆ ನೀಕ್ ಮನಸ್ಸುಂಡೇಂಗಿ ದೇವಯ್ಯ, ನೀಡ ತೋಟಿತ್ಲ್ ಚೆನ್ನ ಮರ ಉಂಡಲ, ನಂಗಡ ಖಾದರ್ ಕ್ಕೇ ಕೊಡ್. ಬೋಂಡಿಕೆ ನಾನೇ ಕೂಟಿಯ ಬಪ್ಪಿ. ಸಾಲ ಎನ್ನಂಗ್ ಮಾಡುವಿಯಂದ್ ಪುದಿಯ ಸಲಹೆ ಕೊಡ್ತತ್.

ಇಂಞಿ ದೇವಯ್ಯಂಗ್ ತಕ್ಕ್ ಇಲ್ಲೆ. ಪೊರಟ್ ಬಾತ್. ತಾಂಡ ಶಕ್ತ್ಯಾನುಸಾರ ತಂಗರ ಮಂಗಲೋ ಕಯಿಚಿತ್.

ಇನ್ನನೆ ತೊಂದರೆಲ್ ಬುದ್ಧ ಚೆನ್ನ ಜನಡ ಮರತ್ ನ ಖಾದರ್ ಕ್ ಕೊಡ್ ಪಚಿಟ್ಟಿತ್. ತಾನೂ ಖಾದರ್ ಏಜಂಟಾಯಿತ್ "ಟಿಂಬರ್ ಮರ್ಚೆಂಟ್"ಂದ್ ಬೋರ್ಡ್ ಇಟ್ಟಿದ್ ಸಾರ್ಥಕ ಆಚಿ!

ಇಂಞಿ ಮಾಚುನ ನಂಬನಕ್ಕ ಆಯಿಲೇಂದ್ ಮುತ್ತಣ್ಣಜ್ಜ ದೇಚುರ ಮಾವಂಗಡ ಸಹಾಯತ್ ದೇಚುರ ಮಂಗಲತ್ ಏರ್ಪಾಡೂ ಮಾಡ್ ಚಿ. ಮಾಚು ಎಕ್ಕೇಂಗಿ ಓರಮ್ಮ ಬಂದಿತ್ ತಂಗರ ಮಂಗಲತ್ ವಿಷಯತ್ ಬಲ್ಯ ಎಚ್ಚರವೊಂದೂ ಎಡ್ಕತೆ ಪೋಪಯಿಂಜತ್. ಅವ್ವಂಡ ಮಾಲ್ ಮಟ್ಟಿ ಎಲ್ಲ ಸರಿಕೂಟಿತ್ ದೇಚುನ ಬೆಂಗಳೂರಲೇ ಚಾಕ್ರಿಲುಳ್ಳ ಬೋಪಣ್ಣಂಗ್ ಕೊಡ್ ಪಂದಾಚಿ.

ಮಂಗಲಕ್ಕ ಒನ್ನಂದೆಕ್ ಮಿಂಞಿ ಮಾಚು ತಾಂಡ ಸಿನೇತ್ ಕಾರಂಗ, ಫಾರೆಸ್ವಕಾರ, ಏಳೆಟ್ವ ಮಾಪಳೆಯ, ಮಲಯಾಳಕಾರ, ಸಾಹುಕಾರಂಗಳೆಲ್ಲ ಜೀಪುಲೂ ಕಾರುಲೂ ಕೂಟಿಯಂಡ್ ಬಾತ್. ಮನೆಲುಳ್ಳ ಕುರ್ಚಿ, ಕಟ್ಕಡಿಕೆ, ಎಲ್ಲ ಇವಂಡ ಸಿನೇತ್ ಕಾರಕ್ಕ. ತಾಂಡ ಬಲ್ಯ ಬಲ್ಯ ಸಿನೇತ್ ಕಾರಕ್ ಬೋಂಡಿಯಂತ ಬ್ರಾಂಡಿ ಬೀರ್ ಎಲ್ಲ ಮಾಚುರ ಸ್ವಾಧೀನ. ಏದ್ ಬೆಂದ್ ಕಳೂ ಅವಂಡ ಕೋಂಬರೆಕ್ ಪೋಪನ್ನಕ್ಕೆ ಇಲ್ಲೆ. ಬಂದ ಬೆಂದ್ ಕ ಪಣಿಕ್ ಮಾತ್ರ.

ಮುತ್ತಣ್ಣಜ್ಜ ಪಿಂಞ ದೇಚುರ ಮೂಡ್ ನೋಟಿತ್ ಊರ್ಕಾರ, ಮನೆಕಾರ, ಬೆಂದ್ಕ ಓಡಿಕ್ಕಳಚಿತ್ ಮಂಗಲ ತೇತತ್. ಚೆನ್ನದಿನತ್ ದೇಚು ವಡಿಯನ ಕೂಟಿಯ ಬಂದಿತ್ ಅಪ್ಪನ ಬೆಂಗಳೂರ್ಕ್ ಕೂಟಿಯಂಡ್ ಪೋಚಿ.

ಇಕ್ಕ ಮಾಚುಕ್ ಮನೆಕ್ ಬರಂಡಿಯ ಕಪ್ಪೋ ತಪ್ಪಚಿ. ಭೂಮಿನ ಪಡ್ಬುಟ್ಟತ್. "ಭೂಮಿ ನಟ್ಟಿತ್ ಎನ್ನಲಾಭ, ನಯಿಪದೊಂದೇ ಬಪ್ಪ"ಂದ್ ಎಣ್ಣಿಯಂಡ್ ತಿರ್ಗಚಿ.

ಮಾಚುಕ್ ದಂಡ್ ಕಡೆಂಜಿ ಪೋಣ್ಣತಕ್ಕ ಪರಂದವು ಇಲ್ಲತೆಂಜಾಲೆ. "ನಾಡ ಮಟ್ಟಿಕ್ ಆ ಮಾಸ್ತರರ ಮೋವಳಾ, ಪೋಲೀಸ್ ರೈಟ್ರ ಮೋವಳಾ"ಂದ್ ಎಣ್ಣುವ ಗತ್ತರ ತಕ್ಕ ಕೇಟಿತ್ ದಾರೂ ಅವಂಡ ಮಂಗಲಕ್ ಮಿಂಞಕ್ಳೆಂಜಿಲೆ.

ಮಾಚುರ ಅರುವದೇಕೆ ಕಾಡಲ್ ಒರ್ಕೆಟ್ಪ ಪುಳ್ಳಿ ಇಲ್ಲತೆನ್ನೆಕೆ ಒಡತಿತ್ ಮಸಿ ಚುಟ್ಟಿತ್ ಆಚಿ. ದೇಚುರ ಮಂಗಲಕ್ ಚೆನ್ನ ಮಿಂಞ ಕಾಡಲ್ ಮಸಿ ಚುಡುವಾನ ನೋಟಿತ್ ಮುತ್ತಣ್ಣಜ್ಜ - "ಅವ್ವಾ, ನೋಟಿಲ್ಲಿ ನಾಡ ಚಾವು ಚುಟ್ಟುಂಡುಂಡ್. ಇಂಞಿ ನಾಡ ಚಾವು ಚುಡುವಕೂ ಪುಳ್ಳಿಯಿಲ್ಲೆ. ನನ್ನ ಕುಂಡ್ಕಟ್ಟಿತ್ ಪೂತಾರಿ"ಂದ್ ಕಣ್ಣನೀರ್ಪುಂಡ್ ಎಣ್ಣಚಿ.

ಸುತ್ತುಮುತ್ತು ಉಳ್ಳ ಪೈಸಾರಿರ ಮರತ್ನೊ ಸಾಗ್ಚಿಟ್ಟಿತ್ ಮುತ್ತಣ್ಣಜ್ಜಂಡ ಜಮ್ಮತ್ಲೇ ಮಸಿ ಚುಟ್ಟಿತ್. ಕಾಡ್ ಪೋಯಿತ್ ಊರ್ಕಾರಡ ಅತ್ತಮೇವಕ್ ಬಾಣೆ ಆಚಿ. ಮರ ಕೆತ್ತುವಕ್ ಬಂದ ಮಲಯಾಳಕಾರ ಪೈಸಾರಿಲ್ ಇಟ್ಟಿಂಡಿಂಜ ಗುಡಿಸಲಾರ ಸುತ್ತ ಬಾಳೆ ನಟ್ಟಿತ್. ಗುಡಿಸಲಕ್ ಗೋಡೆ ಬೆಚ್ಚಿತ್ ಪೋಣ್ಣ ಮಕ್ಕಳ ಊರ್ಂಜಿ ಕಾಕಿಚಿಟ್ಟಿತ್. ಕೂಪ್ ಪೋನದು ನೆಲೆತಾಂಗಿ ನಿಂದತ್. ಊರ್ಕಾರಡ ಅತ್ತ ಅಯಿಂಡ ಬಾಳೆ ಗಿಡ ತಿಂದಕ, ದವುತಿ ಕೆತ್ತುವಕ್ ಸುರು ಮಾಡ್ಚಿ. ಸುಮಾರಾಳ್ ಕೊಚ್ಚಿ ಕ್ರಿಶ್ಚಿಯನ್ಕಾರ. ದಾಡ ದಾಡದೊ ಅತ್ತ ಕಾಂಬಾಲೆಂದೂ ವಾರಕ್ಕೋರ್ ಪುಕಾರ್!

ಮರ ವ್ಯಾಪಾರಿ ಎಣ್ಣನ ಪಿಂಞ ಅಂವೊ ಕಾಂಗ್ರೆಸ್ ಕಾರಂದ್ ಎಣ್ಣೆತರಂಡಲ್ಲ! ಕಾಂಗ್ರೆಸ್ಕರ ಕವಚ ಇಲ್ಲತೆ ಮರ ಕಪ್ಪಕಯ್ಯುವಾ? ಫಾರೆಸ್ಕಾರಳ ಅಡಕಿ ಬೆಪ್ಪ ಕಯ್ಯುವಾ? ಮಾಚುಕ್ ಕಾಂಗ್ರೆಸ್ಕರ ಕವಚ ಕಟ್ಟಿತ್. ಪೈಸಾರಿಲ್ ನಿಂದ ಮಲಯಾಳಕಾರಡ ರಕ್ಷಣೆಕ್ ಇಂದ್ ಮಾಚು ಮಿಂಞಕ್ ನಿಂದತ್.

ನೆರೆಮನೆಕಾರ ಮನೆ ಕೆಟ್ಟುವಕ್ ಕೆತ್ತಿತ್ ಈರ್ಚಿಟ್ಟಿ ಮರ ಪೈಸಾರಿರ ಮರಾಂದ್

ಫಾರೆಸ್ಟ್ ಸ್ಕ್ವಾಡ್‌ನ ಕೂಟಿಯಬಾತ್. ಖಾದರ್ ಕೆತ್ತನ ಮರತರ ಕುತ್ತಿನ ಕಾಟ್‌ಚಿ. ಶಿಫ್ಟ್ ಮಾಡ್‌ಚಿಟ್ಟಿತ್. ತಿಂಬಕ್ ಇಲ್ಲ ತಿಪ್ಪಕ ಜೋಸೆಫ್ ಎಣ್ಣುವಂವೊ ದೇವಯ್ಯಂಡಲ್ಲಿ ಒರ್ ಚೆಂಬ್‌ಕಲ ಅಡುಬೆಚ್ಚಿತ್ ಒರ್ ಬಟ್ಟೆ ನೆಲ್ಲ ಕೇಟಂಡಿಂಜತ್. ಇನ್ನನೆ ಊರ್‌ಲ್ ಜನ ಅಪ್ಪರಿಪ್ಪರ ಕೈ ಮರಿಚಂಡ್ ಬದುಕುವಯಿಂಜತ್.

ಒನ್ನಾಂದ್ ರೆವಿನೂ ಇನ್ಸ್‌ಪೆಕ್ಟರ್‌ನ ಕೂಟಿಯ ಬಂದಿತ್ ದೇವಯ್ಯಂಡಲ್ಲಿಂಜ ಚೆಂಬುಕಲ ಬಲ್‌ಚಿ ಕೊಡ್‌ತತ್. ಇದ್ ಋಣ ಪರಿಹಾರ ಕಾನೂನ್‌ಂದ್ ಎಳಕ್‌ಚಿ. ದೇವಯ್ಯ ಮರ್ಯಾದಿಕ್ ಬೊತ್ತಿತ್ ಕೊಡ್‌ತ ನೆಲ್ಲನೊ ಕೇಟ್‌ಲೆ. ಮಾಚು ಬಪ್ಪಕ ಮಲಯಾಳಕಾರ ಸುತ್ತು ಕೂಡಿತ್ ಮಂತ್ರಿಕ್ ಕೊಡ್‌ಪ ಮರ್ಯಾದಿ ಕೊಡ್‌ಪಯಿಂಜತ್.

ಮರತರ ದುಡ್ಡೆಲ್ಲ ಮಾಚುರ ಕೈಲ್ ಮಾಯ ಆಚಿ. ಇಕ್ಕ ಬ್ರಾಂಡಿ, ವಿಸ್ಕಿ ಎಲ್ಲಿಂಜಿ? ಈ ಪೈಸಾರಿಕ್ ಕೊಡ್‌ನ ಕ್ರಿಶ್ಚಿಯನ್ನಡ ಬದುಕುವ ಉದ್ಯೋಗವೇ ಕಳ್ಳಾ ಕಾಚುವದ್. ಮಾಚು ದುಡ್ಡ್ ಕೊಡ್‌ಕಂಡೂಂದಿಲ್ಲೆಲ್ಲ!

ಇಕ್ಕಣೆ ಖಾದರ್‌ರ ಬಯ್ಯ ಇಂಜತ್. ಮರತೇಂದ ಪಿಂಞ ಖಾದರ್‌ಕೆನ್ನ ಕಾರ್ಬಾರ್? ಖಾದರ್ ಕೈ ಬುಟ್ಟಿನ್ನೆಕೆ ಆಚಿ.

ಹೋಟೆಲ್ ಸಾಹುಕಾರ ಆರ್ ತಿಂಗತರ ಬಾಡಿಗೇ ತಂದಿತಿಲ್ಲೆಂದ್ ರೇಡಿಯೋ, ಟೇಪರೆಕಾರ್ಡರ್ ಎಲ್ಲ ಬಲ್‌ಚಂಡ್ ರೂಮ್‌ಕ್ ಬೀಗ ಇಟ್ಟಿತ್ ಮಾಚುರ ಬೋರ್ಡ್ ಬಲ್‌ಚಿ ಚಾಡ್‌ಚಿ.

ಇಕ್ಕ ಮಾಚುಕುಳ್ಳ ಒರೇ ಬಂಡವಾಳ "ಕಾಂಗ್ರೆಸ್ ಲೀಡರ್"ಂದ್ ಮಾತ್ರ! ಅವನೇ ಕಾಕಿಯಂಡ ಪೆದ, ಪೈಸಾರಿಲುಳ್ಳ ಕೇರಳಕಾರಡ ಕೂಡ ಅವಂಡ ಚೆನ್ನ ನಡೆಪಯಿಂಜತ್.

"ಅಯ್ಯೋ ಇನ್ನತ ಎಚ್ಚಕ್ಕಾಳನ ಕಂಡಿತಿಲ್ಲೆ. ಇದೆಲ್ಲ ಎಕ್ಕಣೆಕ್"ಂದ್ ಊರ್‌ಕಾರ ಒಳಿಯ ತಕ್ಕ ಪರಂದಕಲೂ ಮಾಚುರ ಎದಿಕೆ ಎಣ್ಣುವದ್ ಕಷ್ಟ. ಪೊಲೀಸ್‌ಕಾರಳೂ ಮಾಚುಕ್ ಸೈಡ್ ಬುಟ್ಟಿತ್ ಪೋಲೀಸ್ ಸಲ್ಯುಟ್ ಇಡುವಯಿಂಜತ್. ಆಂಗ್ ಸೆರಿಯಾಯಿತ್ ಎಮರ್ಜೆನ್ಸಿ ಬಂದದೂ, ಮಾಚು ಆಳುವ ಪಕ್ಷಕಾರಡ ಬಯ್ಯ ಸುತ್ತುವದೂ ಕಂಡ ಪಿಂಞ ಏದ್ ಪೋಲೀಸ್‌ಕಾರ ಬೊತ್ತಿಕ್ಕು?

ಹೋಟೆಲ್‌ಕಾರ ಮಾಚುನ ಪೊರಮೆ ಇಟ್ಟ ಸಂಗತಿ ಬಾರ್ ಕಾರಂಗ್ ಗೊತ್ತಾಚಿ. ಅವಂಡ ಎಕೌಂಟ್ ನೋಟಿಪಾಪದು ನಾಲಾಳನ ಕೂಟಿತ್ ಮಾಚುರ ಮೋಟಾರ್ ಸೈಕಲ್‌ನ ಎಳೆದ್‌ಚಿಟ್ಟುಂಡ್ "ಇಂಞಿ ಬರತೆ, ಇದಾಂದ್" ಕ್ವಾರ್ಟರ್ ಬಾಟ್ಲ ಕಮ್ಮಿ

ಕ್ರಿಯತಾರ ರಮಾ ಕೈಕ್ ಕೊಡ್ತಿತ್ "ಮನೆಲ್ ಕುಡ್ಚ"ಂದ್ ಎಣ್ಣೆತಯಿಚತ್.

ಮಾಚುರ ಅಡಿ ಆಳನದ್ ಪೊರಮೆ ಜನಕ್ ಇಂಞೂ ಗೊತ್ತಾಯಿಲೇಂಗಿಯೂ ದೇವಯ್ಯಂಗ್ ಗೊತ್ತಾಯಂಡೇ ಉಂಡ್. ದೇವಯ್ಯನಗುಂಡ್ ಬೆಂಗಳೂರ್‌ಲುಳ್ಳ ದೇಚುಕೂ ಎತ್ತಿತ್.

ಒನ್ನಾಂದ್ ಖಾದರ್‌ನ ತೇಡಿ ಪುಡ್ಚಿತ್ ಮಾಚು ಚೆನ್ನ ದುಡ್ಡ್ ಕೇಟತ್. ಮಲಬಾರ್ ಮಾಪಳೆರ ಮಂಡೆ ಓಡತಿಪ್ಪ? "ಅಂದಕ ಮಾಚು, ನಾಡ ಒರ್ ಬೆಂದ್‌ಕ ದುಬಾಯಿಂಜಿ ಬಂದಿತ್. ಚೆನ್ನ ಜಾಗ ಬೋಂಡುವಲೊ. ನೀಡ ಮರ ಕೆತ್ತನ ಜಾಗ ಉಂಡಲ್ಲ, ಅದ್‌ನ ಕೊಡ್. ನಲ್ಲ ರೇಟ್ ತಪ್ಪಿ"ಂದ್ ಎಣ್ಣೆಚಿ. ಯಜಮಾನಾಂದ್ ಕಾಕಿಯಂಡಿಂಜಂವೊ ಇಂದ್ ಮಾಚೂಂದ್ ಕಾಕ್‌ನದ್ ಕೇಟಿತ್ ಮಾಚುಕ್ ಮಂಡೆಕ್ ಮರ ಬುದ್ದನ್ನೆಕೆ ಆಚಿ. ದಾಡ ಕೂಡ ಎಣ್ಣುವೊ?

ಜಾಗ ಮಾರುವ ತಕ್ಕಾ ಬಾಕ್ ಆಚಿ. ಅಪ್ಪಂಡ ಸೈನ್ ಇಲ್ಲತೆ ಮಾರುವಕಯ್ಯ. ಬೆಂಗಳೂರ್‌ಕ್ ಪೋಯಿತ್ ಇಡ್‌ಚಿಟ್ಟುಂಡ್ ಬಕ್ಕಾಂದ್ ತೀರ್ಮಾನ ಆಚಿ. ಜಾಗ ಮಾರಾಟ ಎಣ್ಣೆಚೇಂಗಿ ಅಪ್ಪ ಸೈನ್ ಇಡುವಕ್ಕಿಲ್ಲೆ. ತೋಟ ಮಾಡುವಕ್ ಬ್ಯಾಂಕ್ ಸಾಲ ಎಡ್‌ಪಕುಳ್ಳ ಫಾರಂಮ್‌ಂದ್ ಸೈನ್ ಇಡ್‌ಚಿಟ್ಟುಂಡ್ ಬಕ್ಕಾಂದ್ ಖಾದರೇ ಕೆಣಿ ಎಣ್ಣೆ ಕೊಡ್‌ತತ್.

ನಾರಾಚಿ ದೇಚೂ, ಬೋಪಯ್ಯನೂ ಮ್ಯಾಟ್ಟಿ ನೋಟಿತ್ ಬರಣೆ ಮನೆಲ್ ಅಣ್ಣಯ್ಯ ಮಾಚೂ ಅಪ್ಪನೂ ಕೋಂಬರೆಲ್ ತಕ್ಕಾ ಪರೆವದ್‌ಕಾಂಬ. ಇಂದಾಕಣೆ ಬರತ ಅಣ್ಣಯ್ಯ ಇಂದ್ ಬಂದದ್ ನೋಟಿತ್ ದೇಚುಕ್ ಒರ್ ತರ ಕರಕರೆ ಆಚಿ. ಪಳೆಯದೆಲ್ಲ ಮರಂದತ್. ಎಡೆ ಎಡೆಕ್ ಮಲೆಯಾಳ ತಕ್ಕೂ ಕೇಪ. ಅಕ್ಕ ದೇಚುರ ಒಡಿಯ ಬೋಪುಣಿ ಪೋಯಿತ್ ಪೆರ್ತ್ ಕುಶಿಲ್ ತಬ್ಬಿಯಂಡ್ ತಕ್ಕಾ ಪರಿವಂಜಿ ದೇಚುಕ್ ಕಾಕಿತ್ ಎಣ್ಣೆಚಿ.

ಮೇಜಿಲ್ ಒರ್ ಫಾರಂ, ಸ್ಟಾಂಪ್ ಪೇಪರ್‌ಲ್ ಅರ್ಜಿ ಎಲ್ಲ ಕಾಂಬ. ಅದ್‌ಲ್ ಅಪ್ಪಂಡ ಸೈನೂ ಆಯಿತ್. ದೇಚು ಮೆಲ್ಲೆ ಓದಿ ನೋಟಿಚಿ. ತಕ್ಕಾ ಪರಿವಂವ ಖಾದರ್‌ಂದ್ ಗೊತ್ತಾಚಿ. ಕೇರಳತ್‌ಲ್ ಹೋಟೇಲ್‌ಲ್ ಆನ ಕತೆ, ತಾಮನೆರ ಕತೆ ಎಲ್ಲ ಒಮ್ಮಕೇ ಗೇನ ಬಾತ್. ಕಣ್ಣೇ ಕಾಂಗತನ್ನೆಕೆ ಆಚಿ.

ಕೋಂಬರೆಕ್ ಯಾಲೆ ಕೂಡ್‌ಚೋ ಎನ್ನೋ! ಪಟ್ಟಿಂಂದ್ ಸದ್ ಬಾತ್! ಖಾದರ್‌ರ ಬೊಳತ ದುಂಬ್‌ನ ದವಡಲ್ ಬಾತ್‌ರೂಮ್ ಚಪ್ಪಲ್‌ರ ಅಚ್ಚೊತ್ತ

ನನ್ನಕೆ ಬುದ್ಧತ್! ನೆತ್ತಿಲ್ ಕಾಕರಿಚ್ಚೆ ತುಪ್ಪನದ್ ಅನ್ನನೇ ಪತ್ತಿಯಂಡಿತ್!

ಬೋಪುಣೆಕ್ ಒಂದೂ ಗೊತ್ತಾಕತೆ ಪೊಣ್ಣರ ರಟ್ಟೆ ಪುಡ್ಚಂಡ್ ಅಡಿಗಮನೆಕ್ ಈತಬಾತ್ ಕೂಡೆನ್ನೆ. ಚೆನ್ನ ಅಳತಿತ್ ಚೆಡಿ ತಣ್ಜೆಂಬದು ಅಣ್ಣಯ್ಯನ ತಕ್ಕ ಪರಾಚಿನಾಂದ್ ಬಕ್ಕಣೆ ಅಪ್ಪ ಒಬ್ಬನೇ ಉಳ್ಳೊ! ಅಯಿಂಗಲ್ಲ ಎಲ್ಲಿಯಾಂದ್ ಕೇಕಣೆ "ಪೊರಮೆ ಪೋಚಲ್ಲ"ಂದ್ ಅಪ್ಪ ಎಣ್ಣೆಚಿ. ರೋಡ್‌ಲ್ ಓರ್ ಆಟೋರಿಕ್ಷಾ ಅಪ್ಪರ ಪೋಚಿ, ಬೋಪುಣೆ ಒಬ್ಬನೇ ಬಾತ್.

ಬೋಪುಣೆಕ್ ಪಳೆಯ ಸಂಗತಿ ಎಣ್ಣುವಾಂಗ್ ಮಿಂಞ ಮೇಜಿಲಿಂಜ ಸ್ವಾಂಪ್ ಪೇಪರ್ ತೇಡ್‌ಚಿ, ಕಾಂಬ್‌ಲೆ.

ಕೇರಳತ್ತ್ಂಜಿ ಬಂದಿತ್ ಕೊಡಗ್ ಮುಡಿಚವಂಗ್ ತುಪ್ಪಿತ್ ಚಪ್ಪಲ್ ಪೂಚೆವನ್ನೋ ಆಚಿ. ಎನ್ನ ಫಲ? ತಾನ್ ಬಂದ ಕಾರ್ಬಾರ್ ತೇತಿತ್ ಆ ಪೇಪರ್ ಎಡ್‌ತಂಡೇ ರಿಕ್ಷಾ ಪತ್ತಿತಿಂಜತ್!

ಪಳೆಯ ಕತೆನಲ್ಲ ದೇಚು ಬೋಪುಣೆಕ್ ಎಣ್ಣೆಚಿ. ಅಪ್ಪಂಡ ಸೈನ್ ಇಡ್‌ಚಿಟ್ಟಿ ಜಾಗ ಮಾರಾಟತರ ಕರಾರ್ ನೋಟೊನದೂ ಎಣ್ಣೆಚಿ. ಇದ್ ಕೇಪಕ ಮುತ್ತಣ್ಣಜ್ಜ "ಎಂತವ್ವಾ ಜಾಗ ಮಾರುಲೇಂದ್ ನಾಕ್ ಪೊಟ್ಟಿ ಪರಂದಿತ್ ಸೈನ್ ಇಡ್‌ಚಿಟ್ಟಿತ್"ಂದ್ ಎಣ್ಣೆತ್ ಕಟ್ಟರ ಬರಿಕ್ ತಾಂಗ್‌ಚಿ.

ಎಟ್ತ್ ದಿನ ಎಂತದಲ್ಲೋ ತಕ್ಕ ಪರಂದಂಡಿಂಜ ಮುತ್ತಣ್ಣಜ್ಜ ಒನ್ನಾಂದ್ ದೇವಯ್ಯನ ಕಾಂಗಂಡೂಂದ್ ಎಣ್ಣೆಚಿ. ಟೆಲಿಗ್ರಾಂ ಮಾಡಿತ್ ದೇವಯ್ಯ ಬಾತ್. ದೇವಯ್ಯಂಡ ಕೈಪುಡ್‌ಚಂಡ್ ಎಂತ ಎಣ್ಣೆಚೋ ದಾರ್‌ಕೂ ಅರ್ಥ ಆಯಿಲೆ. ಕಣ್ಣಲ್ ನೀರ್ ಬುದ್ಧಂಡಿಂಜನ್ನೆಕೇ ಮುತ್ತಣ್ಣಜ್ಜ ಕಣ್ಣ ಮುಚ್ಚಿಚಿ.

ಚಾವುನ ಕೊಡಗ್ಕ್ ಎಡ್‌ತ ಬಾತ್. ಮನೆರ ಬೀಗ ಪೊಳಚಿತ್ ಕೂಡ್‌ಚಿ. ಮಾಚು ಎಲ್ಲಿ ಉಂಡ್‌ಂದ್ ದಾರ್‌ನ ಕೇಪೊ? ಚಾವು ಚುಡುವಕ್ ಪುಳ್ಳಿ ಎಲ್ಲಿ ಕೆತ್ತು ಪೋಂದ್ ಊರ್‌ಕಾರ ಕೇಟತ್, ಅರುವದ್ ಏಕ್ರೆ ಕಾಡ್‌ಲ್ ಇಂದ್ ಗಾಂಧಿ ಗುಲಾಬಿ ಮಾತ್ರು ಉಳ್ಳ ದೇವಯ್ಯಂಡ ತೋಟತ್‌ಂಜಿ ಪುಳ್ಳಿ ಕೆತ್ತಿತ್ ಚಾವು ಚುಟ್ಟಿತ್ ಮನೆಕ್ ಬಾತ್.

ಮುತ್ತಣ್ಣಜ್ಜಂಡ ಮನೆರ ಎದಿಕೆ ಕಟ್ಟೋಳೆ ಪಡಿ ಬುಟ್ಟಿತ್ ಬಾಕಿ ಒಳ್‌ಲುಳ್ಳ ಕಟ್ಟೋಳೆ ಪಡಿ, ಮಚ್ಚಿ ಬುಟ್ಟಿ, ಮರತಾರ ಸಾಮಾನೆಲ್ಲ ಮಾರಿತಾಯಿತ್‌ಂದ್ ದೇವಯ್ಯ ಎಣ್ಣೆನ-ತಕ್ಕ ನೇರ್.

ಅಪ್ಪ ಚತ್ತ ಬೇಜಾರ್ ದೇಚುಕ್ ಇಲ್ಲೆ. ತಾಂಡ ತಾಮನೆಕ್ ಬಂದ ದುರ್ಗತಿನ ಕಂಡಿತ್ ಒಬ್ಬಳೇ ಮೊರಟತ್. ದಂಡ್ ದಿನತ್‌ಲ್ ಮಾಚು ಬಾತ್. ದಾಡದೊ ಅಪ್ಪ ಚತ್ತನ್ನಕೆ ತಿರ್‌ಗ್‌ಚಿ. ದೇಚುವೇ ಖರ್ಚಿ ಮಾಡಿತ್ ದೇವಯ್ಯಂಡ ಮನೆಲ್ ಮಾದ ಕಯಿಚಿತ್ ಪೋಚಿ. ಪೋಪಕ ತಾಂಡಪ್ಪಂಡ ಮಣ್ಣ್‌ಮನೆನ ಒಮ್ಮ ನೋಟಾಚಿ. "ಆಣ್ ಪುಟ್ಟಿತ್ ಈ ಮಣ್ಣ್‌ ಮನೆನ ತಾಂಗ್‌ಲೆ, ಪೋಣ್ಣಾನ ನಾನ್ ಮುಂಡತಿಪ್ಪದಾ?"ಂದ್ ಎಣ್ಣೆಯಂಡ್ ಪೋಚಿ.

\* \* \*

ಮುತ್ತಣ್ಣಜ್ಜಂಡ ಸೈನ್‌ಕ್‌ಟ್‌ನ ಪಿಂಞ ಖಾದರ್‌ರ ಓಟ್‌ಗಳಿ ಜಾಸ್ತಿ ಆಚಿ. ಜಾಗ ಸರ್ವೆಕ್ ಬಂದಿತ್ ನೋಟಣೆ ಸುಮಾರು ನುಪ್ಪದ್ ಏಕ್ರೆಕ್ ಪೈಸಾರಿಲಳೆತ ಮಲಯಳಕಾರ ಬೇಲಿ ಇಟ್ಟಿತ್ ಮರಕಳ್‌ಂಜಿ, ಕೇಂಬು, ಬಾಳೆ ನಟ್ಟಿತ್ ಆಯಿತ್.

ಅಯಿಂಗಡ ಕುಡಿ ಒಪ್ಪಿತ್ ಜಾಗ ಖಾಲಿ ಮಾಡಿತರಂಡು, ಅಂದಕೇ ರಿಜಿಸ್ಪರ್ ಮಾಡನ, ಇಲ್ಲೇಂಗಿ ಅಲಾಯಿದ ಉಳ್ಳ ನುಪ್ಪದ್ ಏಕ್ರೆನ ಇಕ್ಕ ರಿಜಿಸ್ಪರ್ ಮಾಡನ ಎಣ್ಣೆಚಿ, ಖಾದರ್. ಮಾಚುಕ್ ಬೋರೆ ಬಟ್ಟೆ ಕಂಡ್‌ಲೆ. ಮಲಯಳಕಾರಡ ಕುಡಿ ಕೂಟುವದ್ ಸುಲಭ, ಕುಡಿ ಅಳಕುವದ್ ಎಚ್ಚಕ್ ಕಷ್ಟ ಎಣ್ಣುವದ್ ಮಾಚುಕ್ ಗೊತ್ತಿಲ್ಲತದಲ್ಲ. ಅದೂ ಅಲ್ಲತೆ ಅಯಿಂಗೆಲ್ಲ ಒರ್ ಯೂನಿಯನ್ ಮಾಡಿಯಂಡ್ ತುಂಡ್ ಪುಡಾರಿಯಕ್ ಬೋಂಡಿಯದೆಲ್ಲ ಸಪ್ಪೆ ಮಾಡಿಯಂಡುಂಡ್. ಇಕ್ಕ ಕೈಲಿಲ್ಲತ ಮಾಚುಕ್ ಕಾಸಿಲ್ಲತೆ ಕಾಚ್‌ಗಳ್ಳೊ ಕ್‌ಟ್ಟುಲೆ!

ಉಳ್ಳ ನುಪ್ಪದ್ ಏಕ್ರೆಕ್ ದಂಡ್‌ದಿನತ್ ಭದ್ರತೆ ಕಲ್ಲಕಂಬ ತಂತಿ ಇಟ್ಟಿತ್ ಬೆಚ್ಚತ್ ಖಾದರ್. ಆ ನುಪ್ಪದ್ ಏಕ್ರೆನ ರಿಜಿಸ್ಪರ್ ಮಾಡುವಕ್ ಮಾಚುನ ಕೂಟಿಯಂಡ್ ರಿಜಿಸ್ಪರ್ ಆಫೀಸ್‌ಕ್ ಪೋಚಿ. ರಿಜಿಸ್ಪರ್‌ಕ್ ಬೆಕ್ಕಂಡಿಯೆ ಗಣೋದಿಯೆಲ್ಲ ಖಾದರ್ ಬೆಚ್ಚತ್. ಕೇರಳಕಾರ ಅದ್‌ಲೂ ಮರವ್ಯಾಪಾರಿ, ರಿಜಿಸ್ಪರ್‌ಕ್ ಗೊತ್ತಿಲ್ಲಿಯಾ, ದುಬಾಯಿದುಡ್ಡ್, ಮರ ಕಟ್ಟ ದುಡ್ಡ್‌ರೆಲ್ಲ ಬೆಲೆ ಐಂಬದ್ ಎಡ್‌ಪಂವೊ ಅಂಜಾಯಿರ ಇಲ್ಲತೆ ಮಂಡೆ ನೇತುವಾ? ರಿಜಿಸ್ಪರ್ ನೋಟ್‌ರ ಕಟ್ವನ ಕೇಟಂಡ್ ಪೆನ್ನ ಎಡ್‌ಕಣೆ ಚಿಣ್ಣಪ್ಪಲಾಯರೂ, ಅಮೀನನೂ ನುಗ್ಗ್‌ಚಿ. ಕೋಟ್‌ರ ತಡೆ ನೋಟೀಸ್ ಕೊಡ್‌ತತ್. ಖಾದರ್‌ರ ಮೇಲ್ ಬೆವರ್‌ಚಿ. ಮಾಚು ಖಾದರ್‌ರ ಮೂಡ್ ನೋಟ್‌ಚಿ.

\* \* \*

ಬೆಂಗಳೂರ್‌ನ ಚಪ್ಪಲ್ ಪೂಜೆ ಆನಂದೇ ದೇಚೂ, ಬೋಪುಣಿಯೂ ಲಾಯರ್‌ನ ಕಂಡಿತ್ ಮುತ್ತಣ್ಣಜ್ಜಂಡ ಸ್ಟೇಟ್‌ಮೆಂಟ್ ಎಡ್‌ತಂಡ್ ಡಾಕ್ಟರ್ ಸರ್ಜಿಫಿಕೇಟ್ ಮಾಡ್‌ಚಿಟ್ಟಿತ್ ಮಾಡಂಡಿಯ ಬೋರೆ ಕಾರ್ಬಾರೆಲ್ಲ ಮಾಡ್‌ಚಿ. ಮನೆರ ಸಂಗತಿಯೆಲ್ಲ ದೇವಯ್ಯ ಅರಿ ಚಿಟ್ಟಂಡಿಂಜತ್. ಹಿಂದೂ ಸೆಕ್ಷನ್ ಆಕ್ಟ್ ಪ್ರಕಾರ ದೇಚು ಅಪ್ಪಂಡ ಆಸ್ತಿರ ಮೇಲೆ ಕೋರ್ಟ್ ಪೋಚಿ.

ಕೋರ್ಟ್ ತಡೆ ಎಡ್‌ತಂಡೆ ದೇಚು ಬಂದಿತ್ ಖಾದರ್ ತಂತಿ ಇಟ್ಟಿ ಬೆಚ್ಚಾಂಡೊಳ್‌ಲ ಕೆಲಸಕ್ ಸುರು ಮಾಡ್‌ಚಿ. ಊರ್‌ಕಾರ, ಮನೆಕಾರ ಎಲ್ಲ ದೇಚುರ ಎಚ್ಚರಕ್ ತೋಕ್ ಕತ್ತಿ ಆಯಿತ್ ನಿಂದತ್. ತೋಕ್ ಎಡತಂಡ್ ದೇಚು ಅಳಕೂಟಿತ್ ಎಟ್ತ್ ದಿನತ್‌ಲ್ ನುಪ್ಪದ್ ಏಕ್ರೆಕ್ ಗಿಡ ಬೆಚ್ಚತ್. ದೇಚುರ ತೋಕ್‌ನೊ ಊರ್‌ಕಾರಡ ಮನೆಕಾರಡ ಕಾವಲ್‌ನೊ ಕಂಡ ಖಾದರ್ ಆ ಊರ್‌ಕ್ ಬಂದ್‌ಲೆ. ಖಾದರ್ ಮಾಚುನ ಕೆಟ್ಟಿತ್‌ಚಿಟ್ಟಿತ್ ಅಳನಗುಂಡ್ ಚವುಟ್ ಚೊಟ್ಟಿತ್‌ಂದ್ ಕಣ್ಣಾರೆ ಕಂಡವು ಎಣ್ಣೆಚಿ. ಆರ್ ತಿಂಗತ್ ಜಮ್ಮತ್‌ಲ್ ಕೂಡ್‌ನ ಓರಂದೇ ಕೊಚ್ಚಿಕಾರ ಜಾಗ ಖಾಲಿ ಮಾಡ್‌ಚಿ.

ಕೋರ್ಟ್ ತೀರ್ಮಾನ ಇನ್ನನಾಚಿ - "ಮುತ್ತಣ್ಣಜ್ಜಂಡ ಆಸ್ತಿ ಅಣ್ಣಂಗೂ, ದೇಚುಕೂ ಸರಿಪಾಲ್ ಆಂಡು. ಜಾಗತ್‌ಲಿಂಜ ಮರತ್‌ರ ಬೆಲೆ ದಂಡರೆ ಲಕ್ಷ ಉರ್‌ಪಿಯ. ಜಾಗತ್‌ರ ಬೆಲೆ ಅಂಬದಾಯಿರ. ಮಾಚು ಒಬ್ಬನೇ ಮರತ್‌ರ ದುಡ್ಡ್ ತಿಂದಾನಗುಂಡ್ ಅರುವದ್ ಏಕ್ರೆ ಜಾಗ ಮುನ್ನೂರ್ ಭಟ್ಟಿಭೂಮಿ ದೇಚುಕ್ ಹಕ್ಕ್, ಮರತ್‌ರ ಪಣ ಸರಿಪಾಲ್ ಕೊಡ್‌ತಂದ್ ಜಾಗ ಸರಿಪಾಲ್ ಮಾಚುಕು ಕೊಟ್ಟೆಂಡು."

\* \* \*

ಅಂದ್, ತೋಟಕ್ ಗೊಬ್ಬರ ಎಡ್‌ತ ಬಪ್ಪಕ್ ಬಾಡಿಗೇ ಜೀಪ್‌ಲ್ ದೇವಯ್ಯ ಗೊಬ್ಬರ ದುಂಬ್‌ಚಿಟ್ಟೆಂಡುಂಡ್. ಒರ್ ಇಂಚ್ ಗಡ್ಡ ಬುಟ್ಟೆಂಡ್ ಮಾಚು ದಾಟ್‌ಚಿ - ಬಟ್ಟೆ ಎಲ್ಲ ಕೀತಿತ್, ನೀರ್ ಕಾಂಗತೆ ಎಚ್ಚಕ್ ದಿನ ಆಯಿತೋ! ದಂಡ್ ದಿನತ್‌ಂಜಿ ಉಂಡವನನ್ನೆ ಕಾಂಬ್‌ಲೆ. ದೇವಯ್ಯಂಡ ಬರಿಲ್ ನಿಂದಂಡ್ ಮಂಡೆ ಕುಂಬ್‌ಚಿಟ್ಟೆ.

"ಎನ್ನ ಮಾಚು, ಮೂಡ್ ಬಾಡಿಯೆ? ಮನೆಕ್ ಬಪ್ಪಲಿಯಾ?"

"ಏದ್ ಮನೆಕ್ ದೇವಯ್ಯ? ಇದೇ ನಾಡ ಮನೆ ನೋಟ್ ಅಲ್ಲಿ"ಂದ್ ಆಕಾಶ ಕಾಟ್‌ಚಿ.

ದೇವಯ್ಯಂಡ ಕೈಪುಡ್‌ಚಂಡ್, "ಆ ಮೂಂದ್ ದಿನತ್‌ಂಜಿ ಪಂಪು ನೀರ್ ಕುಡ್‌ಚಂಡುಳ್ಳೆ. ಉಂಡಿತಿಲ್ಲೆ"ಂದ್ ಬಿಕ್ಕಿ ಬಿಕ್ಕಿ ಮೊರಟತ್.

ದೇವಯ್ಯ ಅಂಜಿ ಉರ್‌ಪಿಯ ಕೊಡ್‌ತಿತ್, ಉಂಡಿತ್ ಬಾ. ನಾಡ ಜೀಪ್‌ಲ್ ಪೋಕ. ಎಲ್ಲ ಎಣ್ಣುವೀಂದ್ ಎಣ್ಣ್‌ಚಿ.

ಜೀಪು ಟೋಲ್ ಗೇಟ್‌ಕೆತ್ತುವಕ - "ದೇವಯ್ಯ, ನಿನ್ನ ಅಂದ್ ಬೈಟ್ ಇಲ್ಲಿ ನಾನ್ ಬುಟ್ಟಿತ್ ಆ ಮಲಯಾಳಕಾರನ ಕೂಟಿಯಂಡ್ ಪೋನ...."

ದೇವಯ್ಯ ಆ ತಕ್ಕನ ತಡತಿತ್ "ಅದೆಲ್ಲ ಗೇನ ಮಾಡತೇ"ಂದ್ ಎಣ್ಣ್‌ಚಿ.

ಮಾಚು ಮನೆಕೆತ್ತುವಕ ದೇವಯ್ಯಂಡ ಮಂಗಲಾನ ತಂಗೆ ಕುಂಞನೆಡ್‌ತಂಡ್ ಚೆಂಬುಲ್ ನೀರ್ ಬೆಚ್ಚತ್. ಅವಡ ಬೋಳೆರ ಪತ್ತಾಕ್ ಕಾಂಬದು ಮಾಚು ಮೊರಟತ್. ದೇವಯ್ಯ ಮಾಚುನಳಾಪ್‌ಚ್‌ಟ್ಟಂಡ್ ದೇಚು ಎಳಾದ್‌ನ ಕಾಗದ ಕೊಡ್‌ತತ್. ಅದಲ್ ಇನ್ನನೆ ಇಂಜತ್ -

"..... ತೋಟ ಆಕಣೆಕ್ ನಾನೇ ಪಣ ಅಯೆಚಿತಪ್ಪಿ. ಫಸಲ್ ಬಂದ ಪಿಂಞ ಕಾಲ ಕಾಲ ಚೆನ್ನೆಚೆನ್ನೆಂಗೇ ಅಣ್ಣಯ್ಯತರಡ್. ತೋಟ ಎಲ್ಲ ಅಣ್ಣಯ್ಯೆಂಗೇ ಇರಡ್. ನಾಡಪ್ಪಂಡ ಜಮ್ಮ ಪೊರಮೆ ಪೋಪಕಾಗಾಂದ್ ನಾನಿನ್ನನೆ ಮಾಡಂಡಿಯ ಬಾತ್. ಅಣ್ಣಯ್ಯನ ಕೂಟಿಯಂಡ್ ಬಂದಿತ್ ಮನೆಲ್ ನಿಪ್ಪುಚಿರಿ. ಖರ್ಚಿಕ್ ಉಳ್ಳ ದುಡ್ಡ್‌ಕ್ ಚೆಕ್ಕ ಅಯೆಚಿಯೆ...."

ದೇವಯ್ಯನ ತಬ್ಬನ ಮಾಚು ಎಚ್ಚೆನೇರಕ್ ಬುಟ್ಟತೋ!

- \* - \* - \* -



## ಕೊಂದವು ದಾರ್.....?

ಕಮಲು, ಚೋಮುಣಿರ ಪೆರಿಯ ಮೋವ. ಒಂದಾಂಡ ಬಯ್ಯ ಒಂದಾಂದ್ ಮೂಂದ್ ಮೂಡಿ ಕುಂಞಯಳೇ ಆಚಿ. ಚೋಮುಣಿಕ್ ಬಲ್ಯ ಆಸ್ತಿಯೊಂದೂ ಇಲ್ಲೆ. ಆಚೇಂಗಿ ಉಂಬ ಕೂಳ್ಕ್ ತೊಂದರೆ ಇಂಜ್ಲೆ. ನಯಿಚಿ ಕೆಚ್ಚಿ ನೇಡ್‌ನವನೇ ಕಷ್ಟಪಡಂಡಿಯ ಕಾಲತ್, ನಯಿಕತವಂಡ ಬಾಳ್ ನಂದಾಪದುಂಡಾ? ಕೂಟ್‌ಕ್ ಮನೆಲ್ ಮೂಂದೂ ಪೆರಿಗೆ.

ಚೋಮುಣಿಕ್ ಪೊಣ್ಣ್ ಮಕ್ಕಳೆನ್ನೋ ಕುಶಿ ಇಂಜತ್. ಕನಿಕರವೂ ಇಂಜತ್. ಕ್ಕಣ್ಣುಕುಂಞ್ ಇಲ್ಲೆಂದ್ ಒರ್ ಕೊರಗ್ ಬೋರೇ ಇಂಜತ್. ಅಲ್ಲಿ ಇಲ್ಲಿಂದ್ ಎಡೆ ಬುಡೆ ಕುಡಿಚಂಡಿಂಜವಂಗ್ ಕಳ್ಳಿಲ್ಲತೆ ನಾಳ್ ಕಯಿಪದೇ ಕಷ್ಟ ಆಚಿ. ಎಕ್ಕೊಲು ಬೋರೆಯಯಿಂಡ ಕೈಯಿಂಜಿ ಪುಕ್ಕಟೆ ಕ್ಕಟ್ಟುವಕ್ ಅವನೆನ್ನೊ ಊರ್‌ರ ಮುಕ್ಕಾರಿಯಾ, ಪಟೇಲನಾ, ಸೇನಬಾಯಿಯಾ, ಅಲ್ಲಾ ಪೋಲೀಸ್‌ಕಾರನಾ.....?!

ಕಾಸಿಲ್ಲತಾಪಕ ಮನೆಂಜಿ ಅಕ್ಕಿ ಕೊಡ್‌ತಿತೇಂಗಿ ಕುಡಿಕತೆ ಕಯ್ಯ. ಚೋಮುಣಿರಚ್ಚಿಕೇ ಭೂಮಿ ಜಾಗ ಉಳ್ಳಯಿಂಗೆಲ್ಲ ನಯಿಚಿತ್ ನೆಮ್ಮದಿರ ಬಟ್ಟೆಕ್ ಕೂಡ್‌ಚಿ. ಇವಂಡ ಮನೆಲ್ ಮೂಂದ್ ನೇರ ಉಂಬಕೂ ಇಲ್ಲತಾಚಿ.

ಕಮಲು, ತಳ್ಳಿ ನೂಕಿ, ಉರ್‌ಂಡಿಕೆಟ್ಟಿ ಹೈಸ್ಕೂಲ್‌ಕೆತ್ತ್‌ಚಿ. ಓದಂಡೂಂದೆನ್ನೋ ಆಸೆ. ಬಲ್ಯದಡ್ಡಿಯೂ ಅಲ್ಲ. ಉಳ್ಳೊ ಒರ್ ಲಂಗ, ಒರ್ ಬ್ಲಾಸ್. ಒಲಿಪಕ್ ಉತ್ತನಕ ಒಣಂಗಣೆ ಪಳಿಯ ಪೊಡಿಯ ತುಂಡ್ ಸುತ್ತಿಯಂಡ್ ಕಾಲ ಕಯಿಕಂಡು. ಬೋರೆ ದಂಡ್ ತಂಗೆಯಡ ಗತಿಯೂ ಇನ್ನನೇ.

ತಾನೇ ಧೈರ್ಯ ಮಾಡಿತ್ ಕಯಿಂಜ ಕಾಲ ಪಾಸಾನ ಮಕ್ಕಡ ಪುಸ್ತಕ ಎಲ್ಲಾ ಪಾದಿ ಕ್ರಯಕೆಡ್‌ತಂಡ್ ಹೈಸ್ಕೂಲ್‌ಕ್ ಕೂಡ್‌ಚಿ. ಪಳೆಯ ನೋಟ್‌ಬುಕ್‌ಕಲಿಂಜ ಪಾಳೆನೆಲ್ಲ ಕೀತಿತ್ ದಂಡ್ ಮೂಂದ್ ಬುಕ್ಕ್ ಪೊಂದಂಡತ್. ಅಂದಿತೂ ಎತ್ತಲೆ. ಅಪ್ಪನ ದುಡ್ಡ್ ಕೇಟಕ, ನಾಳೆ ನೋಟನಾಂದ್ ಪೋನಂವೊ ಮನೆಕೆತ್ತಣೆ ಅವ್ವ ಮಕ್ಕಕ್ ಒರ್‌ಕ್ ಪುಡ್‌ಚಿತಿಪ್ಪಯಿಂಜತ್. ದಿನಕ್ ಒಂದೋ ದಂಡೋ ಖಾಲಿ ಕ್ಯಾರ್ಟರ್‌ಕುಪ್ಪಿ

ಮಾತ್ರ ಬಾಳೆಕುಂಡ್ಲ ಗುಡ್ಡ ಕೂಡವಯಿಂಜತ್.

ಸ್ಕೂಲ್‌ನಲ್ಲಿ ಪೋನಲ್ಲಿ ನೋಟ್‌ಬುಕ್ ಇಲ್ಲೆ, ಪಾಠ ಪುಸ್ತಕ ಇಲ್ಲೆ, ಸ್ಕೂಲ್ ಯೂನಿಫಾರಂ ಇಟ್ಟಿತ್ತಿಲ್ಲೆಂದ್ ಎಣ್ಣುವ ಕಾರಣಕ್ ಒನ್ನಂದೂ ತಲ್ಲೆ ಕೆಟ್ಟತೆ ಮನೆಕ್ ಬಂದವಲ್ಲ ಕಮಲು. ತಾಂಡ ಕಷ್ಟತನ ಅವ್ವಂಡ ಕೂಡ ಎಣ್ಣೆಯಂಡ್ ಮೊರ್ಡಲು. ಆಚೇಂಗಿ ಅವ್ವ ಎನ್ನ ಮಾಡಲು? ಸ್ಕೂಲ್ ಬುಟ್ಟಿತ್ ಮನೆಲಿರ್ಂದ್ ಒರ್ ಪರಿಹಾರ ಸೂಚನೆ ಕೊಡವಯಿಂಜತ್, ಅವ್ವ, ಅಚ್ಚಿಕೇ.

ದಂಡನೇ ಮೋವಳ ಅವ್ವ ತಾಂಡೋರ್ ದೂರತ ಬೆಂದ್‌ಕಡಲ್ಲಿ ಕುಂಞಿನಾಕಿಯವಕ್ಂದ್ ಸ್ಕೂಲ್ ಬುಡ್‌ತಿತ್ ಅಯೆಚತ್. ಕುಡಿಪಕ್ ಕೈಲ್ ಕಾಸಿಲ್ಲತಿಪ್ಪಕ ಮಾಡ್‌ನ ಸಾಲತರ ಮುಲಾಜಿಕ್ ಮೋವಳೇ ಅಯಿಂಕಂಡಿಯಾಚಿ. ನಂದ ಮೂಡ್‌ಕ್ ಮುಟ್ಟಿ ಪೋಪಕ ಪೋಯಿತ್ ಅಂಜೋ ಪತ್ತೋ ಮೋವಡ ಕೇರಾಫ್‌ಲ್ ಕೇಟಂಡ್ ಕುಡಿಪಕುಳ್ಳೋರ್ ಬಟ್ಟೆಯೂ ಆಚಿ. ಇದೇ ಬೇಜಾರತ್ ಕಮಲರ ಅವ್ವಂಗ್ ಕಾಯಿಲ ಪುಡ್‌ಚತ್. ಮದ್ದಮರ ಇಲ್ಲೆ. ದಿನ ದಿನಕ್ ಸಾಲತರ ಕೂಟ್‌ಕ್ ಪೋಣ್ಣರ ಕಾಯಿಲವೂ ಬೊಳಂದಂಡೇ ಬಾತ್.

ಅಪ್ಪ ಚಾಡ್‌ನ ಖಾಲಿ ಕುಪ್ಪಿನೆಲ್ಲ ಕೂಟಿ ಬೆಚ್ಚಿತ್ ಅದ್‌ನ ಮಾರಿತ್ ಕಮಲು ತಾಂಗ್ ಬೋಂಡಿಯ ಪುಸ್ತಕ ಎಲ್ಲ ಒರ್ ಮಾದರಿ ಸೆರಿ ಕೂಟ್‌ಚಿ. ಇಂಞ ಹಿಂದಿಬುಕ್ ಒಂದ್ ಎಡ್‌ತೆಟಕ, ಸಾಧಾರಣ ಓರಾಂಡ್ ನೀಸಲೂಂದ್ ಧೈರ್ಯ ಎಡ್‌ತಂಡತ್.

ಪ್ರತಿ ನಾರಾಚೆ ಜಬ್ಬರ್‌ಕಾಕ ತಾಂಡ ಸೈಕಲ್‌ಲ್ ಒರ್ ಬೇಗ್‌ಲ್ ಬಟಾಣಿ ಇಟ್ಟಿಂಡ್ ಬಂದಿತ್ ಬೆಲ್ಲ ಮಾಡುವಕ, ಮಕ್ಕ ಅಲ್ಲಿ ಇಲ್ಲಿ ಬುದ್ದ ಕುಪ್ಪಿ, ಇರ್‌ಂಬುತುಂಡ್, ಪ್ಲಾಸ್ಟಿಕ್ ಚೂರ್ ..... ಇನ್ನತಾನೆಲ್ಲ ಎಡ್‌ತಂಡ್ ಓಡಿಪೋಯಿ ಜಬ್ಬರ್‌ನ ಮುತ್ತಿಯವಯಿಂಜತ್. ಪ್ರತಿಯೊಂದಾಂಗೂ ಜಬ್ಬರ್‌ರ ಒರೇ ಲೆಕ್ಕ - ಒರ್‌ಪುಡಿ ಬಟಾಣಿ! ಜಬ್ಬರ್‌ರ ಈ ವ್ಯಾಪಾರತ್‌ನಗುಂಡ್, ಪ್ರತಿಯೋರ್ ಮನೆಲ್ ಪಳಿಯ ಕತ್ತಿ, ತೇಂಜ ಗುದ್ದಲಿ, ಇರ್‌ಂಬು ಕೊಳಪೆ, ಚಟ್ಟುವ, ನಾಯಿ ಚಂಜೋಲೆ.... ಇನ್ನತ ಇರ್‌ಂಬ್ ಸಾಮಾನೆಲ್ಲ ಮಾಯ ಆಪಕ್ ಸುರುವಾಚಿ. ದುಡ್ಡೇ ಬೋಂಡೂಂದ್ ಒರಾತ ಮಾಡ್‌ನ ಮಕ್ಕಕ್ ಮಾತ್ರ ಕುಪ್ಪಿ ಒಂದಾಂಗ್ ಪದ್‌ನಂಜಿ ಪೈಸ ನಗದ್ ಕೊಡವದೂ ಇಂಜತ್. ಕಮಲು ಒಬ್ಬಳ ಬುಟ್ಟಕ ಬಾಕಿ ಮಕ್ಕಡ ವ್ಯವಹಾರ ಎಲ್ಲ ಐಸಕ್ಯಾಂಡಿ ಬಟಾಣಿಕೇ!

ಅಂದೋರ್ ನಾರಾಚೆ, ನೆರೆಮನೆ ಮುತ್ತಣ್ಣಂಡ ಮಕ್ಕ ಜನ ನಡಪ ಬಟ್ಟೆಲಾ ಕುಂಡ್ ಕುಯಿಚಿತ್ ಕೋಡಂಗಳೆ ಕಳಿಚಂಡ್, ಒರ್ ಪುಡಿಯಿಲ್ಲತ ಕತ್ತಿನ ಬಟ್ಟೆಲೇ ಚಾಡಿತ್ ಪೋಯಿತಿಂಜತ್. ಈ ಕತ್ತಿ ಕಮಲೂರ ಚೆರಿಯ ತಂಗೆಕ್ ಕಾಟ್ಪಾಚಿ. ದಾರೋ ಚಾಡ್‌ನ ದಾಕುವಲ್ಲಾಂದ್ ಎಡ್‌ತ್‌ಪುಡ್‌ಚಂಡಿರಣೆ ಜಬ್ಬಾರ್ ಸೈಕಲ್ ಬೆಲ್ಲಾ ಕೇಟಿತ್. ಎಲ್ಲಾ ಮಕ್ಕ ಓಡುವಕ್ ಆ ಮೂಡಿ ಕುಂಞಿಯೂ ಮೆಲ್ಲೆ ಪೋಯಿತ್, ಆ ಬುದ್ಧ್‌ಕಾಟ್ಪಾನ ಬೊಡ್ಡ ಕತ್ತಿನ ಕೊಡ್‌ತಿತ್ ಓರ್‌ಪುಡಿ ಬಟಾಣಿ ಕೇಟಂಡ್ ಬಾತ್. ಕಮಲೂಕೂ, ಅವ್ವಂಗೂ ನನ್ನಾಲ್ ಕೊಡ್‌ತಿತ್ ಬಾಕಿನಮಡ್‌ಲ್‌ಟ್ಟಿಂಡ್ ಕೊರ್‌ಚಂಡ್ ಅಳಾತತ್.

ನೆರೆಮನೆ ಮುತ್ತಣ್ಣ ತೋಟತ್‌ಂಜಿ ಬಪ್ಪಕ ಜಬ್ಬಾರ್ ಎದ್‌ಕೆ ಕಾಟ್ಪಾಚಿ. ಅವಂಡ ಪೊಟ್ಟಿರ ಕೊಡಿಲ್ ಕತ್ತಿಕಂಡತ್. ಇದ್ ನಾಡ ಪಳಿಯ ಕತ್ತಿ ಆಕುವಲ್ಲಾಂದ್ ಜಬ್ಬಾರ್‌ನ ಬೊತ್ತ್‌ಚಿಟ್ಟತ್. ಜಬ್ಬಾರ್ ಸತ್ಯ ಸಂಗತಿ ಎಣ್ಣಿತ್, ಆ ಕತ್ತಿ ಕೊಡ್‌ತ ಮೂಡಿ ಕುಂಞಿನ ಎಣ್ಣಿ ಕೊಡ್‌ತತ್.

ಮುತ್ತಣ್ಣ ಕತ್ತಿಬಲ್‌ಚಂಡ್, ಜಬ್ಬಾರ್‌ಕ್ ದಂಡ್ ತಟ್ಟಿತ್ ಚೋಮುಣಿರಲ್ಲಿಕ್ ಬಾತ್. ಅಕ್ಕಲೇ ಮುಕ್ಕಾಲ್ ಚೊಕ್ಕನ ಚೋಮುಣಿಕ್ - ನೀಡ ಮೂಡಿಯ ಮನೆಯೆಲ್ಲ ಮುಡ್‌ಚಿತ್, ಇಕ್ಕ ನೆರೆಮನೆ ಮುಡಿಪಕ್ ಇಳಿಂಜಿತ್. ನಾಡಲ್ಲಿ ಕತ್ತಿ ಗುದ್ದಲಿ ಒಂದೂ ಪೊರಮೆ ಬೆಚ್ಚದ್ ಇಪ್ಪಾಲೆ. ಇದೆಲ್ಲ ನೀಡ ಮಕ್ಕಡ ಪಣೇಂದ್ ಜೋರಳಾಕ್‌ಚಿ.

ಉರಿಕೇರ್‌ನ ಚೋಮುಣಿ ಮಕ್ಕಳ ಕಾಕಣೆ, ಬಟಾಣಿ ಚಯಿಂತಂಡ್ ಮಕ್ಕಬಾತ್. ಕೇಟಿತಾಪಕ, ಕತ್ತಿಕೊಡ್‌ತದನ್ನೋ ನೇರೆ; ಮಡ್‌ಲುಳ್ಳ ಬಟಾಣಿಯೆ ಸಾಕ್ಷಿ. ಆಚೇಂಗಿ ಬುದ್ಧ್‌ಕಾಟ್ಪಾನ ಕತ್ತಿಂದ್ ಎಣ್ಣಿತ್ ಮುತ್ತಣ್ಣನ ಒಪ್ಪಾಚಿರುವ ಕಯ್ಯುವಾ....? ಚೋಮುಣಿ ಚೆರಿಯವಳ ಬುಟ್ಟಿತ್, ಕಮಲೂನ ಚವುಟಿತೂ, ಇಡ್‌ಚಿತೂ, ಕೆಮಿನೆರ್ ಮಿತೂ ಅರೆಜೀಂವ ಮಾಡಿಬೆಚ್ಚತ್. ಮಕ್ಕಡ ಬಾಯಿಂಜಿ ಈ ಕತ್ತಿರ ಕಥೆ ಸ್ಕೂಲ್‌ಕೂ ಎತ್ತ್‌ಚಿ. ಅಂದ್‌ಂಜಿ ಸ್ಕೂಲ್‌ಲ್ ಕಾಣತಾನ ಪೆನ್ನ್, ಪೆನ್ನಿಲ್, ಪುಸ್ತಕ, ದುಡ್ಡ್ ಎಲ್ಲಾಂಗೂ ಕಮಲುವೇ ಕಳ್ಳಿಂದ್ ಮಕ್ಕಳೂ ಮಾಸ್ತುಳೂ ಪರೆವಕಾಚಿ. ಎಲ್ಲಾ ಕಳ್ಳತನಕೂ ಕಮಲೂನ ಕಾಕಿತ್ ವಿಚಾರಣೆ, ಶಿಕ್ಷೆ ಸುರುವಾಚಿ. ಕಮಲೂರ ನೊಂದ ಮನಸ್ಸ್ ಬೆಂಜಿತ್ ಕರ್‌ಂಜಿ ಪೋಚಿ. ತಾಂಗ್ ದಾರೂ ಇಲ್ಲೆ, ಈ ಪ್ರಪಂಚತ್ ನೆಲಯೇ ಇಲ್ಲೆಂದಾಚಿ.

ಒಬ್ಬಳೆ ಅಳಾತಂಡ್ ಮೊರಡು. ಒಬ್ಬಳೇ ದುಃಖಾಚಿರು. ಏದೋರ್ ಮಕ್ಕಡ ಕೂಟ್ ಕೂಡಿ ಕಳಿಪಕೂ ಕಯ್ಯತಾಚಿ. ಕಮಲೂ ದೂರತ್ ಒಬ್ಬಳೇ ಅಳಾತಂಡ್ ಗೇನ

ಮಾಡ್‌ಚಿ. ನಾಡ ಅಂಜಿ ವಯಸ್ಸರ ತಂಗೆ ಮಾಡ್‌ನ ತಪ್ಪುಕ್ ನಾಕ್ ಈ ಶಿಕ್ಷೆಯಾ? ಆ ಕುಂಞಿ ಮಾಡ್‌ನ ತಪ್ಪಾಚೆಂಗಿಯೂ ಎಂಥ? ಎನ್ನನೆ ಗೇನ ಮಾಡ್‌ನಕಲೂ, ಕಮಲುರ ಬೊಳಿಯತ ಮನಸ್ಸಕ್ ಒಂದೂ ಸೆರಿಕ್ ಅರ್ಥ ಆಯಿಲೆ. ಎಂತ ಕಷ್ಟ ಬಾತೆಂಗಿಯೂ ಸ್ಕೂಲ್ ಮಾತ್ರ ಬುಡುಲೆ. ಓದಿತ್ ಚಾಕ್ರಿಕ್ ಕೂಡಿತ್ ಬದ್‌ಕೊಡೂಂದ್ ತೀರ್ಮಾನ ಮಾಡ್‌ಚಿ.

ಮಂಡೆಲ್ ಪೇನ್, ಕೈಯಿಲ್ ಒಯ್ಪಿ, ಕೀತ್‌ಲಂಗ, ಬಾಡ್‌ನ ಮೂಡ್, ಮಜ್ಜಣ ಕೆಲಕಿಲ್ಲೆ, ಸೆರಿಕ್ ಪುಸ್ತಕವೂ ಇಲ್ಲೆ, ಹೋಂವರ್ಕ್ ಮಾಡುವ ಕಯ್ಯುಲೆ. ಯೂನಿಫಾರಂ ಇಲ್ಲೆ. ಸ್ಕೂಲ್‌ಲ್ ಒಂದಲ್ಲ ಒಂದ್ ಕಾರಣಕ್ ಪೊರಮೆ ನಿಪ್ಪಾಚಿರುವೊ, ಶಿಕ್ಷೆ ಬೋರೆ! ಬಂದ ಮಾಸ್ತ್ರಿ ಎಲ್ಲ "ಎಮ್ಮೆನನ್ನೆಕೆ ಉಳ್ಳಿಯಾ, ಮಂಗಲಾನಕ ಮೂಂದ್ ಪೆರಲಿಂಜತ್ ಕಳ್ಳಿ"ದೆಲ್ಲ ಬಯ್ಯತ ದಿನ ಇಲ್ಲೆ! ತಾಂಡ ಗೋಳ್‌ನ ದಾಕೆಣ್ಣುವೊ? ಅವ್ವಂಡ ಕಾಯಿಲ ದಿನ ದಿನ ಜೋರಾನನ್ನೆಕೆ ಅಪ್ಪಂಗ್ ಕುಡಿಪ ಸ್ವಾತಂತ್ರ್ಯ ಜಾಸ್ತಿ ಜಾಸ್ತಿ ಆಯಂಡೇ ಬಾತ್. ಮನೆಲುಳ್ಳದೆಲ್ಲ ಖಾಲಿ ಆಯಂಡೇ ಇಂಜತ್.

ಸ್ಕೂಲ್‌ಂಜಿ ಬಂದಿತ್, ಎನ್ನೆಂಗಿಚ್ಚಿಕ್ ಉಳ್ಳಾನ ತೇಡಿತ್ ಬೇವುಚಿಟ್ಟಿತ್, ಅವ್ವಂಗೂ ತಂಗೆಕೂ ಕೊಡ್‌ಕಂಡು. ಅಪ್ಪ ಎಚ್ಚಕೋ ನೇರಕ್ ಬಕ್ಕು. ಪೊಲಾಕ ಎದ್ದಿತ್ ಅಪ್ಪಂಗೂ ಮಾಡಿ ಕೊಡ್‌ಕಂಡು. ಮನೆಂಜಿ ಸ್ಕೂಲ್‌ಕೆತ್ತಣೆ ಬಟ್ಟೆಲೇ ನಡಂದಂಡ್ ಬಾಯಿಪಾಠ ಪಡಿಕಂಡಿಯ ಪದ್ಯ ಪಡ್‌ಚವಯಿಂಜತ್. ಎನ್ನಾಚೆಂಗಿಯೂ ನರಿರ ಮಾಳಿಕ್ ನುಗ್ಗುವ ಕಡ್‌ಚಿರನ್ನೆಕೆ ಸ್ಕೂಲ್‌ಕ್ ನುಗ್ಗಂಡಿಂಜತ್.

ಮನೆರ ಗೋಳ್‌ರ ಕತೆ ಓರ್ ತರ. ಸ್ಕೂಲ್‌ರ ಕತೆ ಇಂಞೋರ್ ತರ. ಹೆಡ್‌ಮಾಸ್ಟರ್ ತಾಂಡ ತೋಟ-ತೋಡಿಯತಾರ ಬಯ್ಯ ಆಚಿ. ಸ್ಕೂಲ್ ಮಕ್ಕ ಚೆತ್ತತಾ, ಬದ್‌ಕ್‌ಚಾಂದ್ ನೋಟುವವನಲ್ಲ. ಇಂಞ ಓರಂದ್ ಮಾಸ್ತ್ರಿ ಓರಂದ್ ತರತರ. ಅಯಿಂಡಯಿಂಡ ಒಳಿಯೇ ಪೊಯಂದಂಡಿಪ್ಪವು. ದಾಡ ದಾಡ ಮೀದ ಚೆಡಿನ ಪಾಪತ್ ಕೊಟ್ಟನ ಕಮಲುರಂತಯಿಂಡ ಮೀದ ತೇತಂಡ್ ತೃಪ್ತಿ ಪಡುವವು!

ಇಂಗ್ಲಿಷ್ ಪಾಠಕ್ ಬಪ್ಪ ಗಣೇಶಂಗೂ, ಹಿಂದಿ ಟೀಚರ್ ಗಂಗೆಕೂ ಅದೆಂತೋರ್ ಬಲ್ಲಾದ ಕಳಿ ಶುರುವಾಯಿತ್ ಒಂದ್ ದಂಡ್ ತಿಂಗೇ ಕಯಿಂಜಿತಿಂಜತ್. ಇವು ದಂಡಾಳ್ ಎದೇಂಗೋರ್ ನೆವನ ಎಡ್‌ತಂಡ್ ಚೆನಿಯಾಚೆ ಮಜ್ಜಣತಾರ ಮೀದ ಟೆಸ್ಟ್ ಮಾಡುವದೂ, ತಪ್ಪ್ ಮಾಡ್‌ನ ಮಕ್ಕಳ ನಾಲ್‌ಗಂಟೆಕಾಕಣೆ ಸ್ಕೂಲ್‌ಲೇ ನಿಪ್ಪಾಚಿಟ್ಟಿತ್ ಇಂಪೋಜಿಶನ್‌ರನ್ನೆತ ಶಿಕ್ಷೆ ಕೊಡ್‌ಪದೂ, ಅಲ್ಲ ತೆ ಸೈಶಲ್‌ಕ್ಲಾಸ್ ಎಡ್‌ತವಾಂದೆಣ್ಣಿತ್

ಕೆಲವು ದಡ್ಡ ಮಕ್ಕಳ ಮಾತ್ರ ನಿಪ್ಪಾಚಿಟ್ಟಿತ್, ಎನ್ನೇಂಗಿ ಕೆಲಸ ಕೊಡ್ತಾರುವಂಜಿ, ತಂಗ ದಂಡಾಳ್ ಎದೇಂಗೋರ್ ಮೂಲೆಲ್ ಕಾಲ ಕಯಿಪಯಿಂಜತ್. ಸೈಶಲ್ ಕ್ಲಾಸ್ ಮಾಡುವಂತ ತ್ಯಾಗಿಯಳ ಜನ ಮೆಚ್ಚತಿಪ್ಪಾ? ಆಚೇಂಗಿ, ಈ ತ್ಯಾಗತ್ ರ ಮುಸಾಕ್ ರೊಳ್ ಭೋಗ ವಿಲಾಸ ನಡಪ ಸಂಗತಿ ಚೆನ್ನ ತೇಂಜ ಮಕ್ಕಕ್ ಮಾತ್ರ ಗೊತ್ತಿಂಜತ್.

ಕನ್ನಡ ಪಾಠಕ್ ಬಪ್ಪಯಿಂಜ ಮುತ್ತಪ್ಪ ಮಾಸ್ಸರ್ ಮಾತ್ರ ಒರ್ ಪಳಿಯ ಮನಸ್ಸ; ಆರ್ ಮಕ್ಕಡ ಅಪ್ಪ. ಮನೆಲೂ ಕಷ್ಟ. ತಾನಾಚಿ ತಾಂಡ ಪಾಠ ಆಚಿ. ನಲ್ಲ ಗುಣ ಮೆಚ್ಚುವಕ್ ನಲ್ಲ ಮನಸ್ಸೂ ಬೋಂಡುವಲ್ಲಾ? ಅದ್‌ಂಗೇ ಕೊರತೆ ಆನವು "ದದ್ದುಳಿ ಮತ್ತು ಅಂಬಾಳ್ ಮತ್ತು" (ನಶ್ಯ ಬಲಿಪಾಂಗ್)ಂದೆಲ್ಲ ಅಡ್ಡ ಪೆದ ಇಟ್ಟಿಂಡಿಂಜತ್. ದಾರ್ ಎಂತೇ ಎಣ್ಣಡ್, ಮುತ್ತಪ್ಪ ಮಾತ್ರ ಆ ಸ್ಕೂಲ್‌ಲ್ ನೇರಾನ ಒರು ಗುರು.

ಅಂದ್ ಬೊಳ್ಳಾಚಿ, ಕನ್ನಡ ಓದ್‌ಚಿರುವಕ ಕಮಲುರ ಪುಸ್ತಕತ್ ಪಾಳೆ ಇಂಜಿಲೆ. ಮುತ್ತಪ್ಪ ಪಕ್ಕ ಬಂದಿತ್ ಅವಡ ಬುಕ್ಕನ ತಿರ್ಕಿ-ಮರ್ಕಿ ಮರ್ಚಿ ನೋಟ್‌ಚಿ. ಎಚ್ಚಕೋ ಮಕ್ಕಡ ಕೈ ದಾಟಿತ್ ಬಂದ ಪುಸ್ತಕ. ಮಿಂಞಲೂ ಬಯ್ಯಲೂ ಪಾಳೆಯೆಲ್ಲ ಕೀತಿತ್ ನಡೂಲ್ ಮಾತ್ರ ಎಟ್ ಪತ್ತ ಪಾಳೆ ಇಂಜದ್ ಕಂಡತ್. ಕಮಲುರ ಮೂಡ್‌ನೊಮ್ಮ ನೋಟ್‌ಚಿ. ಅವ ಮಂಡೆ ಕುಂಬ್‌ಟ್ಟಿತ್ ನಿಂದತ್. ಅವಡ ಲಂಗಬ್ಲಾಸೆಲ್ಲ ಈಜಿ ಪೋಯಿತ್ ಮೇಲ್ ಕಾಂಬಯಿಂಜತ್.

ಮುತ್ತಪ್ಪಂಡ ಕೆಲ ಬೆಂಜತ್. ಪಾಠ ತೇಂದದು ಕಮಲುನ ಪೊರ್‌ಮೆ ಕಾಕಿಯ ಬಾತ್.

"ಎನ್ನಂಗವ್ವ ಪುದಿಯ ಪುಸ್ತಕ ಎಡ್‌ತಿತಿಲ್ಲೆ; ನೀನ್ ದಾಡವ್ವ, ದಾಡ ಮೋವ?ಂದೆಲ್ಲ ಕೇಟತ್. ಕಮಲುನ ಇಂದಾಕಣೆ ಇಚ್ಚಕ್ ಪ್ರೀತಿಲ್ ತಕ್ಕ ಪರಿಚಿಟ್ಟಿವೊನಿಂಜಿಲೆ. ಮುತ್ತಪ್ಪಂಡ ಪ್ರೀತಿರ ತಕ್ಕ ಕೇಟಿತ್ ಕಮಲುರ ದುಃಖ ಉಕ್ಕಿ ಮರ್‌ಂಜತ್. ದುಃಖಿಚಿಟ್ಟ್‌ಮೊರ್‌ಟಂಡ್ "ಸರ್ ನಾಳೆ ಪುಸ್ತಕ ಎಡ್‌ಪಿ"ಂದೆಣ್ಣ್‌ಚಿ. ನಾಳೆ ಎಡ್‌ಪವಕ್ ಇಂಞೂ ಚೆನ್ನ ದಿನ ಮಿಂಞ ಎಡ್‌ಕಲಿಂಜತಲ್ಲವ್ವಾಂದ್ ಕೇಟತ್. "ದುಡ್ಡ್ ಇಂಜಿಲೆ ಸರ್"ಂದೆಣ್ಣ್‌ಚಿ.

"ನಾಳೆ ಎಡ್‌ಪದ್ ಇಂದೇ ಎಡ್‌ತವಕೆನ್ನ?"ಂದ್ ಕೇಟತ್.

"ದಂಡ್ ಕುಪ್ಪಿ ಪೋರ ಸರ್, ನಾಳೆಕ್ ಸೆರಿಯಾಪ. ಅಕ್ಕ ಬಿಂಡಿತ ಎಡ್‌ಪಿ.

ಇಚ್ಛೆ ದಿನ ಕ್ಲಾಸ್‌ಲ್ ಎಕ್ಕಲು ಪೊಯಿತ್ ಕ್ಕಟ್ಟಿಯಂಡಿಂಜ ಸಬ್ಬೆಕ್ಕೊರ ಪುಸ್ತಕ ಮಿಂಞಾ ಮಿಂಞಾ ಎಡತ ಸರ್"ಂದೆಣ್ಣೆ ಚಿ.

ಮುತ್ತಪ್ಪಂಗೆ ದಂಡ್ ಕುಪ್ಪಿ ಪೋರಾಂದೆಣ್ಣೆನದ್ ಅರ್ಥ್ ಆಯಿಲೆ. ಬುಡ್ ತಿಕೇಟತ್.

ಅಕ್ಕ ಕಮಲು - "ಸಾರ್, ನಾಡ ಅಪ್ಪ ಎಕ್ಕಲು ದಂಡ್ ಕ್ವಾರ್ಟರ್ ಕಳ್ಳ ಕುಡಿಪ. ಖಾಲಿ ಕುಪ್ಪಿನ ನಾನ್ ಕೂಟಿ ಬೆಚ್ಚಂಡ್ ವಾರಕೊಮ್ಮೆ ಮಾರುವಿ. ಅದ್‌ಲ್ ಕ್ವಾರ್ಟರ್ ದುಡ್ಡ್‌ಲ್ ಸುಮಾರಲ್ಲ ಪುಸ್ತಕ ಎಡ್‌ತಿಯೆ. ಕನ್ನಡ ಪುಸ್ತಕಕ್ ಇಂಞಾ ದಂಡ್ ಕುಪ್ಪಿ ಇಂದ್ ಕ್ಕಟ್ಟುವದ್ ಮದಿಯಾಪಾಂದೆಣ್ಣೆ ಚಿ.

ಮುತ್ತಪ್ಪ ಈ ತಕ್ಕನ ಕೇಟಿತ್ ತಾನೇ ಮೊರ್‌ಟ್‌ರ್‌ತ್. ಬಾಯಿಲ್ ತಕ್ಕೇ ಉತ್ತತಾಚಿ. ಚೆನ್ನೆ ನಿಂದಿತ್ ಕಮಲುರ ಕೀತನ ಚೀಲತ್‌ಲುಳ್ಳ ಪುಸ್ತಕತ್‌ನೆಲ್ಲ ನೋಟ್‌ಚಿ. ಅವಡ ನಿಪ್ಪುಕ್ ಕೈಯಿಟ್ಟಿತ್ - "ಅವ್ವಮೊರ್‌ಡತೆ, ನಾಳೆ ನಾನೇ ನೀಕ್ ಕನ್ನಡ ಪಿಂಞ ಇಂಗ್ಲಿಷ್ ಪುಸ್ತಕ ಎಡ್‌ತ ಬಂದಿತ್ ತಪ್ಪಿ. ಆ ಕುಪ್ಪಿ ಮಾರ್‌ನ ದುಡ್ಡ್‌ಲೂ ಬೋಂಡಿಕೆ ನೀಡಪ್ಪನೇ ಕುಡಿಕಡ್, ಬೇಜಾರ ಮಾಡತೆ. ಮಿಂಞಾಕ್ ನಾನ್ ಎನ್ನೇಂಗಿ ಏರ್ಪಾಡ್ ಮಾಡುವಿ"ಂದ್ ಎಣ್ಣೆತ್ ಅಯೆಚಿತ್.

ಈ ಲೋಕತ್ ನನ್ನ ಅರ್ಥ್ ಮಾಡಿಯಂಡವನೊಬ್ಬೊ ಉಂಡ್‌ಂದ್ ಕಮಲು ಊಜಳೆ ಬುಟ್ಟಿತ್ ಮನೆಕ್ ಬಾತ್. ಮುಟ್ಟಿರ್‌ಟ್‌ಲೋರ್ ತೆಡ್‌ಮಿನ್ನಿತ್ ತೇಂಜ ಬಟ್ಟೆ ಕಂಡೆನ್ನೆಕಾಚಿ, ಕಮಲುಕ್.

ಪಿತ್ಯಾಂದ್ ಚೆನಿಯಾಚೆ, ಮಜ್ಜಣಾಕಣೆ ಸ್ಕೂಲ್, ಕಮಲುರ ಅವ್ವಂಗೆ ಪೆರ್ತ್ ಜೋರ್ ಕಾಯಿಲ, ಏವಕಯ್ಯಲೆ. ಬೆರಿಯ ಬಂದ್‌ರಲೂಂದ್ ಕಮಲು ಸ್ಕೂಲ್‌ಕ್ ಪೋಚಿ. ದಂಡ್ ಪುದಿಯ ಪುಸ್ತಕ ಮಾಸ್ತ್ ತಪ್ಪಾಂದ್ ಧೈರ್ಯತ್ ಸ್ಕೂಲ್‌ಕ್ ಬಾತ್. ಮಜ್ಜಣಾಕಣೆ ನೋಟ್‌ನಕಲೂ ಮುತ್ತಪ್ಪ ಮಾಸ್ತ್ ಸ್ಕೂಲ್‌ಕ್ ಬಂದದ್ ಕಂಡ್‌ಲೆ.

ಚೆನಿಯಾಚೆ ವಾರಕೊಮ್ಮೆ ಬಪ್ಪೊ, ಅದ್‌ನೋ ಸದುಪಯೋಗ ಪಡ್‌ತೆ ಪೋನಕ ಎನ್ನನೇಂದ್ ಗಣೇಶಂಡೋ, ಗಂಗೆರೋ ಮಾನಸಿಕ ಲೆಕ್ಕಾಚಾರ ನಡ್‌ಂದತ್.

ಗಂಗೆ, ಹಿಂದಿ ಪಾಠ ಸೆರಿ ಪಡಿಕತ ಅಂಜಾರ್ ದಡ್ಡ ಬೊಡ್ಡಂಗಳ ತೇಡಿ ಪುಡ್‌ಚಿತ್. ನಾಲರೆ ಗಂಟೆಕೆತ್ತಣೆ ನಿಂದಿತ್ ಪಡ್‌ಚಿತ್ ಪೋಂಡೂಂದ್ ಸುಗ್ರೀವಾಚ್ಚೆ ಮಾಡ್‌ಚಿ.

ಗಣೇಶಂಡ ಪೆದ್ದ ಸೆಲೆಕ್ಷನ್‌ಕಾಪಕ ಕಮಲು ಕೆಣಿಂಜತ್. ಇಂಗ್ಲೀಷ್ ಪದ್ಯ ಪಡ್‌ಚಿತಿಂಜಿಲೆ. ಅವಡ ಬುಕ್ಯಲ್ ಆ ಪದ್ಯ ಉಳ್ಳ ಪಾಳೆ ಇಂಜಿಲೆ. ಆ ಕೀತ್ ಪುಸ್ತಕತ್‌ಲೇ ಅವಡ ದವಡೆಕ್ ಲಟೀಂದ್ ಬಾಟಿತ್ ಎಡ್‌ತ್ ಚಾಡ್‌ಚಿ. "ಇಂದ್ ನಾಲರೆ ಗಂಟೆಕೆತ್ತಣೆ ನಿಂದಿತ್ ಪದ್ಯ ಪಡ್‌ಚಿತ್ ಎಣ್ಣೆತ್ ಪೋಂಡು. ನಾನೂ ಇಲ್ಲಿಯೇ ಇಪ್ಪಿ. ಇಲ್ಲೇಂಗಿ ನೀಡ ತೋಲ್ ಎಡ್‌ತ್‌ರುವೀ"ಂದ್ ಬೊತ್‌ಚಿಟ್ಟತ್. ಅವಡ ಕೂಟ್‌ಕ್ ನಾಲಂಜಿ ದಡ್ಡಂಗಳೋ ಕೂಟ್‌ಚಿ. ಗಂಟೆ ಪೊಜ್ಜಿತ್, ಮಕ್ಕ ಮಾಸ್ತ ಎಲ್ಲ ಪೋಕಣೆ, ಗಣೇಶನೂ ಗಂಗೆಯೂ ಶಿಕ್ಷೆಕ್ ಒಳಪಟ್ಟ ಮಕ್ಕಡ ಕೂಡೆ ಕ್ಲಾಸ್‌ಲೇ ಇಂಜತ್. ಎಲ್ಲ ಅಡೆ-ತಡೆ ನೀಂಗ್‌ನ ಪಿಂಞ ಏದ್ ಮೂಲೆಕೆತ್‌ಚಿೋ ಕಂಡವು ದಾರ್.....?

ಮುತ್ತಪ್ಪ ಮಾಸ್ತರ್ ಬುಕ್ಯ ಎಡ್‌ತ ಬಪ್ಪೀಂದ್ ಇನ್ನನೆ ಮಾಡ್‌ಚೆಲ್ಲಾಂದ್ ಕಮಲುಕ್ ಬೇಜಾರ ಆಚಿ. ದಾಡದೋ ಮಕ್ಕಡ ಬುಕ್ಯ ಎರಂದಿತ್ ನಿಂದಂಡೇ ಓದ್‌ಚಿ. ಅಳಾತ್‌ರಾವ ಕಯ್ಯಾಂದೂ ಕಟ್ಟಪ್ಪಣೆ ಆಯಿತಿಂಜತಲ್ಲಾ.....?

ಸುಮಾರ್ ದಂಡ್ ಗಂಟೆಕ್ ಕಮಲುರ ಎಳಿಯ ತಂಗೆ ಅಂಜಿ ವಯಸ್ಸಾರ ಮೂಡಿ ಕುಂಞಿ ಪಡಿರ ಮರೆ ಮರೆಲ್ ನಿಂದಂಡ್ ಅಕ್ಕನ ತೇಡುವಯಿಂಜತ್. ತಂಗೆನ ಕಂಡ ಅಕ್ಕ, ಕೈ ಭಾಷೆಲ್ ಅಪ್ಪರ ಪೋಂದ್ ಎಣ್ಣೆಚಿ. ಆ ಕುಂಞಿಕೂ ಅಕ್ಕಂಗೂ ತಕ್ಕ ಪರೆವಕೂ ಅವಕಾಶ ಇಲ್ಲೆ. ಗಣೇಶ ಮಾಸ್ತ ಕ್ಲಾಸ್‌ಕ್ ಬರತೆ ಪೊರಮೆ ಬಪ್ಪನ್ನೆಕೆಯಿಲ್ಲೆ. ತಂಗೆ ಇಂದಾಕಣೆ ಸ್ಕೂಲ್‌ಕ್ ಬರತವ ಎನ್ನಾಂಗ್ ಬಂದಿತಿಕ್ಕೂಂದ್ ಪೋಡಿ, ಓರ್ ಬರಿಯ. ಮಾಸ್ತರ್ ಪೋಡಿ ಇಂಞೋರ್ ಬರಿಯ. ಮಜ್ಜಣ ಉಂಗತೆ ನಿಂದ್ ನಿಂದ್ ಓದುವಕೂ ಕಯ್ಯತೆ ಮಂಡೆ ತಿರಿತ್ ಬೂವನ್ನೆಕಾಚಿ. ಪೊರಮೆ ತಂಗೆ ಏದೋ ಪಡಿ ಮೂಲೆಲ್ ಮೊರ್‌ಟಂಡೇ ನಿಂದತ್. ನಾಲರೆಗಂಟೆಕ್ ಗಣೇಶ ಮಾಸ್ತರ್ ಬಾತ್. ಕಮಲು ಪದ್ಯ ಪಡಿಕತಾನ ಕಂಡಿತ್ ಚೆಡಿಲ್ ರೋಸಿ ಪೋಚಿ. ಜಡೆ ಪುಡ್‌ಚಿ ಬೆನ್ನಕ್ ಅವಂಡ ಭೀಮಂಗೈಲ್ ಒಂದ್ ಗುದ್ದ್‌ಚಿ. ಕಮಲು ಅಲ್ಲಿಯೇ ಬುದ್ದತ್. ಇದ್‌ನ ಪಡಿರ ಸೆರೆಯ ಕಂಡ ತಂಗೆ ಜೋರ್‌ಲ್ "ಅಕ್ಕಯ್ಯ"ಂದ್ ಮೊರ್‌ಟತ್. ಗಣೇಶನೂ ಗಂಗೆಯೂ ಮಕ್ಕಡ ಸೈಶಲ್ ಕ್ಲಾಸ್ ತೇಂದಿತ್ "ಪೋಯಿ"ಂದ್ ಜೋರ್ ಮಾಡಿತಯಿಚತ್.

ಎನ್ನನೆಲ್ಲೊ ಎದ್ದ ಕಮಲು, ಪೊರಮೆ ಬಂದಿತ್ ತಂಗೆನ ತಬ್ಬಿಯಂಡ್, ಸಮಾಧಾನ ಮಾಡಿತ್, "ಎನ್ನಂಗ್ ಬಂದಿಯಾ"ಂದ್ ಕೇಟತ್. ಅವ್ವಯ್ಯ ನಿನ್ನ ಬೆರಿಯ ಕೂಟಿಯಂಡ್ ಬಾಂದೆಣ್ಣೆಚೀಂದ್ ಕೊಂಞಿ ತಕ್ಕಲೇ ಎಣ್ಣೆಚಿ.

ಮನೆಕೆತ್ತಿತ್ ಕೋಂಬರೆಕ್ ಪೋಚಿ. ಅವ್ವನ ತವುಡಿತ್ ಕಾಕ್‌ಚಿ. ಒರಟಾಲೆ.

ಕಾಲ್ ಕೈಯೆಲ್ಲ ಮರಕಟ್ಟಿ ಪೋನದ್ ಕಂಡಿತ್ ಕಮಲುಕ್ ಸಂಗತಿ ಗೊತ್ತಾಚಿ. ಮಕ್ಕಡ ಮೊರೆ ಕೇಟಿತ್ ನೆರೆಮನೆಕಾರ ಕೂಡ್‌ಚಿ. ತೆರ್‌ಚಂಡ್ ತೆರ್‌ಚಂಡ್ ಚೋಮುಣಿ ಬಂದಿತೆತ್ತಾಚಿ. ನಾರಾಚಿ ಚಾವು ದಫನ ಆಚಿ!

ಕಮಲು ಎಂದೂ ಜೀವನತ್ ತೆಳಿಚವಳೇ ಅಲ್ಲ. ಅವ ಅತ್ತಕೊಟ್ವರತ್ತಟಿ ಪೋಪಾನ ದಾರೂ ನೋಟಾಲೆ. ತಾನೊಬ್ಬಳೇ ಒರ್ ಪುಚ್ಚಿ ತೆಳಿ ತೆಳೆಚಂಡ್ ತಾಂಡ ಕನ್ನಡ ನೋಟ್‌ಬುಕ್‌ಂಜ ಒರ್ ಪಾಳೆ ಕೀತಿತ್ ಮುತ್ತಪ್ಪ ಮಾಸ್ತರ್‌ಕ್ ಇನ್ನನೆ ಎಳೆದ್‌ಚಿ -

"ಸಾರ್, ಇನ್ನಂದ್ ನಿಂಗ ಪುದಿಯ ಬುಕ್ಕ್ ಎಡ್‌ತ ಬಕ್ಕೊಂದೇ ನಾನ್ ಬಂದಿತಿಂಜ; ಇಲ್ಲೇಂಗಿ ಅವ್ವನ ಬುಟ್ಟಿತ್ ಬಪ್ಪಕಿಂಜಿಲೆ. ನಿಂಗ ಎಣ್ಣೆನನ್ನೆಕೆ ಖಾಲಿ ಕುಪ್ಪಿನ ಅಪ್ಪಂಗೇ ಬೆಚ್ಚಿಯೆ. ನನ್ನ ಇಕ್ಕಣೆ ಪ್ರೀತಿಲ್ ತಕ್ಕ್ ಪರಿಚಿಟ್ಟಿವನಿಲ್ಲೆ. ನಿಂಗ ಆ ಕೊರತೆನ ನೀಕಿತ್ ನಾಕ್ ನೆಮ್ಮದಿ ತಂದಿರ; ಅವ್ವಂಡ ಬಟ್ಟೆಕೇ ನಾನೂ ಪೋಪಿ. -  
"ಕಮಲು"

ಚೆನಿಯಾಚಿ ಅರ್ಜೆಂಟ್ ಕೆಲಸ ಇಂಜಾನಗುಂಡ್, ರಜ ಇಟ್ಟಿತ್ ಪೇಟೆಕ್ ಪೋನ ಮುತ್ತಪ್ಪ ಮಾಸ್ತರ್ ದಂಡ್ ಪುದಿಯ ಪುಸ್ತಕ, ಅಲ್ಲತೆ ಕಮಲುಕೋರ್ ಯೂನಿಫಾರಂ, ಲಂಗ ಬ್ಲಾಸ್ ಎಡ್‌ತಂಡ್ ತಿಂಗಳಾಚಿ ಪೇಟೆಂಜಿ ನೆರೆ ಸ್ಕೂಲಾಕೇ ಬಾತ್. ಅಕ್ಕಣೆ ಪ್ರಾರ್ಥನೆಕ್ ಮಕ್ಕ ನಿಂದಿತ್ ರಾಷ್ಟ್ರಗೀತೆ ಆಯಂಡಿಂಜತ್. ರಾಷ್ಟ್ರಗೀತೆ ಆನದು, ಹೆಡ್‌ಮಾಸ್ತರ್ "ಕಮಲು ಚತ್ತಾಂಗ್ ದಂಡ್ ನಿಮಿಷ ಮೊನ ಪ್ರಾರ್ಥನೆ ಮಾಡಂಡೂ"ಂದ್ ಎಣ್ಣೆಚಿ. ಮುತ್ತಪ್ಪ ಮಾಸ್ತರ್ ತಾನ್ ಕೊಂಡ ಬಂದ ಬುಕ್ಕ್, ಬಟ್ಟೆನ ಎದೆಕ್ ಒತ್ತಿ ಪುಡ್‌ಚಂಡ್ ದುಃಖ್‌ಚಿಟ್ಟಿಂಡ್ ಕಮಲುರ ಮನೆ ತೇಡಿಯಂಡ್ ಪೋಕಣೆ, ಪೋಲೀಸ್‌ಕಾರ ಕೊಟ್ವರ ಬುಟ್ಟಿತ್‌ಂಜಿ ಕೇರೋಡೆ ಕಮಲುರ ಚಾವು ಉಳಾಪಿತ್ ಅವ ಎಳೆದ್‌ನ ಕಾಗದತ್‌ನ ಜೋರ್‌ಲ್ ಕೂಡ್‌ನಯಿಂಗಕೆಲ್ಲ ಕೇಪನ್ನೆಕೆ ಓದ್‌ಚಿ.

ಒರ್ ಬರಿಲ್ ಚೋಮುಣಿ ದಂಡ್ ಚೆರಿಯ ಮೋಳಿಯಳ ತಬ್ಬಿಯಂಡ್ "ನಾನ್ ಇಂಞಾ ಕುಡಿಪುಲೆವ್ವಾ"ಂದ್ ಎದೆಕ್ ಪೊಜ್ಜಂಡ್ ಮೊರ್‌ಟಂಡಿಂಜತ್. ಮುತ್ತಪ್ಪ ಮಾಸ್ತರ್ ಆ ಪುಸ್ತಕ, ಬಟ್ಟೆನ ಚಾವುರ ಬರಿಲ್ ಬೆಚ್ಚಿತ್ "ಇದಾ ನಾಡ ಮುರಿ ನೀಕ್"ಂದೆಣ್ಣಿತ್ ಬೆಮ್ಮಾರ್‌ಚಿ.

- \* - \* - \* -



## ಉದ್ಯ ತೆರಂಗನಕ ಕೊಂಬಡೆಕೆ

ಗಂಗುರ ಅವ್ವ ಬೆಂಜಿತಿಪ್ಪಕ ಮನೆರ ಕಯ್ಯಾಲೆಲ್ ಬಾಳೆ ಎಲಕಂಡ ಬಿರಚಿತ್ ಬುದ್ದವಕ್ ಆಕ್ನದ್, ಮೇಲ್ಕಾಕ್ ಒರ್ಬೊಳ್ಪು ತುಣಿ ಮಾತ್ರ ಬಿರಿಚದ್, ಅವೊ ಉರಿ ಉರೀಂದ್ ಕೂತ್ಕೊಡ್ಪದ್, ಅಪ್ಪಂಡ ಅವ್ವ ತಾಯವ್ವ ಕೋಳಿನೆಯ್ ತೇಡಿತ್ ಪರಟ್ನದ್, ಅಪ್ಪ ಎದೆಕೂ ಮಂಡಕೂ ಪೊಜ್ಜಂಡ್ ಮೊರಟದೆಲ್ಲ ಇಂದ್ ಇನ್ನಾಂದ್ ನಡಂದನ್ನೆಕೆ ಕಾಂಬ. ಅಲ್ಲಿಂಜಿ ನಾಲಾಳ್ ಪೊರ್ತಂಡ್ ಆಸ್ಪತ್ರಕ್ ಪೋನದೂ, ಗಂಗು ಮೊರಡುವಕ್ ತಾಯವ್ವ ತೆಗೆ ಪೊಳಿ, ಬೆಲ್ಲ ಕೊಡ್ತದೂ, ಗೇನ ಉಂಡ್.

ನಾಲಂಜಿ ದಿನ ಅಪ್ಪ ಬಂದಿತ್ ಆಸ್ಪತ್ರಕ್ ಪೋಪಕ ನಾನೂ ಬಪ್ಪೀಂದ್ ಮೊರಟತ್. ಅವ್ವನ ಇಂದ್ ಕೂಟಿಯಂಡ್ ಬಪ್ಪೀಂದ್ ಅಪ್ಪ ಸಮಾಧಾನ ಮಾಡುವಕಾಯಿತ್ ಪರಂದ ಪೊಟ್ಪಂದ್ ಗೊತ್ತಾಪ ವಯಸ್ಸ್ ಅಲ್ಲ.

ಒನ್ನಾಂದ್ ಅಪ್ಪ ಬಪ್ಪಕ ಅವ್ವನೂ ಬಂದದ್ ಕಂಡತ್. ನಡಂದಂಡಲ್ಲ. ಜನ ಪೊರ್ತಂಡ್. ಅವ್ವ ತಕ್ಕ್ ಪರಂದಾಲೆ. ಮನೆ ದುಂಬ ಬೊಳುಪ್ ಬಟ್ಟೆ ಇಟ್ಟ ಆಣೂ ಪೊಣ್ಣೂ ಎನ್ನ ಮಾಡುವಯಿಂಜತ್ಂದ್ ಗೊತ್ತಾಪಾಲೆ. ತಾಯವ್ವ ಮಾತ್ರ ಗಂಗುನ ಮಡಲಳಪ್ಚಿಟ್ಟಿಂಡ್ ತಾನೂ ಮೊರಡುವಯಿಂಜತ್. ಚಾವೊ ಪುಟ್ಟುವೊ ಈ ಸಂಗತಿಯೆಲ್ಲ ಗಂಗುಕೆನ್ನೆ ಗೊತ್ತ್?

ಕಾಲ ಎಲ್ಲಾನೊ ಮರಪ್ಚಿಟ್ಟಿತ್. ದಿನ ಕಯಿಂಜನ್ನೆ ಅವ್ವಂಡ ಗೇನೋ ಮರಂದತ್. ತಾಯವ್ವ ಕರ್ ಮೋವಳ ಅರೆಲೇ ಬೆಚ್ಚಂಡ್ ಚಾಕ್ಚಿ.

ಮಾದಪ್ಪಂಗ್ ಇಗೂ ನುಪ್ಪತ್ತಂಜಿ ಬಯತ್ ದಾಟಿ ತಿಲ್ಲೆ. ದಿನಕ್ಕೊಬ್ಬ ದಂಡಾಳ್ ಬಂದಿತ್ ಮಂಗಲತ್ ಮೊಳಿ ಎಡ್ಪಯಿಂಜತ್. ನೀಕಾಯಿತಲ್ಲೆಂಗಿ ನೀಡ ಮೋವಡ ಸುಖಕಾಯಿತೆಂಗಿ ಮಂಗಲಕಯಿ. ಚತ್ತದ್ ಬರ, ಉಳ್ಳವು ಚತ್ತುವ ಕಯ್ಯುವ? ಎನ್ನ ಉಂಬಕ್ ತಿಂಬಕ್ ಇಲ್ಲತವನ?

ಇನ್ನನೆ ವ್ಯವಹಾರ ಪರೆಯುವಯಿಂಗಳೆ ಎಲ್ಲಾರು. ಮಾದಪ್ಪಂಡ ಅವ್ವನೂ

ಎಣ್ಣುವಚ್ಚಕ್ ಎಣ್ಣೆನೋಟೊಚಿ. ಗಂಗುರ ಮೂಡ್ ಕಾಂಬಕ ಮಾತ್ರ ಮಾದಪ್ಪಂಗ್ ದಂಡನೆ ಮಂಗಲತ್ತರ ವಿಚಾರ ಮರಂದೇ ಪೋಪಯಿಂಜತ್.

ಮಾದಪ್ಪ ಉಂಬಕೂ ಉಡ್‌ಪಕೂ, ಕರಪಕೂ ಕಾಚುವಕೂ, ಆಯಿತ್, ನೆಮ್ಮದಿಲೇ ಇಂಜತ್. ತಾನ್ ಅಳತಂಡ್ ಗೇನ ಮಾಡ್‌ಚಿ, ಉಳ್ಳ ನೆಮ್ಮದಿಕ್ ಎನ್ನಂಗ್ ಭಂಗ ಮಾಡಂಡಿಯೆ? ನಾಡ ಸುಖಕಾಯಿತ್ ಗಂಗುರ ಬಾಳ್‌ನ ಎನ್ನಂಗ್ ಪಾಳಾಕಡ್. ಚಿಕ್ಕವ್ವ ಎಂದೂ ಅವ್ವನಾಗ. ಇಂದೇಕೂ ನಾಳೆಕೂ ಅವ್ವಂಗ್ ಅವ್ವನಾಯಿತ್ ನಾಡ ಅವ್ವನೇ ಉಂಡ್. ಗಂಗುನ ಎಳತ್ ಪಡ್‌ಪ್‌ಚಿಟ್ಟಿತ್ ಒರ್ ನಲ್ಲವಂಗ್ ಕೊಡ್‌ತಕ, ನಾಡ ಓರ್ ತಡಿಕ್ ಎನ್ನಾಂಡಿಯೆ? ಇನ್ನೆಲ್ಲ ವೇದಾಂತತ್‌ರ ಬಟ್ಟೆಕ್ ಮನಸನ್ ತಿರಾಕೊಚಿ.

ಮನೆರೆದಿಕೆ ಮಾಂಗ್ ಮರತ್ತರ ಕೊಂಬಕ್ ಅಪ್ಪ ಕೆಟ್ಟಿ ಕೊಡ್‌ತ ಉಯ್ಯಾಲೆಲಳತ್ ಕಳಿಪದೇ ಗಂಗುಕ್ ಅವ್ವಂಡ ಮಡ್‌ಲಳತ್ ಕಳಿಪಚ್ಚಕ್ ಸಂತೋಷ ಕೊಡ್‌ತತ್. ಉಯ್ಯಾಲೆ ಕಳ್‌ಚಿತ್ ಮದಿಯಾಪಕ ಓಡಿ ಬಂದ್ ತಾಯವ್ವಂಡ ಮಡ್‌ಲಳಪಯಿಂಜತ್. ಅಕ್ಕ ತಾಯವ್ವ "ಉಯ್ಯ ತೆರಂಗ್‌ನಕ ಕೊಂಬಡಿಕೆಂದ್ ಈಂಗೇ ಗಾದೆ ಬೆಚ್ಚಿಯೆ. ಪೋ ಕಳಿ. ನಾಕ್ ಪಣಿ ಉಂಡ್" ಎಣ್ಣಿಯಂಡ್ ಪೋಪಯಿಂಜತ್.

ನಾಲಂಜಿ ಕಾಲ ಕಯ್ಯವಕ ಗಂಗು ಎಳತ್‌ಲೂ, ಕಳಿಲೂ, ಆಟ್‌ಲೂ, ಪಾಟ್‌ಲೂ ದಾಕೂ ಬಯ್ಯಲಿಲ್ಲತಾಚಿ. ಚೆನ್ನ ದಿನತ್‌ಲ್ ತಾಯವ್ವನೂ ಚತ್ತತ್. ಇಕ್ಕ ಮಾತ್ರ ಗಂಗುಕ್ ಚಾವದೂ ಪರಪದೂ ನಲ್ಲೋಣೆ ಅರ್ಥ ಆಪಕಾಯಿತ್. ತಾಂಡ ಪೆತ್ತವ್ವಂಡ ಮರಣತ್‌ಲ್ ಕಾಟುವಕ್ಕ ಕಯ್ಯತ ದುಃಖತ್‌ನೆಲ್ಲ ಕಾಟ್‌ಚಿ. ಇಂಞಿ ಗಂಗುಕ್ ತಾಂಡವುಂದೆಣ್ಣಿ ತುಳ್ಳ ಅಪ್ಪ ಮಾತ್ರ.

ಗಂಗುನ ಹೈಸ್ಕೂಲ್‌ಕ್ ಕೂಟಂಡು. ಮನೆ ಕಾರ್ಬಾರ್ ಒಬ್ಬನಗುಂಡ್ ಆಪಾಲೆ. ಉಳ್ಳ ಅಸ್ತಿ, ಅತ್ತಕಡ್‌ಚಿ, ಮನೆ ಮಾರ್‌ನೆಲ್ಲ ಮಾರಿತ್ ಮೈಸೂರ್‌ಲ್ ಒರ್ ಮನೆ ಎಡ್‌ತಂಡ್ ಕೂಡ್‌ಚಿ. ಎನ್ನೇಂಗಿ ಮಾಡಿತ್ ಮೋವಳ ಬಿ.ಎ. ಮಾಡಂಡೂಂದ್ ಮಾದಪ್ಪಂಡ ಆಶೆ. ಮೇಲ್ ತೆಳ್‌ಗುನ ಗಂಗು ದಿನದಿನಕೂ ಪರಕೆ ಬುಟ್ಟು ಪಂದಿನನ್ನೆಕೆ ಉರ್‌ಂಡ್ ಉರ್‌ಂಡಾಯಿತ್ ಬೊಳಂದತ್.

ಉಳ್ಳ ಪಣ ಎಕ್ಕಣೆ ಬಕ್ಕು? ಮನೆನ ಗಿರ್‌ವಿ ಎಳಾದಿತ್ ಸಾಲ ಮಾಡಂಡಿಯ ಬಾತ್. ಗಂಗುಕ್ ಇದೊಂದೂ ಬೋಂಡ, ದಿನಕ್ಕೋರ್ ತರ ಪೊರಪಾಡ್. ನೇರಕ್ ನೇರಕ್ ಬಾಯಿ ರಸತ್‌ರ ಊಟ. ಸಿನೆಮಾ ನಾಟಕ ಎಣ್ಣಿಯಂಡ್ ಬೈಟೇಕ್

ಮನೆಕೆತ್ತ ಚೇಂಗಿ ಮದಿ.

ಮನೆರ ಎದಿಕೆ ಉಳ್ಳ ಜೈನಾಬಿ ದಿನಕೊಮ್ಮೆ ಗಂಗುನ ಕರಿಯೆಂತ, ಕೂಳೆಂತಂದ್ ತಕ್ಕ್ ಪರಿಚಿರತೆ ಇಪ್ಪಲೆ. ಜೈನಾಬಿರ ಮೋಂವ ತಿಂಗಕೊಮ್ಮೆ ಪಚ್ಚೆ ಕಾರ್ಲ್ ಬಂದಿತ್ ಒಂದಾದಂಡ್ ದಿನ ಇಂಜಿತ್ ಪೋಪಯಿಂಜತ್. ಜೈನಾಬಿ ಕಾರ್ಕಾರ ಮೋಂವಂಡ ಅವ್ವನನ್ನಕೆ ಇಲ್ಲೇಂಗಿಯೂ, ಗೌಸ್ ಮಾತ್ರ ನಲ್ಲ ಚಾಯಿಕಾರ ಬಾಲೆಕಾರ. ಬಪ್ಪಕ ಎಡ್ತಬಂದ ತಿಂಡಿ, ಪಣ್ಣ್ಫಲ, ಪುದಿಯ ಪುದಿಯ ಸಾಮಾನತಾರ ಒರ್ ಪಾಲ್ ಗಂಗುಕ್ ತಪ್ಪತೆ ಎತ್ತುವಯಿಂಜತ್.

ದಿನ ಪೋನನ್ನನೆ ಪೊಡಿಯ, ಬಟ್ಟೆ ಬರಿಯೂ ಗಂಗುಕ್ ಬಪ್ಪಕಾಚಿ. ಮಾದಪ್ಪ ಹರಿಕತೆ, ಭಜನೆ, ಪೂಜೇಂದ್ ಸುದ್ದಿ ಕೇಟಿಲ್ಲಿಕ್ ಪೋಪಯಿಂಜತ್. ತಿಂಗಕೊಮ್ಮೆ ಬಪ್ಪಯಿಂಜ ಗೌಸ್ ವಾರಕೊಮ್ಮೆ ಬಪ್ಪಕಾಚಿ. ಪೂನಾತ್ ಲ್ ಭಾರೀ ಬಲ್ಯ ಸಾವಕಾರಂದ್ ಗಂಗೂಕೂ ಗೊತ್ತಾಚಿ.

ಬಪ್ಪ ತಿಂಗ ಗೌಸ್ ಕೂಡ ಜೈನಾಬಿಯೂ ಪೂನಕ್ ಪೋಯಿತ್ ಮೋಂವಂಡ ಪುದಿಯ ಬಂಗಲೆ ನೋಟಂಡೂಂದ್ ಜೈನಾಬಿ ಮೊಳಿಯಿಟ್ಟತ್. ಪರೀಕ್ಷೆ ಕಯಿಂಜದು ನೀಕ್ ರಜ ಇಪ್ಪ, ಬಾ ನಂಗ ಚೆನ್ನ ದಿನ ಇಂಜಿತ್ ಬಕ್ಕಾಂದ್ ಗಂಗುನ ಒರಾತ ಮಾಡುವಕ್ ಸುರು ಮಾಡ್ಚಿ. ಗಂಗು ದೂರ ದೇಶ ನೋಟನವಳೂ ಅಲ್ಲ. ಅಪ್ಪ ಬುಡುವೋ ಎನ್ನೋ, ಎನ್ನನೆ ಕೇಪ? ಜೈನಾಬಿರ ಉಂಡ ತಿಂದ ಮುಲಾಜಿಕ್ ಒತ್ತಂಡತ್.

ಒನ್ನಾಂದ್ ಅಪ್ಪಂಡ ಕೂಡ ಬಾಯಿ ಬುಟ್ಟಿತೇ ಎಣ್ಣೆಚಿ. ಕಂಡ್ ಕೇಕತ ಊರ್ಕ್ ಕಂಡಂವಂಡ ಕೂಡ ಅಯಿಪದ್ ಮಾದಪ್ಪಂಗ್ ಇಪ್ಪ ಇಲ್ಲೆ. ಆಚೇಂಗಿ ಗಂಗು ಅಂತ ಮೂಡಿ ಅಲ್ಲ. ಜೈನಾಬಿಯೂ ಎಕ್ಕೊಲು ಕಂಡಂಡುಳ್ಳವ. ಜೈನಾಬಿಯೇ ಮಾದಪ್ಪಂಗ್ ಎಣ್ಣೆಚಿ - "ನಂಗ ಒರ್ವಾರತ್ ಬಪ್ಪ. ನಾಡ ಮೋವಳನೆಕೆ ನಿಂಗಡ ಮೋವ. ನಾ ಬರಣೆಕ್ ಮನೆರ ಬೀಗತ್ ಕೈ ನಿಂಗಡಲ್ಲಿಯೇ ಇರಡ್. ಓರಮ್ಮ ಪಡಿ ತೊರಂದಿತ್ ನೋಟಿಯೋಳಿ". ಇಚ್ಚಕ್ ಎಣ್ಣುವಕ ಎನ್ನನೆ ಕಯ್ ಎಣ್ಣುವೋ?

ಗಂಗು ಅಪ್ಪಂಡ ಮಾಲ್ ಎಡ್ತಂಡತ್. ಅಪ್ಪಂಡ ಕಾಲ್ ಪುಡ್ಚಿತ್ ಪೊರಟತ್. ಗೌಸ್ ದಂಡಾಳ್ಕೂ ಫಸ್ಪಕ್ಕಾಸ್ ರೈಲ್ ರಿಸರ್ವೇಶನ್ ಮಾಡ್ಚಿ. ರೈಲ್ ಮಿಂಞ ಪೋನನ್ನಕೆ ಗಂಗುಕ್ ಅಪ್ಪಂಡ ಗೇನ ಇಞ್ಚೋರ್ ಕಡೆ ಪೂನ, ಬೊಂಬಾಯಿನಂತ ಪಟ್ಟಣ ನೋಟುವ ಗೇನ.

ಪೂನಾ ಸ್ಪೇಶನ್ಕ್ ಗೌಸ್ ಕಾರ್ ಎಡ್ತಬಂದಿತ್ ಕಾತಂಡಿಂಜತ್. ಗೌಸ್

ಬಂಗಲೆಕ್ ಪೋಪಕ ಗಂಗುಕ್ ಏದೋ ದೇಶಕ್ ಬಂದನೆಕೆ ಆಚಿ. ಇಡೀ ಮನೆಲ್ ಇಲ್ಲತ ದಿಲ್ಲೆ. ಆಚೀಂಗಿ ದಾರೂ ಜನ ವಾಸ ಮಾಡತನ್ನಕೆ ಕಂಡತ್. ಎನ್ನೋ ವ್ಯಾಪಾರಕಾರ. ದೂರ ದೂರ ಪೋಪ, ಊಟ ಉಪಚಾರ ಎಲ್ಲ ಹೊಟೇಲ್‌ಂಜಿಯೇ ಬಪ್ಪಕ್ಕಾಚಿ.

ದೂರ ಪ್ರಯಾಣ ಸುಸ್ತ್. ಗಂಗುಕ್ ಬೆರಿಯ ಒರಕೂ ಬಾತ್. ಪೊಲಾಕ ಏವಕ ಜೈನಾಬಿನ ಕಂಡಾಲೆ. ಗೌಸ್ ಮಾತ್ರ ಹೊಟೇಲ್‌ಂಜಿ ಬೋಂಡಿಯದೆಲ್ಲ ಎಡ್‌ತ ಬಪ್ಪಾಚಿಟ್ಟಿತ್. ಜೈನಾಬಿ ಇಲ್ಲಿಯೇ ಪಕ್ಕತ್‌ಲ್ ಬೆಂದ್‌ಕಡಲ್ಲಿಕ್ ಪೋಯಿತ್, ಇಕ್ಕ ಬಪ್ಪ, ಅಕ್ಕ ಬಪ್ಪ ಎಣ್ಣಿಯೆಂಡ್ ನೇರ ಮಜ್ಜಣಾಚಿ.

ಇಕ್ಕ ಗಂಗುಕ್ ಮೆಲ್ಲೆ ಮೇಲ್‌ಲ್ ಕುಳಾರ ಪೊರಿ ಏವಕಾಚಿ. ದಾಡ ಕೂಡ ಎಣ್ಣಲು, ದಾರ್‌ನ ಕೇಕಲು? ತಾಂಡ ಅಪ್ಪನೊ ಅವ್ವನೊ ತಾಯವ್ವನೋ ಎಲ್ಲಾ ಗೇನ ಬಾತ್. ನರಿರ ಮಾಳಿಕ್ ತಾನಾಯಿತ್ ನುಗ್ಗನ ಪಯ್ಕುನನ್ನಕೆ ಆಚಿ ಗಂಗುರ ಕತೆ.

\* \* \*

ಜೈನಾಬಿ ಇಂಜ ಮನೆರ ಬೀಗತ್ ಕೈ ತಾಂಡ ಪಕ್ಕ ಉಂಡೇಂಗಿಯೂ, ಮಾದಪ್ಪ ತೊರಪಕ್ ಪೋಯಿಲೆ. ವಾರ ದಂಡಾಚಿ, ಗಂಗು ಬಂದಾಲೆ. ದಾರ್‌ನ ಕೇಕಲು, ದಾಡ ಕೂಡ ಎಣ್ಣಲು, ಎಲ್ಲಿ ತೇಡಲು? ಮಂಡೆಕ್ ಮರ ಬುದ್ಧನ್ನಕೆ ಅಳತಿಪ್ಪಕ ಜೈನಾಬಿ ಇಂಜ ಮನೆರ ಮೊಟ್ಟ್‌ಲ್ ಒರ್ ಎಡೆ ವಯಸ್‌ಕಾರ ನಿಂದದ್ ಕಂಡತ್. ಅವನ ಕೇಕನಾಂದ್ ಮಾದಪ್ಪ ಪೋಕಣೆ ಅವನೇ ಮಾದಪ್ಪನ ಕಾಕಿತ್ ಈ ಮನೆಲಿಂಜವು ಎಲ್ಲಿಯಾಂದ್ ಕೇಟತ್. ಪೂನಕ್ ಪೋನ ಸಂಗತಿ ಎಣ್ಣಿತ್ ಬೀಗತ್ ಕೈ ನಾಡ ಕಯಿಲುಂಡ್‌ಂದ್ ಎಣ್ಣ್ಲೆ ಚಿ.

ಇದ್ ನಾಡ ಮನೆ, ಬಾಡಿಗ್ ಕೊಡ್‌ತಿತಿಂಜೆ. ಆರ್ ತಿಂಗತ್‌ಂಜಿ ಬಾಡಿಗ್ ತಂದಿತಿಲ್ಲೆ. ಮನೆ ಬುಡುವದೂ ಇಲ್ಲೆ. ಬಾರಿ, ತೊರಂದ್ ನೋಟನಾಂದ್ ಎಣ್ಣಿತ್ ಬೀಗ ತೊರಂದತ್. ಆಂಡ ಒಳ್‌ಲ್ ಮೂಂದ್‌ನಾಲ್ ಕೀತ್‌ನ ಪಲಂಬು. ಕಣ್ಣಾನ ಪಾತ್ರ, ಕಾಲಿಕುಪ್ಪಿ ಏದೇದೋ ಊರಾರ ಪೆದ ಉಳ್ಳ ಕೇಲೆಂಡರ್ ಅಲ್ಲತೆ ಇಇಇಂದೂ ಇಲ್ಲೆ! ಮನೆಕಾರನೂ ಮಾದಪ್ಪನೂ ಚೆನ್ನ ನೇರ ಒಬ್ಬ ಒಬ್ಬಂಡ ಮೂಡ್ ನೋಟಿಯಂಡ್ ನಿಂದತ್. ಬಾಡಿಗ್ ತರತೆ ಮನೆ ಬುಟ್ಟ್ ಪೋನ ನಷ್ಟ ಮನೆಕಾರಂಗ್, ಮೋವಡ ಗತಿ ಎನ್ನಾಚೀಂದ್ ಮಾದಪ್ಪಂಡ ಬೇರ. ಪೊಲೀಸ್‌ಕ್ ಪುಕಾರ್ ಕೊಡ್‌ತಕ ಮಾನಕೇಡ್. ನಾಳೆ ಮತ್ಯಾಂದ್ ಮೋವ ಬಾತೇಂಗಿ!

\* \* \*

ವಾರ ಕಯಿಂಜತ್. ತಿಂಗ ಮರಾಂಜತ್. ಜೈನಾಬಿ ಎನ್ನಾಚಿ, ದಾರ್ನ ಕೇಪ್? ಗಂಗುರ ಗೋಳಾನ್ ಕೇಪಕ್ ದಾರುಳ್ಳೋ? ಅಪ್ಪಂಗ್ ಕಾಗದ ಎಳಾದನ ಎಣ್ಣೆಚೇಂಗಿ ಮನೆರ ಕಟ್ಟೋಳೆ ಕಡ್‌ಪಕ್ ಬುಡುವವು ದಾರ್?

ಓರ್ ವಾರಕೆತ್ತಣೆ ಗೌಸ್ ಮನೆರ ಯಜಮಾನನೂ ಅಕ್ಕು, ಸಾವುಕಾರನೂ ಅಕ್ಕು, ಗಂಗುರ ವಡಿಯನೂ ಅಕ್ಕು. ಒನ್ನಾಂದ್ ದಂಡ್ ಮೂಂದಾಳ್ ಬಂದಿತ್ ಮನೆ ಒಡ್‌ಕಿ, ತೇಟಿ, ಚಾಯಿ ಕೂಟಿತ್ ಪೋಚಿ. ಗಂಗುಕ್ ಒಂದೂ ಅರ್ಥ್ ಆಪಾಲೆ. ಒರಕ್ ಊಣ್ ಬುಟ್ಟಿತ್ ದುಕ್ಕುಚ್‌ಟ್ವ್ ಮೊರಟಂಡಳೆಪಕಾಚಿ. ಅಂದ್ ಬೈಟ್ ಭಾರೀ ಬಲ್ಯ ಸಾವುಕಾರ ಆ ಮನೆಕ್ ಬಾತ್, ಅವಂಡ ಮಿಂಞಾ ಗೌಸ್ ಅಳಾಪದೂ ಇಲ್ಲೆ, ನೇರೆ ನಿಪ್ಪಕ್ಕೆ ಬೊತ್ತುವ. ಇದ್ ಗೌಸ್‌ರ ಮನೆ ಅಲ್ಲ, ಈ ಸಾವುಕಾರನೇ ಇದ್‌ಂಡ ಯಜಮಾನಂದ್ ಗಂಗುಕ್ ಗೊತ್ತಾಗ್ತಿಲ್ಲೆ.

ತಿಂಗ ನಾಲ್ ಕಯಿಂಜತ್. ಗಂಗು ಇಂಞಿ ಕುಂಞಿರ ಅವ್ವನಾಂಡು. ಆಚೇಂಗಿ, ಆ ಕುಂಞಿರ ಅಪ್ಪದಾರ್‌ಂದ್ ಎಣ್ಣುವ ಕಯ್ಯು? ಒನ್ನಾಂದ್ ಮೇಜಿರೊಳಾಲ್ ಒರ್ ಕಾಗದ ಕಂಡತ್. ಅದ್‌ಲ್ ಆ ಮನೆರ ಅಡ್ರೆಸ್ ಗಂಗುಕ್ ಕೊಟ್ಟಿಚಿ. ಅದ್‌ನ ಎಳಾದಿತ್ ತಾಂಡ ಗತಿನ ನಾಲೇ ಗೆರೆಲ್ ಅಪ್ಪಂಗ್ ಎಳಾದಿತ್ ಕಾಲಿ ಕವರ್‌ಲ್‌ಟ್ಟಿತ್ ಬೆಚ್ಚಂಡತ್.

ಸಾವುಕಾರ ಎಕ್ಕೇಂಗಿ ಓರಮ್ಮ ಗಂಗುನ ಕಾರ್‌ಲ್ ಪೊರಮೆ ಕೂಟಿಯಂಡ್ ಪೋಪಯಿಂಜತ್. ಒನ್ನಾಂದ್ ಇನ್ನನೆ ಪೋಪಕ ಸಾವುಕಾರಂಡ ಕಣ್ಣ್ ತಪ್ಪಾಚಿಟ್ಟಿತ್, ಆ ಕಾಗದತ್‌ನ ಪೋಸ್ಟ್‌ಕ್ ಇಟ್ಟಿತ್. ದಂಡ್ ದಿನತ್‌ಲ್ ಗೌಸ್ ಮನೆಕ್ ಬಂದಿತ್ ಗಂಗುನ ಕೂಟಿಯಂಡ್ ಬಾಡಿಗೇ ಕಾರ್ ಮಾಡಿತ್ ಬೋರೆ ಒರ್ ಚೆರಿಯ ಮನೆಕ್ ಪೋಚಿ. ನಡಪಾದ್ರೆ ನೇರಕ್ ಆ ಮನೆರ ಪಡಿ ತೊರಂದ ಪೊಣ್ಣಾಳ್ ಗಂಗುನ ನೋಟಿತ್ ಮಂಡೆಕ್ ಸೆರಗ್ ಮುಚ್ಚಿಯಂಡ್ ಪೋಚಿ. ಇದ್ ಜೈನಾಬಿಂದ್ ಗಂಗುಕ್ ದಾರೂ ಎಣ್ಣೆ ಕೊಡ್‌ಕಂಡಿಯದಿಲ್ಲೆ!

ಪಿತ್ಯಾಂದ್ ಮುಸ್ಲಿಂ ಶಾಸ್ತ್ರ ಪ್ರಕಾರ ಗಂಗುರೋ ಗೌಸ್‌ರೋ ಮಂಗಲ ಕಯಿಚತ್. ಜೈನಾಬಿ ಇಂದ್ ಗಂಗುರ ಮಾಂವಿ. ಮಾಂವಿರ ಗತ್‌ಲೇ ತಕ್ಕೂಬಾಕೂ ಸುರು ಮಾಡ್‌ಚಿ.

\* \* \*

ಪೋಸ್ಟ್‌ಮೆನ್ ಡ್ಯೂ ಕಾಗದ ಎಂಡ್‌ತಂಡ್ ಮಾದಪ್ಪಂಡಲ್ಲಿಕ್ ಬಂದಿತ್ ಕೊಡ್‌ತಿತ್ ಪೋಚಿ. ಓದಿತ್ ಮಾದಪ್ಪಂಡ ಮಂಡೆ ಸುತ್ತಿತ್ ಒಮ್ಮ ಬುದ್ಧತ್.

ಬುದ್ಧಲ್ಲಿಂಜಿ ಎದ್ದಿತ್, ಅಲ್ಲಿ ಇಲ್ಲಿ ಪಣ ಸರಿಮಾಡಿತ್ ಪೂನಕ್ ಬಂದಿತ್ ಎತ್ತಚಿ.

ಕಾಣತ ಊರ್, ಅರಿಯತ ಭಾಷೆ, ಎನ್ನ ಮಾಡಲು? ಕೇಟರ್‌ಂಜಿತ್ ಆ ಎಡ್ರಸುಳ್ಳ ಬಂಗಲೆಕ್ ಎತ್ತಚಿ. ಒಳಕ್ ಪೋಪನ್ನಕೆ ಇಲ್ಲೆ. ಗೇಟ್‌ಕ್ ಬೀಗ! ಆರೇಂಗಿ ಕೊಡಗ್‌ಕಾರ ಉಂಡಾಂದ್ ಉಡುಪಿ ಪಟ್ಟಿಂಗಡ ಹೋಟೆಲೆಲ್ಲ ತೇಡಿತ್ ಕನ್ನಡತ್‌ಲ್ ತಕ್ಕ ಪರಂದಿತ್ ಅರಿಂಜಿತಾಪಕ ಸುಮಾರ್ ನಾಪದ್ ಕಾಲಕ್‌ಬಯ್ಯ ಭಾಗಮಂಡ್ಲತ್‌ಂಜಿ ಪೋಯಿತ್ ದರ್ಜಿ ಆಯಿತ್ ಕೂಡ್‌ನ ಅಣ್ಣೆರ ಪರಿಚಯ ಆಚಿ.

ಅಣ್ಣೆರ ಸಹಾಯತ್‌ಲ್ ಕೇಟರ್‌ಂಜಿ ಆಪಕ ಆ ಮನೆರ ಸಾವುಕಾರ ಭಾರೀ ಕಳ್ಳ ವ್ಯಾಪಾರೀಂದೂ ಅವನ ಪೊಲೀಸ್ ಪುಡ್‌ಚಿತ್, ಅವಂಡ ಮನೆನ ಸ್ವಾಧೀನ ಮಾಡಿಯಂಡಿತ್‌ಂದೂ ಗೊತ್ತಾಚಿ.

ಮಾದಪ್ಪನೂ ಅಣ್ಣಿಯೂ ಗಂಗುರ ವಿಚಾರ ಪೊಲೀಸ್‌ಕ್ ಪುಕಾರ್ ಕೊಡ್‌ತತ್. ನಂಗ ಮನೆ ಶೋಧನೆ ಮಾಡುವಕ ಅದ್‌ಲ್ ದಾರೂ ಜನ ಇಂಜಿಲೇಂದ್ ಪೊಲೀಸ್ ರಿಪೋರ್ಟ್ ಇಂಜತ್. ಸಾವುಕಾರ ಕೆಣಿಂಜಂದೇ ಗಂಗುನ ಗೌಸ್ ಸಾಗ್‌ಚಿಟ್ಟಿತಿಂಜತ್. ಇಂಞಿ ಮಾದಪ್ಪಂಡ ಒರೇ ಆಸೆ. ಪುಟ್ನ ಮಣ್ಣ್‌ಕ್ ಎತ್ತಿತ್ ಚಾವಿಂದ್. ಅಣ್ಣೆರ ಸಹಾಯತ್‌ಲ್ ಮೈಸೂರ್‌ಕೆತ್ತಚಿ.

ಸಾವುಕಾರ ಕೆಣಿಂಜದು ಗೌಸ್‌ರ ದರ್ಬಾರ್ ಅಡಂಗ್‌ಚಿ. ದಾಡದೋ ಕಾರ್‌ಲ್ ಡ್ರೈವರ್ ಆಯಿತ್ ಕೂಡ್‌ಚಿ. ಗಂಗುಕ್ ಒರ್ ಪುಡಿ ಕೂಳ್ ಕೊಡ್‌ಪದೂ ಕಷ್ಟ ಆಚಿ. ಗಂಗುರ ಪೆರಿಗೆಲ್ ದುಂಬ ಕಷ್ಟ ಆಯಿತ್, ಆಪರೇಶನ್ ಮಾಡಿತ್ ಕೆಲತ್‌ಲ್ ಚತ್ತ ಕುಳಾನ ಎಡ್‌ತತ್. ಗಂಗುರ ತಡಿಲ್ ತಾರಾಮಾರಾ ಕಾಯಿಲ ಇಂಜಿತ್ ನಾಲ್ ತಿಂಗ ಗವರ್ಮೆಂಟ್ ಆಸ್ಪತ್ರೆಲ್ ಇರಂಡಿಯಾಚಿ. ಗಂಗು ಎಲ್‌ಂಬ್ ತೋಲ್ ಆಚಿ.

ಪತ್ತಿರುವದ್ ದಿನಕೆತ್ತಣೆ ಓರಮ ಗೌಸ್ ಇಲ್ಲೇಂಗಿ ಜೈನಾಬಿ ಬಪ್ಪಯಿಂಜತ್. ಅಲ್ಲಿಂಜಲ್ಲಿಂಜಿ ದಾರೂ ಇಲ್ಲೆ. ಆಸ್ಪತ್ರೆಂಜಿ ಬಪ್ಪಕ ಗಂಗುಕ್ ಮೊಟ್ವ್ ಎಡ್‌ಪಕಯ್ಯ. ಎಲ್ಲಿಕ್ ಪೋಪ ದಾರ್‌ನ ಕೇಪ, ದಾರ್‌ಗತಿ? ಅಪ್ಪನ ಗೇನ ಮಾಡಿತ್ ಮೊರಡುವಕೂ ತ್ರಾಣ ಇಲ್ಲೆ. ಒಳಪ್‌ಚಿಟ್ವ್ ಬೆಚ್ಚಂಡಿಂಜ ತಾಂಡ ಅವ್ವಂಡ ಒರ್ ಮೊಯಿರ ಮಾರಿತ್ ಎನ್ನನೆಯೋ ಮೈಸೂರ್‌ಕೆತ್ತಚಿ.

\* \* \*

ಮೈಸೂರಾಕೆತ್ತನ ಮಾದಪ್ಪ ಗಂಗುರ ಗೇನತ್‌ಲ್ ಕಾಯಿಲ ಬುದ್ದಿತ್ ಚೆನ್ನದಿನ ಗಂಗೂ ಗಂಗೂ ಎಣ್ಣೆಯಂಡೇ ತಿರ್‌ಚಿ. ಕೈಲ್ ಕಾಸಿಲ್ಲತಾಪಕ ಕಷ್ಟಕ್ ದಾರಾಕು? ಗಿರವಿ ಸಾಲಕ್ ಮನೆ ಬುಡಂಡಿಯಾಚಿ. ಆಸ್ಪತ್ರೆಲ್ ಚೆನ್ನ ದಿನ ಇಂಜತ್. ಕಾಯಿಲ ಜೋರಾಚಿ. ಗಂಗೂಂದೆಣ್ಣೆಯಂಡೇ ಪ್ರಾಣ ಬುಟ್ಟಿತ್‌ಂದ್ ಬಯ್ಯ ಗಂಗುಕ್ ಆಸ್ಪತ್ರೆ ಆಯ ಒಬ್ಬ ಎಣ್ಣೆ ಕೊಡ್‌ತತ್.

ಅಂದಿತೂ ಅಪ್ಪನ ಕಾಂಬಕ್ ಕಯಿಂಜ್‌ಲೆ. ತಾಂಡ ಅಪ್ಪಂಡ ಮನೆಕ್ ಪೋಚಿ. ಮನೆಲುಳ್ಳವು ನಡಂದಕತೆ ಎಣ್ಣೆತ್ ಮಾದಪ್ಪಂಗೆ ಬಂದ ಓರ್ ಕಾಗದತ್‌ನ ಗಂಗುಕ್ ಕೊಡ್‌ತತ್. ಅದ್ ಪೂನತ್‌ಂಜಿ ಟೈಲರ್ ಅಣ್ಣೆ ಎಳಾದ್‌ನ ಕಾಗದ! ಅದ್‌ಲ್ ನಡಂದ ಕತೆ ಎಲ್ಲ ಗಂಗುಕ್ ಗೊತ್ತಾಚಿ. ಅಪ್ಪ ಗಂಗುನ ತೇಡಿಯಂಡ್ ಪೂನಕ್ ಎತ್ತಿತ್ ಮಾಡ್‌ನ ಪ್ರಯತ್ನ ಎಲ್ಲ ಅರ್‌ಂಜತ್. ಎದ್‌ಕೆ ಮನೆರ ಮೊಟ್ಟಾನೋಟ್‌ಚಿ. ಜೈನಾಭಿ ಪಲ್ಲ್‌ಳ್ ಚಂಡ್ ಪೂಂದೆಳಿ ತೆಳಿಚೆನ್ನಕೆ ಕಣ್ಣ್‌ಕ್ ಕಂಡತ್. ತಾನ್ ಬೊಳಂದಮನೆ, ತಾಂಡಪ್ಪ ಎಡ್‌ತ ಮನೆರ ಬರಿಲ್ ಇಕ್ಕ ಉಳ್ಳಯಿಂಡ ಮಕ್ಕ ಉಯ್ಯಾಲೆ ಕಟ್ಟಿಯಂಡ್ ತೂಂಗುವಯಿಂಜತ್.

ತಾಂಡ ತಾಯವ್ವ ಪಂಡೊಮ್ಮ "ಉಯ್ಯ ತೆರಂಗ್‌ನಕ ಕೊಂಬಡಿಕ್"ಂದ್ ಎಣ್ಣೆನದ್ ಗೇನಬಾತ್. ಆ ಗಾದಿರ ಅರ್ಥ ಆಚಿ. ಆಚೀಂಗಿ, ಗಂಗುಕ್ ಕೊಂಬಡಿಲೂ ನೆಲೆಯಿಲ್ಲೆ! ಅಲ್ಲಿಂಜಿ ಗಂಗುನ ಕಂಡವನಿಲ್ಲೆ.

- \* - \* - \* -

## ಕಟ್ಟಿರ ಮಂದಣ್ಣ

ಆ ಬಲ್ಯ ಮಾಗೆ ಮರತ್‌ರಡಿಲ್ ಅಳಾತಂಡ ನಂಗಡ ನಾಯಕ ಮಂದಣ್ಣ ದವಡೆನ ಅಂಗೈಕ್ ತಾಕಿರೊಂಜಿ ಎಂತದೋ ಬೇರ್‌ಚಿಟ್ಟುಂಡಿಂಜತ್. ಮಂದಣ್ಣ ನಲ್ಲಾನ ಬೇರ್‌ಚಿಡುವಾಂದ್ ಅವಂಡ ಜಾತಕತ್‌ಲೇ ಇಲ್ಲೆ.

ಅಕ್ಕಣೆಕ್ ಧೂಳ್ ಒಪ್ಪಿಯಂಡ್ ಓರ್ ಜೀಪ್ ಬಾತ್. ಅದ್ ಸರಕಾರಿ ಜೀಪ್. ಜೀಪ್‌ರೊಳ್‌ಲಾ ನಾಲಂಜಾಳ್ ಇಂಜತ್. ಈ ಜೀಪೆನ್ನಾಂಗ್ ನಂಗಡ ಊರ್‌ಕ್ ಬರಂಡಿಯೆ? ಕಳ್ಳ ಕಾಚುವಯಿಂಡ ಮೀದ ಎನ್ನೇಂಗಿ ಪುಕಾರ್ ಇಕ್ಕುವಾ? ಚೆನ್ನ ಎದೆ ಧಕ್ಕ ಎಣ್ಣೆ ಚಿ. ನಿನ್ನಾಂದ್ ಬೈಟ್ ಬಾಕಿಯಿಂಜ ಅರೆಕುಪ್ಪಿ ಪೊಟ್ಟಿಮರತುಂಡಲ್ಲಪ್ಪಾಂದ್ ಚೆನ್ನ ಬೊರೆ ಪುಟ್‌ಚಿ. ಕಟ್ಟಡಿಲ್ ಚೆನ್ನ ಕಾಚುವಕುಳ್ಳ ಕಂಜಿಯೂ ಇಂಜತ್.

ಚೆನ್ನದೂರತ್ ನಿಂದತ್. ನಾಲಂಜಾಳ್ ಇಳ್‌ಂಜಿತ್ ಒರ್ ಮೊಟ್ಟೆ ಪತ್ತೆಚಿ. ಮಂದಣ್ಣ ಪಕ್ಕ ಪೋಯಿತ್ ಜೀಪಾಲಿಂಜ ಡ್ರೈವರ್‌ನ "ಸಂಗತಿ ಎಂಥ"ಂದ್ ಕೇಟತ್.

"ಈ ಪೊಳೆಕ್ ಒರ್ ಕಟ್ಟೆ ಕೆಟ್ಟುವಲ್ಲ, ಅದ್‌ಂಡ ಕೆಲಸಕ್ ಇಂಜಿನಿಯರ್ ಬಂದಿಯೆ"ಂದೆಣ್ಣೆ ಚಿ. ಕಳ್ಳ ಪುಡಿಪಕಲ್ಲಾಂದ್ ಅರಿಂಜಿತ್ ಮಂದಣ್ಣಂಗ್ ಪೋನ ಜೀವ ಬಾತ್.

ಮೆಲ್ಲೆ ಇಂಜಿನಿಯರ್ ನಿಂದಿತಿಂಜ ಮೊಟ್ಟೆಪತ್ತಿತ್ ಪಕ್ಕ ಪೋಚಿ. ದೂರತ್‌ಂಜಿಯೇ ಬಲ್ಯ ಪರಿಚಯಸ್ಥನನ್ನೆಕೆ ಪಲ್ಲೆಚಿಂಜ್ ದಂಡ್ ಕೈಕೂಟಿ ತೊತ್ತತ್. ದಾರೂ ತಕ್ಕ ಪರ್‌ಚಿಟ್‌ಲೇಂಗಿಯೂ ಅಯಿಂಡ ಕೂಡೇ ಚೆನ್ನ ತಿರ್‌ಗ್‌ಚಿ. ಅಯಿಂಗ ತಕ್ಕ ಪರೆವಕ್ಕ ತಾನೂ ಸ್ವರ ಕೂಟಿತ್ ಕೇಕತ ಪ್ರಶ್ನೆಕ್ ಉತ್ತರ ಕೊಡ್‌ಪಕ್‌ಳಂಜತ್.

ಚೆನ್ನ ನೇರತ್ ಒಬ್ಬೊ "ಕಾಡ್‌ಕೆತ್ತುವಕ್ ಚೆನ್ನ ಜನ ಕೊಟ್ಟುವಾ"ಂದ್ ಮಂದಣ್ಣನ ಕೇಟತ್. ಓಹೋ, ನಾಡ ಅವಶ್ಯಕತೆ ಇಯಂಗಕ್ ಉಂಡ್‌ಂದ್ ಮಂದಣ್ಣಂಗ್ ಗೊತ್ತಾಚಿ. "ಓ ಆಂಗೆನ್ನಾ, ಆಂಗೆನ್ನಾ, ಸರ್ ಬೋಂಡಿಕೆ ನಾಳೆಂಜಿ ಚೆನ್ನ ಬಾಲೆಕಾರಳ ಕೂಟಿಯ ಬಪ್ಪಿ"ಂದೆಣ್ಣೆ ಚಿ.



ಇಚ್ಛಕ್ ಸಸ್ತತ್‌ಲಾ ಒರ್ ಇಂಜಿನಿಯರಾರ ಸಿನಿಯ ಬೊಳೆಯೊಂದ್ ನಂಬಿತಿಂಜಾಲೆ. ಬೈಟ್ ಜೀಪಾಲಳಾತಂಡ್ ಅಯಿಂಡ ಕೂಡ ಪೇಟೆಕ್ ಬಾತ್. ಅಯಿಂಡ ಕೂಡ ಉಂಡ್ ಕುಡ್‌ಚಿ ಚೆನ್ನಗತ್ತಾಲೆ ಮನೆಕೆತ್ತಚಿ.

ಕಟ್ಟೆರ ಸರ್ವೆಕ್ ಬಂದ ಸುದ್ದಿ ಊರ್‌ಕಾರಕೂ ಎತ್ತಿತಿಂಜತ್. ಊರ್‌ಲಾ ತರಾವರಿ ಅಭಿಪ್ರಾಯೋ ಇಂಜತ್. ಕಟ್ಟೆಕ್ ವಿರೋಧ ಪರಂದಯಿಂಗಕ್ ಮಂದಣ್ಣ ನಾಲ್ ಅನುಭವತಾರ ತಕ್ಕ್ ಪರಂದಿತ್ ಅಯಿಂಡ ಬಾಯಿ ಮುಚ್ಚ್ಚಾಚ್ಚಿಟ್. ದಿನಕ್ ಪತ್ತ ಉರ್‌ಪಿಯ ಸಂಬಳ, ಅಕ್ಕಕ್ಕ ಕಾಫಿ, ತಿಂಡಿ ಕೊಟ್ಟುವ ಸಂಗತಿ ಎಲ್ಲ ಪರಂದಿತ್, ಪಣಿಕ್ ಜನಳ ರಿಕ್ರೂಟ್ ಮಾಡುವಕ್‌ಳಾಂಜತ್. ನಲ್ಲ ಸಂಬಳ ಕೊಟ್ಟವಕ ದಾರ್ ಬರತಿಕ್ಕು? ಇಂದ್ ಬದುಕುವ ಬಟ್ಟೆ ನೋಟತೆ ನಾಳೆತಾರ ವೇದಾಂತ ದಾಕ್ ಬೋಂಡಿಯೆ?

ಮಂದಣ್ಣ ಕೂಟಿಯ ಬಂದ "ಭೂಸೈನ್ಯ" ಕಂಡಿತ್ ಇಂಜಿನಿಯರ್‌ಕ್ ದುಂಬ ಕುಶಿ ಆಚಿ. ಮಂದಣ್ಣಂಡ ಖರ್ಚಿಯೆಲ್ಲ ಕಯಿಂಜಿತ್ ಪಣಿ ಕೆಜ್ಜಯಿನಚ್ಚಿ ಕೇ ಸಂಬಳೋ ಕೊಟ್ಟಚಿ.

ನಾಲಂಜಿ ದಿನತಲ್ ಊರ್‌ಲಾ ಚೆನ್ನ ಜನ ಗುಸು ಗುಸು ತಕ್ಕ್ ಸುರು ಮಾಡ್‌ಚಿ. ಮಾದಪ್ಪಜ್ಜ, ಅಪ್ಪಯ್ಯಜ್ಜ, ಮಂಜುನಾಥ ಇಯಂಗೆಲ್ಲ ಕೂಡಿತ್ ಈ ಕಟ್ಟೆಕ್ ಪ್ರತಿಭಟನೆ ಮಾಡಂಡೊಂದ್ ಓಡಿಕಳಾಚತ್. ಊರ್‌ಲುಳ್ಳದೇ ನಾಲಂಜಿ ಅನುಕೂಲಸ್ಥಂಗ. ಬಾಕಿ ಎಲ್ಲ ಗರೀಬಳೆ.

ಚೆನ್ನಂಗೇ ದಿನತಲ್ ಕಟ್ಟೆಂಜಿ ಆಪ ಲಾಭ, ನಷ್ಟತಾರ ಅಂಕಿ-ಅಂಶ ಎಲ್ಲ ಮಂದಣ್ಣಂಗ್ ಬಾಯಿಪಾಠ. ಮಂಜುನಾಥ ಒಂದ್‌ದಂಡ್ ಮೀಟಿಂಗ್ ಮಾಡಿತ್ ಊರ್‌ಕಾರಕ್ ಎಚ್ಚರ ಕೊಡ್‌ತತ್. ಚೆನ್ನ ಜನ ಕಟ್ಟೆಕ್ ವಿರೋಧೋ ಕಾಟ್‌ಚಿ!

ಮಂದಣ್ಣಂಗ್ ಪಂಡ್ ಅಪ್ಪಯ್ಯಜ್ಜ ಸಾಲ ಕೊಡ್‌ಕತ ಚೆಡಿಯೊ ಇಂಜತ್. ಬೈಟ್ ಮನೆ ಮನೆ ಸುತ್ತಿತ್ - "ಆ ಮೂಂದಾಳ್ ಭಾರಿ ತೋಟಕಾರ. ಅಯಿಂಡ ತೋಟ ಮುಳಿ ಪೋಪಾಂದ್ ಈ ಕೆಣಿ; ನಂಗೆಲ್ಲ ಗರೀಬಂಗ, ಈ ಬೇಲ್ ಬಾಣೆ ಮುಳಾನಕ ದಂಡ್‌ಬೊಳೆ ಎಡ್‌ಪಂಥ ಈಂಡ ಪತ್ತಪಾಲ್ ಜಾಗೋಕೊಟ್ಟುವ. ಕೂಟ್‌ಕ್ ಪಣವೂ ತಪ್ಪ. ನಂಗ ಬದ್‌ಕುವ ಬಟ್ಟೆ ನಂಗ ನೋಟನ. ಇಚ್ಚಿಕೇ ಅಲ್ಲ, ಕಟ್ಟೆ ಕೆಟ್ಟಿತಾಕಣೆ ನಂಗಡ ಜನಕ್ ಖಾಯಂಪಣಿ ನಾ ತಪ್ಪಿಚಿರುವಿ. ನಲ್ಲ ಸಂಬಳ ಉಂಡ್; ಕಲ್ಲೊಡ್ಡ ಬಂದ್ ಕೂಡ್‌ನಕ ಕಳ್ಳಾಕಾಚಿ ಮಾರ್‌ನಕ ಮದಿ. ಕೋಳಿಪಂದಿ ಮಾರ್‌ನಕೊ ಮದಿ.

ಇಂತ ಪತ್ತ್ ಆಸ್ತಿಮಾಡಲೂ"ಂದ್ ಊರಾರ ಜನತಾರ ಭವಿಷ್ಯತನೇ ಬದಲಾಕುವ ಯೋಜನೆರ ಬ್ಲೂ ಪ್ರಿಂಟೇ ತಯಾರ್ ಮಾಡ್ಚಿ, ಮಂದಣ್ಣ !

ಊರಾರ ಜನ ಮಂದಣ್ಣಂಡ ತಕ್ಕಲೂ ಚೆನ್ನ ನ್ಯಾಯ, ಸತ್ಯ ಕಂಡತ್. "ನಂಗ ಬದುಕುವ ಬಟ್ಟೆ ನಂಗ ನೋಟನಾ, ಪೊರಮೆರ ಜನ, ಪೇಪರ್ಕಾರ ಎಲ್ಲ ಎಚ್ಚಕ್ ಎಣ್ಣೆಚೇಂಗೆನ್ನ್? ನಲ್ಲ ನೀರಾವರಿ ಭೂಮಿಯೂ ಕೊಟ್ಟುವ. ಕಟ್ಟೆ ಆಕಣೆ ಪಣೆಕ್ ಪೋಚೇಂಗಿಯೂ ಮದಿ. ಈ ಸಂಬಳ ಬೋರೆ ದಾರ್ ತಕ್ಕೂಂದ್"ಂದೆಣ್ಣುವಯಿಂಗಳೇ ಜಾಸ್ತಿ. ಮಂದಣ್ಣಂಗುಳ್ಳದೇ ನೂರ್ ಭಟ್ಟಿ ಭೂಮಿ. ತೋಟ ಮಾಡತ ಮೂಂದೇಕ್ರೆ ಜಾಗ. ಇಂಜಿನಿಯರ್, ಪಿಂಞ ಬೋರೆ ಅಧಿಕಾರಿಯ ಎಣ್ಣುವ ಲೆಕ್ಕ ಪ್ರಕಾರ ಮಂದಣ್ಣಂಗ್ ನುಪ್ಪದಾಯಿರ ಉರ್ಪಿಯ, ಪಿಂಞ ನುಪ್ಪದೇಕ್ರೆ ನೀರಾವರಿ ಆಪ ಖಾಲಿ ಜಾಗ ಕೊಟ್ಟವ! ದಾಡ ಕೈಂಜಿ ತಪ್ಪದಲ್ಲ, ಸರಕಾರತಾರ ಪಣ. ದಾರ್ನ ಪಾಳಾಕಿಯೆ? ಕಟ್ಟಿಕೊಟ್ಟುವಾನ ವಿರೋಧ ಮಾಡ್ನವು ಚಾಕಿರುಲೆ!

ಮಡಿಕೇರಿ, ಬೆಂಗಳೂರಲೆಲ್ಲ ಪೇಪರ್ಕಾರ ತಾರಾಮಾರಾ ಬೊತ್ ಚಿಟ್ಟಿತ್ ಎಳ್ವಾದ್ಚಿ. ಈ ಬೊತ್ ಬೊಡಿಕೆಲ್ಲ ಊರಲ್ ದಾರೂ ಬೊತ್ಲೆ. ಪ್ರತಿಭಟನೆಕ್ ಇಂಬೂ ಕೊಡ್ತಲೆ. ಆಂಗ್ ಕಾರಣ ಇಲ್ಲತಿಲ್ಲೆ. ಸರ್ವೆ ಸುರುವಾನ ಪಿಂಞ ಕಾಡ್ ಕೆತ್ತುವಕ್, ಚೈನ್ ಬಲಿಪಕ್ ಪೋಪಯಿಂಡ ಮನೆಲ್ ಮೂಂದ್ ನೇರ ನೆಮ್ಮದಿಲ್ ಉಂಬ, ತಿಂಬ, ಕುಡಿಪ. ಪಣೆಯೂ ಬಲ್ಕ ಅಲೆ ಉಳ್ಳದಲ್ಲ!

ಮಂಜುನಾಥ, ಅಪ್ಪಯ್ಯ, ಮಾದಪ್ಪ ಇಯಂಗಡ ಪ್ರತಿಭಟನೆ ನಡಂದಕಲೂ ಊರಕಾರ ತಂಗಡ ಬದುಕುವ ಬಟ್ಟೆ ನೋಟಾಚಿ. ಚೆನ್ನ ದಿನತಲ್ ಪೇಪರ್ಕಾರಡ ಸದ್ಲೂ ಅಡ್ಂಗ್ಚಿ. ಸರ್ವೆ ತೇಂದಿತ್ ಕಟ್ಟಿರ ನೀಕ ಪಣೆ ಸುರುವಾಚಿ. ಕೇರಳತಾರ ಕ್ರಿಶ್ಚಿಯನಳೂ ತಮಿಳುಕಾರಳೂ ಆಯಿರಾಯಿರ ಬಂದ್ ಕೂಡ್ಚಿ. ಊರಲ್ ಕಳ್ಳಾ ಕಾಚುವಯಿಂಗಳ್ ನಲ್ಲ ಉಗಾದಿ ಬಂಪರ್ ಪೊಜ್ಜತ್! ಊರಕಾರಳನ್ನೆಕೆ ಅರೆಕುಪ್ಪಿ ಎರಕಿರೊಂಜಿ ದುಡ್ಡ್ ನಾಳೆ ತಪ್ಪಿಂಂದ್ ಎಣ್ಣುಲೆ ವಡ್ಡಂಗ! ವಾರಕೊಮ್ಮ ನಗದ್ ಕೊಡ್ಪ.

ಇಂಜಿನಿಯರ್ ಕೂಡೆ ತಿರ್ಗಿಯಂಡ್, ಕಾಡ್ ರೊಳಿಯ ಬಟ್ಟೆ ಕಾಟಿ ಕೊಡ್ತಂಡ್ ಇಂಜ ಮಂದಣ್ಣ ಇಂದ್ ಒರ್ ಕೇಳಿಪಟ್ಟ ಮನುಷ್ಯ. ಜನ ಎಲ್ಲಾಂಗು ಮಂದಣ್ಣಂಡ ಸಲಹೆ ಎಡ್ತೀ ಕಾರ್ಬಾರ್. ಮುಳ್ಗಡೆ ಭೂಮಿರ ಒಪ್ಪಂದಕ್ ತಹಶೀಲ್ದಾರ ಬಂದಲ್ಲಿ ಮಂದಣ್ಣ ಸೈನ್ ಇಟ್ಟ ಪಿಂಞ ಎಲ್ಲಾರು ಇಟ್ಟತ್.

ಕಾಲುವೆರ ಸರ್ವೆ ಮಾಡುವಕ ಮುಳುಗಡೆಕಾರಕ್ ಸರಕಾರ ಅಲಾಯಿದ ರಿಸರ್ವ್ ಬೆಚ್ಚ ಜಾಗತ್ ಪರಿಚಯ ಮಂದಣ್ಣಂಗ್ ಎಲ್ಲ ನಲ್ಲೋಣೆ ಆಚಿ. ಒರ್ ಪ್ರತ್ಯೇಕ ಆನ ನುಪ್ಪದ್ ಏಕ್ರೆ ನಲ್ಲ ತಟ್ಟೊತ್ತ ಜಾಗ, ನೀರ್ ಕೊಲ್ಲಿಯೂ ಉಂಡ್. "ಇದೇ ಜಾಗ ನಾಕ್ ಸರಕಾರ ತರಂಡಿಯ ನುಪ್ಪದ್ ಏಕ್ರೆಕ್ ಇದ್ ಸೆರಿ ಉಂಡ್"ಂದ್ ಲೆಕ್ ಇಟ್ಟತ್. ಇಂಜಿನಿಯರೂ ಅದೇ ಸಲಹೆ ಕೊಡ್ತತ್. ಅಂದ್ ಬೈಟ್ ಮಂದಣ್ಣಂಡ ಕುಶಿನ ಎಣ್ಣಂಡ! ಕಲ್ಪನಾ ಲೋಕತ್ಲೇ ಇಂಜತ್. ಪೊಣ್ಣಾಕೆಣ್ಣಾಚಿ "ನೀಲು, ನಾಕ್ ಕ್ಕಟ್ಟುವ ಜಾಗತ್ ಪೊನ್ನ ಬೊಳೆವ, ದಾಡೋ ಹಂಗಿಲ್ಲೆ. ನಾಡ ಮುಳುವ ಬೇಲ್ಲ್ ದಂಡ್ ಗಾಡಿ ನೆಲ್ಲಾಪ್ಲೆ. ಪುದಿಯ ಜಾಗತ್ ಐಂಬದರುವದ್ ಗಾಡಿ ತಟ್ಟಿತೆಡ್ಕಲು. ಸರಕಾರತ್ಂಜಿ ಕ್ಕಟ್ಟುವ ಪಣತ್ಲಾ ಒರ್ ಮನೆ ಕಟ್ಟಿತ್ ಅಳ್ತಕ ನನ್ನ ತಕ್ಕ್ ಪರಿಚಿರುವವನಿಲ್ಲೆ. ಓರಾಂಡ್ ದಂಡ್ಕಾಲ ಪತ್ತ್ ಏಕ್ರೆಕ್ ಪೇತಪ್ಪು, ಇರುವದೇಕ್ರೆಕ್ ಜೋಳ ಇಟ್ಟಿತ್ ಓರ್ಲಕ್ಕ ನಗದ್ ಎಡ್ಕಲು. ಅಕ್ಕಣೆ ಕಾಲುವೆ ನೀರ್ ಬಪ್ಪ. ದಂಡ್ ಬೊಳೆ ಎಣ್ಣಾಚೇಂಗಿ ಖರ್ಚಿ ಕಯಿಂಜಿತ್ ಒರ್ ಲಕ್ಕ ಅಳ್ತಲ್ಲಿಕೆ ಬಪ್ಪ"ಂದ್ ಕಟ್ಟೆರ ಯೋಜನೆಕ್ಂಜಿ ಬಲ್ಲಿಯ ತಾಂಡ ಯೋಜನೆನ ಎಣ್ಣಾಚಿ.

ಮಂದಣ್ಣಂಡ ಪೊಣ್ಣಾ ನೀಲವ್ವ ಒರ್ ಪೊಟ್ಟಿ ಪೊಣ್ಣಾ. "ಆನ ಕಾಲಕಲ್ಲ ಅಕ್ಕ ನೋಟನ"ಂದ್ ಅನಿಷ್ಟ ಪರಂದತ್. "ಬೆಲ್ಕ ತಕ್ಕ್ ಪರಂದಕ ನೀಡ ನಾವ್ನ ಅರ್ತಾರುವಿ"ಂದ್ ಬೊತ್ಚಿಟ್ಟಿತ್, ತಾಂಡ ಸ್ವಪ್ನ ಲೋಕತೇ ಮನೆಕೆಟ್ಟಿತ್, ಸಂತೋಷತಿಂಜತ್.

ಕಟ್ಟೆರ ಕಂಟ್ರಾಕ್ಟರ್ ಮದ್ರಾಸ್ ಬಾಲಾಜಿ ಕಂಪನಿ. ಬಾಲಾಜಿಕೂ ಕಂಪೆನಿ ಮೇನೇಜರ್ ಕೇರಳತ್ ಲಾರೆನ್ಸ್ ಮಂದಣ್ಣನ ಪರಿಚಯ ಮಾಡಿಕೊಡ್ತತ್. ತಾಂಡ ಸರ್ವೆತ್ಲೆಂದ ಪಿಂಞ - ಆ ಇಂಜಿನಿಯರ್ ಪೋಚಿ. ಇಂಞಿ ಮಂದಣ್ಣಂಡ ಬೇಳೆ ಬೇವಂಡಿಯೆ ಬಾಲಾಜಿ ಕಂಪೆನಿಕಾರಡ ಕೂಡೆ.

ಸದ್ಯಕ್ ಬೋರೆ ಕಟ್ಟಡ ಇಲ್ಲತಾನಗುಂಡ್ ಚೆನ್ನ ದಿನ ಮಂದಣ್ಣಂಡ ಮನೆಲೇ ಬಾಲಾಜಿ ಪಿಂಞ ಲಾರೆನ್ಸ್ ಇಪ್ಪ ತೀರ್ಮಾನ ಆಚಿ. ಬೋಂಡಿಯ ಸಾಮಾನೆಲ್ಲ ಜೀಪ್ಲಾ ಬಂದ್ ಬೂವಕಾಚಿ. ನೀಲವ್ವನೂ ಮಂದಣ್ಣಂಡ ಮೋವ ಪ್ರೇಮನೂ ಕೂಡಿತ್ ರಸರಸ ಅಡಿಗಿ ನಾಲ್ ನೇರ ಮಾಡಿ ಕೊಡ್ತಕ ಮದಿ. ಇಂದ್ ಮಂದಣ್ಣ ಗರೀಬನಲ್ಲ. ಏದ್ ಬಲ್ಯ ಮನ್ಸಂಗ್ ಕಡೆಯಾಯಿತ್ ಬದ್ಕಿಯಂಡಿಲ್ಲೆ. ಯರ್ಚಿ ಮೀನಿಲ್ಲತೆ ಉಂಬ್ಲೆ. ಎನ್.ಎಸ್. ತೊಡುಲೆ, ಬ್ರಾಂಡಿಯೇ!

ಚೆನ್ನಂಗೇ ದಿನತ್‌ಲ್ ಪಣಿಕಾರಳ ನೋಟಿಯವಕ್ ಮಂದಣ್ಣಂಡ ಮೋಂವೊ ರಾಜಂಗ್ ಒರ್ ಸೂಪರ್‌ವೈಸರ್ ಚಾಕ್ರಿ ಆಚಿ. ಲೆಕ್ಕ ಪಕ್ಕ ಬೆಪ್ಪಕ್ ಮೋವ ಪ್ರೇಮಂಗೂ ಒರ್ ಕ್ಲರ್ಕ್ ಚಾಕ್ರಿ ಕೊಡತತ್. ಕಾವೇರಮ್ಮರ ದಯತ್‌ಲ್ ಮಂದಣ್ಣಂಡ ಸಂಸಾರ ಒರ್ ಬಟ್ಟೆಕ್ ಕೂಡ್‌ಚಿ. ಪೊಳೆಕ್ ಕಟ್ಟೆ ಕೆಟ್ಟಾನದ್ ಕಾವೇರಮ್ಮನೇ ಮನೆರೆದಿಕೆ ಕೆಟ್ಟಿತ್‌ಟ್ಟಂಡ್ ಬೋಂಡಿಯಾನಾನ ಬೋಂಡಿಯಾಪಕ ಕೇಟವಂತ ಸೌಕರ್ಯ ಕ್‌ಟ್ಟಾನನ್ನೆ ಆಚಿ.

ಸುಖಿತ್‌ನ ಒಬ್ಬನೇ ಅನುಭವಿಚಿಟ್ಟಕ ಪೋರ. ಅಧಿಕಾರ ಕೈಲಿಪ್ಪಕ ಅಪಚ್ಚಕೂ ಸಹಾಯ ಮಾಡಂಡೂಂದೆಣ್ಣುವ ತತ್ವ ಮಂದಣ್ಣಂಡ! ಎಚ್ಚಕೋ ಮಕ್ಕಕ್ ಕಟ್ಟಿರ ಪಣಿ ನೋಟಿಯವ ಮೇಸ್ತಿ ಕೆಲಸ ಕೊಡ್‌ಪ್‌ಚಿಟ್ಟಿತ್ ಜನ ಸೇವಕನೂ ಆಚಿ.

ತಾಂಗ್ ಜಾಗ ಕ್‌ಟ್ಟಿತ್ ಬೊಳೆ ಎಡ್‌ತನ್ನೆಕೆ ಎಲ್ಲಾಡಕೂಡ ತಾಂಡ ಪುದಿಯ ಜಾಗತ್‌ರ ವಿಚಾರ ಮಂದಣ್ಣ ಎಣ್ಣ್‌ಚಿ. ಚೆನ್ನ ಜನಕ್ ಕೇಡೂ ಆಚಿ. ಪಾಳಾನ ಜಮ್ಮತ್‌ನಗುಂಡ್ ಇಕ್ಕಣೆ ನಾನ್ ಎಂತ ಮಾಡುವ ಕಯಿಂಜತ್? ಗೂಟಕ್ ಕೆಟ್ಟಾನ ಎತ್ತ್ ನನ್ನೆಕೆ! ಇಂಜ ಜಮ್ಮ ಪೋಚೇಂಗಿ ನಾನ್ ಒಕ್ಕಿ ಪೋಯಿಟಾನ ಅಲ್ಲ ಮುಳಿ ಪೋಯಿಟಾನ? ಇಕ್ಕ ನೋಟೀಂದ್ ಮಂದಣ್ಣಂಡ ಸಾಗ್ ಸವಾಲ್! ಚೆನ್ನ ದಿನತ್‌ಲ್ ಮುಳುಗಡೆ ಆನವು ತಂಗಡ ಮನೆ ಖಾಲಿ ಮಾಡಂಡೂಂದ್ ಆರ್ಡರ್ ಆಚಿ. ಕೊಡವ, ಗೌಡ ಎಲ್ಲಕೂಡಿ ಸುಮಾರ್ ಆರುವದ್‌ವಕ್ಕ ಕೂಡೆನ್ನೇ ಮನೆ ಖಾಲಿ ಮಾಡಂಡಿಯಾಚಿ. ಬಾಲಾಜಿ ಮಂದಣ್ಣಂಗ್ ತತ್ಕಾಲಕ್ ಜಿಂಕ್ ಶೀಟ್‌ರ ಒರ್ ಬಲ್ಯಮನೆ ಮಾಡಿ ಕೊಡ್‌ತತ್. ಬಾಕಿ ಉಳ್ಳ ವಕ್ಕಕ್ ಇಂಞ ಪುದಿಯ ಜಾಗವೂ ಮಂಜೂರಾಯಿತಿಲ್ಲೆ. ಮುಳುಗಡೆರ ಪರಿಹಾರ ಪಣೋ ಕ್‌ಟ್ಟಿತಿಲ್ಲೆ. ಎಲ್ಲಿಕ್ ಪೋಪೊ?

ಸಧ್ಯಕ್ ಉತ್ತನ ಮನೆರ ಸಾಮಾನತ್‌ಲೆ ರಿಸರ್ವ್ ಬೆಚ್ಚ ಪೈಸಾರಿಲ್ ಗುಡಿಸಲ್ ಕೆಟ್ಟಿಯವಂದಾಚಿ. ಏದ್ ಅಧಿಕಾರಿನ ಕಂಡಕಲೂ ನೇರೆಕ್ ಉತ್ತರ ದಾರೂ ಕೊಡ್‌ಪಯಿಂಜ್‌ಲೆ. ಮಳೆ ಕೂಡುವಾಂಗ್ ಮಿಂಞ ಮನೆ ಕೆಟ್ಟುವಕ್ ಜನ ಓಡಿ ಕಳಿಚತ್.

ಉಳ್ಳ ಅತ್ತಕಡ್‌ಚಿಯಳ ಮಾರಿತ್ ಮಾಲ್‌ಮಟ ಅಡುಬೆಚ್ಚಿತ್ ದುಡ್‌ಕನವು ಓರಂದ್ ಗುಡಿಸಲ್ ಕೆಟ್ಟಿಯಂಡತ್. ಸುತ್ತ ಓರಂದ್ ಈರಂಡ್ ಏಕ್ರೆಕ್ ಮುಳ್ಳುಟ್ಟಿತ್ ಬೇಲಿಯೂ ಮಾಡಿತ್ ಮಿಂಞ ಮಿಂಞ ಪೋನವು ಹಕ್ಕಪ್ಪುಡಿಚತ್. ಆ ಜಾಗ ಪಾದಿ ಜನಕೂ ಪೋರತ್ತಾಚಿ. ಕುಡಿಪ ನೀರ್‌ಕ್ ದಂಡ್‌ಮೈಲ್ ಪೋಂಡಿಯಾಚಿ!

ಮಂದಣ್ಣಂಗನ್ನೋ ಆತರ ತೊಂದರೆ ಬಂದಾಲೆ. ಕಂಪನಿರ ಲಾರಿ, ಜೀಪ್, ಬಾಲಾಜಿರ ಕಾರಲೇ ತಿರುಗುವಕ ಬಾಕಿ ಉಳ್ಳಯಿಂಗಡ ಗೋಳ್ ಎನ್ನನೆ ಗೊತ್ತಾಪ? ಗೊತ್ತಾಚೇಂಗಿಯೂ ಎನ್ನ ಮಾಡಲು? ಇಕ್ಕ ಕಟ್ಟೆಲ್ ಇರಲೂ ಪೋಲೂ ಪಣಿ. ಆಫೀಸ್ ಕೆಲಸವೂ ದುಂಬ! ಪ್ರೇಮಂಗ್ ಇಕ್ಕ ಓವರ್ ಟೈಂ ವರ್ಕ್. ಅದಾಂಗ್ ಚೆನ್ನ ಜಾಸ್ತಿ ಸಂಬಳೋ ಕೊಡಪಯಿಂಜತ್. ಇರಲ್ ಪನ್ನೆರಂಡ್ ಗಂಟೆಕೆತ್ತಣೆ ಕೆಲಸ! ಬಾಲಾಜಿರ ಮಚ್ಚಣ ಪೆರುಮಾಳ್ ಆಫೀಸ್ ಮೇನೇಜರ್. ಇಂಞ ಬೋರೆ ದಂಡ್ ತಮಿಳ್ಕರ್ತಿಯಳೂ ಇಂಜತ್.

ಬೇಜಾರಾಪಕ ಬಾಲಾಜಿರ ಮಚ್ಚಣ ಪೆರುಮಾಳ್, ಮೂಡಿಯ ಎಲ್ಲ ಚೆನ್ನ ನೇರ ಕೇರಂ ಕಳಿಪಯಿಂಜತ್. ಕಳಿಪಕಾಪಕ ತಳಿಕತೆಯ್ಯುವಾ? ತಳಿಲ್ ಓರೇ ತರ ತಳಿ ಉಳ್ಳದಾ? ಕೆಣಿತಳಿ, ನೊಣತಳಿ, ಮಜಣೆ ತಳಿ, ಚೂಳೆ ತಳಿ, ಕಣ್ಣೋಜಿ ತಳಿಂದೆಲ್ಲ ತರಾವರಿ ಉಂಡಲ್ಲಾ! ಪೆರುಮಾಳ್ ಪ್ರೇಮನ ನೋಟಿಯಂಡ್ ಏದೋ ಓರ್ ಸ್ಪೆಷಲ್ ತಳಿ ತಳಿಪಯಿಂಜತ್. ಕೇರಂ ಕಳಿಲ್ ತಟ್ಟತೆ ಮುಟ್ಟತೆ ಕಳಿಪಕೆಯ್ಯುವಾ? ಮುಟ್ಟಿ ಪೋನಕ ತೊಟ್ಟತಂದ್ ಎಣ್ಣುವ ಕೆಯ್ಯುವಾ? ಅಲ್ಲಾ ಬೋಂಡೂಂದೇ ತೊಟ್ಟಕ್ಕಲೂ, ಸಾರಿ ಮುಟ್ಟಿ ಪೋಚೀಂದ್ ತಿರಕಿರುವಕ್ ಕೆಯ್ಯುಲಿಯಾ?

ಇನ್ನನೇ ಆಫೀಸ್ ಕೆಲಸೋ, ಕೇರಂ ಕಳಿಯೂ ಆಯಿತ್ ಓರಂದ್ ದಿನ ಪ್ರೇಮಂಗ್ ಮನೆಕ್ ಬಪ್ಪಕೇ ಕೆಯ್ಯುವಯಿಂಜಾಲೆ. ಅನ್ನನೆ ಆಫೀಸ್‌ಲೇ ಬುದ್ದಂಡಾಂಡ ಪಿತ್ಯಾಂದ್ ಬೋಂಡಿಕೆ ರಜ ಮಾಡಲು! ಈ ಪುದಿಯ ವ್ಯವಸ್ಥೆಕ್ ಅಪ್ಪಂಡವ್ವಂಡ ತಕರಾರೊಂದು ಇಂಜಿಲೆ. ಊಣ್ ವರ್ಕ್ ಸೆರಿಕಿಲ್ಲೇಂಗಿಯೂ ಮೋವಡ ತಡಿ ದುಂಬಿತ್ ಮೇಲ್ ಮೂಡ್ ನರ ಪಾಂಜಂಡ್ ಬಂದದ್ ಕಂಡಿತ್ ಅಪ್ಪಂಗೂ ಅವ್ವಂಗೂ ಒರ್ ತರ ತೃಪ್ತಿ. ಮನೆ ಮಾರ್ ಕಳಂದಂಡೂ ಪುದಿಯ ಜಾಗ ಕಟ್ಟತ ಒರ್ ಪತ್ ಪದಾನಂಜಿ ಸಂಸಾರ ಮಂದಣ್ಣಂಗಂದ್ ಮಂದಣ್ಣನೇ ತಿರಿಚಂಡ ಜಾಗತ್‌ಲ್ ಗುಡಿಸಲ್ ಕೆಟ್ಟಾನದ್ ಮಂದಣ್ಣಂಗ್ ಗೊತ್ತೇಯಿಲ್ಲೆ. ಒನ್ನಾಂದ್ ಬೋಟೆಕ್ ಪೋನ ಮಂದಣ್ಣ ತಾಂಡ ಸ್ವಪ್ನ ರಾಜ್ಯತ್‌ಲ್ ಬೋರೆ ಜನ ಕೂಡನಾನ ಕಂಡತ್. ಉರಿ ಕೇರ್‌ಚಿ. ತೋಕ್ ಕಾಟಿತ್ ಬೊತ್ತಚಿಟ್ಟತ್. ಆ ಮಳೆಗಾಲತ್‌ಲ್ ನೆಲೆಯಿಲ್ಲತ ಜನ ಎಲ್ಲಿಕ್ ಪೋಪೋ? ದಾರೂ ಅನಂಗುವ ಮಾದರಿ ಕಾಂಬುಲೆ!

ಮಂದಣ್ಣಂಡ ಕೂಡ ಇಯಂಗಡ ಈ ಕಳಿ ನಡಪಕಿಲ್ಲೆ. ರೆವಿನ್ಯೂಕೂ, ಫಾರೆಸ್ಟ್ ಇಲಾಖೆಗೂ, ಪೋಲೀಸ್‌ಕೂ ಮಂದಣ್ಣಂಡ ಪುಕಾರ್ ಪೋಚಿ. ಕಂಪೆನಿ ಮೇನೇಜರ್

ಲಾರೆನ್ಸ್ ಕೇರಳಕಾರನಲ್ಲಾ? ಕೆಣಿ, ಚದಿ ಅವಂಗ್ ಪಡ್‌ಪಾಚಿರಂಡುವಾ? ಮಂದಣ್ಣ ಲಾರೆನ್ಸ್‌ರ ಸಲಹೆ ಕೇಟದೇ ತಡು, ಅವಂಡಲ್ಲಿ ರೆಡಿಮೇಡ್ ಸಲಹೆ - ಸಹಕಾರ ಎಲ್ಲಾ ಇಂಜತ್. ತಾಂಡ ಕೇರಳ ಕ್ರಿಶ್ಚಿಯನಳ ಬುಟ್ಟಿತ್ ಬೋಂಡಿಯ ಏರ್ಪಾಡ್ ಇರ್‌ಕಿರ್‌ಲ್ ಮಾಡ್‌ಚಿಟ್ಟಿತ್ ಮಂದಣ್ಣಂಗ್ ಧೈರ್ಯ ಕೊಡ್‌ತತ್.

ಪಿತ್ಯಾಂದ್ ಪೋಲೀಸ್‌ಕಾರಳೂ, ಫಾರೆಸ್ಟ್ ಸ್ವಾಡ್‌ಕಾರಳೂ ಬಂದಿತ್ ಮಂದಣ್ಣಂಡ ಜಾಗತ್ ಮನೆ ಕೆಟ್ವನಯಿನ ಬೊತ್ತ್‌ಚಿಟ್ಟಿತ್. ಮನೆರ ಸುತ್ತು ಬರಣೆಕ್ ಎಟ್ಪ ಪತ್ತಾಳ್‌ರ ಮನೆರ ಪಕ್ಕ ಚಾಂದ್ ಮರತ್‌ರ ಕುಟ್ಟಿ, ಬೂಟಿರ ತುಂಡ್ ಎಲ್ಲ ಅಡಕಿ ಬೆಚ್ಚದ್ ಕಂಡತ್. ಲಾರೆನ್ಸ್‌ರೋ ಮಂದಣ್ಣಂಡೋ ಎಂಜಿ ತಿಂದ ಅಧಿಕಾರಿಯ ಪಾಪತ ನೆಲೆಗೆಟ್ಟ ಜನಳ ಪೊಣ್ಣಾಳ್ ಮಕ್ಕಳೋ ಬಡ್‌ಚಿತ್ ಮೂಳೆ ಮುಟ್ಟ್ ಪೊಳೆಚದ್ ಪೋರತೆ ಕಳ್ಳತನತ್‌ರ ಕೇಸೂ ದಾಖಲ್ ಮಾಡಿತ್, ಅಂದೇ ಪೈಸಾರಿಂಜಿ ಜಾಗ ಖಾಲಿ ಮಾಡ್‌ಚಿಟ್ಟಿತ್.

ಅಡಿಯೂ ಇಲ್ಲೆ, ಆಕಾಶೋ ಇಲ್ಲತಯಿಂಗಳ ಕಂಡಿತ್ ಅಪ್ಪಯ್ಯಜ್ಜನೂ, ಮಾದಪ್ಪಜ್ಜನೂ, ಮಂಜುನಾಥನೂ ಅಯಿಂಗಳ ಕೂಟಿಯ ಪೋಯಿತ್ ಕೊಟ್ಪ ಪಟ್ಟಿಲೆಲ್ಲ ಆಕಿತ್ ನೆಲೆ ಕೊಡ್‌ತತ್.

ಜಾಗ ಖಾಲಿ ಮಾಡ್‌ಚಿಟ್ಟಿ ಮಂದಣ್ಣಂಡ ಕೈ ತಪ್ಪಿ ಪೋನ ಜಾಗ ಕೈಸೇರಿತ್ ನೆಮ್ಮದಿಲ್ ವರ್‌ಚಿ. ಕುಡಿಯೆದ್ದ ಕೊಡವ, ಗೌಡಡ ಪೊಣ್ಣಾಳ್ ಮಕ್ಕ ಮಂದಣ್ಣ ಮಾಡ್‌ನ ಅನ್ಯಾಯಕ್ ನೆಲ ಪೊಜ್ಜಿ ಶಾಪ ಇಟ್ಟಿತ್ ತೃಪ್ತಿ ಪಟ್ಟಿಂಡತ್. ಪೊಲಿಯ ಶಾಪ ಇಟ್ಟಕ ಪೋರಿ ಚಾವ? ಮಂದಣ್ಣಂಡ ವಾದತೂ ನ್ಯಾಯ ಮಿಶ್ರ ಉಂಡಲ್ಲಾ? ಅಚ್ಚಕ್ ಜನಡ ಸೇವೆ ಮಾಡ್‌ನವಂಡ ಜಾಗತ್ ಇವು ಮನೆ ಕೆಟ್ಟುವದಾ?

ಬಾಲಾಜಿ ಕಂಪೆನಿಕ್ ಕೇರಳತ್ ಇಂಞೋರ್ ಬಲ್ಯ ಕಂಟ್ರಾಕ್ಟ್. ಅಲ್ಲಿ ಆಫೀಸ್ ಕೆಲಸಕ್ ಅನುಭವ ಉಳ್ಳ ಓರ್ ಆಫೀಸ್ ಮ್ಯಾನೇಜರೂ, ಒರ್ ಕ್ಲರ್ಕ್ ಪೋಂಡಿಯ ಬಾತ್. ಬಾಲಾಜಿರ ಮಚ್ಚಿಣನೂ ಪ್ರೇಮನೂ ಎಲ್ಲಾ ಕೆಲಸ ಕಾರ್ಬಾರ್‌ಲೂ ಜಾಸ್ತಿ ಅನುಭವ ಉಳ್ಳವು. ಕೇರಳಕ್ ಪೋನಕ ಸಂಬಳೋ ಜಾಸ್ತಿ. ವಾಸಕ್ ಸೌಕರ್ಯವುಂಡ್. ಮಂದಣ್ಣ ಇದ್‌ಂಗೆನ್ನಂಗ್ ಬೋಂಡಾಂದೆಣ್ಣೆತ್ ಅಡ್ಡ ಬರಂಡಿಯೆ? ಪ್ರೇಮಂಗ್ ಪ್ರವೋಶನ್ ಆಯಿತ್ ಕೇರಳ ಪ್ರೊಜೆಕ್ಟ್ ಇಂಡಿಪೆಂಡೆಂಟ್ ಚಾರ್ಜ್‌ಲ್ ಪೋಚಿ.

ನೀರಾವರಿ ಕಟ್ಟಿ ಪಾದಿಕ್ ಬಾತ್. ಕಾಲುವೆ ತೋಡುವ ಕೆಲಸ ಸುರುವಾಚಿ. ಅದೂ

ಬಾಲಾಜಿ ಕಂಪೆನಿಕಾರಳೇ ಎಟ್ವಾ ಮೈಲ್ಕೆತ್ತನೆ ಪುಡ್ಚತ್. ಕಾಲುವೆ ಪಣಿರ, ಪಿಂಞ ಜಲ್ಲಿ ಒಡ್ಪ ವಡ್ಡಂಗಕ್ ವಾಸಕ್ ಜಾಗ ಬೋಂಡು. ಇಕ್ಕ ಕಂಪೆನಿರ ಒರ್ ಚೆರಿಯ ಮೇನೇಜರ್ ಅಲ್ಲತೆ ಚಿಲ್ಲರೆ ವಿಷಯಕ್ ಸಲಹೆಗಾರನೂ ಮಂದಣ್ಣನೇ.

"ಮಳೆಗಾಲ, ಒಡ್ಡಂಗಕ್ ಮನೆ, ಜಾಗ ಬೋಂಡು. ಅಯಿಂಡ ಕೆಲಸ ಜಾಸ್ತಿ ಎಣ್ಣೆಚೇಂಗಿ ಆರ್ತಿಂಗ. ಪಿಂಞ ಬೋರೆ ಜಾಗತ್ ಗುಡಿಸಲ್ಡುವ. ಆನಗುಂಡ್ ಚಾಂದ್, ಬೂಟಿ ಕೇಸಲ್ ಮನೆ ಬುಡುತುವಕ ಮುಳ್ಗಡೆ ಜನ ಇಂಜ ಖಾಲಿ ಗುಡಿಸಲ್ಲ್ ಒಡ್ಡಂಗಳ ಬುಡನ. ನೀಡ ಜಾಗಕೂ ಕಾತರಾಪ. ಅಲ್ಲ ಮಂದಣ್ಣ"ಂದ್ ಲಾರೆನ್ಸ್ ಸಮಸ್ಯೆ ಪರಿಹಾರ ಮಾಡ್ಚಿ.

ಬಾಲಾಜಿ ಪಿಂಞ ಲಾರೆನ್ಸ್‌ನಗುಂಡೇ ಮಂದಣ್ಣ ಮಿಂಞಕ್ ಬಂದಂವೊ. ಕಯ್ಯಾಂದೆಣ್ಣುವದ್ ಏದ್ ಧರ್ಮ? ನ್ಯಾಯ ಬೋಂಡುವಲ್ಲಾ? "ಆಕು"ಂದೆಣ್ಣೆಚಿ. ಪಿತ್ಯಾಂದೇ ವಡ್ಡಂಗಳೂ ಲಾರೆನ್ಸ್‌ರ ಕೂಟ್ಕಾರ ಕ್ರಿಶ್ಚಿಯನ್ ಪಣಿಕಾರಳೂ ಮಂದಣ್ಣಂಡ ನುಪ್ಪದೇಕ್ರಿ ಜಾಗತ್ ಕೂಡ್ಚಿ. ಕಾಲುವೆ ಕೆಲಸ ರಭಸತ್ ನಡಂದತ್.

ಕೊಡಗ್ಗರ ಮಕ್ಕಕ್ ಕಂಪನಿಲ್ ಕೆಲಸ ಮಾಡಿ ಕೊಡ್ಪಾಂದ್ ಮಂದಣ್ಣಂಡ ಕೇಳಿ ನಾಲ್ ದಿಕ್ಕ್ ಕೆತ್ತಿತ್. ಕೊಡಗ್ಗರ ಎಚ್ಚಕೋ ಬಾಲೆಕಾರ "ಮಂದಣ್ಣ ಮೇನೇಜರ್"ನ ಕಾಂಬಕ್ ಬಪ್ಪಯಿಂಜತ್. ಮಂದಣ್ಣ ಇಂದ್ ಪಳಿಯ ನೂರ್‌ಭಟ್ಟಿ ಭೂಮಿರ ಕಳ್ಳಾ ಕಾಚುವ ಮಂದಣ್ಣನಲ್ಲ; ಬ್ರಾಂಡಿವಿಷ್ಕಿಲೇ ಕೈ ಕತ್ತುವಂವೊ!

ಮಂದಣ್ಣಂಡ ಮುಳ್ನ ಭೂಮಿ ಜಾಗತ್‌ರ ದುಡ್ಡ್ ಕಾಯಿತ್ ಎಚ್ಚಕೋ ಓಡಿ ಕಳಿಚತ್. ಲ್ಯಾಂಡ್ ಎಕ್ವಿಸಿಸನ್ ಆಫೀಸರ್ ಮೊಟ್ಟ್ ತೇಯಣೆ ನಡಂದತ್. ಆ ಆಫೀಸರ್‌ಕಾರ ಬೋರಿ ತಕ್ಕ್‌ಕೆಲ್ಲ ಬಗ್ಗುವವು ಅಲ್ಲ. ಅಯಿಂಡ ಓದಿ ಅಡ್ವಾನ್ಸ್ ಬೆಚ್ಚ ಪಿಂಞ ಮಾತ್ರ ಮಂಡೆ ನೇತುವ. ಏಕ್ರೆಕ್ ಅಂಜಾಯಿರ ತಪ್ಪಾಂದ್ ಸುರೂಲ್ ಎಣ್ಣೆನ ಸರಕಾರ ಮಂದಣ್ಣಂಡ ಭೂಮಿನ 'ಸಿ' ಗ್ರೇಡ್‌ಂದ್ ಮಾಡಿತ್ ಏಕ್ರೆಕ್ ದಂಡಾಯಿರಕುಳ್‌ಪಿತ್‌ಂದ್ ಗೊತ್ತಾಚಿ. ಎನ್ನೇಂಗಿ ಆಡ್, ಕ್‌ಟ್ವಾವದ್ ಬೆರಿಯ ಕ್‌ಟ್ವಡ್‌ಂದ್ ಒರೇ ಗೇನ ಮಂದಣ್ಣಂಗ್.

ಓಡಿ ಕಳ್‌ಚಿತ್ ಪಣ ಬಂದೀತ್‌ಂದ್ ಪೋಚೇಂಗಿ ಆ ಪಣ ಮೂಂದ್ ಕಂತ್‌ಲ್ ತಪ್ಪಾಂದೆಣ್ಣಿತ್ ಮಂದಣ್ಣಂಗ್ ಮೂಂದಾಯಿರ ಕ್‌ಟ್ವಾವನ್ನೆ ಆಚಿ. ಆಫೀಸ್ ಕಾರಡ ಪಾಲ್ ಪರ್ಸೆಂಟೇಜ್, ಅದ್ ಇದ್‌ಂದೆಣ್ಣಿತ್ ವಜಾ ಪೋಯಿತ್ ದಂಡಾಯಿರ ಕೈಕ್

ಕೊಟ್ಟಣ್ಣ ಅವರ ಸ್ವಾಸ್ಥ್ಯ ನಿಪುಣತೆಯನ್ನು ತಿಳಿಸುತ್ತಾನೆ.

ಎಂತೂ ಮಂದಣ್ಣ ಗಟ್ಟಿಗ. ಮಿಂಚು ಪಣ ಎಡೆತೆವೊ! ಬಾಕಿ ಉಳ್ಳಯಿಂಗಕ್ ಸ್ಯಾಂಕ್ಷನ್ ಆಗತ ಪೈಸಾರಿಲ್ ಹಕ್ಕಿ ಪಿಕ್ಕಿಯಡಂತ ಗುಡಿಸಲೇ ಗತಿ.

ಬಾಲಾಜಿ ಕಂಪೆನಿ ಇಂಜಿನಿಯರ್ಸ್‌ನ ಸೆರಿಕ್ ಎಡೆ ಇಟ್ಟಿತ್ ಚಾಕತಾನಗುಂಡ್ ಆ ಕುರಿರ ಬಿಲ್ಲೇ ಪಾಸಾಯಿಲೆ. ಆಳಕ್ ಅಡ್ವಾನ್ಸ್ ಕೊಡಪಕೂ ಪಣಯಿಲ್ಲೆ. ಚೀಫ್ ಇಂಜಿನಿಯರ್ ಒಬ್ಬಂಗೇ ಐಂಬದಾಯಿರ ಮೀದಿ ಬೆಕ್ಕಂಡು. ಇಂಚು ಅವಂಡ ಕೂಟ್ ಬಾದೆಯಳ ಲೆಕ್ಕ ಇಡಿ. ಬಾಲಾಜಿರ ಕತೆ ಗೋಳಾಚಿ. ಸದ್ಯಕ್ ಬಿಲ್ ಆಕಣೆ ಚೆನ್ನ ಪಣ ಬೋಂಡೊಂದೆಣ್ಣೆಚಿ ಬಾಲಾಜಿ. ಮಂದಣ್ಣಂಗ್ ತುಪ್ಪಿಂಗೂಡ ಎರಕಿಂಗೂಡ; ಎನ್ನೇಂಗೂಡ್ ಬಿಲ್ ಪಾಸಾಕಣೆ ಸುಧಾರಣೆಕಲ್ಪಾಂದೆಣ್ಣೆತ್ ತಾಂಗ್ ಕೊಟ್ಟನ ದಂಡಾಯಿರ ಉರ್‌ಪಿಯತ್‌ನೋ ಪೊಣ್ಣರ ಮಾಲ್ ಬೆಚ್ಚಿತ್ ಎಡೆತ ಪಣ ಕೂಟಿ ಅಂಜಾಯಿರ ಮಾಡಿ ಕೊಡೆತತ್. ಇಂದ್ ಅಂಜಾಯಿರ ಕೊಡೆತಕ ನಾಳೇ ಬಿಲ್ ಬಂದ ಪಿಂಚು ಪತ್ತಾಯಿರ ಕೇಕಲೊಂದೆಣ್ಣವ ಧೈರ್ಯ ಇಂಜ ಪಿಂಚು ಕೊಡೆಪಕೆನ್ನಾಂಡಿಯೆ?

ಒನ್ನಾಂದ್ ಪೊಣ್ಣನೋ ಕೂಟಿ ಮಂದಣ್ಣ ತಾಂಡ ನುಪ್ಪದೇಕೈ ಪುದಿಯ ಜಾಗ ನೋಟಿಯ ಬಪ್ಪಕ್ ಪೋಚಿ. ದೂರತಂಜಿ ನೋಟಣೆ ಜೋಳ, ಮರಕಳಂಜಿ, ಚೇನಕಂಡೆ, ಬಾಳೆ ಎಲ್ಲಾ ಬೊಳಂದ್ ನಿಂದದ್ ಕಂಡಿತ್ "ಅದೇ ನಂಗಡ ಪುದಿಯ ಜಾಗ"ಂದ್ ನೀಲವ್ವಂಗ್ ಕಾಟಿ ಕೊಡೆತತ್. ಪಚ್ಚೆ ಪುಡಾಚ ಬೊಳೆ ಕಂಡಿತ್ ನೀಲವ್ವಂಡ ಕುಸಿನ ಎಣ್ಣಂಡ, ನೋಟ್‌ಚೇಂಗಿ ಕಣ್ಣೇತ್ತುಲ್ಲೆ!

"ಇದಾ ಇದೇ ಜಾಗ, ನಂಗಡ ಊರ್‌ಕಾರ ಅಂದ್ ಗುಡಿಸಲ್‌ಟ್ಟುಂಡ್ ದಬಾಯಿಚಿಡುವಕ್ ಪೇಚಾಡೆನದ್. ಪಾಪ, ಲಾರೆನ್ಸ್ ದೇವಳಂತವೊ; ಅವಂಡ ಕೆಣೆನಗುಂಡ್ ಜಾಗ ಬಾಕಿ ಆಚಿ. ಈಂಗೇ ಎಣ್ಣವ ನಂಗಡಯಿಂಗಕ್ ಉಪಕಾರ ಮಾಡುವಕಾಗಾಂದ್. ಲಾರೆನ್ಸ್ ತಾಂಡ ಆಳಳಗುಂಡ್ ಚಾಂದ್‌ಮರ ಕೆತ್ತಚಿಟ್ಟಿತ್ ಅಯಿಂಡ ಮನೆರ ಪಕ್ಕ ಇರಾಕಿರಲ್ ಬೆಪ್ಪಾಚಿಟ್ಟಿತ್ ಪೊಲೀಸ್‌ಕ್ ಕೊಡೆತತ್. ನಲ್ಲೋಣೆ ಚವುಟ್ಟಿತ್ ಕೇಸುಟ್ಟಿತ್ ದವುತಿಯೆ"ಂದ್ ತಾಂಡ ಪರಾಕ್ರಮತ್‌ನ ಪೊಣ್ಣ ಕೆಣ್ಣೆಚಿ.

ಅಕ್ಕಣೆ ನೀಲವ್ವ "ಅಯ್ಯೋ ಪಾಪ, ಇಕ್ಕಣೆ ನಂಗಲ್ಲಾ ಒಕ್ಕಚಿ ಬದ್‌ಕನವು. ಅಯಿಂಡ ಮೇಲೆ ಕಳ್ಳ ಕೇಸ್ ಎನ್ನಂಗ್‌ಟ್ಟಿರ? ಚೆನ್ನ ಜಾಗ ಬುಡುವಕೆಣ್ಣೆತುಂಡೇಂಗಿ



ಬುಟ್ತ್ ತಪ್ಪಕಿಂಜಾಲಿಯಾ? ಇಕ್ಕ ಅಯಿಂಗೆಲ್ಲ ಎಲ್ಲಿಯಾ"ಂದ್ ಕೇಟತ್.

"ಇಲ್ಲಿಂಜಿ ಮನೆ ಬುಟ್ತ್ ಓಡಿತಾಪಕ ನೆಲೆಯಿಲ್ಲತೆ ಆಪಕ ಕಟ್ಟೆ ಕೆಟ್ಟುವಕಯ್ಯಾಂದ್ ಪಾರಿಕಳಾಚ ಆ ಪೊರ್ಕಿ ಸಾವುಕಾರಂಗ" ಕೊಡವ ಬಂಬಂಗ ಅಪ್ಪಯ್ಯ ಮಾದಪ್ಪನೆಲ್ಲ ಇಲ್ಲಿಯಾ? ಅವು ಕಾಕಿತ್ ಜಾಗ ಕೊಡ್ತಿತ್ ಅಳಾಪ್ಚಿಟ್ಟಿತಲೊ, ಮಾಡಡ್ ನೋಟನ. ನಾನೂ ನೋಟುವಿ"ಂದ್ ಪೊಣ್ಣಾಕ್ ಅಳಾಕ್ಚಿ.

ಅಕ್ಕಣೆ ಜಾಗತ್ ಪಕ್ಕ ಎತ್ತ್ಚಿ - ಒಡ್ಡಂಗ ಒಂದೂ ಕಾಂಬುಲೆ. ಅಂದ್ ಕೊಡವ, ಗೌಡರೆಲ್ಲ ಕೆಟ್ಟಿತಿಂಜ ಮನೆಯೆಲ್ಲ ಕ್ರಿಶ್ಚಿಯನ್ ಪಣಿಕಾರ ಉಂಡ್. ಕೂಟ್ಕ್ ಇಂಞೂ ಸುಮಾರ್ ಪುದಿಯ ಗುಡಿಸಲೂ ಉಂಡ್. ದಂಡ್ ಮೂಂದಾಳೊನ ಕಾಕಿತ್ ಚೆನ್ನ ಗತ್ತಾಲೆ ಕೇಟತ್.

"ನಂಗ ಇಲ್ಲಿಂಜಿಯೆ ಪಣಿಕ್ ಪೋಪ. ಲಾರೆನ್ಸ್ ಮೇನೇಜರ್ ಇಲ್ಲಿಯೆ ಇಪ್ಪಕೆಣ್ಣಿತ್. ಮರ ಕಳಂಜಿ, ಚೇನಕಂಡೆ - ಎಲ್ಲ ಫಸಲ್ ಬಾತೇಂಗಿ ನಿಂಗಕೂ ತಪ್ಪ"ಂದ್ ಒಂದ್ ದಂಡಾಳೆಣ್ಣಿಚಿ. ನೀಲವ್ವಂಗ್ ಚೆರಿಯ ಸಂಶಯವೂ ಬಾತ್. "ಅಲ್ಲ, ಇವು ಇನ್ನನೆ ಮನೆ ಕೆಟ್ಟಿತ್ ಅಳೆತಿತಲ್ಲಾ, ಪಂಡೇ ಮಲಯಾಳ ಕ್ರಿಸ್ತಾನಿಯ. ಅವು ಏದ್‌ಂಗೂ ಅಂಜತವು. ಜಾಗ ಬುಟ್ತ್ ತಕ್ಕುವಾ, ಅವು ಬೋರೆ ಜಾಗತ್‌ಲ್ ಮಾಡ್‌ನ ಕೇತರ ಗೊತ್ತಿಲ್ಲೆಯಾಂದ್ ವಡಿಯನ ಕೇಟತ್.

ಓಹೋ, ಇಲ್ಲಿ ಪುಟ್ಟಿ ಬೊಳಂದ ಕೊಡವ ಗೌಡಳೆಲ್ಲ ಕೆಟ್ಟ್ ಕೆಟ್ಟಿಚಿಟ್ಟಿತ್ ಇರ್ ಪೊಲಣೆ ದವುತ್ತಿಯೆ. ಇವು ಏದ್ ಲೆಕ್ಕ? ನೋಟ್ ನೀಲು ಪೊರಮೆ ಜನಳೆ ಎಚ್ಚಕೋ ವಾಸಿ, ನಂಗಡವು ನಂಗಕಾಪುಲೆ, ಅದೆಲ್ಲ ನಾ ನೋಟಿಯವಿ"ಂದೆಣ್ಣಿಚಿ.

ನಡು ಜಾಗತ್ ಒರ್ ಚಪ್ಪರತ್‌ರಡಿಲ್ ಒರ್ ಏಸುಕ್ರಿಸ್ತಂಡ ಪೋಟೋ ಬೆಚ್ಚದ್ ಕಂಡಿತ್ ನೀಲವ್ವಂಗ್ ಎಂತೋ ಸಂಶಯವೂ ಬಾತ್. ವಡಿಯ ಇಂದ್ ಸಾಧಾರಣತ್‌ರ ಮನುಷ್ಯಲ್ಲಾಂದೆಣ್ಣಿವ ಧೈರ್ಯತ್ ಮುಂಡತೆ ಕೂಡ್ಚಿ.

ಬಾಲಾಜಿ ಕಂಪೆನಿ ಕಟ್ಟಿ ಕೊಡ್ತ ಜಿಂಕಶೀಟ್ ಮನೆ ಇಂದ್ ಮಂದಣ್ಣಂಡ ಸ್ವಂತ ಮನೆರ ಲೆಕ್ಕ. ಬೈಟ್ ಲಾರೆನ್ಸ್‌ನ ಕಾಂಬಕ ಕೇಟತ್ - "ನೋಟಿ, ವಡ್ಡಂಗ ಎಲ್ಲಾ ಜಾಗ ಖಾಲಿ ಮಾಡಿತ್. ಕಾಲುವೆಪಣಿ ಎಲ್ಲ ತೇಂದಿತ್. ಪಳಿಯಯಿಂಡ ಕೂಟ್ಕ್ ಚೆನ್ನ ಪುದಿಯವೂ ಅಲ್ಲಿ ಕೂಡಿತ್ ಮರಕಳಂಜಿ, ಬಾಳೆ, ಜೋಳ ಎಲ್ಲಾ ನಟ್ಟಿತ್ ಎನ್ನ ಸಂಗತೀಂದ್ ಚೆನ್ನ ಸಂಶಯತ್‌ಲೆ ಕೇಟತ್.

"ಅದ್‌ಂಗೆನ್ನ ಮಂದಣ್ಣಾ, ಅವು ಚೆನ್ನ ದಿನ ಇಪ್ಪ. ನೀಡ ಜಾಗ ಸಾಗ್ ಆನನ್ನೆಕೆ ಆಚೆಲ್ಲಾ? ನೀಕೂ ಚೆನ್ನ ಬೊಳಂದಾನ ತಪ್ಪಾಚಿರುವಿ; ಬೋರೆ ಜನ ಬಂದಿತ್ ಕೂಡತ್ತನ್ನೆಕೆ ಕಾತರ್ ಉಂಡಲ್ಲಾ"ಂದ್ ನೊಣೆ ಎಣ್ಣೆಚಿ.

ಮಂದಣ್ಣಂಗ್ ಸಂಶಯ ಬಂದಿತ್‌ಂದ್ ಲಾರೆನ್ಸ್‌ಕೂ ಗೊತ್ತಾಚಿ. ಪುಡ್‌ತ ಕ್‌ಟ್ವನ ಪಿಂಞ ಪೊಡ್‌ಪಕ್ ಬುಟ್ಟಕ ಕೊಡವನ ತಡ್‌ಪಕಯ್ಯ! ಪೊಡಕತನ್ನೆಕೆ ಮುರ್ಕಿ ಪುಡಿಪಕ್ ನಾಡ ಕೇರಳ ಕೆಣಿಪಾಯಿಚಿರಂಡೂಂದ್ ಹಾರಂಗಿ ಯೋಜನೆನಚ್ಚಿ ಕೇ ಬಲ್ಯ ಯೋಜನೆ ಇಟ್ಟಿತ್ ಲಾರೆನ್ಸ್.

ಇದೇ ಸಮಯಕ್ ಸೆರಿಯಾಯಿತ್ ರಾಬರ್ಟ್ ಎಣ್ಣುವಂವೋ ತಾಲೋಕರ್ ತಾಶಿಲ್‌ದಾರನಾಯಿತೂ ಬಾತ್. ಪೀಟರ್ ರೆವಿನ್ಯೂ ಇನ್ಸ್‌ಪೆಕ್ಟರಾಯಿತ್ ಅಲ್ಲಿಯೇ ಇಂಜತ್. ಕಾಲಕೂಡಿ ಬಪ್ಪಕ ಎಲ್ಲ ಮೇಳ ಕೂಡಿ ಬಪ್ಪ! ಲಾರೆನ್ಸ್ ಒಳಿಯ ಕೂಡಿತ್ ತಹಶೀಲ್ದಾರನ ಪುಡ್‌ಚಿತ್ ಮಂದಣ್ಣ ಸ್ವಪ್ನ ಕಂಡ ಜಾಗತ್ ನಾಪದ್ ಕ್ರಿಸ್ತ ಸಂಸಾರ ಉಂಡ್‌ಂದೂ, ಆ ಜಾಗತ್‌ನ ಅಯಿಂಗಕ್ ಆಳಣ್ಣ ಮಂಜೂರ್ ಮಾಡಂಡೂಂದೂ, ಆ ಜಾಗಕ್ "ಮೇರಿ ನಗರ"ಂದ್ ಪೆದ ಇಟ್ಟಿತ್ ಒರ್ ಚರ್ಚ್ ಕೆಟ್ಟಂಡೂಂದೂ ತಾಂಡ ಯೋಜನೆರ ಬ್ಲೂ ಪ್ರಿಂಟ್ ಕೊಡ್‌ತಿತ್ ಕಾರ್ಬಾರ್ ಮಾಡ್‌ಚಿ!

ರೆವಿನ್ಯೂ ಇನ್ಸ್‌ಪೆಕ್ಟರೂ ತಹಶೀಲ್ದಾರನೂ ಕೂಡ್‌ನಕ ಎಂತ ಪವಾಡ ಮಾಡುವಕಯ್ಯತ?

ಕೊಡವಳನ್ನೆಕೆ ಬೋರೆ ಜಾತಿಕಾರ, ಮತಕಾರ ಕೇಡ್ ಮಚ್ಚರ ಕಾಟುವಾ? ತಾಂಡ ಮತ-ಜಾತಿ ಎಣ್ಣೆ ಚೇಂಗಿ ಏದ್ ಕಾನೂನ್ ಕಾಯಿದೇನೋ ಮೀರಿತ್ ಇರ್ ಪೊಲಣೆ ಕಾರ್ಬಾರಾಪ. ಕೊಡವ ಅಧಿಕಾರಿಯ ನೆಲೆನಿಂದ ಕೊಡವಂಡ ಕುಡಿ ಅಳಕುವಕುಳ್ಳಜಾಡ್ ತೇಡುವ.

ಪದ್‌ನಂಜಿ ದಿನತ್‌ಲ್ ಮಡಿಕೇರಿರ ಪೇಪರ್‌ಲೆಲ್ಲ ಕಾಂಬ" ಜೂನ್ ಪತ್ತಾಂಗ್ "ಮೇರಿ ನಗರ" ಚರ್ಚ್ ಉದ್ಘಾಟನೆಂದ್! ಕೊಡಗಲ್ ಪಂಡ್‌ಂಜಿ ಉಳ್ಳ ಊರೇ ಮುಳಿತ್ ಪೋಪಕ ಇದೋರ್ 'ಮೇರಿಯೂರ್' ಎನ್ನನೆ ಪುಟ್ಟ್‌ಚಿ ಎಣ್ಣುವ ಸಂಗತಿ ಏದ್ ಕೊಡವಂಡ ಮಂಡೆಕೂ ಪೋಯಿಲೆ. ಲಾರೆನ್ಸ್‌ರ ಚರ್ಚ್‌ಗಳಿ ನೋಟಿತ್ ಮಂದಣ್ಣಂಗೇನೋ ಸಂಶಯ ಬಾತ್. ಒನ್ನಾಂದ್ ಪೋಯಿತ್ ನೋಟಣೆ ಒಣಂಗ್‌ನ ಮಾಂಗಿ ತೊಪ್ಪರ ತೋರಣತ್ತರಡಿಲ್ ಮೇರಿರ ಚರ್ಚ್‌ಂದ್ ಬಲ್ಯ ಬೋರ್ಡ್

ಇಂಜತ್. ಸುತ್ತೂ ತಂತಿ ಬೇಲಿ ಆಯಿತ್. ಮಂದಣ್ಣಂಗ್ ಉಬ್ಬ ದಾಟಿತ್ ಪೋಪ ದೈರ್ಯವೂ ಬಂದಾಲೆ, ತಾಂಡ ಸ್ವಪ್ನ ರಾಜ್ಯಕ್ ನುಗ್ಗುವಕ್! ಚೋಂದ ಮೋಟರ್ ಸೈಕಲ್‌ರ ಪಕ್ಕ ತಾಂಗಿನಿಂದ ಪಾದ್ರಿ ಮಂದಣ್ಣನ ನೋಟಿತ್ "ಎನ್ನಾಂಡು"ಂದ್ ಕೇಪನ್ನೆಕೆ ದುಂಡ್‌ಲೇ ಕೇಟತ್. ಮಂದಣ್ಣ ಬಯ್ಯಕ್‌ಬಾತ್!

ಪಿತ್ಯಾಂದ್ ತಾಲೂಕ್ ಆಫೀಸ್‌ಕ್ ಪೋಯಿತ್ ಪುಕಾರ್ ಕೊಡ್‌ತತ್. "ನಿಂಗ ಆ ಜಾಗಕ್ ಅರ್ಜಿಯೇ ಇಟ್ಟಿತ್ತಿಲ್ಲೆ. ನಿಂಗಕೆನ್ನನೆ ಜಾಗ ಆಪ? ಅಲ್ಲಿ ಮನೆ ಕಟ್ಟಿ ಅಳ್‌ತಯಿಂಗಕ್ ಪಟ್ಟೆ ಕೊಡ್‌ತಿತಾಯಿತ್"ಂದೆಣ್ಣ್‌ಚಿ.

ತಾತ್‌ನ ಮಂಡೆನ ನೇತತ ಮನೆಕ್ ಬಾತ್ ಮಂದಣ್ಣ. ಮನೆರ ಪಕ್ಕ ನಾಲ್ ಪೋಲೀಸ್‌ಕಾರಳ ಕಂಡತ್. ಎನ್ನ ಸಂಗತೀಂದ್ ಕೇಟತ್. ಬಾಲಾಜಿ ಕಂಪೆನಿಲ್ ಇರ್‌ಂಬ್, ಕಲ್ಲ್ ಒಡ್‌ಪ ಡೈನಮೈಟ್ ಕಳುವಾಯಿತ್‌ಂದೂ, ಮಂದಣ್ಣಂಡ ಮೋಂವೊ ರಾಜಂಡ ಮೇಲೆ ಸಂಶಯಾಂದೂ ಲಾರೆನ್ಸ್ ಪುಕಾರ ಕೊಡ್‌ತಿತಿಂಜತ್.

ಪೋಲೀಸ್‌ಕಾರ ಮಂದಣ್ಣಂಡ ಮನೆ ತೇಡುವಕ ಮನೆರೊಳ್‌ಲ್ ಡೈನಮೈಟ್ ಕ್‌ಟ್‌ಚಿ. ಏದೂ ಪಾಪ ಕರ್ಮ ಅರಿಯತ ಪಾಪತ್‌ರ ರಾಜನ ಪುಡ್‌ಚಂಡ್ ಪೋಚಿ. ಲಾರೆನ್ಸ್‌ರ ಈ ಚದಿಕ್ ತಕ್ಕ ಪ್ರತೀಕಾರ ಮಾಡುವಕ್ ಇಕ್ಕ ಮಂದಣ್ಣಂಗ್ ತಾಕತಿಲ್ಲೆ. ಎನ್ನೇಂಗಿ ಮಾಡಿತ್ ರಾಜನ ಬುಡ್‌ತನಾಂದೆಣ್ಣ್ ಚೇಂಗಿ ಮಂದಣ್ಣಂಡ ಕೈಲ್ ಕಾಸಿಲ್ಲೆ. ಬಾಲಾಜಿ ತಪ್ಪಕುಳ್ಳ ಮುಳ್‌ಗಡೆರ ಅಂಜಾಯಿರ ಉರ್‌ಪಿಯೇಂಗಿ ಕೇಕನಾಂದ್ ತೇಡ್‌ಚಿ. ಬಾಲಾಜಿ ಕಂಪೆನಿರ ಕೆಲಸ ಚಾಯಿಲ್ಲೆಂದ್ ಟೆಂಡರ್ ರದ್ದ್ ಮಾಡಿತ್‌ಂದೂ, ಅಯಿಂಗ್ ಕೇರಳತ್‌ರ ಪ್ರೊಜೆಕ್ಟ್‌ಕ್ ಪೋಪಾಂದೂ ಅರಿಂಜತ್.

ಮಂಡೆಕ್ ಮರ ಬುದ್ದನ್ನೆಕೆ ಬುದ್ದಂಡಿಂಜ ಮಂದಣ್ಣನ ನೀಲವ್ವ ಕಾಕಿತೊಪ್ಪ್‌ಚಿ. ಓರ್ ಬರಿಂಜಿ ತಮಿಳ್‌ಕಾರ ಮನೆರ ಜಿಂಕ್‌ಶೀಟ್ ಉತ್ತುವಯಿಂಜತ್. ಎನ್ನ ಸಂಗತೀಂದ್ ನೀಲವ್ವನೇ ಕೇಟತ್. ಕಂಪೆನಿರ ಕೆಲಸ ಆಚಿ. ಇಲ್ಲಿಯತ್‌ರ ಟೆಂಡರ್ ಕ್ಯಾನ್ಸಲ್ ಮಾಡಿತ್. ಎಲ್ಲಾ ಕೇರಳಕ್ ಸಾಗ್‌ಚಿರಂಡು, ನಿಂಗಡ ಸಾಮಾನ ಎನ್ನೇಂಗಿ ಉಂಡೇಂಗಿ ಎಡ್‌ತೋಳಿ. ಜಿಂಕ್‌ಶೀಟ್ ಇಕ್ಕ ಲಾರಿಕ್ ಲೋಡ್ ಮಾಡಂಡು"ಂದ್ ಒರ್ ಆಳ್ ವರದಿ ಒಪ್ಪ್‌ಚಿರಣೆ ಪಾದಿ ಉತ್ತಿತಾಯಿತಿಂಜತ್!

ತಮಿಳ್ ಗೊತ್ತಿಲ್ಲತೆ ನೀಲವ್ವ ಆ ತಮಿಳ್‌ಕಾರಡ ಕೂಡ ಎಂತ ತಕ್ಕ ಪರೆಯಲು? ಪರಂದಿತೆನ್ನಾ ಸುಖ? ಮನೆರೊಳ್‌ಂಜಿ ಕಟ್ಟಕಡಿಕೆ, ಪೊಟ್ಟಿ ಬಟ್ಟೆನೆಲ್ಲ ಪೊರಮೆ ಇಟ್ಟಿತ್

ನೀಲವ್ವ ಮೊರಟಂಡಿಂಜತ್.

ಮಂದಣ್ಣ ಪೊಲಾಕತ್‌ಂಜಿ ಉಂಡಿತೂ ಇಂಜಾಲೆ. ಇಕ್ಕಣೆ ಪೊರಮೆ ಜನಕೆಲ್ಲ ಮೇನೇಜರ್‌ಂದೇ ಗೊತ್ತಿಂಜ ಮಂದಣ್ಣನ ಓರ್ ತಕ್ಕೂ ಕೇಕತೆ ಮನೆನೆಲ್ಲ ಕಯಿಚಿತ್‌ಟ್ಟಿದ್ ಕಂಡಿತ್ ನೀಲವ್ವನ ಒಮ್ಮ ನೋಟ್‌ಚಿ. ಪೊರಮೆ ಗುಡ್ಡೆ ಇಟ್ಟು ಪೊಟ್ಟಿರೆ ಕೊಡಿಲ್ ನೀಲವ್ವ ಮೊರಟಂಡ್ ಅಳಾತಿತ್.

ಕಟ್ಟೆರ ಬೌಂಡ್ರಿ ಗೇಟ್‌ರ ಪಕ್ಕ ಮಂಜುನಾಥ ಬಸ್ಸ್ ನಿಂದತ್. ಬಾಲಾಜಿ ಸಾವುಕಾರನೆತ್ತ ಬಸ್ಸಲೇಂಗಿ ಬಾತಾಂದ್ ಮಂದಣ್ಣ ನೋಟ್‌ಚಿ. ಒರ್ ಮೂಡಿ ಕನ್ನಡ ಪೊಡಿಯ ಉಡ್‌ತಂಡ್ ಅರೆಲೋರ್ ಚೆರಿಯ ಕುಂಞಾನೋ ತೆಕ್ಕಿಯಂಡ್ ಇಳಿಂಜಿತ್ ಪಕ್ಕ ಎತ್ತಾಚಿ. ಪಾಲ್ ಕುಡಿಪ ಕುಂಞಾನೆಡ್‌ತಂಡ್ ಬಂದವ ಮಂದಣ್ಣಂಡ ಮೋವ ಪ್ರೇಮ!

ಅಪ್ಪ, ಅಪ್ಪ, ಮೋವ ಓರಬ್ಬಡ ಮೂಡ್ ನೋಟ್‌ಚಿ. ಪ್ರೇಮ ಮೊರಟಂಡ್ ಮಂಡೆ ಕುಂಬ್‌ಟ್ಟತ್. ನಡಂದ ಸಂಗತಿ ಎಂತಂದ್ ಕೇಕಂಡಿಯ ಅವಶ್ಯಕತೆಯಿಂಜಾಲೆ.

ಕೇರಳ ಪ್ರಾಜೆಕ್ಟ್ ಪೋನಲ್ಲಿ ಪ್ರೇಮ, ಪೆರುಮಾಳ್ ಒಕ್ಕಚೇ ಇಂಜತ್. ಪ್ರೇಮ ಪೆತ್ತಿತಾನದು ಚೆನ್ನಂಗೇ ದಿನತ್‌ಲ್ ಪೆರುಮಾಳ್‌ನ ಕೂಟಿಯ ಪೋಯಿತ್ ಅವಂಡ ಅಪ್ಪ ಬೋರೆ ಮಂಗಲ ಕಯಿಪ್‌ಚಿಟ್ಟತ್. ಪ್ರೇಮನ ಕೆಲಸತ್‌ಂಜಿ ಎಡ್‌ತತ್.

ಅವ್ವನೂ ಮೋವಳೂ ಮೊರಟಂಡಿರಣೆಕ್ ಮಂದಣ್ಣ ಕಟ್ಟೆರತ್ತಟಿ ಮೊಟ್ಟ್‌ಟ್ಟಿಟ್ಟತ್. ಕಟ್ಟೆ ದುಂಬಿತ್ ನೀರ್ ತೆರೆ ಪೊಯ್ಯುವಯಿಂಜತ್. ಮಂದಣ್ಣಂಡ ಭೂಮಿ ಮನೆ ಇಂಜ ಜಾಗ ಮುಳಿತ್. ಮನೆರ ಬರಿಲಿಂಜ ಓರ್ ಮಾಗೆ ಮರತ್‌ರ ಕೊಡಿ ಮಾತ್ರ ಕಾಂಬ!

ಕಟ್ಟೆರ ಬರಿರ ಮೊಟ್ಟ್‌ಲ್ ನಿಂದಿತ್ "ಊರ್‌ನ ಮುಳ್‌ಕನ ಕಟ್ಟೆಕ್ ಒರ್ ಆಳ್‌ನ ಮುಗ್ಗುವದ್ ಕಷ್ಟಾ? ಕಟ್ಟೆಕೋರ್ ನರಬಲಿಯಾಡ್"ಂದ್ ಪಾರ್‌ಚಿ.

ದೂರತ್‌ಲ್ ಪಣಿಕಾರ ಕಂಡಿತ್ ಓಡಿಬಂದ್ ಎಡ್‌ತತ್. ಮಂದಣ್ಣ ಚೆತ್ತಿತ್ತಿಂಜಾಲೆ. ಪಿತ್ತಾಂದ್ ಎಲ್ಲಾ ಸಂಗತಿ ಕೇಟ ಅಪ್ಪಯ್ಯಜ್ಜ ಬಂದಿತ್ ಮಂದಣ್ಣಂಡ ಸಂಸಾರತ್‌ನ ಕೂಟಿಯ ಪೋಯಿತ್ ತೋಟತ್ ಆಕಿಯಂಡತ್.

ಚೆನ್ನ ಪೋಕರಿ ಮಕ್ಕ "ಕಟ್ಟೆರ ಮಂದಣ್ಣ"ಂದ್ ಇಕ್ಕಲೂ ಚೇಷ್ಟೆ ಮಾಡುವ!

## ದಿನೆ ಫಲ

ಚುಬ್ಬುಜ್ಜಂಡ ಮಾನಿ ಭೂಮಿಲ್ ಗೊಬ್ಬರಗೋಡ್ ಇಟ್ಟಿತ್ ನಲ್ಲೋಣೆ ನಯಿಚಕ ವಾರಾಂಡುಂಬಕ್ ತಟ್ಟಿ ಕೊಟ್ಟಿ ನೆಲ್ಲಾಕು. ಕಾಫಿ, ಯಾಲ ಇಲ್ಲೆ. ಚತ್ತೆಕ್ ಉಳ್ಳ ಒರ್ ಕೆಟ್ತ್ ತರಕಾರಿಯೋ, ಚೋರಂಗೆಯೋ, ಕೈಪುಳಿಯೋ, ಬಾಳೆಕೊಲೆಯೋ ಕೂಟಿತ್, ಎಟ್ತ್ ಮೈಲ್ ಪೊರ್ತ್, ಮಾರಿತ್ ದಿನ ಕಯಿಪದ್ ಪಂಡಂಜೇ ಬಂದ ನಡಪ್ಪು.

ಚುಬ್ಬುಜ್ಜಂಡ ಪೊಣ್ಣ್ ಚೀತ, ಪೆತ್ತ ಮಕ್ಕೆಲ್ಲ ಚತ್ತ-ಕೆಟ್ತ್ ಪೋಯಿತ್ ಬಾಕಿ ಆನವು-ಮೋಂವೊ ಮಂದು ಪಿಂಞ ಮೋವ ಪಟ್ಟು.

ಮಂದು ವಾರಕೊಮ್ಮ ಚತ್ತೆರಂದ್ ಸ್ಕೂಲ್ ಬಾಕಿ ಮಾಡಿತ್ ಅಪ್ಪಂಡ ಕೂಡ ಒರ್ ಚೆರಿಯ ಕೆಟ್ತ್ ಪೋರಿ ಪೋಯಿತ್ ಚತ್ತೆ ವ್ಯಾಪಾರ ಮಾಡಿಯಂಡ್ ಬಪ್ಪದ್ ಮಾಮೂಲ್ ನಡಪ್ಪು. ಚುಬ್ಬುಜ್ಜ ಹೋಟೆಲ್‌ಕ್ ಮೊಟ್ಟ್‌ಟ್ಟವನಲ್ಲ. ಮೋರಾಂಗೂಳಾರ ಕೂಪದಿಕ್ ದಂಡ್ ಮತ್ತಿ ಮೀನ್ ಚುಟ್ಟಿತ್ ಇಟ್ಟಿಂಡಕ ಅಪ್ಪನೂ, ಮೋಂವೊನೂ ತರ್ತೆ ಕೇತಿತ್, ಮೂಂದ್ ಗಂಟೆಕ್ ಪೇಟೆ ಬುಡು.

ಹೋಟೆಲ್‌ರ ಕನ್ನಡಿ ಪೊಟ್ಟಿಲ್ ರೋಡ್‌ಲ್ ಜಲ್ಲಿ ಗುಡ್ಡೆರನೆಕೆ ಅಟ್ಟಿ ಬೆಚ್ಚ ಪೊಕ್ಕಡ, ವಡೆ ಎಲ್ಲ ಕಾಂಬಕ ಮಂದುರ ಆಸೆ ದುಂಬನ ಕಣ್ಣ್ ಅದಾನೇ ನೋಟುವದ್ ಕಂಡಿತ್ ಎಟ್ಟಾಣಕ್ ಕೆಟ್ತ್ ಚಿಟ್ಟಿಂಡ್, ಪಾದಿ ಮಂದುರ ಜೋಬ್‌ಕೆಟ್ಟಿತ್, ಪಾದಿ ಮನೆಕ್ ಎಡ್‌ತೆ ಬಕ್ಕು. ಅದಾನ ಮನೆಲಳೆತಂಡ್ ಎಲ್ಲಾರು ತಿಂಬದೇ ಅಯಿಂಗಕ್ ನಮ್ಮೆ.

ಮಂದು ಹೈಸ್ಕೂಲ್‌ಕ್ ಪೇಟೆಕೇ ಕೂಡ್‌ಚಿ. ಅಪ್ಪಂಡ ಕೂಡೆ ಕೆಟ್ತ್ ಪೊರ್‌ಪದ್ ಚೆನ್ನ ಇಣಾಣಕೇಡ್ ಆಪಯಿಂಜತ್. ಪೇಟೆಕೆತ್ತಣೆ ಕೆಟ್ತ್ ಪೊರ್‌ತಿತ್, ಸ್ಕೂಲ್ ಮಕ್ಕ ಕಾಂಬ ಜಾಗಕೆತ್ತವಕ, ದಂಡ್ ಕೆಟ್ತ್‌ನೋ ಒಂದಾಂಗ್‌ಟ್ಟಿತ್, ಅಪ್ಪನೇ ಪೊರ್‌ಪಯಿಂಜತ್. ಓರ್ ಕೆಟ್ತ್‌ರ ಸುಂಕೇಂಗಿ ಬಾಕಿ ಆಪಯಿಂಜತ್!

ಇನ್ನನೆ ಎಸ್.ಎಸ್.ಎಲ್.ಸಿ.ಕ್ ಎತ್ತಿತ್ ಫೇಲಾಚಿ. ಅದೇ ಕಾಲ ಮೋವ ಪಟ್ಟು ಪಾಸಾಚಿ. ಮಿಂಞಕ್ ಓದ್‌ಚಿಡುವಕ್ ಚುಬ್ಬುಜ್ಜಂಗ್ ಕಯಿಂಜಾಲೆ. ಒಂದುಳ್ಳ ಮೋಂವನೇಂಗಿ ಕಾಲೇಜ್ ಪತ್‌ಚಿಡಂಡೂಂದ್ ಅಪ್ಪವ್ವಂಗ್ ಬಲ್ಯ ಮನಸ್ಸಿಂಜತ್.

ಕುಂಞಿರ ಇಕ್ಕ ಪಾಳ್ ದೆಸೇಂದ್ ಸಮಾಧಾನಪಟ್ಟಂಡತ್.

ಪಟ್ಟು ನಲ್ಲ ಚಾಯಿಕರತಿ, ತಿದ್ದಾನ ಗೊಂಬೆ. ಅವಳ ಬಲ್ಯಯಿಂಡ ಕೈಕೆಲ್ಲ ಕಟ್ಟಿತಿಂಜಕ, ನೋಟುವಕ್ ನಾಲ್ ಕಣ್ಣ್ ಪೋರ.

ಚುಬ್ಬಜ್ಜಂಗ್ ಇಕ್ಕ ಒರ್ ನೇವಸ ಸುರುವಾಚಿ. ಮೊಟ್ಟೆ ಪತ್ತುವಕ್ ಕಯ್ಯಲೆ. ದೂರ ನಡಪಕೂ ಕಯ್ಯಲೆ. ಮಂದುಕ್ ಕೆಟ್ತ್ ಪೋರಿತ್ ಮಾರುವದ್ ಮಾನಕೇಡ್. ಮನೆಲ್ ಮಂಗಲ ಕಯ್ಯುವಕುಳ್ಳ ಮೂಡಿನ ಬೆಚ್ಚಂಡ್ ಚತ್ತೆಕ್ ಕೆಟ್ತ್ ಪೋರುವದ್ ಚಾಯಿಲ್ಲೇಂದ್ ಅವ್ ಚೀತೆಯೂ ಎಣ್ಣುವಯಿಂಜತ್.

\* \* \*

ಅಬು ಒರ್ ಚೆನ್ನ ವಯಸ್ಸಾನ ಮಾಪಳೆ, ಪಂಡಂಚೇ ಮನೆಮನೆ ಸುತ್ತಿತ್ ಚೋರಂಗಿ, ಬಾಳೆಕೊಲೆ ಎಲ್ಲ ವ್ಯಾಪಾರ ಮಾಡಿಯಂಡಿಂಜ ಅಬುನ ಅರಿಯತಂವೊ ನಾಡ್ಲೇ ಇಲ್ಲೆ. ನಲ್ಲ ಮರ್ಯಾದಸ್ತ. ಕೇರಳತ್ಂಜಿ ಬಂದ್ಕೂಡ್ನ ತಟ್ಟಿಪ್ ಮಾಪಳೆಯಡ ಮಾದರಿ ಅಲ್ಲ. ನಲ್ಲ ಕಾಯ, ಕಷ್ಟಕ್ ಆಪಂವೊ.

ಮಂದು ಇಕ್ಕ ಮನೆಲುಳ್ಳ ಬಾಳೆಕೊಲೆ, ಚೋರಂಗಿ ಇನ್ನತಾನೆಲ್ಲ ಅಬುಕ್ಕೇ ಕೊಡ್ಪಯಿಂಜತ್. ತಾಂಡ ಹಿತ್ತಲ್ಲ್ ಇಲ್ಲತಾಚೇಂಗಿ, ಊರ್ಲ್ ಉಳ್ಳಯಿಂಡ ಮನೆಯೆಲ್ಲ ಸುತ್ತಿತ್ ಕಂಡ್ಪುಡ್ಚಿತ್, ಅಬುನ ಕೂಟಿಯಂಡ್ ಪೋಪಯಿಂಜತ್. ಇದ್ಂಗೆ ಅಬು ಚೆನ್ನ ಕಮಿಷನ್ನೂ ಕೊಡ್ಪಯಿಂಜತ್.

ಅಬು ವಾರ ಇಡೀ ಸುತ್ತಿತ್, ವಾರಕೋರ್ ಲೋಡ್ ಕೇರಳಕ್ ಅಯಿಪಯಿಂಜತ್. ಮಂದುರು ಮನೆ ಖರ್ಚಿಕೂ ಕಾಸಾಪಯಿಂಜತ್. ಈ ಚೆರಿಯ ವ್ಯಾಪಾರ ಚಾಯಿ ಕೂಡಿಯಂಡೇ ಬಾತ್.

ಚುಬ್ಬಜ್ಜಂಡ ಕಯ್ಯಾಲೆ, ಬಾಡೆ, ಅಟ್ಟಿ ಎಲ್ಲ ಇಕ್ಕ ಒರ್ ಗೋಡೌನ್ ಆಪಕಾಚಿ, ಪರಂಗಿ ಚಕ್ಕೆ, ಬಡುವಪುಳಿ, ಕಳ್ಂಜಿ, ಪುಳಿ ಇಂತದೆಲ್ಲ ಮಾಲ್ ಎಡ್ತಿತ್, ಕೂಟಿ ಬೆಚ್ಚಿತ್, ವಾರಕೋರ್ ಲೋಡ್ ಪೋಪಕ ಓರಮ್ಮ ಮಂದೂ ಲಾರಿಲ್ ಕೇರಳಕ್ ಪೋಯಿತ್ ಬಪ್ಪಯಿಂಜತ್.

ಅಬುರ ಸಂಸಾರ ಬಲ್ಯದ್. ಅವಂಡ ಪೊಣ್ಣ್ ಚತ್ತಿತ್ ದಂಡನೇ ಪೊಣ್ಣ್ ಕೇರಳತ್ಂಜಿ ಕೆಟ್ಚಿ. ಅವಡ ತಮ್ಮಣ ಹಸನ್ ಎಲ್ಲಿಯೂ ಮೋಳಾಕೇರತೆ ಇಕ್ಕ

ಅಬುರಲ್ಲಿ ಬಂದ್ ಕೂಡ್‌ಚಿ. ಅಬುಕ್ ಮಿಂಞತನ್ನಕೆ ಜಾಸ್ತಿ ಸುತ್ತುವಕೂ ಕಯ್ಯಲೆ. ಮಂದು ಪಿಂಞ ಹಸನ್‌ರ ವ್ಯಾಪಾರ ಚಾಯಿಲೇ ನಡಂದತ್.

ಕಂಡವಂಡ ಲಾರಿಕ್ ಒಂದಾಂಗ್ ದಂಡ್ ಬಾಡಿಗೇ ಕೊಡ್‌ಪಾಂಗ್‌ಂಜಿ ನಂಗಳೇ ಒರ್ ಪಳಿಯ ಲಾರಿ ಮಾಡಿಯಂಡಕ ಲಾಭ ಉಂಡಲ್ಲಾಂದ್ ಹಸನ್‌ರ ಸಲಹೆ ಅಬುಕೂ, ಮಂದುಕೂ ಸೇರಿದ್ ತೋಂದ್‌ಚಿ.

ಹಸನ್ ಕಂತ್‌ಲ್ ಓರ್ ಲಾರಿ ತಕ್ಕ ಪರ್‌ಂದತ್, ಮಂದು ಅಪ್ಪವ್ವನ ಒಪ್ಪ್‌ಚಿಟ್ಟಿತ್, ಅವ್ವಂಡ ಮಾಲ್ ಮಟ ಅಡಬೆಚ್ಚಿತ್ತೂ, ಅಬು ತಾಂಡ ಪೇಟೆರ ಮನೆ ಎಳ್‌ದಿ ಕೊಡ್‌ತಿತ್ತೂ, ಆಳಣ್ಣ ಪದ್‌ನಂಜಾಯಿರ ಇಟ್ಟಿತ್ ಓರ್‌ಲಾರಿ ಎಡ್‌ತತ್.

ಇಯಂಗಡ ಜಂಟಿ ವ್ಯಾಪಾರ ಚಾಯಿಲೇ ನಡಂದತ್. ಮಂದುನ ಇಕ್ಕ ಎಲ್ಲಾರೂ "ಲಾರಿಮಂದೂ"ಂದೇ ಕಾಕುವಂಜತ್. ಇಚ್ಚಕಾನಕಲೂ ಮಂದು ಚಾಣನೂ ಅಲ್ಲ ಬಲ್ಯ ಪೊಟ್ಟಿನೂ ಅಲ್ಲ. ಈ ಕಾಲತ್‌ರ ಚಾಲಾಕ್‌ನೆಲ್ಲ ಅರಿಯತಂವೊ.

ಮಂದುರ ಮನೆಕಾರ ಮಿಟ್ಟು ಚೆನ್ನ ಅನುಕೂಲಸ್ತ. ಆಚೇಂಗಿ, ಅಪ್ಪಂಡ ಕಾಲತ್‌ಂಜೇ ವಿರೋಧ. ಚುಬ್ಬಜ್ಜಂಡ ನಲ್ಲ ಜಾಗ, ನಲ್ಲ ಭೂಮಿನೆಲ್ಲ ಬಲ್‌ಚಂಡ್, ಕೂಟಿಯಂಡ್, ಚುಬ್ಬಜ್ಜನ ಪಾಳಾಕ್‌ನವುವೇ ಮಿಟ್ಟುರ ಸಂತಾನ.

ಪಟ್ಟುರ ತೆಳ್‌ಂಗ್‌ನ ಮೇಲ್, ದುಂಬ್‌ನ ಮೂಡ್ ಕಾಂಬಕಾನ ಪಿಂಞ ಮಂದುನ ಕಂಡಲ್ಲಿ ಎಲ್ಲ ತಕ್ಕ ಪರಿಚಿಡುವೊ, ಕಷ್ಟ ಸುಖ ಕೇಪೊ, ಮನೆಕ್ ಕಾಕ್‌ವೊ..... ಎಲ್ಲ ಸುರುವಾಚಿ. ಮಂದು ಮಾತ್ರ ಅಚ್ಚಕಚ್ಚಿಕೆ. ಮಿಟ್ಟುರ ಮನೆ ಕಡ್‌ಂದಿತ್ ಮಂದುರಲ್ಲಿಕ್ ಒರ್ ಮೈಲ್ ಉಂಡ್.

ಮಿಟ್ಟು ತೋಕ್ ಬೋಟೆ, ಅದ್ ಇದ್‌ಂದ್ ನೆವನ ಎಡ್‌ತಂಡ್, ಮಂದುರ ಮನೆರಾಲೆಲ್ಲ ಸುತ್ತುವದ್ ಜೋರಾಚಿ. ಪಟ್ಟುನ ಕಂಡಲ್ಲಿ ತಕ್ಕ ಪರಿಚಿಡುವೊ, ನಾಡ ಪೋರಿಯ ಈಲೆ ಬಾತಾ? ಮಂದು ಮನೆಲುಂಡಾ? ಇನ್ನನೆ ಒಂದಾಂಗೊಂದ್ ಸಂಮ್ಮಂಧ ಇಲ್ಲತಾನ ಕೇಪೊ. ಉಳ್ಳದಂಡ್ ಚಾಕಾಳಿ ಪೋರಿಯ ಕೊಟ್ಟ್‌ಬುಟ್ಟಿತ್ ಪೋಪ್‌ಲೇಂದ್ ಪಟ್ಟುಕೇ ಗೊತ್ತುಂಡ್.

ಮಿಟ್ಟುರ, ಬಾಲ್ ನೇತಿತ್ ಚಾಣ ಇಡುವಕಯ್ಯತ ಕೊಟ್ಟ್‌ರೊಳಲೇ ಉಳ್ಳ ಪೋರಿಯಳ ಪಟ್ಟುರಯಿಂಗಡ ಮುಟ್ಟತ್‌ಲ್ ತೇಡುವದ್ ದಿನ ದಿನಕ್ ಜಾಸ್ತಿ ಆಚಿ.

ಮಿಟ್ಟು ಹೈಸ್ಕೂಲ್‌ಲಿಪ್ಪಕ ಮೂಡಿಯಳ ಕೆಣಕಿತ್ ಸಸ್ಪೆಂಡ್ ಆನದ್, ಸೈಕಲ್ ಕಟ್ಟಿತ್ ಪೋಲೀಸ್ ಚೌಟ್ ತಿಂದದ್. . . ಎಲ್ಲ ಪಟ್ಟುಕ್ ಗೊತ್ತಿಲ್ಲತದಲ್ಲ.

ಒನ್ನಾಂದ್ ಗುಡ್ಡತ್‌ರ ಬರಿಲ್ ಮಿಟ್ಟು ಹಾಜರ್! ಅದ್ ಇದ್‌ಂದ್ ಎಂತೆಲ್ಲೋ ಕೇಟಿತ್ ಪಟ್ಟುರ ಬೋಳೆಲುಳ್ಳ ಚೈನ್‌ನ ತೊಟ್ಟಿತ್, ಮೂಂದ್ ಬೆರತಾಲೇ ತೇಟಿತ್ ಮೂಂದ್ ಬೆರ ಎದೆಕೂ ಪಡ್‌ಚಿಟ್ಟುಂಡ್ - "ಇದ್ ದುಂಬ ಚಾಯುಂಡ್ ಪಟ್ಟು, ಪುದಿಯದಾಂ"ದ್ ಕೇಟುಂಡ್, ಒರ್ ಚೂಳ ತೆಳಿ ತೆಳಾಚತ್.

ಎಲ್ಲಿಂಜತೋ ಪಟ್ಟುಕ್ ಚೆಡಿ...! ಲಟೀಂದ್ ದವಡೆಕ್ ಬೆಚ್ಚಿತ್, "ನಾಯಿ, ಪೊರ್ಕಿ. ನೀಡ ಪೋರಿ ತೇಡಲ್ ನಾಕ್ ಗೊತ್ತಿಲ್ಲಿಯಾ"ಂದ್ ಮೂಡ್‌ಕ್ ತುಪ್ಪಿತ್ ಓಡಿರ್‌ತ್.

"ನಾಯಿ ನೀನೇ, ನೀಕ್ ಮಾಪಳೆಯೇ ಸೆರಿ. ನೀಡ ಬದ್‌ಕ್ ಗೊತ್ತಿಲ್ಲಿಯಾ....? ನಾಯಿ ದಾರ್‌ಂದ್ ಕಾಟಿರತೆ ಪೋಚೇಂಗಿ ನಾಡ ಪೆದ ಮಿಟ್ಟು ಅಲ್ಲ" ಎಣ್ಣೆತ್ ಪೋಚಿ.

ಹಸನ್‌ರ ಲೋಡ್ ವಾರಕ್ ದಂಡ್ ಕುರಿ ಕೇರಳಕ್ ಪೋಪಯಿಂಜತ್. ಲಾಭತ್‌ರ ಪಾಲ್ ಮಂದುಕ್ ಅಬುವೇ ಸೆರಿಕ್ ಕೊಡ್‌ತ್‌ರುವಯಿಂಜತ್. ಹಸನೇ ಲೋಡ್ ಪೊಜ್ಜಕಲೂ, ಕಾಸ್‌ಕಾಸ್‌ರ ಲೆಕ್ಕ ಅಬುಕ್ ಕೊಡ್‌ಕಂಡಿಂಜತ್. ಕೇರಳ ಕಳಿಯೆಲ್ಲ ಅಬುರ ಕೂಡ ನಡ್‌ಪಯಿಂಜ್‌ಲೆ.

ಪಟ್ಟು ಸಮುದ್ರ ಕಂಡವಳಲ್ಲ. ಒಮ್ಮೆ ನೋಟುಂಡೂಂದುಳ್ಳ ಆಸೆನ ಅಣ್ಣಂಗ್ ಎಣ್ಣೆಚಿ. ಅನ್ನನೇ ತಂಗಿನ ಕೂಟಿಯುಂಡ್ ತಲಚೇರಿ, ಕಣ್ಣೂರ್, ಕ್ಯಾಲಿಕಟ್ ಎಲ್ಲ ಸುತ್ತಾಚಿಟ್ಟಿತ್, ಚೆನ್ನ ಬಟ್ಟೆ ಬರಿ, ಒರ್‌ಪೌನ್ ಎಲ್ಲ ಎಡ್‌ತಂಡ್ ಮೂಂದ್ ದಿನ ಕಯಿಂಜಿತ್ ಬಾತ್.

ಅಣ್ಣ, ತಂಗೆ ಕೇರಳ ಸುತ್ತಿತ್ ಬಂದಾಂಡ ಪಿತ್ಯಾಂದ್, ಮಂದುನ ಕಂಡವು ಎಲ್ಲ - "ಎನ್ನೆರೇ ಮಂದು ಪಟ್ಟು ಮೂಡಿ ಮನೆಲಿಲ್ಲಿಯಾ"ಂದ್ ಒರ್ ಪ್ರಶ್ನಾರ್ಥಕ ಆಯಿತ್ ಕೇಪಯಿಂಜತ್. ಉಂಡ್‌ಂದ್ ಎಣ್ಣೆಕ ಒರ್ ತರಾ ತೆಳಿಚಂಡ್ "ಅಲ್ಲಾ ಕೇರಳತ್‌ಂಜ ಬಾತಾಂದ್ ಕೇಟ"ಂದೆಣ್ಣೆತ್ ಜಾಗ ಖಾಲಿ ಮಾಡುವಯಿಂಜತ್ ಪಾಪತ ಮಂದುಕ್ ಇದ್ ಒಂದೂ ಅರ್ಥ ಆಪಯಿಂಜ್‌ಲೆ.

ನಾಲ್ ದಿನತ್‌ಲ್ ಮಂದು, ಊರ್‌ಲ್ ಚೆಂಬಿ ತಾಯಿರಲ್ಲಿಕ್ ಬಾಳೆಕೊಲೆ ಕೇಪಕ್



ಪೋನಲ್ಲಿ, ಅದೂ ಇದೂ ತಕ್ಕಾಚಿ. ಚೆಂಬಿ ತಾಯಿ - "ಪಟ್ಟು ಮೂಡಿರ ಮಂಗಲ ಉಂಡಾ ಮೋನೆ"ಂದ್ ಕೇಟತ್.

"ನಲ್ಲತಂದ್ ಬಾತೇಂಗಿ ಈಯಾಂಡ್ ಕಯಿಕಂಡು ತಾಯಿ" ಎಣ್ಣಾಚಿ. ಅಕ್ಕ ತಾಯಿ - "ಮೂಡಿನ ಅಲೆ ಈಲೆ ಪೊರಮೆ ಅಯಿಕತೆ ಮೋನೆ, ಜನ ಎನ್ನೇಂಗಿ ಪಳಮೆ ಮಾಡು"ಂದೆಣ್ಣೆತ್ ಬೋರೆಲ್ಲಿಕೋ ತಕ್ಕಾ ಪೋಚಿ.

ಒನ್ನಾಂದ್ ಮಿಟ್ಟು ದಂಡ್ ಈರ್ಚೆಕಾರಡ ಕೂಡ ಪೋಪಕ ಹಸನ್ ಮಾಪಳ ಕಂಡತ್. ತಕ್ಕಾ ಪರಂದಿತ್ ಮಿಟ್ಟು ಅವಂಡ ತೋಟತ್‌ಲ್ ಬೂಟಿ ಮರ ಈರ್ ಚಿಟ್ಟಿತ್ ಪಾರ್ ಮಾಡ್‌ನ ಸಂಗತಿ ಎಣ್ಣಾಚಿ. ಹಸನ್‌ರ ಕೇರಳ ಮಂಡೆ ಓಡ್‌ಚಿ. "ನಾಕ್ ಚೆನ್ನ ಪಾರ್ ತಪ್ಪಿರಾ"ಂದ್ ಕೇಟತ್. ಮಿಟ್ಟು ಮರ ಈರ್‌ಚಿಟ್ಟಿಯದೇ ಮಾರುವಕ್. ಕಾಲರ ಮೊರಡ್‌ಕೇ ಗಿರಾಕಿ ಕ್‌ಟ್ಪನದ್ ಅವಂಡ ಭಾಗ್ಯ.

ತಕ್ಕೂ-ಬಾಕೂ ತೇಂದತ್, ಟ್ರಿಯಲ್ ನೋಟನಾಂದ್ ಲಾರಿರ ಅಡಿಲ್ ನಾಲ್ ಪಾರ್ ಬೆಚ್ಚಿತ್, ಮೇಲೆ ಪುಳಿ, ಬಾಳೆ ಲೋಡ್ ಮಾಡ್‌ಚಿ. ಮಂದುಕೂ, ಬಾವ ಅಬುಕೂ ಗೊತ್ತಾಗತನ್ನೆಕೆ ಎಚ್ಚರತ್‌ಲ್ ಕೇರಳಕ್ ಸಾಗ್‌ಚಿಟ್ಟಿತ್. ಒಂದಾಂಗ್ ನಾಲ್ ಲಾಭ ಬಾತ್. ಇದ್ ಹಸನ್‌ರ ಸ್ವಂತ ಲಾಭ ಆಚಿ.

"ಚೋದರ್‌ಂಜ ನಾಯಿ ಚೆಟ್ಟುವ ನಕ್ಕೂಂದೆಣ್ಣಿಟ್ಟು ಹಸನ್ ತಾನೊಬ್ಬನೇ ಲಾರಿಲ್ ಪೋಪಕ್ಕೆಲ್ಲ ಬೂಟಿಪಾರ್ ಸಾಗ್‌ಚಿಟ್ಟಿತ್ ತೇತತ್. ಬೂಟಿ ತೀಂದದು ಬೊಳ್ಳಾಂದಿ, ಬೇಂಗೆ ಇನ್ನನೆ ಮಂದುಕರಿಯತೆ ಹಸನ್ ಪಿಂಞ ಮಿಟ್ಟುರ ವ್ಯವಹಾರ ನಡ್‌ಂದಂಡೇ ಇಂಜತ್.

ಮಿಟ್ಟು ಊರ್, ನಾಡ್‌ಲೆಲ್ಲ ಪಟ್ಟುರ ಮೇಲೆ ಪುಲಿಯಾಟ್ ಇಡುವಕ್ ಸುರುಮಾಡ್‌ಚಿ. ತಾನೇ ಕಣ್ಣಲ್ ಕಂಡನ್ನೆಕೆ ಕತೆ ಕೆಟ್ಟಿತ್ ಎಣ್ಣುವಯಿಂಜತ್. ಪಟ್ಟು ಹಸನ್‌ರ ಕೂಡ ಕೇರಳಕ್ ಪೋಯಿತ್ ನಾಲಂಜಿ ದಿನ ಇಂಜಿತ್ ಬಪ್ಪಾಂದ್, ಬಟ್ಟೆಲ್ ಪೋಪವನೋ ತಡ್‌ತಿತ್ ಎಣ್ಣಾಲೇಂಗಿ ಮಿಟ್ಟುಕ್ ವರ್‌ಕ್ ಬಪ್ಪಯಿಂಜಾಲೆ. ಚೆಡಿ ತೇಪಕ್ ಅದೋರೇ ಬಟ್ಟೆ ಇಂಜ ಅವಂಗ್.

ಊರ್‌ರ ಪೊಣ್ಣಾಳಡ ಬಾಯಿಕ್ ಇಂತ ಸುದ್ದಿ ಕ್‌ಟ್ಪನ ಪಿಂಞ ಕೇಕಂಡುವಾ? ಬೇಲ್‌ಲೂ, ಬಾಣೆಲೂ, ತೋಟತ್‌ಲೂ, ಕೂವತ್‌ಲೂ ಇದೇ ತಕ್ಕಾ. ದಾಡ ಸುದ್ದಿ ಕೂ ಪೋಗತೆ, ತಾಂಡ ಮನೆರ ಒಕ್ಕಾಮೆಲೇ ಮುಳಿತಿಂಜ ಪಟ್ಟುಕಾಡ್, ಅವಡ ಅಪ್ಪ, ಅವ್ವ,

ಅಣ್ಣಂಗಾಡ್ ಊರ್ ಕೇರಿಲ್ ನಡ್ಂದಂಡಿಂಜ ಪಳಮೆ ಒಂದೂ ಕೆಮಿಕ್ ಬುದ್ಲೆ.

ಪಟ್ಟುರ ಚಾಯಿ, ಗುಣ ಮನ ಕೊದಾಚಿತ್ ಬಂದ ಎಚ್ಚಕೋ ತಂದ್ ಪಾದಿ ಬಟ್ಟಲೇ ತೆರಾಚಿ ಪೋಯಿತಿಂಜತ್. ಕೊಕ್ಕರೆ ಮಕ್ಕರೆ, ಕೊಣ್ಚಿ ನೊಣಚಿಯಕೆಲ್ಲ ತಂದ್ ಬಂದಿತ್ ಮಂಗಲಾಚಿ. ಪಟ್ಟುರ ಮಾತ್ರ ನಲ್ಲಗುಣೇ ಅವಡ ಬಾಳ್ಕ್ ಮುಳ್ಳಾಯಿತ್ ಕುತ್ನಕಲೂ, ಮನೆಕಾರಕ್ ಮಾತ್ರ ಒಂದೂ ಗೊತ್ತಿಂಜಾಲೆ.

"ಈಯಾಂಡ್ ಪಟ್ಟುರ ಮಂಗಲ ಕಯಿಚ್ಚರನ. ಮಾಲ್ಮಟಿ ಮಾಡಿ ಬೆಚ್ಚಕ ನಲ್ಲದ್. ಮೂಡ್ಕ್ ಬಂದಿತ್ ಮುಟ್ಟಿ ಪೋಪಕ ಓಡಿ ಕಳಿಪದ್ ಸೆರಿಯಲ್ಲ"ಂದ್ ಚೀತೆ ಹಟ ಪುಡ್ಚತ್. ಅಪ್ಪ, ಅವ್ವಂಡ ತಕ್ಕಕ್ ಬೆಲ್ಕ ಪರಿವಯಿಂಜಾಲೆ.

ಒಮ್ಮೆ ಮಾಲ್ಕುಳ್ಳಚ್ಚಕ್ ಪಣ ಸೆರಿ ಕೂಟುವದ್ ಮಕ್ಕ ಕಳಿಯಲ್ಲ. ಅದ್ಂಗ್ ಎಲ್ಲಾರು ಒತ್ತಿತ್ ಭೂಮಿನ ಪಿ.ಎಲ್.ಡಿ. ಬ್ಯಾಂಕ್ಕ್ ಎಳಾದಿತ್, ಸಾಲ ಎಡ್ಪಕ್ ತೀರ್ಮಾನ ಮಾಡ್ಚಿ. ಚುಬ್ಬಿಜ್ಜ ನಡ್ಪಕಯ್ಯತಂವೊ, ಮೋಂವೊನ ಕೂಟಿಯಂಡ್ ಕಾಂಬಯಿನ ಕಂಡಿತ್, ಎಡೆ ಇಡಂಡಿಯಯಿಂಗಕ್ ಎಡೆ ಇಟ್ಟತ್; ಮೇಚಿ ಇಡಂಡಿಯಲ್ಲಿ ಮೇಚಿ ಇಟ್ಟತ್. ಚೆನ್ನ ದಿನತ್ಲೆ ಲೋನ್ ಸ್ಯಾಂಕ್ಷನ್ ಆಚಿ.

ಕ್ಯಾಲಿಕಟ್ಲಾ ಪೌನ್ಕ್ ಚೆನ್ನ ಕಮ್ಮಿ ರೇಟ್. ನಲ್ಲ ಮಾಟತ್ ರೆಡಿಮೇಡ್ ಮಾಲೂ ಕಾಟುವಾಂದ್ ಅರ್ಜತ್. ಮಂದೂ, ಪಟ್ಟುರ ದಂಡಾಳು ಪೋಯಿತ್ ಎಡ್ತ ಬಪ್ಪನೆಕೆ ತೀರ್ಮಾನಕ್ ಬಾತ್. ಎನ್ನನೆಯು ಲಾರಿ ಪೋಪದಿಪ್ಪ. ಅದ್ಲೇ ಪೋನಕ ಖರ್ಚಿ ಕಮ್ಮಿ ಆಪ. ಹಸನ್ ಕಾ ತಟ್ಟಿಂಗಳೆಲ್ಲ ಪರಿಚಯ ಉಂಡ್. ಮಂದುಕೂ ಒಮ್ಮೆ ಇಮ್ಮೆ ಪೋಯಿತ್ ಅಭ್ಯಾಸ ಇಂಜತ್.

ಮನೆಲಿಂಜ ಚಿಲ್ಲರೆ-ಪಲ್ಲರೆ ಪಣವೆಲ್ಲ ಕೂಟ್ಚಿ. ಅಬುರ ಕೈಯಿಂಜಿ ಚೆನ್ನ ಕೈಮರ್ಚಂಡತ್. ಬ್ಯಾಂಕ್ ಲೋನ್ರ ಒಂದನೇ ಕಂತ್ ಪದ್ನಂಜಾಯಿರ ಕಾಟ್ಚಿ. ಎಲ್ಲಾಂಗೂಡಿ ಇರ್ವತ್ತಂಜಾಯಿರ ಮಾಡಿತ್ ಕ್ಯಾಲಿಕಟ್ಲಾ ಪೊರಡುವ ಏರ್ಪಾಡಾಚಿ.

"ನಿಂಗ ಅಣ್ಣನೂ ತಂಗೆಯೂ ಲಾರಿಲ್ ಬಾರಿ. ನಾನ್ ಲಾರಿ ಲೋಡಾನ ಪಿಂಞ ಡೈರೆಕ್ಟ್ ಬಸ್ಸಲ್ ಪೋಪಿ; ಲಾರಿ ಎತ್ತುವಕ ನಾನ್ ಕಾತಂಡಿಪ್ಪಿ"ಂದ್ ಹಸನ್ ಎಣ್ಣೆನ ಐಡಿಯ ಎಲ್ಲಾಕು ಸೆರಿ ತೋಂದ್ಚಿ.

ಅಂದ್ ಬ್ಯಾಂಕ್ ತೊಂದದು, ಕ್ಯಾಶ್ ಎಡ್ತಂಡ್ ಅಣ್ಣನೂ, ತಂಗೆಯೂ ಮಡಿಕೇರಿಲ್ ಲಾರಿನ ಕಾತಂಡಿಂಜತ್. ಲಾರಿಲೋಡ್ ಆನ ಪಿಂಞ ಹಸನ್ ಡೈರೆಕ್ಟ್

ಬಸ್ಸುಪತ್ತಿತ್ ಪೋಚಿ. ಮಂದೂ, ಪಟ್ಟು ಮಡಿಕೇರಿಕ್ ಲಾರಿ ಬಪ್ಪಕ ಲಾರಿ ಪತ್ತಚಿ. ಡ್ರೈವರ್ ಜೋಸೆಫ್ ತಾಂಡ ಅನುಭವತ್ ಅನಾನೆಲ್ಲ ರಸಕೂಟಿ ಎಣ್ಣೆಯಂಡ್ ಪೋಚಿ.

ಕೇರಳಗಡಿರ ಫಾರೆಸ್ಪ್ ಗೇಟ್ ಉಳ್ಳ ಫಾರೆಸ್ಪರ್ ಗಾರ್ಡ್ ಇಯಂಗ ಮಾಡುವ ಅನ್ಯಾಯ, ಫಾರೆಸ್ಪರ್ ಬೇಲಯ್ಯಂಡ ದಾಲತ್, ಗಾರ್ಡಡ ದುಡ್ಡ್ ಮಾಡುವ ಕೇಣಿ, ಲಾರಿಕಾರಕ್ ಕೊಡಪ ಹಿಂಸೆ, ಒರ್ ದಿನತರ ಅಯಿಂಡ ಅಂದಾಜ್ ಸಂಪಾದನೆ . . . . ಇದನೆಲ್ಲ ತಾಂಡ ಅನುಭವತನ ಜೋಸೆಫ್ ಎಣ್ಣೆಚಿ.

\* \* \*

ಮೋಂವನೂ, ಮೋವಳೂ ಮಾಲ್ ಮಾಡ್ಚಿಡುವಕ್ ಪೋನ ಪಿಂಞ ಚೀತೆ ಅದೇ ಊರಲಿಂಜ ಮೊಮ್ಮಂಡಲ್ಲಿಕ್ ಪೋಯಿತ್, ಪಟ್ಟುಕೋರ್ ತಂದ್ ನೋಟ್‌ಂದ್ ಮೊಳಿಯಿಟ್ಟತ್. "ಪಟ್ಟುರ ವಿಷಯತ್ ಊರ್‌ಲ್ ಕೆಮಿ ಬೆಪ್ಪಕಯ್ಯುಲೆ ಮೊಮ್ಮ. ಮಾಪಳೆ ಅವಳ ಬೆಚ್ಚಂಡಿತಲೊ. ಮಿಟ್ಟುಕ್‌ಣ್ಣ ಕಣ್ಣಾರೆ ಕಂಡಿತಲೊ. ಕೇರಳಕ್ಕೂ ಮಾಪಳೆರ ಕೂಡ ಪೋಯಿತ್ ಇಂಜಿತ್ ಬಪ್ಪಲೋ, ಎನ್ನನೆ ತಂದ್ ಮಾಡಡ್"ಂದ್ ಮೂಡ್‌ಕ್ ಪೊಜ್ಜನೆಕೆ ಪರಂದದ್ ಕೇಟಿತ್ ಚೀತೆ ಬಂದಿತ್ ಮೊರ್‌ಟಂಡ್ ಊಣ್‌ವರ್‌ಕ್ ಬುಟ್ಟಿತ್ ಬುದ್ದಂಡತ್.

\* \* \*

ಫಾರೆಸ್ಪರ್ ಬೇಲಯ್ಯ ಹರಿಜನ ಕೋಟಿತ್‌ರ ರಿಜರ್ವೇಶನ್‌ಲ್ ಚಾಕ್ರಿಕ್ ಕೂಡ್‌ನಂವೊ. ಇಟ್ಟು ಒರ್ ಸುರಾಲ್, ಒರ್ ಸರ್ತ್ ಉತ್ತನಕ ಬೋರೆ ಬಟ್ಟೆ ಇಲ್ಲತೆ ಚಾಕ್ರಿಕ್ ಕೂಡ್‌ಚಿ. ಬೋರೀ ಅಂಜಿ ಕಾಲತ್‌ಲ್ ಬೆಂಗಳೂರ್‌ಲ್ ದಂಡ್ ಬಂಗ್ಗಿ, ದಂಡ್ ಸೈಟ್ ಮಾಡ್‌ನಂತ ಭೂಪ! ಅವಂಡ ದಿನತರ ಕಳ್ಳಕುಡಿ ಊಟಕ್ ಮುನ್ನೂರ್ ಉರ್‌ಪಿಯ ಪೋರೆ! ತಿಂಗಳ್ ಕ್ಕಟ್ಟುವ ಸಂಬಳ ಆಯಿರತ ಮುನ್ನೂರ್ ಚಿಲ್ಲರೆ! ಮರ ವ್ಯಾಪಾರಿಯಡ ಕಾರೆಲ್ಲ ಅವಂಡದೇ. ಎಲ್ಲಿಕ್ ಪೋಂಡಿಕೂ ಕಾರೇ.

ಅವಂಗ್ ರಿಜರ್ವೇಶನ್ ಕೋಟಿತ್‌ಲ್ ಒರ್ ವಾರಕ್ ಬಯ್ಯ ರೇಂಜರಾಯಿತ್ ಪ್ರಮೋಶನ್ ಬಂದಿತಿಂಜತ್. ಇಂಞಿ ದಂಡ್ ವಾರತ್‌ಲ್ ರೇಂಜರಾಯಿತ್ ಸೀಟ್‌ಲ್ ಅಳಪಕುಳ್ಳಂವೊ; ಮೈಕ್‌ಟೈಸನ್‌ರಂತ ಕರ್ತ ಮೇಲ್, ಚೋರೆ ಕಣ್ಣ್, ಕರ್ಲ್ ತಲಮಿ, ಪೋಲೀಸ್ ಮೀಸೆ ಕಾಂಬಕ ಮೇಲ್ ನೆಟ್ಟು, ಮಾರಿಕ್ ಬುಟ್ಟು ಪೋರಿ. ಕೊಡಗ್ ಗೇಟ್‌ಲ್ ಅವನೋರ್ ಬೊರ್‌ಳಿ.

ಪ್ರಮೋಶನ್ ಬಂದಂದಂಜಿ ಅವನ ತಡ್‌ಪವನೇ ಇಲ್ಲೆ. ನಿಂಗ, ಪೋಯಿ, ಬಾರೀಂದ್ ಕಾಕಿಯಂಡಿಂಜಯಿನ ಪೋರೆ, ಬಾರೆಂದ್ ಸುರು ಮಾಡ್‌ಚಿ. ಪೋಲೀಸ್ ರೈಟ್, ಮಾದಯ್ಯ - ಮಾದಯ್ಯ ನೀನ್‌ಂದ್ ಕಾಕ್‌ಚಿ. ಪಂಡಂಜೇ ಇಂಜ ಪೊಣ್ಣಾಳ್ ಪಿರಾಂದ್ ಇಕ್ಕ ಬಟ್ಟೆಲ್ ಪೋಪಯಿನ ಕಾಕುವಲ್ಲಿಕ್ ಎತ್ತ್‌ಚಿ. ಗೇಟ್‌ಲ್ ಅವನೋರ್ ಪಾಳೆಗಾರನೆ.

ಗೇಟ್‌ರ ಪೋಲೀಸ್‌ಕಾರಕೆಲ್ಲ ಬೇಲಯ್ಯಂಡ ಒರ್ ದಿನತರ ಆದಾಯ ಒರ್ ತಿಂಗತರ ಆಪಾಲೆ. ಕೊಡಿಯತ ಅಧಿಕಾರಿಯಳೆಲ್ಲ ಅಯಿಂಡಯಿಂಡ ವಾರ ಅಳಂದ್‌ರಾವಂಜಿ ಎಣ್ಣೆನನ್ನೆಕೆ ಬೆಚ್ಚಿ ತಿಂಜತ್. ಗಾರ್ಡ್‌ಕ್ ಮಾತ್ರ ನಾಯಿ ಕುಟ್ಟಿಕ್ ಒಟ್ಟಿಚೂರ್ ಚಾಡ್‌ನನಕೆ ಪತ್ತೋ ಇರ್‌ವದೋ ಚಾಡಿತ್ ಅಡ್‌ಕಿ ಬೆಚ್ಚಿತಿಂಜತ್.

ಒನ್ನಾಂದ್ ಒರ್ ಮರಲೋಡ್ ಪುಡ್‌ಚಂಡ್ ನಲ್ಲ ದೀಪಾವಳಿ ಬಂಪರ್ ಪೊಜ್ಜತ್! ಪೋಲೀಸ್‌ಕಾರಕ್, ಗಾರ್ಡ್, ವಾಚರ್‌ಕೆಲ್ಲ ಒರ್ ಪಾರ್ಟಿ ಬೆಚ್ಚತ್, ಕುಡ್‌ಚಿತ್ ಉಟ್ಟಿ ಮಂಡೆಕೆತ್ತ್‌ಚಿ. ಎಂತ ಪರ್‌ದಂಡುಳ್ಳೊಂದ್ ಗೇನ ಇಲ್ಲತಾಚಿ. ಸರಕಾರತರ ರಿಜರ್ವೇಶನ್ ಪಾಲಿಸಿನೇ ಬಜ್ಜತ್." ಬೋರೀ ಚಾಕ್ರಿಕ್, ಮನೆ ಸೈಟ್‌ಕ್, ಪ್ರಮೋಶನ್‌ಕ್, ರಿಜರ್ವೇಶನ್ ಬೆಚ್ಚಮಾತ್ರಕ್ ಸಮಾಜತ್‌ಲ್ ಮೇಲ್ ಕೇಳ್ ವರ್ಗ ಪೋಪದುಂಡಾ? ಬೋರೆ ಚಾತಿರ ಮಂಗಲ ಕಯಿಪಕುಳ್ಳ ಮೂಡಿಯಳೋ ಇರುವದ್ ಪರ್ಸೆಂಟ್ ದಲಿತಂಗಕ್ ರಿಜರ್ವೇಶನ್ ಬೆಕ್ಕಂಡು! ಅಕ್ಕೇ 'ಏಲ್ಲಾ ಒಂದಾಪ'ಂದ್ ನೇಶನಲ್ ಪಾಲಿಸಿಕೇ ಓರ್ ಎಮೆಂಡ್‌ಮೆಂಟ್‌ರ ಸೂಚನೆ ಇಟ್ಟತ್. ಕೂಟ್‌ಕ್ ಕೊಡವತಿಯಡ ವಿಚಾರೋ ಚೆನ್ನ ಪಾಳ್ ತಕ್ಕ ಪರ್‌ಂದತ್.

ಮೂಂದ್ ಮೂಡಿಯಡ ಅಪ್ಪ ಮಾದಯ್ಯ ರೈಟ್‌ಕ್ ಈ ತಕ್ಕ ಕೇಟಿತ್ ಕೈಕಾಲ್ ಬೋರ್‌ತತ್. ಚಂವುಂತೆರಕಿಯಂಡ್ ಜಾಗ ಕಾಲಿ ಮಾಡ್‌ಚಿ ಗಾರ್ಡ್. ಚಾಮಿಯೂ, ಮಾದಯ್ಯ ರೈಟ್, ದಂಡಾಳೆ ಕೊಡವ ಇಂಜಿಯೆ ಒಬ್ಬಂಡ ಮೂಡ್ ಒಬ್ಬ ನೋಟಿತ್ ಮುಂಡತಾಚಿ.

ಅಂದ್ ಮಜ್ಜಣ ಗಾರ್ಡ್ ಚಾಮಿನ ಕಾಕಿತ್ "ನೋಟ್‌ರೆ ಚಾಮಿ, MYZ 2022ನಂಬರ್‌ರ ಲಾರಿ ಬಂದಂಡುಂಡ್‌ಂದ್ ಮೆಸೇಜ್ ಉಂಡ್. ಅದಲ್ ಒರ್ ಕಣ್ಣನೂ, ಮೂಡಿಯೂ ಉಂಡ್‌ಲೊ. ಎಚ್ಚರ ಬೆಚ್ಚಿ. ಗೇಟ್ ಲಾಕ್ ಮಾಡಿತ್ ನನ್ನ ಕಾಕಂಡು" ದೆಣ್ಣೆಚಿ.

ಮೂಂದ್ ಗಂಟೆಕ್ ಲಾರಿ ಬಾತ್. ನಂಬರ್ MYZ 2022! ಕ್ಲಾ ಅಳತಿತ್, ಮೂಡಿ ತಾಂಗಿತ್ ವರಿಯಂಡುಂಡ್. ಲಾರಿ ನಿಪ್ಪದು ಡ್ರೈವರ್ ಜೋಸೆಫ್ ಮಾಮೂಲಾರ ನೂರಾಂಡ ನೋಟ್ ಪುಡ್ಚಂಡ್ ಕೈನೋಟ್ಚಿ. ಚಾಮಿ ಗೇಟ್ ತೊರ್ಕತೆ ಬೇಲಯ್ಯನ ಕಾಕ್ಚಿ.

ಬೇಲಯ್ಯ ಬಂದವನೇ "ಎಲ್ಲ ಇಳಿರಿ, ಲಾರಿ ಚೆಕ್ ಮಾಡಂಡು"ಂದೆಣ್ಣೆಚಿ. ಜೋಸೆಫ್ ನೂರಾಂಡ ಇಂಞೋರ್ ನೋಟ್ ಬಲ್ಚಿ ಕಾಟ್ಚಿ. ಕೇಟವತೆ ಇಳಿ ಎಣ್ಣೆಚಿ!

ಮಂದು -" ಚೆಕ್ ಮಾಡುವಕೆಂತ ಉಳ್ಳೊ, ಬೊರೀ ಬಾಳೆಕೊಲೆ. ಪೊರ್ಮೇ ಕಾಂಬಲ್ಲ" ಎಣ್ಣೆಚಿ. ಬೇಲಯ್ಯ ಮಂದುರ ಕೈಪುಡ್ಚಿ ಬಲ್ಚಿತ್, ಅಂವೊ ಪುಟ್ಟಿ ಬೊಳಂದ ಪರಿಸರತ್ ಬಳಸುವಯಿಂಜ ಎಲ್ಲಾ ಶಬ್ದತನೋ ಒಂದಾಂಡ ಬಯ್ಯ ಒಂದ್ ಕೊಯೆತಿತ್ ಇಳಿಂಂದ್ ಪಟ್ಟುನೋ ಬಲ್ಚಿತ್‌ಟ್ಟಿತ್!

ತೆಡ್ ಬಡ್ಚಯಿನನ್ನೆಕೆ ಬಾಯಿಲ್ ತಕ್ಕ ಉತ್ತತೆ, ಅಣ್ಣನೂ ತಂಗೆಯೂ ನಿಂದತ್. ಲಾರಿನ ಚೆಕ್ ಮಾಡುವಕ್ ವಾಚರ್, ಗಾರ್ಡೆಲ್ಲ ಪತ್ತಿತ್ ಬಾಳೆಕೊಲೆನ ಚೆನ್ನ ನೇತಿತ್, ಬರ್ಜಿರಂತ ಇರ್ಂಬಾರ ಮೊನೆ ಉಳ್ಳ ಉದ್ದ ಕೋಲ್‌ಲ್ ತಾರಾಮಾರ ಕುತ್ಚಿ. "ಇದರಿ ಇಲ್ಲಿ ಉಂಡ್ ಇಲ್ಲಿ"ಂದ್ ಎಣ್ಣೆತ್ ಎಟ್ಪಪತ್ ಬಾಳೆಕೊಲೆ ಎಡ್ಕಣೆ ದಂಡ್ ಗೋಣಿಚೀಲತರ್ ಕೆಟ್ಪ ಕಂಡತ್. ಪೊರ್ಮೆ ಬಲ್ಚಿತ್ ಚಾಕ್‌ಲ್ ಚೀಲ ಚೆನ್ನ ಒಡ್ತತ್. "ಚಾಂದ್ ಕುಟ್ಟೆಯ ಉಂಡ್ ಸರ್"ಂದ್ ಲಾರಿ ಕೊಡಿಂಜೇ ಎಣ್ಣೆಚಿ.

"ಸೂ.... ಮೋನೆ, ಮೂಡಿನ ಪಾರ್ಚಿಟ್ಟುಂಡ್ ಪೋಪಾಂಡ ಕೂಟ್‌ಕ್ ಚಾಂದ್ ಮರ ಸಾಗ್ಚಿಟ್ಟುಂಡುಳ್ಳಿಯೆ? ಕೆಣ್‌ಂಜಕ ಇವಳ ಬುಟ್ಟುಕೊಡ್ತಿತ್ ಬಚಾವು ಆಲೂಂದಾ ಈ ನಾಟಕ?"ಂದ್ ಕೇಟಂಡ್ ಮಂದುರ ದವಡೆಕ್ ನಾಲಂಜಿ ಬೆಚ್ಚಿತ್, ಒರ್ ಚವುಟ್ ಚೊಟ್ಚಿ.

ಅಕ್ಕಣೆ ಪಟ್ಟು "ಅಣ್ಣಯ್ಯ"ಂದ್ ಜೋರ್ ಕೂತ್ ಕೊಡ್ತಂಡ್, ಮಂದುನ ತಬ್ಬಿ ಪುಡ್ಚಂಡತ್. "ಧೂ ಸೂ... ಂಡೆ, ಅಣ್ಣಯ್ಯಂದ್ ನಾಟಕ ಬೋರೆ ಕಳಿಪಿಯಾ....? ಇಲ್ಲಿ ಕೆಣಿಂಜಿ ಬೂವಕ ಅಣ್ಣಯ್ಯ ನಾಯಿರ್‌ತಾ? ಇದೆಲ್ಲ ನಾಡ ಕೂಡ ಪತ್ತುಲೆ"ಂದೆಣ್ಣೆತ್ ಅವಡ ಜಡೆ ಪುಡ್ಚಿ ಬಲ್ಚಿತ್ ಚಾಡ್ಚಿ.

ಚಾಂದ್ ಮರತಾರ ದಂಡ್ ಗೋಣಿಕೆಟ್ಲ್ಯಾ ಎನ್ನನೆ ಬಾತ್‌ಂದ್ ಗಾಬರಿಲ್ ಮಂದು ಜೋಸೆಫ್‌ನ ಕಾಕ್‌ಚಿ. ಕ್ಲೀನರ್ ಕುಟ್ಟಿನ ತೇಡ್‌ಚಿ. ಇಚ್ಚಕ್ ಸಂಗತಿ ನಡ್‌ಕಣೆ ಡ್ರೈವರ್, ಕ್ಲೀನರ್ ಏಲೆ ಓಡಿತ್ ಕಾಡ್ ಬುದ್ಧತೋ ಎನ್ನೋ! ಗಾರ್ಡ್ ಆಲೆ-ಈಲೆ ತೇಡಿತ್, ಅಂವೊ ತಪ್ಪಾಚಿಟ್ಟಂಡ್ ಓಡಿರ್‌ತ್‌ಂದ್ ಎಣ್ಣ್‌ಚಿ. ಜೋಸೆಫ್‌ಕ್ ಇದೆಲ್ಲ ಎಚ್ಚಕೋ ಕಾಲತಾರ ಅನುಭವ! ಅಂವೊ ಕೆಣಿಯುವಾ....?

ಕೂಡೆನ್ನೆ ತಾರಾಮಾರ ಮಂದುಕ್ ಪೊಜ್ಜಿತ್, ಅಯಿಂಗ ಪೊಟ್ಟಿ ಬೇಗ್‌ನೆಲ್ಲ, ಉಳ್‌ಪಿತ್ ಕ್ವಾಟರ್ಸ್‌ಕ್ ಈತಂಡ್ ಪೋಚಿ. ಪೊಟ್ಟಿರೊಳ್‌ಲ್ ಇರ್‌ವತ್ತಂಜಾಯಿರತಾರ ಕೆಟ್ವನ ಎಡ್‌ತ್ ಪುಡ್‌ಚಂಡ್, ಕೆಮಿಲ್ ಕೇಪಕ್ಯಾಗತ ತಕ್ಕೆಲ್ಲ ಪರಂದತ್, ಬೇಲಯ್ಯ.

ಅಣ್ಣಯ್ಯಂದ್ ಕಾಕಿ ಮೊರಟಂಡ್ ಮೂಲೆಲಳ್‌ತವ ಕೊಡವತಿ ಮೂಡೀಂದ್ ಚಾಮಿಕ್ ಗೊತ್ತಾಚಿ. ಕಣ್ಣ ಅವಡ ಅಣ್ಣನೇ ಆಯಿತಿಕ್ಕೊಂದ್ ತೋಂದ್‌ಚಿ. ಅಯಿಂಗಡ ಗೋಳ್ ಕಂಡಿತ್, ನಲ್ಲ ಕುಲತಲ್ ಪುಟ್ವನ ಚಾಮಿಕ್ ದುಂಬ ಕರಕರೆ ಆಚಿ. ಆಚೇಂಗಿ ಎನ್ನ ಮಾಡಲು ಚಾಂದ್ ಮರತಾರ ಕೇಸ್-ಪೆರ್ತ್ ಕರಿಣ! ಬೇಲಯ್ಯಂಡ ಕೈಕ್ ಕೆಣೆಂಜವು ನರಿರ ಮಾಳಿಕ್ ನುಗ್ಗನ ಎತ್ತನನ್ನೆಕೆ.

ಪಟ್ಟುರ ಚಾಯಿನೋ, ಇರ್‌ವತ್ತಂಜಾಯಿರತಾರ ಕೆಟ್ವನೋ ಕಂಡಿತ್ ಬೇಲಯ್ಯಂಡ ಮಂಡೆ ನೂಲ್ ತುಂಡ್‌ನ ಗಾಳಿಪಟತಾರನ್ನೆಕೆ ಏಲೇಲೆಯೋ ಓಡ್‌ಚಿ; ಕೇಸ್ ಮಾಡ್‌ಚೇಂಗಿ ದಾಕ್ ಲಾಭ? ಡಿಪಾರ್ಟ್‌ಮೆಂಟ್‌ಲೆನ್ನೋ ಓರ್ ಪೆದ ಬಕ್ಕು! ರೇಂಜರ್ ಪ್ರಮೋಶನ್ ಇಕ್ಕಲೇ ಕೊಟ್ಟಿತಾಯಿತ್. ಅಣ್ಣನೋ, ತಂಗನೋ ರೂಮ್‌ಲ್ ಕೂಟಿತ್ ಪಡಿ ಇಟ್ಟಿತ್, ಪೊರಮೆ ಬಂದಿತ್ ಚಾಮಿಕೆಣ್ಣ್‌ಚಿ - ನೋಟ್‌ರೇ, ಅವ ನೀಡ ಜಾತಿಕರ್‌ತಿಯೆ. ಇಕ್ಕ ಕೇಸ್ ಬುಕ್ಕ್ ಮಾಡ್‌ನಕ ಇವು ದಂಡಾಳು ಕಸ್ಪಡಿಕ್ ಪೋಂಡು. ಕೇಸ್‌ಲ್ ಗೆಲ್ಲಂಡಿಕೆ ಪೆರ್ತ್ ಕಷ್ಟ ಉಂಡ್. ನಾಲಂಜಿ ಕಾಲ ಕೋರ್ಟ್ ಸುತ್ತಂಡು. ಕಮ್ಮಿ ಪತ್ತ್ ನಾಪದಾಯಿರ ಖರ್ಚಿ, ಲಾರಿ ಪೋನನ್ನೆಕೇ! ಲಾರಿಕ್ ಅವನೂ ಪಾರ್ಟ್‌ನರ್‌ಲೊ! ಅವನೇ ಒತ್ತಂಡಿತ್. ಲಾರಿ ರಿಜಿಸ್ಟ್ರೇಷನ್ ಮಾಪಳೆರ ಪೆದತ್‌ಲ್. ಅಂವೊ ಇದ್‌ಲ್ ಬಚಾವು ಅಂಡಿಕೆ ಓರೇ ಬಟ್ಟೆ, ಓರಾಯಿರ ಖರ್ಚಿಕೆಡ್‌ತಂಡ್, ಇಂದ್ ಬೈಟ್ ಏದೇಂಗಿ ಲಾರಿ ಪತ್ತಿತ್ ಮನೆಕ್ ಪೋಡ್. ಮೂಡಿನ ಇರ್‌ಲ್ ಅಯಿಪದ್ ಅಪಾಯ, ಅವ ನಾಡಲ್ಲಿ ಇಂಜಿತ್ ಪೊಲಾಕತಾರ ಬಸ್‌ಲ್ ಪೋಡ್. ನಾನ್ ಅದ್‌ಂಗುಳ್ಳ ಏರ್ಪಾಡ್ ಮಾಡುವಿ. ನೀನೂ, ವಾಚರ್ಸ್‌ನೂ ನಾಲಾಯಿರ ಎಡ್‌ತೋಳಿ. ಕೊಡಿಲುಳ್ಳಯಿನ ನಾನ್ ನೋಟಿಯವಿ. ಈ ಸಂಗತಿನ ಆ ಕಣ್ಣಿಂಗ್ ಎಣ್ಣ್. ಅವಂಡ

ನಲ್ಲಾಂಗೇ ನಾನೆಣ್ಣುವೊ. ಇದ್ದಾಂಗ್ ಒತ್ತಲೇಂಗಿ ಅಣ್ಣನೂ ತಂಗೆಯೂ ಜೈಲ್ ಕಂಬಿಲೆಕ್ಕ ಮಾಡಡ್"ಂದ್ ಚಾಮಿಕೆಣ್ಣೊಚಿ.

"ಅಕ್ಕ ಲಾರಿನೋ, ಚಾಂದ್ ಮರತನೋ ಎನ್ನೊ ಮಾಡುವೊ ಸರ್"ಂದ್ ಚಾಮಿ ಕೇಟತ್.

"ಅದ್‌ಂಗೆಲ್ಲ ಬಟ್ಟೆ ಉಂಡಾರೇ; ಲಾರಿ ತಡ್‌ಪಕ ಡೈವರ್, ಕ್ಲೀನರ್ ಪಾರಿ ಬುದ್ದಿತ್ ಓಡಿರ್‌ತ್, ಓಡ್‌ನ ಪಿಂಞ ಸಂಶಯತ್‌ಲ್ ಚೆಕ್ ಮಾಡುವಕ ಚಾಂದ್ ಕ್‌ಟ್ಚಿ. ಬೋರೆ ದಾರೂ ಇಂಜ್‌ಲೇಂದ್ ಕೇಸ್ ಬುಕ್ಕ ಮಾಡಲು. ಮಾಪಳೆರ ಮೇಲೆ ಕೇಸಾಪ"ಂದ್ ಎಣ್ಣೊಚಿ.

ಚಾಮಿ ಒಳಕ್ ಪೋಯಿತ್ ಮಂದುನ ಕೊಡವ ತಕ್ಕ ಪರಿಚಿಟ್ಟತ್. ಅದ್ ಕೇಪಕ ಪಟ್ಟುರ ಮೊರೆ ತಡ್‌ಪಕಯ್ಯತಾಚಿ. ಇಂತಲ್ಲಿ ಓರ್ ಕೊಡವ ತಕ್ಕ ಪರಿಚಿಟ್ಟದ್ ದ್ರೌಪದಿರ ಕಷ್ಟಕ್ ಕೃಷ್ಣ ಬಂದನ್ನಕೆ ಆಚಿ. ನಡ್‌ಂದ ಸಂಗತಿನೆಲ್ಲ ಅಣ್ಣನೂ, ತಂಗೆಯೂ ದುಃಖ್‌ಚಿಟ್ ಮೊರಾಟಂಡೇ ಎಣ್ಣೊಚಿ. ಆಚೇಂಗಿ ಚಾಂದ್‌ಮರ ಎನ್ನನೆ ಬಾತ್‌ಂದ್ ಮಾತ್ರ ಗೊತ್ತಿಲ್ಲೇಂದ್ ಎಲ್ಲಾ ದೇವಡ ಆಣೆ ಇಟ್ಟಿತೆಣ್ಣೊಚಿ. ಬ್ಯಾಂಕ್‌ಂಜಿ ಲೋನ್ ಎಡ್‌ತ ಕಾಗದ ಪತ್ರತನೋ ಕಾಟಿತ್ ಮಾಲ್‌ಮಾಡ್‌ಚಿಡುವಕ್ ಪೊರಾಟ ಸಂಗತಿನೋ ಎಣ್ಣೊಚಿ.

ಚಾಮಿಕ್ ಪೆರ್ತ್ ಕರಕರೆ ಆಚಿ. ಮಂದುನ ಪೊಜ್ಜದೂ, ಪಟ್ಟುರ ಜುಟ್ಟ್ ಪುಡ್‌ಚಿ ಬಲ್‌ಚಿ ಚಾಡ್‌ನದು, ಕೆಟ್ಟ ಕೆಟ್ಟ ತಕ್ಕ ಪರ್‌ಂದದೂ, ಇಕ್ಕ ಅಯಿಂಡ ಪರಿಸ್ಥಿತಿಯೂ ಕೊಡವನಾನ ಚಾಮಿಕ್ ಬಲ್ಯ ನೊಂಬಲತ್‌ರ ಸಂಗತಿ ಆಚಿ. ಆಚೇಂಗಿ ಎನ್ನೊ ಮಾಡುವಕಯ್ಯ ತುಪ್ಪಿಂಗೂಡ ಎರ್ಕಿಂಗೂಡ!

ಬೇಲಯ್ಯ ಎಣ್ಣೊನ ಅಭಿಪ್ರಾಯತ್‌ನ ವಿವರೋಡೆ ಮಂದುಕ್ ಎಣ್ಣೊಚಿ. ಮಂದೂ, ಪಟ್ಟೂ, ಚೆನ್ನ ಗೇನ ಮಾಡ್‌ಚಿ. ದುಡ್ಡ್ ಪೋಚೇಂಗಿ ಪೋಡ್. ಮಾನ ಬಚಾವಾಚೇಂಗಿ ಮದೀಂದ್ ಬೇಲಯ್ಯಂಡ ಶರತ್‌ಕ್ ಒತ್ತತ್. ಆಚೇಂಗಿ ಎಂತ ಕಷ್ಟ, ಅಪಾಯ ಬಂದಕಲೂ ಬರಡ್, ನಂಗ ಬೋರೆ ಬೋರೆ ಪೋಪ್‌ಲೆ. ಇಂದ್ ಬೈಟ್ ಲಾರಿಕಾರಕ್ ದಮ್ಮಯ್ಯ ದಕ್ಕಯ್ಯ ಎಣ್ಣಿತೇಂಗಿ ದಂಡಾಳೂ ಒಕ್ಕಚೇ ಪೋಕಾಂದೆಣ್ಣೊಚಿ.

ಚಾಮಿ ಈ ಸಂಗತಿ ಎಣ್ಣುವದು ಬೇಲಯ್ಯಂಗ್ ಸರಿ ಕಂಡ್‌ಲೆ. ಪತ್ತಿರುವದಾಯಿರ ಬಲ್ಯದಲ್ಲ ಸರಿಯಾನ ಓರ್ ಲಾರಿ ಕೆಣ್‌ಂಜಕ ಆ ದುಡ್ಡಾಪ. ಆಚೇಂಗಿ ಕೈಕ್ ಕ್‌ಟ್ಚಿನ

ಈ ಗೊಂಬೆನ ಬುಟ್ಟಕ ಇಚ್ಚಕ್ ಮಂಡೆ ಓಡ್‌ಚಿಟ್ಟಿತ್ ಎನ್ನ ಪ್ರಯೋಜನ?

"ಏದ್‌ಂಗೂ ನೋಟನರೆ ಚಾಮಿ, ಬೈಟಾಡ್. ಅವಂಗ್ ನನ್ನ ಅಚ್ಚಕ್ ನಂಬಿಕೆ ಇಲ್ಲೇಂಗಿ ಚವುಟಿ ನಡು ಪೊಳ್‌ಚಿತ್ ಎನ್ನ ಮಾಡಂಡೂಂದ್ ನಾಕ್ ಗೊತ್ತುಂಡ್. ನಾಡ ಕೂಡ ಅವಂಡ ಕಳಿಯೆಲ್ಲ ಪತ್ತ! ನೀನಿಕ್ಕ ಬೆರಿಯ ಏದೇಂಗಿ ಲಾರಿಪತ್ತಿತ್ ಪೇಟೆಕ್ ಪೋಯಿತ್, ದಂಡ್ ಕುಪ್ಪಿ ಬೀರ್, ಒರ್ ಕುಪ್ಪಿ ಬ್ರಾಂಡಿ, ಚೆನ್ನ ಚೌ ಚೌ ಪಿಂಞ ದಂಡ್ ಕೇಜಿರಚ್ಚಕ್ ಕೋಳಿಯರ್ಚಿ ಎಡ್‌ತಂಡ್ ಬೆರಿಯ ಬಾ. ಕರಿ ವಾಚರ್‌ನಗುಂಡ್ ಮಾಡ್‌ಚಿಡನ. ಲಾರಿ ಪುಡ್‌ಚ ಸಂಗತಿ ಮಾತ್ರ ಒಬ್ಬಂಗ್ ಬಾಯಿಬುಡತೆ ಅರೆಗಂಟೆಲ್ ಬಂದಿತೆತ್ತಂಡು" ಎಣ್ಣೆತ್ ಮುನ್ನೂರ್ ಉರ್‌ಪಿಯ ಕೊಡ್‌ತಿತ್ - "ನೀಕ್ ಬೋಂಡಿಯ ಅರೆ ಕುಪ್ಪಿ ಇದ್‌ಲೇ ಎಡ್‌ತ" ಎಣ್ಣೆ ಚಿ.

ಚಾಮಿ ಓರ್ ಲಾರಿ ಪತ್‌ಚಿ. ಗೇಟ್‌ಲ್ ಆನ ಸಂಗತಿನೇ ಗೇನ ಮಾಡ್‌ಚಿ. ಒರ್ ಚೆರಿಯ ವಯಸ್ಸಾರ ಕೊಡವತಿ ಮೂಡಿಕ್ ಇಂತ ಕಷ್ಟ ಬಾತಲ್ಲ. ನಾನೋರ್ ಕೊಡವನಾಯಿತ್ ಈ ಪಾಪತನ ಕಣ್ಣಲ್ ನೋಟುಂಡಲ್ಲಾ. ನಾಕೆನ್ನೋ ದಂಡೋ ಮೂಂದೋ ಆಯಿರ ಕ್‌ಟ್ಟು. ಆಚೇಂಗಿ ನಾಕದ್ ದಕ್ಕುವಾ? ಕಾವೇರಮ್ಮೆ ಇಗ್ಗ್‌ತಪ್ಪ ನನ್ನ ಮೆಚ್ಚುವಾ? ನಾನೆನ್ನ ಮಾಡುವಕಯ್ಯು? ನಾಳೆ ಮತ್ಯಾಂದ್ ರೇಂಜರ್‌ರ ಕುರ್‌ಚಿಲಳ್‌ಪಂವೊ ಬೇಲಯ್ಯು. ಅವಂಗ್ ತಿರಿತ್ ನಿಂದಕ ನಾಡದೆಂತ ನಡ್‌ಕು? ಬಲ್ಯ ಆಫೀಸರ್ ಎಲ್ಲ ಅವಂಡ ಕೈರ ಮಡಕ್‌ಲುಂಡಲ್ಲಾ....?

ಲಾರಿ ಪೇಟೆಕೆತ್ತಚಿ. ಪೋಲೀಸ್ ರೈಟ್ ಮಾಡಯ್ಯನ ಕಂಡತ್. "ಎನ್ನಾರೆ ಚಾಮಿ, ಗೇಟ್ ಬುಟ್ಟಿತ್ ಬಂದಿಯೆ? ನೀ ಎನ್ನಂಗ್ ಬಂದಿಯೇಂದ್ ನಾಕ್ ಗೊತ್ತಿಲ್ಲೆಯಾ? ನೀಡ ಬೇಲಂಗ್ ಬ್ರಾಂಡಿ ಸ್ಪಾಕ್ ಇಲ್ಲೇಂದ್ ಕಾಂಬ. ಏಳ್, ನಾಕೋರ್ ದಂಡ್ ಪೆಗ್ಗ್ ಬೂಕ್‌ಚಿಡ್"ಂದ್ ಪೋಲೀಸ್ ಗತ್ತಲೇ ನಿಪ್ಪುಕ್ಕೊಂದ್ ತಟ್ವಚಿ.

ಓರಂದ್ ಪೆಗ್ಗ್ ದಂಡಾಳು ಇಟ್ಟಿತ್. ಇಕ್ಕ ಚಾಮಿಕ್ ಚೆನ್ನ ಧೈರ್ಯ ಬಾತ್. ನಡ್‌ಂದ ಸಂಗತಿನ, ಮಿಂಞಕ್ ನಡ್‌ಪಕುಳ್ಳ ಸಂಗತಿನ ಮೆಲ್ಲೆ ಎಣ್ಣೆತ್ - "ನಂಗ ಕೊಡವಳಾಯಿತ್ ಕೊಡವತಿ ಮೂಡಿಕಾಯಂಡುಳ್ಳ ಈ ಅನ್ಯಾಯತನ ಎನ್ನನೆ ಕಣ್ಣಲ್ ನೋಟುವೊ"ಂದ್ ಕೇಟಿತ್.

ಕಯಿಂಜವಾರ ಬೇಲಯ್ಯಂಡ ಪಾರ್ಟಿ ಕಯಿಂಜಲ್ಲಂಜಿ ಮಾಡಯ್ಯ ರೈಟ್‌ಕ್ ಅವಂಡ ಮೀದ ಭಾರೀ ಚೆಡಿ ಇಂಜತ್. ಚಾಮಿನಗುಂಡ್ ಎಲ್ಲ ವಿವರ ಅರ್‌ಂಜಂಡ್ -



"ನೀನ್ ಬೆರಿಯ ಪೋ. ಬಾಕಿ ಏರ್ಪಾಡ್ ನಾನ್ ಮಾಡುವಿ"ಂದೆಣ್ಣೆತ್ ಕೂಟ್ಕ್ ದಂಡ್ ಪೆಗ್ಗ್ ಎರ್ಕಚಿ.

ಚಾಮಿ ಎಣ್ಣೆನ್ ನೇರತ್ ಗೇಟ್ಕೆತ್ತಿತ್ ಕೋಳಿಕರಿ, ಚಪಾತಿ ಮಾಡುವ ಏರ್ಪಾಡ್ಕ್ಳಂಜತ್. ಬೇಲಯ್ಯಂಗ್ ಬ್ರಾಂಡಿ ಕೊಡ್ಪಕ್ ಪೋಪಕ ಪಟ್ಟು ಮಾತ್ರ, ಮೊರ್ಟಂಡ್ ಬೆಂಚ್ಲ ಅಳತಿತ್. ಮಂದುನ ಕಂಡ್ಲೆ. ಎನ್ನ ಸಂಗತಿ ಆಚೀಂದ್ ಅದೇ ಗೇನತ್ಲಾಚಿ.

ಎಟ್ತ್ ಗಂಟೆಕ್ ಕೋಳಿ ಕರಿ, ಚಪಾತಿ ಎಲ್ಲ ಎಡ್ತ ಪೋಯಿತ್ ಬೇಲಯ್ಯಂಡ ಮೇಜಿಲ್ ಬೆಪ್ಪಚಿಟ್ಟಿತ್ ಬಾತ್. ಮಾದಯ್ಯ ರೈಟ್, ಎನ್ನೇಂಗಿ ಪರಿಹಾರ ಕಂಡ್ ಪುಡಿಕ್ವಾ, ಅಲ್ಲ, ಕಾಟ್ವನ ಕಳ್ಳ, ಎರಕಿರೊಂಜಿ ಈ ಸಂಗತಿನ ಅಲ್ಲಿಕೇ ಮರಂದ್‌ರಾತಾಂದ್ ಗೇನ ಮಾಡಿಯಂಡ್ ಗೇಟ್ಲೇ ನಿಂದಂಡಿಂಜತ್.

ಓರ್ ಜೀಪ್‌ರ ಲೈಟ್ ಕಂಡತ್. ದಾರೆಂಗಿ ಅಧಿಕಾರಿಯ ಚೆಕ್ಕಿಂಗ್ ಬಾತಾ, ಅಲ್ಲ ಕೇರಳಕ್ ಪೋಪ ಜೀಪಾಂದ್ ಗೇನ ಮಾಡಿಯಂಡ್ ನಿಂದತ್. ಜೀಪ್‌ಂಜಿ ಡಿ.ಎಫ್.ಓ., ಎಸ್.ಐ. ದಂಡ್ ಪೋಲೀಸ್‌ಕಾರ ದಡಬಡಾಂದ್ ಇಳಂಜತ್. ಬಾರಾಂದ್ ಚಾಮಿನೋ ಕೂಟಿಯಂಡ್ ಬೇಲಯ್ಯಂಡ ಕ್ವಾಟರ್ಸ್‌ಕ್ ನುಗ್ಗಚಿ.

"ದಮ್ಮಯ್ಯ, ದುಡ್ಡೆಲ್ಲ ಎಡ್ತೋಳಿ, ನನ್ನ ಬುಟ್ಟರಿ, ಅಣ್ಣಯ್ಯಂಡ ಕೂಡ ಪೋಪಿ. ಅಣ್ಣಯ್ಯನ ಒಮ್ಮ ಕಾಟಿ ತಾರೀಂದ್ ಗೊಳೊಂದ್ ಮೊರ್ಟದ್ ಕೇಟತ್. ಎಸ್.ಐ. ಪಡಿಕ್ ಚವುಟ್ಚಿ. ಪಡಿ ತೊರಂದತ್. ಬೇಲಯ್ಯ ಗಾಡ್‌ಗಾಡ್ ಜೊರ್‌ಪಯಿಂಜತ್. ನೇರೆ ನಿಪ್ಪಕೂ ಕಯ್ಯುವಯಿಂಜ್ಲೆ. ಕುಪ್ಪಿ, ಕರಿ, ಚಪಾತಿ ಎಲ್ಲ ಮೇಜಿಲೇ ಇಂಜತ್. ಪಟ್ಟು ಪೊಡಿಯ ಸೆರಿ ಮಾಡಿಯಂಡ್ ಓಡಿ ಬಂದ್ ಎಸ್.ಐ.ರ ಕಾಲ್‌ಕ್ ಬುದ್ಧಿತ್ ದಂಡ್ ಕಾಲ್‌ನೋ ಮುರ್ಕ ಪುಡಿಚಂಡ್ ಮೊರ್ಟತ್.

ಡಿ.ಎಫ್.ಓ. ಬೇಲಯ್ಯಂಡ ದವಡೆಕ್ ಒಂದ್ ಬುಟ್ಟತ್. ತೆರ್ಚಿ ಬುದ್ಧಿಲ್ವಿಕ್ ನಾಲ್ ಚವುಟೊ ಬುದ್ಧತ್. ಮಂದುನ ಕಾಟುವಕೆಣ್ಣೆಚಿ. ಚೆನ್ನ ದೂರತರ ಒರ್ ಫಾರೆಸ್ಟ್ ಶೆಡ್ಡಲ್ ಮಂದುನ ಕೂಟಿತ್ ಬೀಗ ಇಟ್ಟಿತಿಂಜತ್.

ಡಿ.ಎಫ್.ಓ. ಲಾರಿನ ಚೆಕ್ ಮಾಡ್ಚಿ. ಚಾಂದ್ ಉಳ್ಳದ್ ನೇರೆ. ಅದ್ ಎನ್ನನೆ ನೀಕ್ ಸಂಶಯ ಬಾತ್‌ಂದ್ ಬೇಲಯ್ಯನ ಕೇಟತ್. ಮಜ್ಜಣ ಪನ್ನೆರಂಡ್ ಗಂಟೆಕ್ ಮಾಡಿಕೇರಿಂಜಿ ನಂ. 73ಲಿಂಜಿ ದಾರೋ ಪೋನ್ ಮಾಡಿತ್ ಈ ಎಲ್ಲ ವಿವರ

ಅರಿಚಿಟ್ಟಿತಿಂಜತ್‌ಂದ್ ಬೇಲಯ್ಯ ವರದಿ ಒಪ್ಪಾಚಿಟ್ಟಿತ್. ಬ್ಯಾಂಕ್‌ರ ಸೀಲ್ ಪೊಳಿಕತ ಇರುವತ್ತಂಜಾಯಿರ ಉರ್‌ಪಿಯತ್‌ರ ಕೆಟ್ಟ್ ಬೇಲಯ್ಯಂಡ ಕೈಂಜ ವಶ ಪಡ್‌ತಿಯಂಡ್, ಎಲ್ಲಾರ್‌ನೊ ಕೂಟಿಯಂಡ್ ವೀರಾಜಪೇಟೆಕ್ ಪೋಚಿ. ಚಾಮಿನ ಪೊಲಾಕ ಮಡಿಕೇರಿಕ್ ಬಪ್ಪಕೆಣ್ಣ್ ಚಿ.

ಪತ್ತಾಗಂಟೆಕ್ ಓರ್ ಇನ್ಸ್‌ಪೆಕ್ಟರೂ, ಡಿ.ಎಫ್.ಓ ನೂ 73 ನಂಬರ್ ಪೋನ್ ದಾಡಾಂದ್ ತೇಡಿ ಪುಡಿಪಕ್ ಪೋಚಿ. ಇನ್ನಾಂದ್ ದಾರ್ ಮಾಕುಟ್ಟು ಗೇಟ್‌ಕ್ ಪೋನ್ ಮಾಡಿಯೇಂದ್ ಕೇಟತ್. ಪೋನ್ ಮಾಡ್‌ನಂವೊ ಬೋರೆ ದಾರೂ ಅಲ್ಲ, ಪಟ್ಟುನಗುಂಡ್ ತುಪ್ಪಾಚಿಟ್ಟಿಂಡ ಮಿಟ್ಟು!

ಇದೊಂಡಡೆಲ್ ಲಾರಿ ಪಾರಿತ್ ಓಡ್‌ನ ಜೋಸೆಫ್ ಇರ್‌ಕಿರ್‌ಲ್ ಪೋಯಿತ್, ಹಸನ್‌ಕ್ ವರ್ತಮಾನ ಕೊಡ್‌ತಿತಿಂಜತ್. ಲಾರಿ ಬಾವಂಡ ಪೆದತ್‌ಲ್ ಉಳ್ಳದ್. ಎನ್ನೇಂಗಿ ದುಡ್ಡ್‌ಟ್ಟಿತ್ ಕೇಸ್‌ನ ಸೆರಿಕೂಟನಾಂದ್ ಹಸನ್ ಪಿತ್ತಾಂದ್ ಅಬುರಲ್ಲಿಕ್ ಪೊರಾಟತ್.

ಇಕ್ಕ ಚಾಂದ್ ಕುಟ್ಟೆರ ವಿಚಾರಣೆ ಮಾಡುವಕ್ ಎಲ್ಲಾರು ಅಬುನ ಕಾಕ್‌ಚಿಟ್ಟಿತ್. ಏದ್ ಪಾಪಕರ್ಮ ಅರಿಯತ ಅಬುಕ್ ದಂಡ್ ತಲ್ಲೂಕ್‌ಟ್ಟಿಚಿ. ಅಬುರ ಪಕ್ಕ ಹಸನ್ ಬಂದೆತ್ತ್‌ಚಿ. ಅಬುನ ಬಚಾವು ಮಾಡುವಕ್ ಹಸನ್ ಸತ್ಯ ಎಣ್ಣೆತೆ ಬೋರೆ ಬಟ್ಟೇ ಇಲ್ಲತಾಚಿ. ಮಿಟ್ಟು ಮಾಡ್‌ನ ಕತೆನ ಎಣ್ಣೆ ಚಿ. ಮಿಟ್ಟುರ ಮನೆಕ್ ಪೋಲೀಸ್‌ಕಾರಳ ದಂಡ್ ಫಾರೆಸ್ಪೆಕಾರಳ ಅಯೆಚತ್. ಮನೆ ಜಪ್ತಿ ಮಾಡುವಕ ಅದೇ ಚಾಂದ್ ಮರತ್‌ರ ಕುಟ್ಟೆ ದುಂಬ್‌ಚಿಟ್ಟಿ ಓರೇ ತರತ್‌ರ ಓರ್ ಗೋಣಿಚೇಲ ದುಂಬ ಚಾಂದ್ ಕ್‌ಟ್ಟಿಚಿ. ಪೊರ್‌ಪ್‌ಚಿಟ್ಟಿಂಡ್ ಬಾತ್.

ಕೋರ್ಟ್ ಡ್ಯೂಟಿಲ್ ಬಂದ ಮಾದಯ್ಯ ರೈಟ್, ಹಾಜರಾಯಿತ್, ಚಾಮಿ ಅವಂಗ್ ಅರಿಚಿಟ್ಟಾನೋ, ಅಂವೊ ಕೂಡೆನ್ನೆ ಡಿ.ಎಫ್.ಓ. ೦ಗ್ ಪೋನ್ ಮಾಡ್ ನಾನೋ, ಬೇಲಯ್ಯಂಡ ಮಾಮೂಲ್ ಚಾಲಾನೋ ವರದಿ ಮಾಡ್‌ಚಿ.

ಚಾಮಿ ದುಡ್ಡ್‌ಕ್ ಆಸೆಪಡತೆ, ಮೇಲಧಿಕಾರಿನೇ ಪುಡ್‌ಪ್‌ಚಿಟ್ಟಿದ್ ಡಿ.ಎಫ್.ಓ. ೦ ಗ್ ಕುಶಿಯಾಯಿತ್ "ನಿನ್ನಂತವು ಬೋಂಡುರೆ, ನೀಕ್ ರಿವಾರ್ಡ್ ತಪ್ಪಿ. ಪ್ರಮೋಶನ್‌ಕ್ ಶಿಫಾರಸ್ ಮಾಡುವೀ"ಂದ್ ಎಣ್ಣೆ ಚಿ.

ನಿರಪರಾಧಿ ಪಟ್ಟುನ ನೋಟಿತ್ "ಸಾರಿ ಮೋಳೆ, ನೀಕ್ ಇಂತ ಕಷ್ಟ ನಾಡ ಡಿಪಾರ್ಟ್‌ಮೆಂಟ್‌ಕಾರನಗುಂಡ್ ಬಂದಾಂಗ್ ನಾನೇ ಮಾಘ್ ಕೇಟವಿ. ನೀಕ್

ಮಂಗಲಾಯಿತಾ"ಂದ್ ಕೇಟತ್. ಇಲ್ಲೇಂದ್ ಪಟ್ಟು ಮಂಡೆ ಆಟ್‌ಚಿ.

ಡಿ.ಎಫ್.ಓ. ಚಾಮಿನ ನೋಟಿತ್ "ಎನ್ನಾರೆ ಚಾಮಿ, ನೀನೇ ಇವಳ ಮಂಗಲ ಕಯಿಚವಕೆನ್ನಾ.....? ಒಪ್ಪಿಗೇಯಾ"ಂದ್ ಕೇಟತ್. ಚೆರಿಯ ಓರ್ ಇೞಾಣ ಕಾಟಿಯಂಡ್ ಒರ್ ಒಪ್ಪಿಗೇರ ತೆಳಿ ತೆಳಿಚತ್ ಚಾಮಿ!

ಮಿಟ್ಟು, ಬೇಲಯ್ಯ ಪಿಂಞ ಹಸನಾರ ಕೈಕ್ ಕೋಳ ಇಟ್ಟಿತ್ ಉಪ್ಪಕ್ ಬರತ ಮಂಡಂಗಳ ಬಡ್‌ಚನ್ನಕೆ ಈತಂಡೇ ಪೋಚಿ.

ಚಾಮಿನ ಮಂದು ಮನೆಕ್ ಕೂಟಿಯಂಡ್ ಪೋಚಿ. ಪಟ್ಟುರ ಬೋಜತ್‌ನ ತೆರಮೆ ಕಣ್ಣಲೇ ನೋಟಿಯಂಡ್ ಚಾಮಿ ನಡಂದತ್.

ಚೀತೆಕ್ ನಡಂದ ಸಂಗತಿನೆಲ್ಲ ಚಾಮಿಯೇ ಒಪ್ಪಿಚಿಟ್ಟಿತ್. ಡಿ.ಎಫ್.ಓ. ಆಖೀರಿಕ್ ಎಣ್ಣಾನಾನೋ ತೆಳೆಚಂಡೇ ಎಣ್ಣಾಚಿ. "ನಂಬಾನವಂಗ್ ದೇವ ಇಂಬ್ ಕಾಟತಿರ; ಮದ್‌ಚವನ ದೇವ ಚದಿಕತಿರ"ಂದ್ ಚುಬ್ಬಜ್ಜ ಊಜಳೆ ಬುಟ್ಟಿತ್ "ಇದೆಲ್ಲ ದೆಸೆಫಲ"ಂದೆಣ್ಣಾಚಿ. ಪಟ್ಟು ಕಾಲ್‌ಮೂಡ್ ಕತ್ತಿತ್, ಪೊಡಿಯ ಮಾತಿತ್ ಕಾಫಿ-ತಿಂಡಿ ಎಡ್‌ತ ಬಂದಿತ್ ಬೆಪ್ಪಕ ಉದ್‌ಚಿ ಬಂದ ನೆಲಚಿನೆನ್ನಕೆ ಎಲಂಗುವಯಿಂಜತ್.

- \* - \* - \* -

## ತಾಟಕತನ ತಲೆ ಪತ್ತೆ !

ಕಂಬ- ಮನೆಕಾರ, ನೆರೆಮನೆ, ಊರ್‌ಕೇರಿ, ನಾಡ್ ಅಲ್ಲತೆ ಮನೆಕ್ ಬಂದ ಬೆಂದ್‌ಕಡ ಕೈಯಿಂಜಿಯೂ ಪಣ ಸಾಲ ಕೇಟಂಡದಲ್ಲತೆ, ಬಯ್ಯಕ್ ಕೊಡ್‌ತವನಲ್ಲ. ತೂಟ್‌ಗಳಕ್ ಪೋನ ಚಾವು ಬಯ್ಯಕ್ ಬಂದದ್ ಇಪ್ಪಕೂ ಮದಿ. ಆಚೀಂಗಿ ನಂಗಡ ಕಂಬಂಡ ಕೈಯಿಂಜಿ ಪಣ ಬಯ್ಯಕ್ ಬಂದದ್ ಇಲ್ಲೆ!

ರಾಮಾಯಣತ್ ಚಾಡಿ ಪರಂದಾನಗುಂಡ್ ಮಂತರೆಕ್ ಚಾಡಿಲ್ ಒಂದನೇ ಸ್ಥಾನ ಕ್ಕಟ್ಟಿಪೋಚಿ. ಆ ರೆಕಾರ್ಡ್ ಪೋಳಚಿತ್ ಈ ಕಾಲತ್ ಒಂದನೇ ಸ್ಥಾನ ಪಡಂದವನೇ ಈ ಕಂಬ! ತಾಟಕತನತ್ ದಾಕೂ ಬೋಂಡಿಕೆ ತರಬೇತಿ ಕೊಡ್‌ಕು. ಪಾರ್ಟಿಂಜಿ ಪಾರ್ಟಿಕ್ ಪಾರುವಾಲ್ ಕಾಂಗ್ರೆಸ್‌ಕಾರ ಬಯ್ಯಲಿರಂಡು!

ಪಣೆಕೆಜ್ಜ ಅಳುವ ಎಂದೂ ಸೆರಿಕ್ ಸಂಬಳ ಎಡತಂಡ್ ಪೋನದಿಲ್ಲೆ. ಪೋಲೀಸ್‌ಕಾರಕ್, ರೆವಿನ್ಯೂ ಇನ್ಸ್‌ಪೆಕ್ಟರ್‌ಕ್ ಅಲ್ಲತೆ ಪಟೇಲಂಗ್ ಮಾತ್ರ ಧಾರಾಳ ಮೇಚಿ ಇಟ್ಟವಯಿಂಜತ್.

ವಡಿಯಂಡ ಪೋಣ್ಲ್ ಬುಡ್‌ತವೊ, ವಡಿಯ ಬುಟ್ಟಿ ಪೋಣ್ಲ್‌ನ ತಾಂಡ ಮನೆಲಾಕಿಯಂಡ್ ತಾಂಗ್ ಪೋಣ್ಲ್‌ಕ್ ಪೋಣ್ಲ್ ಆಚಿ, ಬೊಳೆಪಣೆ, ಅಯಿಪಣೆಕ್ ಸಂಬಳ ಇಲ್ಲತ ಆಳೂ ಆಚಿ; ಅಲ್ಲಿಂಜಿ ಅವಡ ದುಡ್ಡ್ ಖರ್ಚಿಲೇ ಅವಕೋರ್ ತೋಯನೋ, ತೊಂಡನೋ ತೊರತ್ ಬುಟ್ಟಕ ಅಲ್ಲಿಕ್ ಅವಡ ಅಧ್ಯಾಯತೇಂದತ್. ಇದ್ ಕಂಬಂಡ ಕಿತಾಪತಿ !

ಕಂಬಂಡ ನೊಣೆ ತಕ್ಕ್‌ಕ್ ಮರ್‌ಳಾಗತವು ದಾರೂ ಇಲ್ಲೆ. ಏಂವ ಏದೇ ಒರ್ ಕಾರ್ಬಾರ್‌ಕೆಣ್ಣಡ್ ಕಂಬಂಡ ಬಾಯಿಲ್ ಕಯ್ಯಾಂದ್ ಬಂದದಿಲ್ಲೆ!

ಊರ್‌ರ, ನೆರೆ ಊರ್‌ರ, ಪೋಣ್ಲ್‌ರ ತಾಮನೆರ ಊರ್‌ರ ಇನ್ನನೆ ಮೂಂದ್-ನಾಲ್ ಕೊಡವಸಮಾಜ ಕೆಟ್ಟುವಾಂಡ ರಶೀತಿ ಬುಕ್ಕ್, ಅಯ್ಯಪ್ಪ ದೇವಸ್ಥಾನತ್‌ರ ಗಣಪತಿ ಬುಡುವಾಂಡ ರಶೀತಿ ಬುಕ್ಕ್ ಮಾತ್ರ ಕೈಲ್ ತಪ್ಪುಲೆ. ಕಂಡವಂಗ್ ಒಂದ್ ದಂಡ್

ಪುಡ್‌ಪ್‌ಚಿರತೆ ಅಂವೊ ಆನ್‌ಂಗುಲೆ. ಇದ್‌ಲ್ ಬಂದದೆ ಅವಂಡ ಪ್ರಧಾನ ಸಂಪಾದನೆ. ಏದೇ ಟಿಕೇಟ್ ಬುಕ್ಕಾಡ್, ವಸೂಲಾನ ಪಣ ಆಡ್, ಇಕ್ಕಾಕಣೆ ವಾಪಾಸ್ ಮಾತ್ರ ಕೊಡ್‌ತಿತೂ ಇಲ್ಲೆ. ಸಭೆಕ್ ಪೋಚೆಂಗೆನ್ನೆ ಬಾಕಿ ಮೆಂಬರುವ ಕೇಪೊ!

ಮನೆಕಾರಡ ಒರೆ ಪಟ್ಟೆ ಉಳ್ಳ ಇಡೀ ಜಮ್ಮಕ್ ಓರಳೆ ತಂತಿ ಬೇಲಿ ಇಟ್ಟಿತ್ ಸುಮಾರ್ ಎಳ್‌ವದ್ ಏಕ್ರೆ ಒಬ್ಬಂಡ ಸ್ವಾಧೀನ. ಪೋಲೆಲ್ಲ ತಕ್ಕ್ ಪರಂದಂಡೇ; ಪೊಲಾಕ ಎದ್ದಿತ್ ನೋಟಾನಕ ಬಲ್ಯಪ್ಪಂಡ ಮಕ್ಕಡ ಜಾಗಕೆಲ್ಲ ಮರಕ್ ಓರಳೆ ತಂತಿ. ಕೂಟ್‌ಕ್ ತಂತಿರ ಕೂಡ ಸುತ್ತು ದೂರ ದೂರ ಓರಂದ್ ಏಲ ಗಿಡ! ಜಾಗ ಎನ್ನೋ ಸ್ವಾಧೀನ ಆಚಿ; ಪಳೆಯ ತೋಟತಾರ ತಂತಿಯೂ ಏಲಗಿಡೋ ಎಲ್ಲಾ ಬಲ್‌ಚಿತ್ ಆಪಕ ಪಳೆಯಾಂಗೂ ಅತ್ತ ಕೂಡ್‌ಚಿ. ಪುದಿಯಾನೋ ಪೂರ್ತಿ ಮಾಡ್‌ಲೆ. ವಿಶಾಲ ಜಾಗ ನೋಟುವದ್ ಒರೇ ತೃಪ್ತಿ ಕಂಬಂಗ್!

ತಾಂಡ ಬೋಜಪ್ಪಂಡ ಮೋಂವೋ ತಿಮ್ಮಯ್ಯ. ಎಚ್ಚಕೋ ಕಾಲತ್‌ಂಜಿ ತಿಮ್ಮಯ್ಯಂಡ ಭೂಮಿ ವಾರ ಮಾಡಿಯಂಡಿಂಜತ್. ವೇಲಾಯಿದ. ಪಾಪತ ವೇಲಾಯಿದ ಬೋಂಡಾಂದೆಣ್ಣ ಕಲೂ ಕೇಕತೆ ಡಿಕ್ಲರೇಶನ್ ಕೊಡ್‌ಪ್‌ಚಿಟ್ಟಿತ್, ತಾನೇ ಸಾಕ್ಷಿ ಎಣ್ಣಿತ್ ನೂರ್ ಬಟ್ಟಿ ಭೂಮಿ ವೇಲಾಯಿದಂಗಾಚಿ. ಇನ್ನನೆ ಊರಾರ ನಾಲ್ ಒಕ್ಕ ಮುಡ್‌ಚತ್. ಈ ತರತ್ ಕಂಬಂಗ್ ಚಾಲುಕ್ಯ ಚಕ್ರವರ್ತಿಯಳನೆಕೆ "ತಾಟಕಿ ಕಂಬ", "ಊರ್ ಮುಡಿಯ", "ಚದಿಯ" ಇನ್ನನೆ ನಾಲಂಜಿ ಬಿರ್‌ದೂ ಬಾತ್.

ಇಚ್ಚಕಾಚೇಂಗಿಯೂ ಕಂಬಂಡ ದರಿದ್ರ ನೀಂಗ್‌ನ ದಿನ ಇಲ್ಲೆ. ಮಲಯಾಳಕಾರಳ "ಏಟ", ತುಳುಕಾರಳ "ಅಣ್ಣ"ಂದಲ್ಲತೆ ಪೆದ ಎಡ್‌ತ ಕಾಕ್‌ನವನಲ್ಲ, ನಂಗಡ ಕಂಬ!

ಜಮ್ಮ ಎಲ್ಲಾ ಇನ್ನನೆ ಬಲ್‌ಚಿ ಕೂಟ್‌ನ ಪಿಂಞ ತಿಮ್ಮಯ್ಯ ಬಟ್ಟೆ ಕಾಂಗತೆ, ಉಳ್ಳ ಇಚ್ಚಕ್ ಕರೆ ಮುರೆನ ಕಳತಿತೂ ತಿದ್ದಿತೂ ಚೆನ್ನ ಏಲತೋಟ ಮಾಡಿಯಂಡ್ ಬಾಕಿ ಉಳ್ಳ 50 ಬಟ್ಟಿ ಭೂಮಿ ನಟ್ಟಂಡ್ ತಾಂಡ ಪಾಡ್‌ಕ್ ತಾನಿಂಜತ್. ಬೇಲಾರ ನೀರಾರ ಏತುಲ್ ನೆರೆಮನೆಕಾರಡ ಕೂಡೆ ಕೂಡಿಯಂಡ್ ತಿಮ್ಮಯ್ಯಂಗೊಮ್ಮ ಚಾಕೂ ಇಟ್ಟಿತ್. ಚೆನ್ನ ತೋಪರೆ ಆಯಿತ್ ತಿಮ್ಮಯ್ಯ ಬದ್‌ಕಿತ್ ಬಾತ್.

ತಿಮ್ಮಯ್ಯಂಡ ಬೇಲ್‌ಕ್ ನೀರ್ ಬಪ್ಪ ತೋಡ್‌ನ ತರ್‌ಚಿ ಬುಡುವೊ, ಅತ್ತಳಾಟುವ ಬಟ್ಟೆಕ್ ಮುಳ್ಳ ಬೆಪ್ಪೊ, ತೋಟಕ್ ಕೂಡ್‌ಚೀಂದ್ ಎತ್ತಡ ಕಾಲ್ ಕೆತ್ತುವೊ, ಬಾಲ್ ತರಿಪೊ, ಚಕ್ಕೆ ಪೀಲಿಲ್ ವಿಷ ಬೆಚ್ಚಿತ್ ಅತ್ತಳ ಕೊಲ್ಲುವೊ, ಇನ್ನನೆ

ತಿಮ್ಮಯ್ಯಂಗ್ ದಿನಕೋರ್ ರಗಳೆ ಮಾಡತೆ ಎಂದೂ ವರ್ನವನಲ್ಲ, ಕಂಬ! ತಾಂದ್ ತಾಂದ್ ಮದಿಯಾಯಿತ್, ಸ್ಪೇಶನ್ ಕೋರ್ಟ್ ಎಲ್ಲ ಪತ್ತಿತಾಚಿ. ಎಲ್ಲಿ ಪೋಚೇಂಗಿಯೂ ತಿಮ್ಮಯ್ಯಂಡ ಪರ ದಾರೂ ಇಲ್ಲೆ. ಕೂಟ್ಕ್ ಕಂಬಂಡ ಉಪದ್ರ ಜಾಸ್ತಿ ಜಾಸ್ತಿ ಆಯಂಡೇ ಬಾತ್. ಆಖೀರಿಕ್ ಆವದಿಲ್ಲತೆ ಅಪಚ್ಚಕೂ ತಾಂದ್ ನೋಟನಾಂದ್ ತಿಮ್ಮಯ್ಯಂಡ ಪೋಣ್ಣ್ ಕಾವೇರಿ ಸಲಹೆ ಕೊಡ್ತತ್.

ಇಚ್ಚಕಾಚೇಂಗಿಯೂ ಎದ್ಕೆ ಮಾತ್ರ ಕಂಬ ತಕ್ಕ್ ಬಾಕ್ ಪರಂದಂಡ್ ಚಾಯಿಲೇ ಇಪ್ಪಯಿಂಜತ್. ಏದ್ ನೇರತ್ ಎಂತ ಮಾಡೂಂದ್ ಮಾತ್ರ ಗೇನ ಮಾಡುವಕ್ ಕಯ್ಯುವಯಿಂಜಿಲೆ.

ಒನ್ನಾಂದ್ ಅಂಗಡಿಕ ಪೋನಲ್ಲಿ ತಿಮ್ಮಯ್ಯನ ಎದ್ಕೆ ಕ್ಲೆಚಿ. ಪೂಂದೆಳಿ ತೆಳಿಚಿತ್ ಪಲ್ಲ್ಗಳ್ಚಂಡ್ "ನಿನ್ನೇ ತೇಡಿಯಂಡಿಂಜ ತಿಮ್ಮಯ್ಯ, ಎಲ್ಲಿಯ ಒರ್ನುಪ್ಪದುರ್ಪಿಯ ತಾ, ಕರ್ತ ಪ್ಯಾಂಟ್ ರ ಜೋಬ್ಂಜಿ ಪರ್ಸ್ ಎಡ್ಪಕ್ ಮರಂದ್ ಪೋಚಿ. ಇಂಞಿ ಮನೆಕ್ ಪೋಯಿತ್ ಬಪ್ಪದುಂಡಾ? ಬೈಟ್ ಅಯಿಚಿತಪ್ಪಿ"ಂದ್ ಸಲೀಸ್‌ಲ್ ಬೆಪ್ಪಕ್ ಕೊಡ್ತಂವೊನನೆಕೆ ಕೇಟತ್.

ತಿಮ್ಮಯ್ಯ ಇಂದ್ ಮಾತ್ರ ಚೆನ್ನ ಮೂಡ್ ಮುರ್ಚಿತೇ ಪರಂದತ್. ನೀ ಕೇಪದೂ ಬೋಂಡ, ನೀಕ್ ತಪ್ಪದೂ ಬೋಂಡ, ತಂದದೆನ್ನೇಂಗಿ ಬಯ್ಯಕ್ ಬಂದಿತಾ?

ಈ ತಕ್ಕ್ ಕೇಟಿತ್ ಕಂಬಂಡ ಮೂಡ್ ಇಳಿಚಿಪೋಚಿ. ತಿಮ್ಮ ಅಚ್ಚಕ್ ಕರಿಣ ಪರಂದುರೂಂದ್ ಗೇನ ಮಾಡಿತಿಂಜಲೆ. ಕೂಡ ಬೋರೆ ದಂಡಾಳಿಂಜಾನಗುಂಡ್ ಅವಂಗ್ ಮಾನ ಕೇಡಾಚಿ.

ಅಂದ್ ಬೈಟ್ ಬುದ್ಧಂಡಾಪಕ ತಿಮ್ಮಯ್ಯಂಡ ನಾಯಿ ಒರ್ ಪೋಲೆ ಕೊರ್ಪ ಕೂಡ್ಚಿ. ಕಾವೇರಿ ಕ್ಡೆಕೆ ತೊರಂದಿತ್ ನೋಟಣೆ ಗುಡ್ಡತ್ ಪಕ್ಕ ಲೈಟ್ ಬೋಳಿ ಕಂಡತ್.

"ಬೆಕ್ಕ್ ಬೋಟೆಕಾರ ಅಯಿತಿಕ್ಕೂ"ಂದ್ ತಿಮ್ಮಯ್ಯ ಎಣ್ಣೆ ಚಿ.

ಪಿತ್ಯಾಂದ್ ಪೊಲಾಕ ತಿಮ್ಮಯ್ಯ ಬೇಲ್‌ಲ್ ಉತ್ತಂಡ್ ಇಪ್ಪಕ ಒರ್ ಪೋಲೀಸ್ ರೈಟ್ರೂ ರೇಂಜರೂ ತಿಮ್ಮಯ್ಯ ಉಪ್ಪಲ್ಲಿಕ್ ಬಾತ್.

"ಏಳ್, ನೀಡ ಮನೆ ಚೆನ್ನ ಜಪ್ಪಿ ಮಾಡಂಡು, ನೀನ್ ಚಾಂದ್ ಮರ ಕಪ್ಪಿಯ,

ಕಳ್ಳ ಕಾಚುವಿಯಾ"ಂದೆಲ್ಲ ಪುಕಾರ್ ಬಂದಿತ್‌ಂದ್ ಎಣ್ಣೆ ಚಿ.

ಅಂತದೊಂದೂ ಇಲ್ಲತ ಪಿಂಞ ತಿಮ್ಮಯ್ಯಂಗೆನ್ನ ಪೋಡಿ! ಬೇಲ್‌ಲ್ ಎತ್ತ ನಿಪ್ಪಚಿಟ್ಟಿತ್ ಕೆತ್ತ ಮರಂಜ ಕಾಲ್ ಮೇಲ್‌ನೋ ಕತ್ತತ ಬಾತ್.

ಒಟ್ಟಿ ಕಲಂದಿತ್ ಬೆಚ್ಚ ಕಾವೇರಿ ಬಂದಯನ ಕಂಡಿತ್ ಬೊತ್ತಿಪೋಚಿ. ತಿಮ್ಮಯ್ಯಂಡ ಮನೆಯೆಲ್ಲ ತೇಡ್‌ನನಕೆ ಮಾಡಿತ್ ಪೋಲೀಸ್ ರೈಟ್ ಪೊರಮೆ ಬಂದಿತ್ ಗುಡ್ಡಕ್ ಪೋಚಿ. ರೇಂಜರೂ ಪೋಚಿ. ತಿಮ್ಮಯ್ಯ ಗುಡ್ಡಕ್ ನುಗ್ಗುವಕ ಅವಂಗೇ ಚಾಂದ್ ಮರ ವಾಸನೆ ಬಾತ್. ಒರ್ ಗೋಣಿಚಿಲತ್ ಚೆನ್ನ ಚಾಂದ್‌ಮರ, ಬುಟ್ಟಿತ್ ದಂಡ್ ಕುಪ್ಪಿ ಕಳ್ಳ ಕಾಂಬಕ ತಿಮ್ಮಯ್ಯಂಗೆ ಸೋಯ ತಪ್ಪಾನನಕೆ ಆಚಿ. ತಿಮ್ಮಯ್ಯ ಕಾವೇರಿನ ಕಾಕ್‌ಚಿ. ಅವಕೆನ್ನ ಗೊತ್ತ್ ಇದೆಲ್ಲ? ಬೈಟ್ ನಾಯಿ ಕೊರತದ್ ಇಕ್ಕ ಅರ್ಥ ಆಚಿ.

ಅಕ್ಕಣೆಕ್ ಒಂದೂ ಅರಿಯತವನಕೆ ಇಂಞೋರ್ ಬರಿಂಜ ಕಂಬ ಬಂದಿತ್ ರೇಂಜರ್‌ಕೂ ರೈಟ್‌ಕೂ ಸಲಾಂ ಪೊಯ್ಯುವಂಜಿ "ಇದೆಲ್ಲ ಎಂಥ ಸಾರ್"ಂದ್ ಕೇಟತ್.

"ಎಲ್ಲಾ ಗೊತ್ತಾಪ ಬಾರಿ ಮಹಜರ್‌ಕ್ ಸೈನ್ ಇಡಿ"ಂದ್ ಎಣ್ಣೆ ಚಿ. ಕಾವೇರಿರೋ ಮಕ್ಕಡೋ ಗೋಳ್ ನೋಟಂಡ.

"ಪೊರಡಿ ಸೈಶನ್‌ಕ್"ಂದ್ ರೈಟ್ ಪೋಲೀಸ್ ಕೂತ್ ಕೇಪಕ ತಿಮ್ಮಯ್ಯ ನಾನ್ ಎತ್ತ ಕಯಿಚಿತ್ ಬೋರೆ ಬಟ್ಟೆ ಇಟ್ಟಿವಿ"ಂದ್ ಪೊರಾಟತ್.

ಅಕ್ಕಣೆ ಕಾವೇರಿ "ಒಟ್ಟಿ ಕಲಂದ್ ಬೆಚ್ಚಿಯೆ, ದಂಡ್ ಒಟ್ಟಿ ಚುಟ್ಟ್ ಕೊಡ್‌ತಾರುವಿ"ಂದ್ ಮೊಟ್ಟ್ ಎಡ್‌ತತ್.

"ಅದೆಲ್ಲ ಆಪ್‌ಲೆ, ಇಟ್ಟಿ ಬಟ್ಟೆಲೇ ಪೊರಾಡಂಡು, ಅನಂಗಿರುವಕಯ್ಯಾ"ಂದ್ ರೈಟ್ ಅಪ್ಪಣೆ ಆಚಿ.

ಕಂಬ ಒಂದೂ ಅರಿಯತವನಕೆ "ನೋಟ್ ತಿಮ್ಮಯ್ಯ ಆಗತ ಕೆಲಸ ಮಾಡಿಯಂಡ್ ನಂಗಡ ವಕ್ಕಕೇ ಕೆಟ್ಟ ಪೆದ ಮಾಡಿಟಿಯ, ಸೈಶನ್‌ಲ್ ನೀನ್ ಇಟ್ಟಿ ಬಟ್ಟೆನೋ ಉತ್ತಚಿರುವ, ಪಿಂಞ ಎನ್ನಂಗೆ ಬೋರೆ ಬಟ್ಟೆ ಇಡಂಡಿಯೆ? ಅದ್‌ಲೇ ಪೋಂದೆಣ್ಣೆ ಚಿ.

ಕಲಂದ್ ಬೆಚ್ಚ ಒಟ್ಟಿನ ಚುಟ್ಟಿತ್ ಬೆರಿಯ ಮಕ್ಕಕ್ ಕೊಡ್‌ಪಕೂ ಬುಡತೆ,

ನೊಗನೇಂಗಿಲುಳ್ಳ ಎತ್ತಲೋ ಬುಡತೆ, ಕೀತಾನ ಚಡ್ಡಿ, ಹರಕ್ ಪೊಡಿಯತ್‌ಲೇ ವಡಿಯನೋ ಪೊಣ್ಣಾನೋ ಸ್ವೇಶನ್‌ಕ್ ಬಲ್‌ಚಂಡ್ ಪೋಚಿ. ಕಾವೇರಿರ ನಿಪ್ಪಲ್ ಕಳ್ಳಾ ಕುಪ್ಪಿನೋ ತೂಕಿ, ತಿಮ್ಮಯ್ಯ ಚಾಂದ್ ಕುಟ್ಟಿನೋ ಪೊರ್ತ್ ಪೋಪಾನ ಕಂಡ ಉರ್‌ಕಾರಳೇ ಕಣ್ಣೀರ್‌ಟ್ಟತ್. ಕಂಬಂಡ ಚದಿ ಗೊತ್ತಿಲ್ಲತವು ಊರ್‌ಲ್ ದಾರೂ ಇಲ್ಲೆ. ಒರ್ ಕಾಲಕೆತ್ತಣೆ ತಿಮ್ಮಯ್ಯ ಪಟ್ಟಿ ಪಾಡ್ ದೇವಕೇ ಗೊತ್ತ್. ಊರ್‌ಕಾರಡ ಸಹಾಯತ್‌ಲೂ, ಸಾಕ್ಷಿಲೂ, ಕೇಸೆನ್ನೋ ಪೋಚಿ. ಆಚೇಂಗಿ ತಿಮ್ಮಯ್ಯ, ಕಾವೇರಿರ, ಮನಸ್‌ಲ್ ಕತ್ತಾನ ತಿತ್ತ ಮಾತ್ರ ಅನ್ನನೇ ಇಂಜತ್.

ಕೇಸ್ ತೇಂದಂದ್ ಕಂಬ ಚೂಳೆ ತಳಿ ತಳಿಚಂಡ್ "ಈ ಕೇಸೆಲ್ಲ ನಿಪ್ಪಲೇಂದ್ ಅಂದೇ ನಾ ಎಣ್ಣೆಲಿಯಾ ತಿಮ್ಮಯ್ಯ"ಂದ್ ಬಲ್ಯ ಸಹಾಯ ಮಾಡ್‌ನನಕೆ ಪರಂದತ್.

\* \* \*

ಕಂಬಂಡ ಮೋಂವೊ ಸಾಬು ಕಾಲೇಜ್‌ಲ್ ಓದಿಯಂಡಿಂಜತ್. ಕಂಬಂಡ ಪೊಣ್ಣ್ ಚಿಮ್ಮಿ ವಡಿಯಂಡ ತಾಟಕತನ ಗೊತ್ತುಂಡೇಂಗಿಯೂ ವಡಿಯನ ತಿದ್ದುವಕ್ ಪೋನವಳಲ್ಲ. ಹೈಸ್ಕೂಲ್‌ಕ್ ಕೂಡ್‌ನಲ್ಲಿಂಜಿ ಆ ಕ್ಲಾಸ್ಟ್ ಫೀಸಾಡ್ ಬಟ್ಟೆಯಾಡ್ ನೇರಕ್ ಇಲ್ಲೆ. ಎಚ್ಚಕೋ ಕುರಿ ಫೀಸ್ ಕೆಟ್ಟತಾಂಗ್ ದವುತಿತ್!

ನಾಲಂಜಿ ಕಾಲತ್‌ಂಜಿ ಸಾಬುಕ್ ತಿಮ್ಮಯ್ಯ ಮಾಡ್‌ನ ಸಹಾಯಕ್ ಕೈಕಣಕಿಲ್ಲೆ. ಕಾಲೇಜ್‌ಕ್ ಕೂಡ್‌ವಕಲೂ ತಿಮ್ಮಯ್ಯ ಓರ್ ಸೂಟ್‌ಬಟ್ಟೆ, ಪುಸ್ತಕ, ದುಡ್ಡ್ ಎಲ್ಲಾ ಕೊಡ್‌ತಿತ್. ಅಂವೊ ಮಾತ್ರ ಎಚ್ಚಕ್ ಕೊಡ್‌ಕಲು?

ತಿಮ್ಮಯ್ಯಂಡ ಮೇಲೆ ಕಳ್ಳತನ ಪೊರ್‌ಪಾಚಿಟ್ಟಿತ್ ಇಟ್ಟಿ ಕೀತ್ ಬಟ್ಟೆಲ್ ಪೋಲೀಸ್‌ಕಾರ ಈತ ಪೋನಾನ ಅರಿಂಜಿತಾಪಕ ಮಾತ್ರ ಸಾಬುಕ್ ತಡ್‌ಪಕಯ್ಯತೆ ಆಚಿ. ಒಂದೂ ಬೋಂಡಾಂದ್ ಕಾಲೇಜ್ ಬುಟ್ಟಿತ್ ಮಿಲ್ಕಿಕ್ ಕೂಡಿರ್‌ತ್. ಪೋಪಕ ತಾಂಡ ಅಪ್ಪ ಮಾಡ್‌ನ ಅನ್ಯಾಯಕಾಯಿತ್ ತಿಮ್ಮಯ್ಯಂಗೂ ಕಾವೇರಿಕೂ ಕಾಗದ ಎಳೆದಿತ್ ಮಾಪ್ ಕೇಟಂಡ್ ಮನೆಬುಟ್ಟಿತ್.

\* \* \*

ಜಾರ್ಜ್ ಕೇರಳತ್‌ರ ಬಲ್ಯ ಸಾವುಕಾರ. ಕೊಡಗಲ್ ಚೆನ್ನ ಏಲ ತೋಟ ಮಾಡಂಡೂಂದ್ ಜಾಗ ತೇಡಿಯಂಡಿಂಜತ್. ಕಂಬುರ ಖಾಲಿ ತೋಟತ್‌ರ ಬರಿಲೇ ಒರ್ ಕೊಡವಂಡ ಸಾಗ್ ಜಾಗ ಎಡ್‌ಪಕ್ ಬರಲೂ ಪೋಲೂ ಸುರುವಾಚಿ.



ನಂಗಡ ಚದಿಯ ಕಂಬಂಗ್ ಜಾರ್ಜ್ ಪರಿಚಯ ಎನ್ನನೆ ಆಚೋ! ಜಾರ್ಜ್ ಜೀಪ್‌ಲೇ ಓಟ್‌ಕಳಿ. ಜಾಗತ್‌ರ ಬೌಂಡ್ರಿ, ಕಾಟಿ ಕೊಡ್‌ಪೊ, ಮರ ಲೆಕ್ಕ ಎಡ್‌ಪೊ, ಜಾಗಕ್ ಬೆಲೆ ಕೆಟ್ಟುವೊ ಎಲ್ಲ ಕಂಬಂಡದೇ ಕಾರ್ಬಾರ್.

ಜಾಗ ಎಡ್‌ತಿತ್ ತೋಟ ಮಾಡುವಕ ಓರಂದ್ ವಾರ ಕಂಬಂಡ ಮನೆಲೇ ಜಾರ್ಜ್ ರಿಕಾಣಿ. ಕಂಬಂಡ ಬೇಲ್ ಪಣಿ, ತೋಟ ಪಣಿಕೆಲ್ಲ ಜಾರ್ಜ್ ಪಣಿಕಾರ ಪುಕ್ಕಟೆ! ಜಾರ್ಜ್ ತಂತಿ ಇಡುವಕ ತಿಮ್ಮಯ್ಯಂಡ ಸ್ವಾಧೀನ ಇಂಜ ಅರೆ ಏಕ್ರೆ ಜಮ್ಮತ್‌ನೋ ಕೂಟಿ ತಂತಿ ಇಟ್ಪಾರ್ತ್!

ಕಂಬಂಡ ಮನೆಲ್ ಎಕ್ಕೋಲು ಗೌಜಿ. ಕೋಳಿಕರಿ ಮಾಡ್‌ನಕ ತುಂಡೆಲ್ಲ 'ಜಾರ್ಜ್ ಏಟಿ'ಂಗ್; ಕಾಲ್, ಕೊರ ಕಂಬಂಗ್! ಮುಟ್ಟೆಕರಿರ ಮುಟ್ಟೆ ಚೂರ್ ಜಾರ್ಜ್; ಕಂಡೆ ಚೂರ್ - ಕಣ್ಣಿ ನಂಗಡ ಬಂಬಂಗ್, ತಣ್ಣಂಜ, ಮೂಡ್ ಕರಿಂಜ ಒಟ್ಟಿ ಕಂಬಂಗ್, ನಲ್ಲ ಪೊಕ್ಕಳತರ್ ಒಟ್ಟಿ ಜಾರ್ಜ್; ಪರ್ತಿ ಕಡಿಕೆ, ತಲ ಮೆತ್ತೆ, ಬಿಸಿನೀರ್‌ಕುಳಿ, ಆರಾಮ್ ಕುರ್ಚಿ, ಟರ್ಕಿಟವಲ್, ಕಾಲ್ಗೇಟ್ ಪೇಸ್, ಎಲ್ಲ ಜಾರ್ಜ್; ಚೇರಿ ಕಡಿಕೆ, ಪಲಿಯಕುಟ್ಟ್, ಅಳಪಕ್ ಅಯಿಮರ, ಕಲತ್‌ರ ಅಡಿಲ್ ಬಾಕಿಯಾನ ದಂಡ್ ಚೊಂಬ್ ನೀರ್, ಚೇಲೆ ಮುಂಡ್, ಪಲ್ಲುದ್ದುವಕ್ ಮಸಿಕಂಡೆ . . . ಎಲ್ಲ ನಂಗಡ ಕಂಬಂಗ್!

"ಚೋದರಿಂಜ ನಾಯಿ ಚೆಟ್ಟುವ ನಕ್ಕಚಿ"ಂದ್ ಎಣ್ಣಾನಕೆ ಜಾರ್ಜ್ ಇಂಞೂ ಎಂತೆಂತದೋ ಕೇತರೆ ಮಾಡ್‌ಚೀಂದ್ ಪಳಮೆ ಇಂಜತ್!

ಕಂಬಂಡ ಮೋವ ಪಾತೆ ಜಾರ್ಜ್ ಕೂಡ ಮೂನಾಲ್ ಕುರಿ ಕೇರಳತ್ತಟಿ ಪೋನಾನ ಕಂಡವುಂಡ್. ಬಂದ ಪುದಿಯ ಪುದಿಯ ಪೊಡಿಯ ಉಡ್‌ಪಯಿಂಜದೂ ನೇರೆ. ಇನ್ನನಾಯಿತ್ ಪಾಲಿಕ್ ಬಂದ ಸುಮಾರ್ ನಲ್ಲ ನಲ್ಲ ತಂದ್ ತಪ್ಪಿ ಪೋಚಿ.

ಬಂದಿತ್ ಮೂಡಿನ ನೋಟಿತ್ ಉಂಡ್ ಕುಡ್‌ಚಿ ಲಗ್ಗೆ ಪತ್ರಿಕೆ ಮಾಡ್‌ನಾಂದ್ ಪೋನವು ಕೂಡ ಮರ್‌ಚಿ ಬಂದದಿಲ್ಲೆ.

ಜನಡ ಬಾಯಿ ಮುಂಡತಿಪ್ಪಾ? ಅದ್‌ಂಗೂ ತಿಮ್ಮಯ್ಯನೂ ಕಾವೇರಿಯೂ ಪಿತ್‌ಲಾಟ ಮಾಡುವಾಂದ್ ಬೋಂಡಿಯಚ್ಚಕ್ ರಂಪ ಮಾಡ್‌ಚಿ. ಮಂಗಲಾಕತೆ ಮೂಡಿ 'ಜಾರ್ಜ್ ಮಾಮಾ' ಎಣ್ಣಿಯಂಡ್ ಜೀಪ್‌ಲ್ ಓಡಿಕಳಚಕ ಜನಕ್ ಕಣ್ಣಿಲ್ಲಿಯಾ? ಪರಿವಕ್ ನಾವು ಇಲ್ಲಿಯಾ?

ಜಾರ್ಜ್ ಜಾಗತ್‌ಲಿಂಜ ಬೂಟಿ ಮರತ್‌ಂಜಿ ತೋಟ್, ಚೆಟ್ಟುವ ಮರಕೆತ್ತಣೆ

ಲೋಡ್ ಲೋಡ್ ಪೋಚಿ. ಆಂಡ ಕೂಡೆನ್ನೇ ಕಂಬಂಡ ತೋಟತರ ಮರಯೆಲ್ಲ ಮಾಯಾಪಯಿಂಜತ್. ಮನೆಕಾರ ಎಲ್ಲ "ಜಮ್ಮತರ ಮರ ಪೋಯಂಡುಂಡ್"ಂದ್ ನಾಲ್ ದಿನ ಗುಜು ಗುಜು ಎಣ್ಣೆಚಿ. ಪೋಪದೆಲ್ಲ ಪೋಚಿ.

ತಿಮ್ಮಯ್ಯಂಡ ಬೇಲಾರ ಕರೆಲೇ ಜಾರ್ಜರ ತೋಟ, ತಿಮ್ಮಯ್ಯಂಡ ಬೇಲಾಲುಳ್ಳ ಪಂದಿನ ಬೊಡಿಬೆಪ್ಪಚಿಟ್ಟಿತ್ ಜಾರ್ಜರ ತೋಟತರೊಳ್ಳಕ್ ಬಲಾಚಿ ಇಡ್ಚಿಟ್ಟಿತ್. ತಿಮ್ಮಯ್ಯ ಪಂದಿ ಚಾಕುವಾನೇ ಬುಟ್ಟಿತ್. ಸುತ್ತು ಮುತ್ತು ಜನಡ ಪಂದಿಯೆಲೆಲ್ಲ ಕಂಬ ಅದೇ ಮಾದರಿ ಮಾಡ್ಚಿ.

"ಮರಕ್ ಮರ ಎಣ್ಣೆ ಇಡುವ"ಂದ್ ಪೊಟ್ ಪ್ರಚಾರ ಮಾಡಿತ್ ಮನೆಕಾರಡ ಅತ್ತಕ್ ಚಕ್ಕೆ ಪೀಲಿಲ್ ಮದ್ದ್ ಬೆಚ್ಚಿತ್ ಕೊಂದತ್. ಇದ್‌ಂಗೆಲ್ಲ ಜಾರ್ಜ ಇಂಬ್‌ಕೊಡ್‌ತದಲ್ಲ, ನಂಗಡ ಬಂಬ ಕಂಬಂಡ ಕಾರ್ಬಾರ್!

ಪಕ್ಕತ ಊರಾರ ಮಿಲ್ಪಿಕಾರಂಗ್ ಚೆನ್ನಂಗೇ ದಿನ ರಜ. ರಜತರೊಳ್ಳಲ್ ಮಂಗಲ ಕಯಿಕಂಡಿಂಜತ್. ಈ ಅರ್ಜೆಂಟ್ ಆಸಾಮಿರ ಆತುರತ್‌ಲ್ ಪಾಲಿಕ್ ಓರ್ ತಂದ್ ಬಾತ್.

ಬಂದಾನ ಬುಟ್ಟಕ ಆಯಿಲೆ, ಎನ್ನೇಂಗಿ ಮಾಡಿತ್ ಅವಳ ಉಳ್ಳಪಿರ್‌ನಾ, ಜನ ಪೆರ್ತ್ ಕೆಟ್ಟಿವು, ಅದ್‌ಂಗೂ ಪಿತ್‌ಲಾಟ ಮಾಡಿರೊಂದ್ ಕಂಬಂಡ ಪೊಣ್ಣ್ ಚಿಮ್ಮಿರ ಸಲಹೆ ಬಾತ್.

"ಪಣ ಬೋಂಡುವಲ್ಲಾ? ನಾಪದ್ ಐಂಬದಾಯಿರ ದಾರ್ ಕೊಡ್‌ಕು?" ಚೊಡ್ ಪತ್ತನ ಕಂಬ ಐಮರತ್‌ಲ್ ಬೇರ್‌ಚಿಟ್ಟಂಡ್ ಅಳತತ್.

"ಜಾರ್ಜ ಅಣ್ಣಯ್ಯನ ಕೇಕನಾ"ಂದ್ ಏಂಗ್‌ಚಿ ಚಿಮ್ಮಿ.

ಅಕ್ಕಣೆಕ್ ಜಾರ್ಜರ ಏಲತೋಟ ನೇಂದಿಂಜತ್. ಕಂಬಂಡ ತೋಟ ಅತ್ತ ಮೇವ ಬಾಣೆ ಆಯಿಂಜತ್. ಇಕ್ಕ ಜಾರ್ಜ ವಾರಕೊಮ್ಮ ಪದ್‌ನಂಜಿ ದಿನಕೊಮ್ಮ ಬಂದಿತ್ ಇಂಜಿತ್ ಪೋಯಿರುವಯಿಂಜತ್.

ಒನ್ನಾಂದ್ ಕಂಬ ಮೋವಡ ಮಂಗಲತರ ಸಂಗತಿ ಎಣ್ಣೆತ್ "ನಾಕ್ ನಾಪದಾಯಿರ ಉರ್‌ಪಿಯ ಬೋಂಡು, ಎನ್ನೇಂಗಿ ಮಾಡಿತ್ ಸೆರಿ ಮಾಡಿ, ನಾಲ್ ಕಾಲಕ್ ತೇತುರುವೀಂದ್‌ಮೊಳಿ ಇಟ್ಟಿತ್.

ಚೆನ್ನ ಬೇರ್‌ಚಿಟ್ಟಿತ್ ಜಾರ್ಜ್ ಎಣ್ಣೆಚಿ "ನಿಂಗಡ ತೋಟತ್ ಗಿಡವೊಂದೂ ಇಲ್ಲೆ. ನಲ್ಲ ಮರೋ ಇಲ್ಲೆ, ನಿಂಗ ಸಾಲ ತೇಪಕ್ ಸಾಧ್ಯ ಇಲ್ಲೆ. ನಿಂಗಡ ಸ್ವಾಧೀನ ಉಳ್ಳ ಜಮ್ಮ ಜಾಗತ್‌ರ 60 ಏಕೆ ನಾಕ್ 21 ಕಾಲಕ್ ಭೋಗ್ಯಕ್ ತಾರಿ, ಮಾರುವಕ್ ಮನೆಕಾರ ಸೈನ್ ತಪ್ಪಕಿಲ್ಲೆ, ನಾನ್ ತೋಟ ಮಾಡುವಿ. ನಿಂಗಲೇ ಮೇನೇಜ್‌ಮೆಂಟ್ ನೋಟಿ. ಸಂಬಳೋ ತಪ್ಪಿ. ಎನ್ನನೆಯೂ ಮಣ್ಣೊನ ನಾನ್ ಎಡ್‌ತ ಪೋಪಾಲೆಲ್ಲಾ, ಸೆರಿಯಾನ ಲಿಖಾವಟ್ ಮಾಡಿಯವನ. ನಿಂಗಡ ಜಾಗತ್ ತೋಟೋ ಆಚಿ. ಮೋವಡ ಮಂಗಲೋ ಆಪ. ನಿಂಗಕ್ ಉಂಬಕ್ ಕೂಳುಂಡ್, ನಾನೂ ಚೆನ್ನ ಚೆನ್ನ ತಪ್ಪಿ, ನಾನೊಂದು ನಿಂಗಲ ಚದಿಪಾಲೆ. 21 ಕಾಲಕೆತ್ತಣೆ ನಾಡ ಪಣಕ್ ಬಡ್ಡಿ ಬೋಂಡ. ಆಂಡ ಬದ್‌ಲ್‌ಕ್ ತೋಟ ಮಾಡಿತ್ ಫಸಲ್ ಎಡ್‌ತವಿ".

"ಜಾರ್ಜ್ ಏಟಂಡ" ತಕ್ಕ್ ಕೇಟಿತ್. ಕಂಬಂಡೋ, ಚಿಮ್ಮಿರೋ, ಪಾತೆರೊ ಕುಶಿನ ನೋಟಂಡ. 20 ಕಾಲ ಕಯ್ಯುವಕ್ ಎನ್ನಾಂಡಿಯೆ! ಪಿಂಞ ಇಡೀ 60 ಏಕೆ ತೋಟ ನಂಗಡದಾಪಲ್ಲಾಂಡ್ ತಕ್ಕ್‌ಬಾಕ್ ತೇತತ್.

ಬೋಂಡಿಯ ರೆಕಾರ್ಡೆಲ್ಲ ಇಂಗ್ಲೀಷ್‌ಲೇ ಜಾರ್ಜ್ ಲಾಯರ್‌ನಗುಂಡ್ ಎಳ್ಳಾದ್‌ಚಿಟ್ಟಿತ್. ಆ ಕರಾರ್‌ಲ್ ಒರ್ ಒಕ್ಕಣೆ ಇನ್ನನೆ ಕೂಟ್‌ಚಿ-21 ಕಾಲ ಕಯಿಂಜ ಪಿಂಞ ಕಂಬ ಎಕ್ಕ್ ಅಸಲ್ ಪಣ ನಾಪದಾಯಿರ ಕೊಡ್‌ಪ ಅಕ್ಕ್ ಜಾಗ ಬುಟ್ಟ್‌ಕೊಡ್‌ಕಂಡು!"

ಈ ಕರಾರ್ ಪ್ರಕಾರ 21 ಕಾಲ ಕಯಿಂಜ ಪಿಂಞ ಕಂಬ ಎಕ್ಕ್ ಅಸಲ್ ಪಣ ನಾಪದಾಯಿರ ಕೊಡ್‌ಪ ಅಕ್ಕ್ ಜಾಗ ಬುಟ್ಟ್‌ಕೊಡ್‌ಕಂಡು!"

ಈ ಕರಾರ್ ಪ್ರಕಾರ 21 ಕಾಲ ಕಯಿಂಜದು ಜಾಗ ಬುಟ್ಟ್‌ಕೊಡ್‌ಪಾಂದಲ್ಲತೆ ತೋಟಾಂದಿಲ್ಲೆ; ಏಲಗಿಡ ಬಲ್‌ಚಿತ್ ಖಾಲಿ ಜಾಗ ಕೊಡ್‌ತಕ ಮದಿ. ಅದೆನ್ನ ಕಾಫಿ ತೋಟ ಅಲ್ಲಲ್ಲ? ಏಲಗಿಡ ಬಲ್‌ಚಿತ್ ಬೋರೆ ಜಾಗತ್ ನಟ್ಟವಲು, ಇದ್ ಕೇರಳ ಕೇಣಿ!

ಅದೂ ಅಲ್ಲತೆ ನಾಪದಾಯಿರ ಅಸಲ್ ಕಂಬ ಕೊಡ್‌ಪದುಂಡಾ! ಕಂಬಂಡ ಚದಿಯ ಮಂಡೆಕ್ ಇದೆಲ್ಲ ಪೋಯಿಲೆ. ಕೇರಳತ್‌ರ ಓರಂದ್ ಚೇಟಂಗ ನೂರ್ ನೂರ್ ತಾಕಲಾಟ ಕಂಬಂಗಳ ನೀರ್ ಕುಡ್‌ಪ್‌ಚಿರುವಾಂದ್ ಕಂಬಂಗನ್ನೆ ಗೊತ್ತ್?

ಪಾತೆರ ಮಂಗಲ ಗೌಜಿಲೇ ಆಚಿ. ಮೂಂದ್ ದಿನ ಜಾರ್ಜ್‌ರ ಜೀಪ್‌ಲೇ

ಮಂಗಳಲತರ ಓಟಾಂಗಳಿ. ಮಂಗಳಲತ ಮನೆಲ್ ಸಿಲ್ಕ್ ಶರ್ಟ್ ಇಟ್ಟಿಂಡ್ ಈಸಿಚೇರ್ಲ್ ತಾಂಗಿ ಅಳಾತ ಜಾರ್ಜ್‌ನ ಕಾಂಬಕ ಕೆಲವು ಮರ್ಯಾದಸ್ಸು ಬಾಲೆಕಾರಡ ಚೋರೆ ಪದಾರ್ಚಿ. ಪಲ್ಲ್ ಕಡಿಚಂಡ್ ಮುಂಡತಿಂಜತ್.

ತಡ್‌ಪಕಯ್ಯತೆ ಒರ್ ಅಜ್ಜ "ಇಂವನೇ ಮೂಡಿರ ಅಪ್ಪನಾ ಅಲ್ಲ ಒಕ್ಕತರ ಕೊರವಕಾರನಾ? ಬಲ್‌ಚಿ ಚಾಡೀ, ಬೆಪ್ಪಲ್ಲಿ ಬೆಕ್ಕಂಡು ಕೋಳ್ ಬಾಳಾವಳ"ಂದ್ ಎದಿಕೇ ಎಣ್ಣೆತ್ ರಂಪ ಮಾಡ್‌ಚಿ!

ಇದ್‌ನ ಕೇಟ ಜಾರ್ಜ್ ಮೆಲ್ಲೆ ಜಾಗ ಖಾಲಿ ಮಾಡ್‌ಚಿ. ಏಲೆ ಮಾಯ ಆಚೀಂದ್ ಗೊತ್ತಾಯಿಲೆ.

ನಾಡ ಬಾಲ್ಯತೆಲಾಯಿತುಂಡೇಂಗಿ ಸೂ.... ಮೋಂವೊನ ಕೈಪುಡ್‌ಚಿಬಲ್ಲಿ ಚಾಡುವಂಜಿ ನಡು ಪೊಳಿಪಕಿಂಜ"ಂದ್ ಅಜ್ಜ ಪಾರಿಕಳಿಚತ್.

ಅಕ್ಕ ಬಾಲೆಕಾರಕ್ ಎಚ್ಚರ ಆಚಿ. ಆಚೀಂಗಿ ಆಸಾಮಿ ಎಲ್ಲಿಯ?

ಜಾರ್ಜ್‌ರ ಬರಲ್ ಕಮ್ಮಿಯಾಚಿ. ಕಂಬಂಡ ಸಾಲ ದಿನ ದಿನ ಪೆರ್ತಂಡೇ ಬಾತ್. ಜಾರ್ಜ್ ತಾಂಡ ತೋಟತ್ ಬಿಡಾರ ಕೆಟ್ಟಿತ್ ಒರ್ ಕೇರಳಕಾರ ರೈಟ್, ಬೆಚ್ಚತ್, ಈ ರೈಟ್ ಭಾರಿ ಶಿಸ್ತಕಾರ, ಇಕ್ಕಣೆ ಕಂಬಂಗ್ ಕೊಟ್ಟ್‌ಕುಳ್ಳ ತೊಪ್ಪು, ಕೊಕ್ಕಲೆ, ಪುಳ್ಳಿಕೆಲ್ಲ ತಾಂಡದೇ ಜಾಗ ಇಂಜತ್. ಇಕ್ಕ ಜಾರ್ಜ್‌ರ ಮೋಂವೊ ಚೋಸೆಫ್ ಓರಮ ಬಪ್ಪಕಾಚಿ. ಅಂವೊ ಕಂಬನ ತಕ್ಕ ಪರಿಚಿರುವಕೆಲ್ಲ ಪೋಯಿಲೆ. ಕಂಬಂಡ ಭೋಗ್ಯ ಜಾಗತ್ ಬೋಂಡ್ಯ ಮರ ಎಲ್ಲ ಕೆತ್ತಿತ್ ಪುಳ್ಳಿ ಲೋಡ್ ಪೋಚಿ. ತಂತಿ ಆಚಿ, ಗಿಡೋ ಬೆಚ್ಚತ್.

ಇಕ್ಕ ಕಂಬಂಡ ಅತ್ತಳ ಕೊಟ್ಟೊಂಜಿ ಬಾಣೆಕ್ ಆಟಂಡಿಕೆ ಬಟ್ಟೆಯಿಲ್ಲೆ. ಉಬ್ಬ ತೊರ್‌ಪಕ ಕೇರಳ ತೋಟಕ್ ಪಾರುವ. ಪೋನ ಅತ್ತಡ ಕಾಲ್ ತುಂಡಿತೋ ಬಾಲ್ ತುಂಡಿತೋ ಬಪ್ಪಕಾಚಿ!

ಜಾರ್ಜ್ ಬಪ್ಪ ದಿನ ಪಾರಕಾತಿತ್ ಒನ್ನಾಂದ್ ಕಂಬ "ನಾಕ್ ಚೆನ್ನ ದುಡ್ಡ್ ಬೋಂಡಿಂಜತ್"ಂದ್ ಕೇಟತ್.

"ಅಕ್ಕಕ್ಕ ದುಡ್ಡ್ ತಪ್ಪಕ್ ನಾನೆನ್ನ ಪಣಮರ ನಟ್ಟಿಯನಾ? ಇಕ್ಕ ಎಲ್ಲ ಮೋಂವಂಡ ಕಾರ್ಬಾರ್"ಂದ್ ಒರೇ ವಾಕ್ಯ ಪರಂದಿತ್ ಪೋಯಿರ್‌ತ್.

ಕಂಬಂಡ ಪೊಣ್ಣೆಕ್ ಸೌಖ್ಯ ಇಲ್ಲತಂದ್ ಒಮ್ಮೆ ಆಸ್ಪತ್ರೆಕೆತ್ತಣೆ ಜೀಪ್

ಬೋಂಡಿಂಜತಲ್ಲಾಂದ್ ಕೇಟತ್.

ಜಾರ್ಜ್ ಏಕವಚನ ಸುರು ಮಾಡಿತ್ "ನೀನ್ ಪಂಡೆಲ್ಲ ಜೀಪಾಲೇ ಪೋನವನಾ?  
ಆಂಗಲ್ಲ ಜೀಪ್ ತಪ್ಪಕಯ್ಯುವಾ"ಂದ್ ನಿರ್ದಾಕ್ಷೀಣ್ಯತ್ ಎಣ್ಣೆರ್ತಾ!

\* \* \*

ಪಾತೆನ ಕೂಟಿಯಂಡ್ ಹೈದರಾಬಾದ್‌ಕ ಪೋನ ಮಿಲ್ಟಿಕಾರ ಮುತ್ತಣ್ಣ, ಪೊಣ್ಣೊನ  
ಚಾಯಿಲೇ ನೋಟ್‌ಚಿ. ದಿನ ದಿನಕ್ ಪಾತೆರ ಮೂಡ್, ಮೇಲ್ ತೆಳ್‌ಂಗಿಯಂಡೇ  
ಬಾತ್. ಒನ್ನಾಂದ್ ಪಾತೆಕ್ ಚೆನ್ನ ಸೌಖ್ಯ ಇಲ್ಲೆಂದ್ ಆಸ್ವತ್ರಕ್ ಕೂಟಿಯಂಡ್  
ಪೋಚಿ. ಡಾಕ್ಟರ್ ನೋಟಿತ್ ಲೇಡಿ ಡಾಕ್ಟರ್‌ಕ್ ಚೀಟಿ ಕೊಡ್‌ತಯಿಚಿತ್ ಟೆಸ್ತ್  
ಮಾಡ್‌ಚಿ.

ಮುತ್ತಣ್ಣನ ಕಾಕಿತ್ "ಬೇಜಾರ ಇಲ್ಲೆ, ಎಲ್ಲಾ ನಾರ್ಮಲ್, ಇಂಞೂ ಇರ್‌ವದ್  
ದಿನ ಟೈಂ ಉಂಡ್, ಎಡ್‌ಮಿಟ್ ಮಾಡುವಕ್"ಂದ್ ಎಣ್ಣೆಚಿ. ಪಾಪೆತೆರ ಮುತ್ತಣ್ಣಿಂಗ್  
ಒಂದೂ ಅರ್ಥ ಆಕತನೆಕೆ ಮೂಡೇ ನೋಟ್‌ಚಿ.

ಲೇಡಿ ಡಾಕ್ಟರ್ ಕರ್‌ಂದೊಳಿ ತೆಳ್‌ಚೆಂಡ್ ಡೆಲಿವರಿಕ್ 20 ದಿನ ಉಂಡ್‌ಂದ್  
ಬುಡ್‌ತಿ ಎಣ್ಣೆ ಕೊಡ್‌ತತ್!

"ಅಯ್ಯೋ ಮಂಗಲಾಯಿತ್ ಅಂಜಿ ತಿಂಗ ಆಯಿತಿಲ್ಲೆ ಅದೆಂಥ ಡೆಲಿವರಿ"ಂದ್  
ಕೇಟತ್. ಪಾತೆರ ಮೂಡ್ ನೋಟಣೆ ಅವ ಮಂಡೆ ಕುಂಬ್‌ಟ್ಟತ್! ಡಾಕ್ಟರ್ ಚೆರಿಯ  
ತೆಳಿ ತೆಳಿಚತ್.

ಮುತ್ತಣ್ಣಂಡ ಸಿನೇತಂಗ ಓರಂದೇ ಪರಂದಿತ್ ತಮಾಶಿ ಮಾಡುವಕಾಚಿ.  
ಮುತ್ತಣ್ಣಿಂಗ್ ಸಂಗತಿ ಗೊತ್ತಾಚಿ.

"ಮೋವಳ ಮಡಿಕೇರಿಕ್ ನಾರಾಚೆ ಅಯೆಪಿ. ಪೆರುವಕ್ ಮನೆಲೇ ಆಕಿಯೋಳಿ,  
ಮಡಿಕೇರಿಲ್ ಬಂದಿತಿರಿ"ಂದ್ ಟೆಲಿಗ್ರಾಂ ಅಯಿಚತ್.

ಟೆಲಿಗ್ರಾಂ ಓದಿತಾಪದು ಕಂಬ ಚಿಮ್ಮಿರ ಮೂಡ್, ಚಿಮ್ಮ ಕಂಬಂಡ ಮೂಡ್  
ನೋಟ್‌ಚಿ! ನಾರಾಚೆ ಅಪ್ಪನೂ ಅಪ್ಪನೂ ಬೆಂಗಳೂರ್ ಬಸ್ಸ್ ಬಪ್ಪಾನ ಕಾತಂಡಿಂಜತ್.

ಮಂಗಲಕರ್ತಿಕ್ ಕೊಡ್‌ತ ಪೊಟ್ಟಿ, ಪೋಳಿಯ ಎಲ್ಲ ಉಳ್‌ಪಾಚಿ, ಮುತ್ತಣ್ಣ.  
ಮೋವ ಮಂಡೆ ಬಗ್ಗೆ ಚಿಟ್ಟಂಡ್ ನಿಂದಿಂಜತ್. ಮಾಂವ ಮಾಂಯಿರ ಕಾಲೂ ಪುಡಿಕ್‌ತ

ಮುತ್ತಣ್ಣ ಓರ್ ಬರಿಕ್ ಕೂಟಿಯ ಪೋಯಿತ್, ಮಾಂವಂದೂ ಕಾಕತೆ "ಇದರಿ ನಿಂಗಡ ಮೋವಡ ಕುಂಞಿಯೂ ಉಂಡ್"ಂದ್ ಪಾತೆರ ಕೆಲಕ್ ಬೆರಕಾಟ್ಚಿ! "ಇಂಞಿ ನಿಂಗಲೇ ಚಾಕಿ. ನಾಡ ಭಾರ ನೀಂಗ್ಚಿ"ಂದ್ ಎಣ್ಣೆತ್ ಒರ್ ಆಟೋ ಪತ್ತಿತ್ ಪೋಯಿರ್ತ್!

ಕಂಬ ಜಾರ್ಜ್‌ನ ಬೊಡಿ ಬೆಚ್ಚಿ ಕೊಂದ್‌ರುವೀಂದ್ ಪಾರಿಕಳ್‌ಚತ್. ಅವಂಡ ಪಾರಿಕಳಿರ ಕಳಿಕಲ್‌ನ ದಾರ್ ನೋಟುವ!

"ಇಚ್ಚಕಾಂಡ ಕೂಟ್‌ಕ್ ಇದೋರ್ ಕಷ್ಟ ಬಾತ್"ಂದ್ ಚಿಮ್ಮಿ ಮೊರಟತ್.

ನಾಲ್ ದಿನತ್ ಪಾತೆ ಪೆತ್ತತ್. ಮುತ್ತಣ್ಣ ಡಾಕ್ಟರ್ ಸರ್ಟಿಫಿಕೇಟ್, ಪೋಲೀಸ್ ಪುಕಾರ್ ಎಂತದೆಲ್ಲ ತಾಂಡ ಭದ್ರತೆ ಮಾಡಂಡು, ಅದೆಲ್ಲ ಭದ್ರತೆ ಮಾಡಿತೇ ಕೂಟಿಯ ಬಂದಿಂಜತ್. ಕಂಬಂಗ್ ಇಕ್ಕ ಅಡಿ ಇಲ್ಲೆ, ಆಕಾಶ ಇಲ್ಲೆ!

ಕಂಬ ಮನೆಕೆತ್ತಣೆ ಅವಂಡ ದಂಡ್ ಪಂದಿಯಳ ಜಾರ್ಜ್‌ರ ತೋಟತ್ ಬೊಡಿ ಬೆಚ್ಚಿತ್‌ಟ್ಟದ್ ಗೊತ್ತಾಚಿ. ಯರ್ಚಿ ಮಾಡಿತ್ ಮಾರನಾಂದ್ ಯರ್ಚಿ ಮಾಡುವ ಕಾಪಕ ಪಕ್ಕ ನಿಪ್ಪಕಯ್ಯತಾಚಿ. ಓರ್ ದಿನಕ್ ಮಿಂಞ ಬೊಡಿ ಬೆಚ್ಚದ್ ನಾರಿ ಪೋಯಿತಿಂಜತ್. ಯರ್ಚಿಕ್ ಬಂದವು "ನಾಕ್ ಬೋಂಡ, ನಾಕ್ ಬೋಂಡಾ"ಂದ್ ಜಾಗ ಬುಟ್ಟತ್.

ಕಣ್ಣೀರ್‌ಟ್ಟುಂಡ್ ಕಾಲ್ ಪುಡ್‌ಚಿ ಬೋಡ್‌ನಕ ಕಾಸ್ ಕೊಡ್‌ಪವನಿಲ್ಲೆ, ಅಂಡ ಕೂಟ್‌ಕ್ ಮನೆಲ್ ಪೆತ್ತವ!

ಪೆತ್ತವಳ ನೋಟುವಕ್ ಬಂದ ಪೊಣ್ಣಾಳ್ "ಇದೆನ್ನ ಕುಂಞಿ ಅವ್ವನೆನ್ನೆಕೆಯೂ ಇಲ್ಲೆ, ಅಪ್ಪನನೆಕೆಯೂ ಇಲ್ಲೆಂದ್ ಮೂಡ್‌ಕ್ ಕುತ್ತಾನನಕೆ ಪರಿಯುವಯಿಂಜತ್.

ಇಂಞಿೋರಬ "ಮಂಗಲ ಈಯಾಂಡ್ ಕಾದ್ಯಾರ್‌ಲಲ್ಲ ಆಯೆ, ಇದ್ ತೊಲಿಯಾರಲ್ಲ, ಅಂಜೇ ತಿಂಗಲ್ಲ ಆಯೆ"ಂದ್ ಒರ್ ಪ್ರಶ್ನಾರ್ಥಕ ಆಶ್ಚರ್ಯ ಕಾಟುವಂಜಿ ಒಳಂದೆಳಿ ತೆಳಿಚವಯಿಂಜತ್.

ಊರ್‌ರ ನರಿನನಕೆ ಇಂಜ ಕಂಬ ಈಗಲ್ಲ ಎಂಥ ಉತ್ತರ ಕೊಡ್‌ಕಲು? ಚಯಿಂತೆರಕಿಯಂಡ್ ಸಹಿಸ್‌ಚಿ ಬಂದಾನೆಲ್ಲ!

ಜಾರ್ಜ್‌ರ ತೋಟ ದಾಟಿತ್ ಬಪ್ಪ ತೋಡ್‌ರ ನೀರೇ ಇಡೀ ಕೋವುರ ಬೊಳೆಕ್. ಮಳೆ ಕಮ್ಮಿ ಉಳ್ಳ ಕಾಲ ಆ ನೀರೂ ಎತ್ತುಲೆ. ಜಾರ್ಜ್‌ರ ತೋಟಕ್ ಮೋಟಾರ್ ಬೆಚ್ಚಿತ್ ನೀರ್ ಪಾರ್‌ಚಿರುವಕಾಯಿತ್ ಆ ತೋಡ್‌ಕ್ ಸಿಮೆಂಟ್ ಕಟ್ಟೆ ಮಾಡಿತ್ ನೀರ್

ಎಡ್‌ಪಕ್ ಸುರು ಮಾಡ್‌ಚಿ. ಕೇದಕ್ ಓರ್ ತುಳಿ ನೀರ್ ಬಪ್ಪಯಿಂಜಿಲೆ.

ಕದ್ ಪೋಪಕಾಪಕ ಬೇಲ್ ಒಣಂಗೆಚಿ. ಎಲ್ಲ ಕೂಡಿತ್ ತಹಶೀಲ್ದಾರಂಗ್ ಪುಕಾರ್ ಕೊಡ್‌ತತ್. ಎನ್ನ ಮಾಡುವಕಯ್ಯು? ಪಣ ಉಳ್ಳವಂಡ ಬರಿಕಲ್ಲತೆ ಇಂಞಾ ದಾಕ್ ತಹಶೀಲ್ದಾರ, ರೆವಿನ್ಯೂ ಇನ್ಸ್‌ಪೆಕ್ಟರೆಲ್ಲ ಪರೆಯುವೊ?

ಭೂಮಿ ಒಣಂಗೆಚಿ, ಅತ್ತಕುಳ್ಳ ಪಿಲ್ಲೂ ಕ್‌ಟ್ಟುಲೆ, ಆಳಣ್ಣ ಕಂಬನೇ ಬಯ್ಯುವಕಾಚಿ. ಜಾಗ ಭೋಗ್ಯಕ್ ಕೊಡ್‌ತ ಪಿಂಞ ಆಂಡೊಳ್‌ಲುಳ್ಳ ತೋಡ್‌ನ್ನೆನ್ನನೆ ಬುಡ್‌ತುವೊ?

ಕಂಬಂಗ್ ಇಂಜದೇ ಓರೇಕ್ ಎತ್ತ್. ಒನ್ನಾಂದ್ ಜಾರ್ಜರ್ ತೋಟಕ್ ಪೋಯಿತ್ ಬಂದದು ಬಾಯಿಲ್ ನೊರೆ ಬಂದಿತ್ ಚತ್ತ್ ಬುದ್ದತ್. ತಿಮ್ಮಯ್ಯ ಮಾತ್ರ ಎಚ್ಚಕ್ ಪಣಿ ಉಂಡೇಂಗಿಯೂ ಅತ್ತಕೆಲ್ಲ ಕುಟ್ಟೆ ಕೆಟ್ಟಿತ್ ಕೂಡೆ ನೋಟುವಯಿಂಜತ್.

ಚತ್ತ ಎತ್ತನೋ, ಪೆತ್ತ ಮೋವಳೋ, ಅಪ್ಪ ದಾರ್‌ಂದ್ ಅರಿಯತ ಕುಂಞಾನೋ, ಒಣಂಗಿ ಬುದ್ದ ಬೊಳೆನೋ, ಜನ ಪರಿಯುವ ತಕ್ಕನೋ ನೋಟಿತೂ ಕೇಟಿತೂ ಕಂಬಂಗ್ ಕಣ್ಣೇ ಕಾಂಗತಾಚಿ. ಒರ್ ಪುಡಿ ಉಂಗನಾಂದೆಣ್ಣೆ ಚೇಂಗಿ ಅಕ್ಕಿ ಇಲ್ಲೆ. ಪಳಿಯ ಕೇಪು ತೋಕ್ ನೆರತಿತ್ ತೋಟಕತ್ತಟಿ ಪೋಚಿ. ಮಜ್ಜಣಾಪಕ ಬೊಡಿ ಕೇಟಿತ್.

ಚೆನ್ನ ನೇರತ್ ಸಂಗತಿ ಗೊತ್ತಾಚಿ. ರೋಸಿ ಪೋನ ಕಂಬ ಜಾರ್ಜರ್ ಮೋಂವೊ ಜೋಸೆಫ್‌ಕ್ ಬೊಡಿ ಬೆಚ್ಚತ್. ಬೊಡಿ ತೋಪರೆ ಆಚಿ. ಜೋಸೆಫ್ ಚತ್ತಿತಿಲ್ಲೆ!

ಕಂಬಂಗ್ ಒರ್ ಕಾಲ ಜೈಲಾಚಿ. ಜೈಲಾಲಿಪ್ಪಕ ಪೊಣ್ಣ್ ಚಿಮ್ಮಿ ಕೆಲಕಿಲ್ಲತೆಯೂ, ಕಪ್ಪ ತಡ್‌ಪಕಯ್ಯತೆಯೂ, ಮೋವಡ ಗೋಳ್ ನೋಟುವಕಯ್ಯತೆಯೂ ತೂಂಗಿಯಂಡ್ ಚತ್ತತ್.

ಮಿಲ್ವಿಕಾರ ಸಾಬು ತಂಗೆರ ಮಂಗಲ ತೇತಿತ್ ಪೋನಂವೊ ಇದೆಲ್ಲ ಅರಿಂಜಿತ್ ಇಪ್ಪರ ಬಂದದೇ ಇಲ್ಲೆ. ಏದೋ ಜಾತಿನ ಮಂಗಲಾಯಿತ್ ಅಸ್ಸಾಮ್‌ಲ್ ಉಂಡ್‌ಂದ್ ಅರಿಂಜತ್.

ಓರಾಂಡ ಜೈಲ್ ತೇತಿತ್ ಬರಣೆ ಮೋವ ಪಾತೆನೊ, ಕುಂಞಾನೋ ತಿಮ್ಮಯ್ಯ ಮನೆಲಾಕಿಯಂಡ್ ಚಾಕಿತ್, ಪಾತೆನ ನರ್ಸ್ ಟ್ರೈನಿಂಗ್‌ಕೂ ಕೂಟ್‌ಚಿ. ಕುಂಞಾನ ಕಾವೇರಿಯೇ ಚಾಕಿಯಂಡಿಂಜತ್. ಕಂಬಂಡ ಮನೆ ಓರ್ ಬರಿ ಬುದ್ದಿತ್ ಗಾಂಧಿ ಗುಲಾಬಿ

ಪುಟ್ಟಿತಿಂಜತ್.

ತಿಮ್ಮಯ್ಯ ಪೋಯಿತ್ ತಾಂಡ ಮನೆಕೇ ಕಂಬನ ಕೂಟಿಯ ಬಾತ್. ಕುಳಪ್ಪಾಚಿಟ್ಟಿತ್, ಬೋರೆ ಬಟ್ಟೆ ಇಡ್ಚಿಟ್ಟಿತ್ "ಅಣ್ಣಯ್ಯ ನೀನ್ ಇಂಞ ಎಲ್ಲಿಕೂ ಪೋಂಡ. ನಾನುಂಬಾಲ್ ಒರ್ ಪುಡಿ ಕೂಳ್ ನೀಕ್ ತಪ್ಪೀ"ಂದ್ ಎಣ್ಣೆ ಚಿ.

ಕಂಬ ತಿಮ್ಮಯ್ಯಂಡ ಹೈಸ್ಕೂಲ್ ಓದುವ ಮಕ್ಕಳ ಕಾಕಿತ್ ಅಳಪ್ಪಾಚಿಟ್ಟಿಂಡ್, "ಅಪ್ಪಾಗುರು ಕಾರೋಣಂಗೂ ಮನೆಕಾರಕೂ ವಂಚನೆ ಮಾಡಿತ್, ಜಮ್ಮ ಜಾಗತನ ಎಲ್ಲಾ ನಾನ್ ಬಲೆಚಿ ಮಾಡತದೆಲ್ಲ ಮಾಡ್ನ. ನಾಕಂತು ಏದೂ ದಕ್ಕಾಲೆ. ನಾಡ ಭೋಗ್ಯತರ ಅವಧಿ ತೇಂದ ಪಿಂಞ ನಿಂಗ ಆ ಜಾಗ ಬುಡ್ತಿಯಂಡ್ ಸೆರಿಯಾಯಿತ್ ಪಾಲೆಟ್ಟಿಂಡ್ ನಯಿಚಿತ್ ಬದ್ಕಿ. ಪೋರೊಮೆಂಜಿ ಬಂದ ಕಂಡವಂಗ್ ಇಂಬ್ ಕೊಡ್ಕತಿ. ತಾಟಕತನ ಎಂದೂ ತಲೆಪತ್ತುಲೇಂದ್ ನನ್ನ ನೋಟಿತ್ ಪಡಿರಿ"ಂದ್ ಎಣ್ಣೆತ್ ತಿಮ್ಮಯ್ಯನ ತಬ್ಬಿಪುಡ್ಚಂಡತ್!

- \* - \* - \* -



## ಪೋಲೀಸ್ ತೀರ್ಪು

ಅಂದ್ ಪೇಟೆಲ್ ಗಣಪತಿ ಬುಡುವ ನಮ್ಮೆ. ಭಾರೀ ತೇರ್ ಮೆರವಣಿಗೆ, ಕೊಂಬ್-ಕೊಟ್ಟ್, ಆಟ್-ಪಾಟ್. ಇನ್ನತ ನಮ್ಮೆ ಬಂದ್‌ಟಕ ಪೋಲೀಸ್‌ಕಾರಕಂತೂ ಊಣ್-ವರಕಿಲ್ಲೆ, ಮನಸ್ಸುಕ್ ನೆಮ್ಮದಿ ಇಲ್ಲೆ. ಪೋಲೀಸ್‌ಕಾರಳೆಲ್ಲ ಅಪ್ಪರಿಪ್ಪರ ಪಾಲ್‌ಟ್ಟಿತ್ "ದಾರ್‌ಕೆಲ್ಲ ಎಲ್ಲಿ ಡ್ಯೂಟಿಂದ್ ಅಯಿಂಡಯಿಂಡ ಚಾಕ್‌ರಿ ವಹಿಸಿತಿಂಜತ್, ಸ್ಪೆಷನ್‌ಲ್ ಮಾತ್ರ ಮೂಂದ್ ಪೋಲೀಸ್‌ಕಾರಳೂ ಓರ್ ರೈಟರೂ ಡ್ಯೂಟಿಲಿಂಜತ್.

ಸಾಧು, ರೈಟರ್ ಎಣ್ಣೆಚೇಂಗಿ ಅವಂಡ ಸ್ವಭಾವ "ಸಾಧು"ಂದ್ ಅಲ್ಲ! ಮೇಲಧಿಕಾರಿಯ ಎಕ್ಕಲೂ ಪೋಲೀಸ್‌ಕಾರಳ ನಂಬರ್ ಎಣ್ಣೆತ್ ಕಾಕುವದ್ ಕ್ರಮ. ಸಾಧುರ ಪೆದಕೊತ್ತನ್ನೆಕೆ ಅವಂಡ ಗುಣ ನಡೆತೆ ಅಲ್ಲ. ಅದತೂ ಅವಂಡ ಪೆರಿಯ ಪೊಣ್ಣ್ ಚತ್ತ ಪಿಣ್ಣ್ ಅವಂಡದ್ ಗೆಳೆಗೆಕೋರ್ ತರ ಕಳಿ.

ದಂಡ್ ದಿನಕ್ ಬಯ್ಯ ಬೈಟಾಪಕ ಸೈಕಲ್‌ಲ್ ಬಂದ ಓರ್ ಬಾಲೆಕಾರ, ಓರ್ ಪೊಣ್ಣಾಳ್‌ರ ಬೋಳೆಂಜ ಚೈನ್ ಬಲ್‌ಚಂಡ್ ಓಡ್‌ನ ಕೇಸ್ ದಾಖಲಾಯಿತಿಂಜತ್. ಕಳ್ಳನ ಕಾಟ್ಟಿತಿಂಜಾಲೆ. ಎನ್ನೇಂಗಿ ಮಾಡಿತ್ ಕಳ್ಳನ ಪುಡಿಕ್ಕೊಂಡೂಂದ್ ಪೋಲೀಸ್‌ಕಾರ ಆ ಬಾಲೆಕಾರನ ತೇಡಿಯಂಡಿಂಜತ್.

ಸೆರಿ ಏಳ್ ಗಂಟೆಕ್ ಕರೆಂಟ್ ಪೋಚಿ. ಸ್ಪೆಷನ್ ಕಾಂಪೌಂಡ್‌ರ ಬರಿಲುಳ್ಳ ಮಾಂಗೆ ಮರತ್‌ರ ಪಕ್ಕಕಾಲೆ ಓರ್ ಸೈಕಲ್ ದಾಟ್‌ಚಿ. ಓರ್ ಪೋಲೀಸ್, "ಸೈಕಲ್‌ಕಾರ ಯಾಲೆ ಪೋಪಾ"ಂದ್ ನೋಟ್‌ಚಿ. ಅಕ್ಕಣೆಕ್ ಆ ಬಾಲೆಕಾರ ಸೈಕಲ್‌ನ ಮರತ್‌ರ ಬರಿಲ್ ನಿಪ್ಪಾಚಿಟ್ಟಿತ್ ಸೈಕಲ್‌ರ ಕ್ಯಾರಿಯರ್‌ಲ್ ಎಂಥಾನೋ ತೇಡುವನ್ನೆಕೆ ಕಂಡತ್. ಕೂಡೆನ್ನೆ ಆ ಪೋಲೀಸ್‌ಕಾರ ಓಡಿ ಬಂದಿತ್, "ಸರ್ ಸರ್, ಓರ್ ಸೈಕಲ್‌ಕಾರ ಒಳ್‌ಚಿ ಕಳಿಪಾ"ಂದ್ ಸಾಧು ರೈಟರ್‌ಕ್ ಎಣ್ಣೆಚಿ.

"ಪುಡಿರಿರೇ" ಎಣ್ಣೆಚಿ ಸಾಧು. ರೈಟರ್ "ಪುಡಿ" ಎಣ್ಣುವದೂ ಮುಪ್ಪಿಲಿಂಜ ಪೋಲೀಸ್‌ಕಾರ ಕಾಂಪೌಂಡ್ ಪಾರಿತ್ ಬಾಲೆಕಾರನ ಪುಡೆಚತ್. ಅವನ ಈತ ಬಂದಿತ್, "ಸರ್ ಅದೇ . . . ನಿನ್ನಾಂದ್ ಚೈನ್ ಬಲ್‌ಚಂವ." "ತೇಡಿಯಂಡುಳ್ಳ ಕಳ್ಳ ಕಾಲಾಕೇ

ತೊಡ್ಕಿಯಂಡತ್‌ಂದೆಣ್ಣುಟ ಕೆಣ್‌ಂಜತ್ ನೋಟಿ. ನಾನಂವಂಡ ಸೈಕಲ್ ಎಡ್‌ತ ಬಪ್ಪಿ. ಇಕ್ಕ ನಿಂಗ ಇಂವನ ಒಳ್‌ಕ್ ಇಡಿ. ಎಣ್ಣೆತ್ ಆ ಪೋಲೀಸ್ ಸೈಕಲ್‌ಕ್ ಪೋಚಿ.

ಸಾಧು ರೈಟರ್‌ಕ್ ಅಂದ್‌ಡೀ ಬೋಣಿಯೂ ಆಯಿತಿಂಜ್‌ಲೆ. ಗಣಪತಿ ಬುಡುವಂದ್ ಇರಲೂಡಿ ಚಿಲ್‌ಂಗ್ ಮಳೆಲ್ ಡ್ಯೂಟಿ ಮಾಡೊಂಡು. ಕ್‌ಣ್ಣಿಂಗ್ ನಾಲ್ ಬಾಟಿತ್ ಅರೆ ಜಿಂವ ಮಾಡಿತ್ ಜೋಬುನೆಲ್ಲಾ ತೌಡಿತ್ ಕ್‌ಟ್ವನ ನೋಟ್‌ನೋ ಕಾಸ್‌ನೋ ಬಲ್‌ಚಂಡತ್. ಕ್‌ಟ್ವನ ದುಡ್ಡ್ ಕಾಸ್‌ನ ಸುರಾಲ್ ಜೋಬುಕ್ ಇಟ್ಟುಂಡ್ ವಿಚಾರಣೆಕ್ ಇಳ್‌ಂಜತ್.

ಕ್‌ಣ್ಣಿಂಡ ಪೆದ ಕೇಪಕ ಬಿಕ್ಕಿ ಕಳಚತ್. "ನಿನ್ನೆಲ್ಲಾ ಜಿಂವತ್ ಬುಟ್ಟಕ ನಂಗಕ್ ಎಕ್ಕಲೂ ಮಂಡೆ ನೊಂಬಲ. ನೀಕೆನ್ನ ಪೆದ ಎಣ್ಣುವಕ್ ಗೊತ್ತೆಲ್ಲಿಯಾ?" ಎಣ್ಣೆತ್ ಬಗ್ಗೆ ಚಿಟ್ಟಿತ್ ಕ್‌ಪೊಪ್ಪೆತ್ತೆರ ಅಡಿಕ್ ತೊಡೆರ ಸೆರಕ್ ಸೆರಿಯಾನ ಓರ್ ಚೌಟ್ ಕೊಡ್‌ತತ್. ಆ ಚೌಟ್‌ಕ್ ಕ್‌ಣ್ಣಿ, "ಅಯ್ಯೋ" ಎಣ್ಣೆತ್ ಮೂಲೆಕ್ ತಾಂಗಿಪೋಚಿ.

ಅಕ್ಕಣೆಕ್ ಸೈಕಲ್ ನೂಕಿಯಂಡ್ ಬಂದ ಪೋಲೀಸ್‌ಕಾರ "ಸರ್ ಎಲ್ಲಿಯೇಂಗಿ ಚಿತ್ತ್ ಪೋಕು. ಅದೋರ್ ಗ್ರಾಚಾರ ಬಕ್ಕೂ"ಂದ್ ಎಚ್ಚರ ಕೊಡ್‌ತತ್.

"ಥತ್ ಮುಟ್ಟಾಳ. ಬೂಟ್ ಚೌಟ್‌ಕ್ ಚಿತ್ತಕ, 'ಹಾರ್ಟ್ ಫೈಲ್'ಂದ್ ಎಳ್ಳಿ ಚಾಡುವಕ್ ಗೊತ್ತಿಲ್ಲತಂವೊ ಎನ್ನಂಗ್‌ರೇ ಪೋಲೀಸ್ ಚಾಕ್ರಿಕ್ ಕೂಡಿಯೆ. ನಾಲ್ ಬಡ್‌ಚಿತ್ ಕಯ್ಯವೇಂಗಿ ಬಾಯಿಬುಡ್‌ತ್. ಇಲ್ಲೇಂಗಿ ಬಟ್ಟೆ ಉತ್ತಿತ್ ಕಯ್ಯವೇಂಗಿ ಬಾಯಿಬುಡ್‌ತ್. ಇಲ್ಲೇಂಗಿ ಬಟ್ಟೆ ಉತ್ತಿತ್ ಚಡ್ಡಿಲ್ ಲಾಕಪ್‌ಕ್ ಇಡ್. ನಾಳೆ ಪೊಲಾಕ ವಿಚಾರ ಮಾಡನ" ಎಣ್ಣೆಚಿ ರೈಟರ್.

"ಸರ್, ಅಂವನ ಬಾಯಿಬುಡ್‌ತುವದ್ ಇರಡ್. ಅಂವ ಕಣ್ಣೇಂಗಿ ತೊರ್‌ಪದ್ ಉಂಡಾಂದ್ ನಾಕಾಪ", ಪೋಲೀಸ್ ಎಣ್ಣೆಚಿ.

ಕ್‌ಣ್ಣಿಂಡ ಸೈಕಲ್‌ಲ್ ಓರ್ ಬ್ಯಾಗ್‌ಲ್ ಬೆಡ್‌ಶೀಟ್, ಟವುಲ್ ಸೋಪು ಇಂಜತ್. ಅದೆಲ್ಲ ಇಪ್ಪಕ ಇಂವನೋರ್ ಬಿಕಾರಿ . . . ಕಂಡಾನ ಕಪ್ಪ, ಕ್‌ಟ್ವನ ಕಟ್ಟೆಲೋ ದಿಟ್ಟೆಲೋ ಬುದ್ಧಂಡ್ ಕಾಲ ಕಯಿಪ ಕಳ್ಳಾ"ಂದ್ ಅನುಭವಸ್ಥ ಪೋಲೀಸ್‌ಕಾರಕ್ ಎಣ್ಣೆ ಕೊಡ್‌ಕೊಂಡುವಾ!

ಕಳ್ಳನ ಪುಳ್ಳಿ ಕುಟ್ಟೆನನ್ನೆಕೆ ಬಲ್‌ಚಿತ್ ಲಾಕಪ್‌ಕ್ ಇಟ್ಟಿತ್. ಕ್‌ಣ್ಣಿಂಡ ಜೋಬುಂಜಿ ಬಾತ್‌ನಾನ ನೋಟಿತ್, "ಇಂದೇತ್‌ರ ನಮ್ಮೆರ ಕೋಳುಕ್ ಮದೀ"ಂದ್

ಕುಶೀಲ್ ಪಕ್ಕತಾರ ವೈನ್‌ಶಾಪ್‌ಕ್ ಪೋಯಿತ್ ಬಾತ್ ಸಾಧು.

ಚೆನ್ನಂಗ್ ದಿನಕ್ ಮಿಳ್ಳಾ ಪುದಿಯದಾಯಿತ್ ಬಂದ ಕಾನ್ಸ್ಟೇಬಲ್ ಮಾದಪ್ಪ ಕೊಡವನೇ. ಅವಂಗ್ ಕ್ಕಣ್ಣಂಡ ಪಾಡ್ ಕಂಡಿತ್ ಪೋಡಿಯೂ ಆಚಿ. ಚೆನ್ನ ಎರ್ಕಿತ್ ಬಂದ ಸಾಧುರ ಪಕ್ಕ ಪೋಯಿತ್, "ಸರ್ ಕ್ಕಣ್ಣಂಗ್ ಬಲ್ಯ ಪೋಯಿತಾಯಿತ್, ಏವ ಮಾದರಿ ಕಾಂಬುಲೆ. ಆಸ್ಪತ್ರೆಲ್ ಎಡ್‌ಮಿಟ್ ಮಾಡಿತ್ ಭಾರ ನೀಕಿಯವನ. ಎಸ್.ಐ. ಬಾತೇಂಗಿ ಬಯ್ಯು. . ." ಸಲಹೆ ಕೊಡ್‌ತತ್!

"ಪೋರೆ, ಸ್ಟೇಷನ್‌ಲ್ ಚಾವದ್ ಇದೆನ್ನ ಪುದಿಯ ಸಂಗತಿಯಾ?" "ರೋಡ್‌ಲ್ ಬೈಟಾಪಕ ಮೂನಾಲ್ ಬಾಲೆಕಾರ ಪೊಜ್ಜಿ ಬುದ್ದಂಡಿಂಜತ್ ನಾನ್ ಪಕ್ಕ ಪೋಕಣೆ, ಅವನೊಬ್ಬನ ಬುಟ್ಟಿತ್, ಬಾಕಿ ಉಳ್ಳವು ಓಡಿರ್‌ತ್"ಂದ್ ರಿಪೋರ್ಟ್ ಎಲ್ಲಿತ್ ಆಸ್ಪತ್ರೆಕ್ ಸಾಗ್‌ಚಿಟ್ಟಿಕ್ ಆಚಿ, ಮುಂಡತಿರ್ ಎಣ್ಣಿತ್ ಮಾದಪ್ಪಂಡ ಬಾಯಿ ಮುಚ್ಚ್‌ಚಿಟ್ಟಿತ್ ಸಾಧು.

ಮಾದಪ್ಪಂಗ್ ಮನಸ್ಸ್ ಕೇಟಾಲೆ. ಓರ್ ಗ್ಲಾಸ್ ನೀರ್ ಎಡ್‌ತ ಬಂದಿತ್ ಕ್ಕಣ್ಣಂಗ್ ಕುಡಿಪ್‌ಚಿಡುವಕ್ ನೋಟಾಚಿ. ಓರ್ ಗೋಣಿಚಿಲತನ ನಾಲ್ ಮಡ್‌ಕ್ ಮಾಡಿತ್ ಕ್ಕಣ್ಣಂಡ ಮಂಡೆರಡಿಕ್ ಬೆಚ್ಚತ್. ಇದನ್ ಕಂಡ ಸಾಧು, "ಅಲ್ಲರೇ ಮಾದಪ್ಪ ನೀನೆನ್ನ ಪೋಲೀಸ್ ಸ್ಟೇಷನ್‌ಲ್ ಆಸ್ಪತ್ರೆ ಡ್ಯೂಟಿ ಮಾಡಿಯಂಡುಳ್ಳಿಯಾ? ಪೋಲೀಸ್ ಯೂನಿಫಾರಂ ಕೊಯಿತಂದೇ ಸತ್ಯ-ಧರ್ಮ-ಕರ್ಮ, ದಯಾ-ದಾಕ್ಷಿಣ್ಯ ಎಣ್ಣುವಾನೆಲ್ಲಾ ಮೇಲ್ ಕೊಡ್‌ಕಿತ್ ಬೂಕಿರೊಂಡು. ಕೈಕ್ ಕ್ಕಟ್ಟ್‌ನ ಕಳ್ಳಂಗಳೆಲ್ಲಾ ಇನ್ನನೆ ಕರುಣೆ ಕಾಟಿತ್ ಉಪಚಾರ ಮಾಡಿಯಂಡುಂಡೇಂಗಿ ನೀಡ ಸರ್ವಿಸ್‌ಲ್ ನೀಕ್ ರಿವಾರ್ಡ್ ಕ್ಕಟ್ಟುಲೆ. "ತೆಳ್ಳಾಚಂಡ್ ಬೀಡಿ ಕತ್‌ಚಿಟ್ಟಿತ್ ಸಾಧು.

ಸಾಧು ಅಚ್ಚಕ್ ಪಾಳು ಮನುಷ್ಯನಲ್ಲ. ದುಂಬನ ಸಂಸಾರತ್ ಬೊಳ್‌ಂದಂವ. ಸ್ಕೂಲ್‌ಲ್ ನಲ್ಲ ಚುರ್‌ಕೂ ಇಂಜತ್. ಎಸ್.ಎಸ್.ಎಲ್.ಸಿ. ಓದಿತ್ ಪೋಲೀಸ್ ಚಾಕ್ರಿಕ್ ಕೂಡ್‌ಚಿ. ಸಾಧುಕ್ ಮಿಳ್ಳಾಕ್ ಓದೊಂಡೊಂದ್ ಮನಸ್ಸಿಂಜತ್. ಆಚೇಂಗಿ ಅವಂಡ ಅಪ್ಪವ್ವಂಗ್ ವಿಪರೀತ ಪಣತರ ಆಸೆ. ಕಾಲೇಜ್ ಓದಿತ್ ಓರ್ ಸ್ಕೂಲ್ ಮಾಸ್ಪರೋ, ಪೋಸ್ಟ್ ಮಾಸ್ಪರೋ ಆಚೇಂಗಿ ಎನ್ನ ಪ್ರಯೋಜನ? ತಿಂಗಳೊಮ್ಮೆ ಕ್ಕಟ್ಟುವ ಸಂಬಳತ್ ಸಂಸಾರ ನೀಸುವದ್ ಉಂಡಾ? ಓರ್ ಪಳಂಜೊಲ್ ಉಳ್ಳನ್ನಕೆ, "ಕಾಡ್‌ಕ್ ಪೋನಂವ ಕಂಡ್ ಬಕ್ಕು, ತೋಡ್‌ಕ್ ಪೋನಂವೊ ಕೊಂಡ್ ಬಕ್ಕು, ಖಾಕಿ ಇಟ್ಟಂವಂಗ್ ಕಾಕಿ ಕೊಡ್‌ಕೂ"ಂದ್ ಅಪ್ಪ ಮೊಂವೊಂಗ್ ಎಣ್ಣ್‌ಚಿ.

"ಸರಿಯಪ್ಪ, ಯೂನಿಫಾರಂ ಉಳ್ಳ ಡಿಪಾರ್ಟ್‌ಮೆಂಟ್‌ಕೇ ಕೂಡಂಡಿಕ್ ನಾನ್ ಮಿಲಿಟರಿಕ್ ಕೂಡ್‌ವೀ"ಂದ್ ಸಾಧು ಎಣ್ಣೆ ಚಿ.

ಅಕ್ಕ ಅಪ್ಪ, "ಛೀ, ಪೊಟ್ಟಿ ನೀಕ್ ಲಕ್ಷ್ಮಿರ ಕಥೆ ಗೊತ್ತಿಲ್ಲಿಯರೇ ಕೇಳ್. . . .! ಒನ್ನಾಂದ್ ಲಕ್ಷ್ಮಿ, ವೇಷ ಮಾತಿಯಂಡ್ ಪೋಯಂಡಿಂಜತ್. ಕಾಲ್‌ಕ್ ಮೊಟ್ಟ್ ಪಟ್ಟಿತ್ ಓರ್ ಕುಂಡ್‌ಕ್ ಬುದ್ಧಾರ್‌ತ್. ಏವಕ್ ಕಯಿಂಜಾಲೆ. ಕೂತ್ ಕೊಡ್‌ಪಕ ಡ್ಯೂಟಿ ತೇತಿತ್ ಬಂದಂಡಿಂಜ ಓರ್ ಖಾಕಿ ಯೂನಿಫಾರಂಕಾರ ಓಡಿ ಬಂದಿತ್ ಕುಂಡ್‌ರೊಳ್‌ಂಜಿ ನೇತಿತ್ ಎಡ್‌ತತ್. ಅಕ್ಕ ಅಂವಂಡ ಮಂಡೆಕ್ ಕೈ ಬೆಚ್ಚಿತ್, ಉಯಿ ಖಾಕಿಕಾರ, ನಾನ್ ಕಾಕುವಕ ಬಂದಿತ್ ಒಪ್ಪಿಯಲ್ಲ. ಇಂದ್‌ಂಜ ಖಾಕಿ ಇಟ್ಟಿಂವನ, "ಕಾಕ್‌ಲೇಂಗಿಯೂ ನಾನೇ ಬಪ್ಪಿ"ಂದೆಣ್ಣೆತ್ ಪೋಚಿಲೊ. ಅನ್ನನಾಯಿತ್ ಖಾಕಿ ಯೂನಿಫಾರಂಕಾರ ಪೋಲೀಸ್‌ಕಾರಳೇ ಆಡ್, ಫಾರೆಸ್ವ್‌ಕಾರನೇ ಆಡ್, ಚೋಂದ ಬಸ್ಸರ ಕಂಡೆಕ್ಕರೇ ಆಡ್ ಅಯಿಂಗಡ ಕೂಡೆ ಲಕ್ಷ್ಮಿ ತಾನಾಯಿತೇ ಪೋಪ. ಮಿಲ್ಪಿಕಾರಡ ಯೂನಿಫಾರಂ ಬೋರೆ ಕಲರ್. ಅಯಿಂಗಕ್ ಲಕ್ಷ್ಮಿರ ಭಾಗ್ಯ ಇಲ್ಲೇ"ಂದ್ ಎಣ್ಣೆತ್ ಮೋಂವನ ಪೋಲೀಸ್‌ಕ್ ಕೂಟಿರ್‌ತ್.

ಮಂಗಲಾಕತ ಸಾಧುಕ್ ಕ್ವಾಟರ್ಸ್ ಕಾಟ್ಪಾಲೆ. ಓರ್ ರೂಮ್ ಮಾಡಿಯಂಡತ್. ಆ ರೂಮ್‌ರ ಬರಿಲೇ ಓರ್ ಸಾರ್ವಜನಿಕ ಕಣತೆರೆ. ಇಡೀ ಲೋಕತಲೂ ನೀರ್ ಬತ್ತ ನಕಲೂ ಆ ಕಣತೆರೆಲ್ ನೀರ್ ಬತ್ತಲೆ. ಅನ್ನನಾಯಿತ್ ಆ ಕಣತೆರೆಕ್ ಪುರುಸೊತ್ತೇ ಇಲ್ಲೆ. ಆಚೇಂಗಿ ನೀರ್ ಬಲಿಪಕ್ ಬಪ್ಪಯಂಗ ಮಾತ್ರ ಅಯಿಂಗಡ ಸ್ವಂತ ಕೇರೂ ತಿರ್‌ಗಣೆನೋ ಕೊಂಡ ಬಂದೊಂಡಿಂಜತ್. ಸಾಧು ಈ ಕಾರಣತ್ ಓರ್ ಕೇರೂ ತಿರ್‌ಗಣೆಯೂ ಎಡ್‌ತಂಡತ್.

ಈ ಕಣತೆರೆ ನೀರ್‌ಕ್ ಬಪ್ಪಯಿಂಗಡ ಪೈಕಿ ಟೈಲರ್ ಮುತ್ತಂಡ ಮೋವ ಸುಧಾನ ಗೊತ್ತಿಲ್ಲತವು ಇಲ್ಲೆ. "ಸುಧಾ ನೀರ್‌ಕ್ ಬಾತ್" ಎಣ್ಣೆನಕ ಮದಿ, ನೀರ್‌ಕ್ ಬಂದವು ತೆರ್ಪ ನಿಂದಿತ್ ಮಿಳ್ಳಾ ಸುಧನ ನೀರ್ ಬಲ್‌ಚವಕ್ ಬುಡುವಯಿಂಜತ್.

ಸುಧಾಂಡ ತಡಿಕೊತ್ತನಡು, ನಡುಕೊತ್ತ ಮೂಡ್, ಮೊಣ್ಣೆ ಕಾಲ್‌ಂಜಿ ನಾಲ್ ಬೆರ ಕ್‌ದಕೆತ್ತಣೆ ಉಳ್ಳ ಜಡೆ, ಎಲ್ಲಾಡೊ ಕೂಡೆ ಕುಶಿರ ತಕ್ಕ್, ನೀರ್ ಎಡ್‌ತಂಡ್ ಅರೆಕೆಟ್ಪಲ್ ಬೆಚ್ಚಂಡ್ ಪೊರ್‌ಡುವಕ ಕೇರ್ ತಿರ್‌ಗಣೆ ಕೊಡ್‌ತಯಿಂಗ ಆಣೇ ಆಡ್, ಪೊಣ್ಣೇ ಆಡ್ ತೆರಮೆ ನೋಟಿತ್ ಪೊಂದೆಳಿಲ್ ಓರ್ "ಥ್ಯಾಂಕ್ಸ್" ಎಣ್ಣೆತೆ ಅವ ಪೋಪುಲೆ. ಅವಡ ಈ ಥ್ಯಾಂಕ್ಸ್‌ಕಾಯಿತ್ ಪಕ್ಕತ ಹೋಟೆಲ್‌ಕ್ ನೀರ್ ಬಲಿಪ ಮಕ್ಕ ಸಾವುಕಾರನುಂಡ್ ಬಯ್‌ಚಿಟ್ಟಂಡಕಲೂ ಪರೋಲೆಂದ್ ಸುಧಾಂಗ್ ನೀರ್ ಬಲ್‌ಚಿ ಕೊಡ್‌ಪದೂ ಇಂಜತ್!

ಸಾಧು ಅಂವಂಡ ಪುದಿಯ ರೂಮ್‌ಕ್ ಬಂದಲ್ಲಿಂಜ ಆದ್ ಕಣ್ಣ್ಕ್ ಬುದ್ಧವಳೇ ಸುಧಾ. ಪೊಲ್‌ಂಜೆತಿಕೆ ತಾಡಿ ಕೆರ್‌ತಂಡಿಪ್ಪಕ ಪಟ್ಟಿಲ್ ಕಣತೆರೆಲ್ ನೀರ್ ಬಲಿಪಯಿಂಜ ಸುಧಾನ ರೂಮ್‌ರ ಕಿಡ್‌ಕೆಂಜ ನೋಟಿಯಂಡ್ ದವಡೆ ಮುರ್‌ಚಂಡದೂ ಉಂಡ್. ಯೂನಿಫಾರಂ ಕೊಂಡಿ ಕೊಟುವಕ ಅಡಿಯತ ಕಣ್ಣ್, ಕೊಡಿಯತ ಕೊಂಡಿ ಕೊಟಿಯಂಡ್ ಸ್ಟೇಷನ್‌ಲ್ ಶಿಕ್ಸೆ ಅನುಭವಿಚಿಟ್ಟಿದೂ ಉಂಡ್.

ಒನ್ನಾಂದ್ ಬಿಂದಿಗೆ ಎಡ್‌ತಂಡ್ ಬಪ್ಪಕ ಓರ್ ಮಾಪಳಚಿ ನೀರ್ ಬಲ್‌ಚಂಡ್ ಉಂಡ್. "ಪೊಣ್ಣ್ ಪೊಣ್ಣ್‌ಕ್ ಪಗೇ"ಂದೆಣ್ಣಿಟ ಆ ಮಾಪಳಚಿ ನೀರ್ ಬಲ್‌ಚಿತ್ ಅವಡ ತಿರ್‌ಗಣೆನೋ ಕೇರ್‌ನೋ ಇರ್‌ಕಿಯಂಡ್ ನಡಂದತ್. ಇದ್‌ನ ನೋಟಿಯಂಡಿಂಜ ಸಾಧು, "ಇದಮ್ಮಾ ತಿರ್‌ಗಣೆ ಕೇರ್"ಂದ್ ಕಣತೆರೆಕೇ ಎಡ್‌ತಂಡ್ ಓಡಿ ಬಾತ್.

"ನೀಡ ಪೆದ ಎಂಥಮ್ಮಾ, ನೀನ್ ನೀರ್ ಬಲಿಪಕ್ ಕೇರ್‌ನ ಮನೆಂಜಿ ಕೊಂಡ ಬರಂಡ ನಾಡಲ್ಲಿಂಜೇ ಎಡ್‌ತಾ"ಂದ್ ಎಣ್ಣ್‌ಚಿ. ಸುಧಾ "ಆಕೂ"ಂದ್ ಮಂಡೆ ಆಟಿತ್, "ನಾಡ ಪೆದ ಸುಧಾ"ಂದ್ ಎಣ್ಣ್‌ಚಿ.

"ಓ . . . . ನಾಡ ಪೆದ ಸಾಧು"ಂದ್ ಎಣ್ಣಿತ್ ಚೆರಿಯ ತೆಳಿ ತೆಳಿಚತ್ ಸಾಧು.

ಅಕ್ಕಲೇ ದಂಡಾಳ್‌ರ ನೋಟತ್ ಪ್ರೇಮತ್‌ರ ಬಲೆ ನೆಜ್ಜಿಪೋಚಿ. ಅದ್ ದಿನ ದಿನೇ ನೆಜ್ಜಂಡೇ ಬಾತ್. ಅಪ್ಪವ್ವಂಡ ಒಪ್ಪಿಗೆ ಪೋಲೆ ಚಿನ್ನಂಗ್ ದಿನತ್ ಮಂಗಲವೂ ಆಚಿ.

ಆಚೇಂಗಿ ಸಾಧುರ ಅಪ್ಪವ್ವಂಗ್ ನಲ್ಲ ಕಾಂಚಾಣ ಉಳ್ಳಲ್ಲಿಂಜ ಮೂಡಿ ಕೊಂಡ ಬರೊಂಡೂಂದ್ ಆಸೆ ಇಂಜತ್. ತಾಮನೆನ ಒಡ್‌ಕಿಯಂಡೇ ಬಪ್ಪಂತ ಒಂದ್ ದಂಡ್ ತಂದೂ ಇಂಜತ್. ಆಚೇಂಗಿ ಸುಧಾಂಡ ಅಪ್ಪ ತಾಂಡ ಟೈಲರ್ ಚಾಕ್ರಿಲ್ ಮೂಂದ್ ನೇರ ಸಂಸಾರತ್‌ರ ಕೆಲದುಂಬ್‌ಚಿಡುವದೇ ಕಷ್ಟತ್. ಸಾಧುರ ತಂಗೆ ಚಾಯಿಯೂ ಇಂಜ್‌ಲೆ. ಓದಿತೂ ಇಂಜ್‌ಲೆ. ಬಂದ ತಂದೆಲ್ಲ ತಪ್ಪಿ ಪೋಪ ಇಂಜತ್. ಉಂಬಕಿಲ್ಲತವನೂ ಐಂಬದಾಯಿರ ಡೌರಿ ಕೇಪಯಿಂಜತ್! ಸಾಧುಕ್ ಮಂಗಲಾಪಕ ಡೌರಿ ಕೊಂಡಬಪ್ಪ ಮೂಡಿನೇ ತೇಡಿತ್ ಆ ಪಣತ್ ಮೋವಳ ಉಳ್‌ಪಿರೊಲೂಂದ್ ಪ್ಲಾನ್ ಮಾಡಿತಿಂಜದೆಲ್ಲಾ ಕೊಡಮರ್‌ಂಜಿ ಪೋಚಿ! ಇದ್‌ಂಗೆಲ್ಲಾ ಸುಧಾನೆ ಕಾರಣಾಂದ್ ಎಲ್ಲಾಡೊ ಮನಸ್ಸಲ್ ನಿಂದತ್.

ಒಂದ್ ದಂಡ್ ತಿಂಗ ಎಲ್ಲಾ ಚಾಯಿಲೇ ಇಂಜತ್. ಮೈಮಡಲ್ಲಿಂಜ ಒಂದೂ

ಕಾಟ್ವೆಲೇಂದ್ ಗೊತ್ತಾಪಕ ಮಾಂವ ಮಾಂವಿ ಮಚ್ಚಣಿಚಿಯಡ ಮೂಡ್ ಪೊಲತೇ ಆಚಿ. ಪೊಯಿಂದಂಡಿಂಜ ತಿತ್ತ್ ಎದ್ಲೆ ಕತ್ತುವಕೂ ಸುರು ಆಚಿ.

ಮಂಗಲಾಯಿತ್ ಆರ್ ತಿಂಗತ್ ಸಾಧುಕ್ ಕೇರಳ ಗೇಟ್‌ಕ್ ವರ್ಗ ಆಚಿ. ಮನೆಕ್ ಆಚಿಕೊಮ್ಮ ಮಾತ್ರ ಬಂದಿತ್ ಪೋಪ ಇಂಜತ್.

"ಕಾರ್‌ಕೊಟ್ಟಿಂಗಕ್ ಆಚೀಂಗಿಯೂ ಕೋಳಿ ಕುಣ್ಣಿರ ಮೀದ ಚೆನ್ನ ಕನಿಕರ ಇಕ್ಕು. ಆಚೀಂಗಿ ಡಾರಿಕ್ ಅಲ್‌ಂದ ಮಾಂವಿ ಮಚ್ಚಣಿಯಕ್ ಅಂತ ಕನಿಕರ ಇಪ್ಪುಲೇ"ಂದ್ ಲೋಕ ಅರ್‌ಂಜ ಸತ್ಯ.

ಮನೆಲ್ ಎಲ್ಲಾರೂ ಒಂದಾಯಂಡ್ ಪಿಂಞ್ ಸಾಧುರ ತಕ್ಕಕೂ ಬಲ್ಯ ಬೆಲೆ ಕಾಟ್ಟಿಯಂಡಿಂಜಾಲೆ. ಗೇಟ್‌ಲಿಪ್ಪಕ ಕಳ್ಳರ ಚೋದರ್‌ಂಜ ಸಾಧುಕ್ ತಾಂಡ ಪೊಣ್ಣಾರ ಗೋಳ್ ಅರಿಯುವಕ್ ಕಯ್ಯತಾಚೊ ಎನ್ನೊ. ಅಕ್ಕಣೆ ಸುಧಂಗ್ ಆರ್ ತಿಂಗ ದುಂಬಿತಿಂಜತ್. ಮನೆರ ಪಣಿ-ಪಾಲ್ ಒಂದ್‌ತೊಟ್ಟ್ ನೂರೋಳ ಅವಡ ಕೈಲೇ ಆಂಡು. ಮಾಂವಿ ಮಚ್ಚಣಿಚಿ ಇತ್ತ್ ಬುದ್ಧ ಕಡ್ಡಿನ ಅತ್ತ್‌ಡುಲೆ. ಎಚ್ಚಕ್ ನೈಚಕೋ ಮಾಂವಿ ಮಚ್ಚಣಾಚಿರ ಪೋರಮೆ ತೇರುಲೆ. ಕೇಕತ ತಕ್ಕೆಲ್ಲಾ ಕೇಕಂಡಿಯಾಚಿ. ತಾಂಗೋರ್ ತಾಮನೆ ಉಂಡ್‌ಂದೆಣ್ಣುವಾನೇ ಮರ್‌ಕಂಡಿಯಾಚಿ. ತಕ್ಕ ತಕ್ಕಕ್, "ಗತಿಕೆಟ್ಟಿ ನಿನ್ನ ಸೀಮೆಣ್ಣೆ ಬೂಕಿತ್ ಚುಟ್ಟಿತ್, ನಂಗಕೊತ್ತ ಮೂಡಿನ ಮಂಗಲ ಕಯಿಚಂದೆ ನಂಗಕ್ ನೆಮ್ಮಡಿ"ಂದ್ ಎಣ್ಣುವಾನ ಕೇಟಿತ್ ಸುಧಾಂಗ್ ತಾನ್‌ಇಂಞ್ ಬಾಳಿ ಬದ್‌ಕೊಂಡೊಂ ದೆಣ್ಣುವ ಆಸೆಯೇ ಬುಟ್ಪೋಚಿ.

ಒನ್ನಾಂದ್ ಸುಧಾ, "ನಾನ್ ತಿತ್ತ್‌ಲ್ ಕತ್ತಿತ್ ಚಾವಾಂಗ್‌ಇಂಞ್ ನೀರ್‌ಲ್ ಒಕ್ಕಿತ್ ಚಾವದೇ ಸುಖಾಂದ್ ಗೇನ ಮಾಡಿಯೇ..... ದಾರೂ ನನ್ನ ತೇಡತೀ"ಂದ್ ಓರ್ ಚೂರ್ ಪೇಪರ್‌ಲ್ ಎಲ್ಲ ಬೆಚ್ಚಿತ್ ಕಾಣತಾಯಿಪೋಚಿ. ಎಟ್ತ್ ದಿನ ಕಯಿಂಜಪಿಂಞ್ ಪೊಳೆಲ್ ಓರ್ ಪೊಣ್ಣಾಳ್‌ಚಿ ಚಾವು ಕಾಟ್ಪಚಿ.

ಸಾಧು ತಾನ್ ಕೊದ್‌ಚಿ ಮಂಗಲಾನ, ದುಂಬ್‌ನ ಕುಳಿಯಮೆಕರ್ತಿ ಪೊಣ್ಣಾನ ಕಳ್ಳಂದಾಂಡ ದುಃಖಿತ್‌ನ ಮರ್‌ಪಕ್ ಕಳ್ಳನೇ ನಂಬಂಡಿಯಾಚಿ. ಮೋವ ಚತ್ತ ದುಃಖಿ, ನಷ್ಟ ಅಪ್ಪವ್ವಂಗ್ ಅಲ್ಲತೆ ಬಾಕೆ ಮನೆಕಾರಕ್ ಅದೋರ್ ಘಟನೆ ಮಾತ್ರ ಆಚಿ.

ಸುಧಾ ಚತ್ತಿತ್ ಚೆನ್ನಂಗೇ ದಿನತ್ ಅಪ್ಪಂಗ್ ಒರೇ ಮೋವ ಆಯಿತುಳ್ಳ ಚೆಂಬಿನ ಸಾಧುಕ್ ತೊರ್‌ತತ್. ಚೆಂಬಿ ಪಣ ಎನ್ನೋ ಕೊಂಡ್‌ಬಾತ್. ಪಣತ್‌ರ ಕೂಡೆ ಗುಣ

ಕೊಂಡ ಬಪ್ಪಕ್ ಮರಾಂದ್‌ರಾತ್! ಅಂದಾಂಜಿ ಸಾಧುರ ಗುಣತೂ ಬದಲಾಚಿ. ಸ್ವೇಷನ್‌ಕ್ ಬಂದಿತ್ ಕಾಟ್ಪಾನಯಿನ ಚಾಟುವಕೂ ಬಡಿಪಕೂ ಸುರು ಮಾಡ್‌ಚಿ. ಕೂಟ್‌ಕ್ ಚೆಂಬಿ ಸುರುಲ್ ದಂಡ್ ಕುರಿ ಕುಳಾಚಿ ಪೋಚಿ. ಅಲ್ಲಿಂಜಿಪ್ಪರ ಮಕ್ಕಳೇ ಆಯಿಲೆ. ಇದೆಲ್ಲಾ ಒಂದಾಂಗೊಂದ್ ಕೊಯಿಂದಂಡ್ ಸಾಧುರ ನಲ್ಲಗುಣ ಪೊಗೆ ಬೂದಿಲೇ ಮುಚ್ಚಿಪೋಚಿ.

ಚೈನ್ ಕಳ್ಳ ಕಣ್ಣಿನ ಚವುಟಿತ್‌ಚ್ಚಿತ್ ಬೀಡಿ ಬಲ್‌ಚಂಡ್ ಅಳಾತತ್, ಎರ್‌ಕ್‌ನ ಕಳ್ಳ ಚೆನ್ನ ಚೊಕ್ಕಾಚಿ. ಗೇನ ಯಾಲೆಲೆಯೋ ಓಡ್‌ಚಿ. "ಛೆ, ನಾಡ ಮಿಞ್ಲಾತ ಪೊಣ್ಣಾ ಇಂಜಿತಿಂಜಕ ನಾಡ ಬದ್‌ಕೇ ಬದಲಾಪಕಿಂಜತ್. ನಾಡ ಅವ್ವ ತಂಗೆಯಡ ಡಾರಿರ ಆಸೆಕ್ ನಾನೂ ಒತ್ತ್ ಕೊಡ್‌ತಿತ್ ನಾಡ ಬಾಳಾರ ಬಟ್ಟೇ ಬದಲಾಯಿ ಪೋಚಲ್ಲಾ"ಂದ್ ಗೇನ ಮಾಡಿಯಂಡ್ ಕೆಟ್ಪೋನ ಬೀಡಿನ ಆದ್ಯ ಕತ್ತ್‌ಚಿಟ್ಟತ್.

ಪೇಟೆಲ್ ಗಣಪತಿ ಬುಡುವ ಮೆರವಣಿಗೆರ ಕೂತ್ ಪೊಯಿಲ್ ಕೇಪಯಿಂಜತ್. ಪಿಟಾಕಿರ ಸದ್ಲೆ ಕೆಮಿ ಅಡ್‌ಂದ್ ಪೋಪನ್ನಕೆ ಕೇಪಯಿಂಜತ್. ಸ್ವೇಷನ್‌ಲಿಂಜ ಮಪ್ಪಿ ಪೋಲೀಸ್‌ಕಾರ, "ಸರ್, ನಾನ್ ಚೆನ್ನ ನೇರ ಮೆರವಣಿಗೆ ನೋಟಿತ್ ಬರಡಾ"ಂದ್ ಕೇಟಿತ್. "ಹಾಂ ಬೆರಿಯ ಬಂದ್‌ರ್, ನೋಟಿಯಂಡೆ ಕೂಡಿರ್‌ತೆ. ಒಯಿಂಬದ್ ಗಂಟೆಕ್ ನಾಕ್ ಪೋಂಡು" ಎಣ್ಣಾಚಿ ಸಾಧು ರೈಟ್.

ಪೋಲೀಸ್‌ಕಾರ ಪೋಯಿತ್ ಅಂಜಿ ಮಿನಿಟ್‌ಲ್ ಓಡಿ ಬಾತ್. "ಸರ್ ಗಲಾಟೆ ಸುರು ಆಯಿರ್‌ತ್. ಕೋಮು ಗಲಭೆಲೋ. ದಾರೋ ಮೆರವಣಿಗೆಲ್ ಕಲ್ಲ, ಚಪ್ಪಲ್ ಕನ್‌ಚತ್‌ಲೊ. ಲಾರಿ ಚಾರ್ಜ್ ಆಯಂಡುಂಡ್"ಂದ್ ಎಣ್ಣಾಚಿ.

ದಂಡ್ ಪೋಲೀಸ್‌ಕಾರಳ ಸ್ವೇಷನ್‌ಲ್ ಬುಟ್ಟಿತ್, ದಂಡಾಳಾನ್ ಕೂಟಿಯಂಡ್ ಸಾಧು ಪೇಟೆಕ್ ಓಡ್‌ಚಿ. ಪೋಲೀಸ್ ಓರ್ ಬರಿಲ್ ಲಾರಿ ಚಾರ್ಜ್ ಮಾಡುವಕ ಇಇಸೋರ್ ಬರಿಲ್ ಕಲ್ಲ, ಸೋಡಾಕುಪ್ಪಿ ಬೂವ ಇಂಜತ್. ಸಾಧುರ ನೆತ್ತಿಕೆ ಬುದ್ಧತ್ ಜಲ್ಲಿ ಕಲ್ಲೊಂದ್. ಸ್ಪಿಂಕಲ್ ಮಾಡುವಕ ಜೆಟ್‌ಲ್ ನೀರ್‌ಪಾರಟ ಪಾರ್‌ಚಿ ಚೋರೆ. ಅವ್ವಯ್ಯಾಂದ್ ಕೂತ್ ಕೊಡ್‌ತಿತ್ ಗಾಯಕ್ ಕೈಪೊತ್ತಿಯಂಡ್ ಕುತ್ತಿ ಅಳಾತತ್. ಏಕ್‌ದಂ ಪೋಲೀಸ್ ಅವನ ನೇತಿಯಂಡ್ ಆಸ್ಪತ್ರೆಕ್ ಓಡ್‌ಚಿ.

ಸಾಧು ಕಣ್ಣ್ ಬುಟ್ಟ್ ನೋಟುವಕ ಆಸ್ಪತ್ರೆಲುಳ್ಳದ್ ಗೊತ್ತಾಚಿ. ಮೇಲೆಲ್ಲ ಚೋರೆಲ್ ಮುಕ್ಕಿತ್ ಎಡ್‌ತನ್ನೆ ಕೆ ಇಂಜತ್. ಅಂವೊಂಡ ಸ್ವೇಷನ್‌ರ ಸಬ್‌ಇನ್ಸ್‌ಪೆಕ್ಟರ್ ಅಣ್ಣನಾಯಕಂಗೂ ಪೆರ್ತ್ ಪೊಯ್ತಾಯಿತ್ ಅಲ್ಲಿಯೆ ಅಡ್ಡಿಟ್ ಆನದ್ ಸಾಧುಕ್ ಗೊತ್ತಾಚಿ.

ಎಸ್.ಐ. ಅಣ್ಣನಾಯಕಂಡ ಮಂಡೆರೊಳ್‌ಲ್ ಒಂದೂ ಇಲ್ಲೆಂಗಿಯೂ ಯೂನಿಫಾರಂ ಪಿಣ್ಣ ಕೈಲುಳ್ಳ ತಂಡ್‌ರ ಬಲತ್‌ಲ್ ದಿನ ಕೈಪಯಿಂಜತ್. ಉಂಬುಳ್‌ರ ಮಾದರಿ ಜನಡ ತಡಿಂಜ ಚೋರೆ ಊತುವಯಿಂಜತ್. ರಿಜರ್ವೇಶನ್ ಕೋಟಾತ್ ನೈಪು ಇಲ್ಲತೆ ಚಾಕ್‌ರಿ ಕೊಟ್ಟಿ ಪೋಚಿ. ಸ್ಟೇಷನ್‌ರೊಳ್‌ಕ್ ದಾರೇ ಬರಡ್, ಏದ್ ಕಾರ್ಬಾರ್‌ಕೆ ಬರಡ್ ಅವನ ಏಕವಚನ ಅಲ್ಲತೆ ಬಹುವಚನತ್‌ಲ್ ಕಾಕ್‌ನ ದಾಖಲೆ ಇಲ್ಲೆ.

ಸ್ಟೇಷನ್‌ಲ್ ಸಾಧು ರೈಟ್, ಈ ನಾಯಕಂಡ ಚೇಲ. ಎಸ್.ಐ.ರ ಮನೆಕ್ ಬೋಂಡಿಯಾನೆಲ್ಲ ಎತ್ತೆಚಿಡುವ ಮಂಡೆಪುಡಿಯನೂ, ದಳುಳಿಯೂ ಈ ಸಾಧು ರೈಟ್‌ರ್. ಅದ್‌ಲ್ ರೈಟ್‌ರ್‌ಕೂ ಲಾಭ ಇಂಜತ್. ಅನ್ನನಾಯಿತ್ ಇವು ದಂಡಾಳೂ ಒಂದಾಯಂಡ್ ಬಾಕಿ ಪೋಲೀಸ್‌ಕಾರಳ ಗೋಳ್ ಕೆಟ್ಟುವದೂ ಇಂಜತ್. ಇನ್ನತ ಎಸ್.ಐ. ರ ಜಿಂವತ್‌ನ ಬದ್‌ಕ್‌ಚಿಡುವದ್ ಸಾಧುರ ಕರ್ತವ್ಯ ಆಯಿತಿಂಜತ್. ಆ ನೇರತ್ ಎಸ್.ಐ. ನಾಯಕಂಡ ಪೆದ ಕೇಟಕ ಚೋರೆ ಕೊಡ್‌ಪಂಪನೂ ಅವ ಅನ್ನನೇಂಗಿ ಚಾವಡ್‌ಂದ್ ಎಣ್ಣುವ.

ತಪಸ್ವಿಕ್ ಪುದಿಯ ತತ್ತ ಉದ್‌ಚನ್ನೆ ಸಾಧುಕೋರ್ ಐಡಿಯಾ ಉದ್‌ಚತ್. ಸ್ಟೇಷನ್‌ಲುಳ್ಳ ಚೈನ್ ಕಳ್ಳನ ಎನ್ನನೆಯೂ ಆಸ್ಪತ್ರೆಕ್ ಅಡ್ಡಿಟ್ ಮಾಡೊಂಡು. ಆ ಕಾರ್ಬಾರ್ ಇಕ್ಕಲೇ ಮಾಡಿರುವಂಜಿ ಓರ್ ಪ್ರಯತ್ನ ಮಾಡಿತ್ ನೋಟುವೀಂದ್ ಗೇನ ಮಾಡಿತ್ ಕೂಡೆನ್ನೆ ಪೋಲೀಸ್ ಮಾದಪ್ಪನ ಕಾಕ್‌ಚಿಟ್ಟತ್.

"ಮಾದಪ್ಪ, ನೀನ್ ಇಕ್ಕಲೆ ಸ್ಟೇಷನ್‌ಕ್ ಪೋಯಿತ್ ಆ ಚೈನ್ ಕಳ್ಳನ ಕೂಟಿಯ ಬಂದಿತ್ ಅಡ್ಡಿಟ್ ಮಾಡಿರ್. ಪೇಟೆರ ಗಲಾಟೆಲ್ ಪೋಯಿತಾನಂವೋಂದ್ ಜಾರಿಯವಲೂ"ಂದೆಣ್ಣೆಚಿ.

ಸರ್, ಆ ಕಣ್ಣ ಚೆನ್ನ ಉಷಾರಾಯಿತ್. ಅವ ಕಳ್ಳನಲ್ಲಾಂದ್ ತೋಂದುವ. ಅವಂಡ ಚೇಲತ್ ಬೆಡ್‌ಶೀಟ್‌ರೊಳ್‌ಲ್ ಚೆನ್ನಂಗ್ ಪುಸ್ತಕ ಉಂಡ್. ಕಾಲೇಜ್ ಪ್ರಿನ್ಸಿಪಾಲ್ ಸೀಲ್‌ಟ್ಟಿತ್ ಕೊಡ್‌ತ ಓರ್ ಸರ್ತಿಫಿಕೇಟೂ ಉಂಡ್. ನಂಗ ದುಡ್‌ಕಿರ್‌ತ್‌ಂದ್ ತೋಂದುವ" ಮಾದಪ್ಪ ಎಣ್ಣೆಚಿ!

"ನಿನ್ನ ಅದೆಲ್ಲಾ ದಾರ್‌ರೇ ಕೇಟಂವೊ? ನಾನ್ ಎಣ್ಣೆನಚ್ಚಕ್ ಮಾಡ್. ನಾಕ್ ಬುದ್ಧಿವಾದ ಎಣ್ಣುವಕ್ ಎತ್ತಿಪೋಯಿತ್....! ಬೆರಿಯ ಪೋ"ಂದೆಣ್ಣೆಚಿ.

ಮಾದಪ್ಪನೂ, ಹಮೀದ್ ಪೋಲೀಸ್ ಕೂಡಿತ್ ಸ್ಟೇಷನ್‌ಲಿಂಜ ಆ ಕಣ್ಣನ ಪೂರ್ತ ಬಂದಿತ್ ಆಸ್ಪತ್ರೆಲ್ ಇಟ್ಟತ್. ಸಾಧು ಡಾಕ್ಟರ್, ನರ್ಸಡ ಕೂಡೆ ತಕ್ಕ ಪರ್‌ಂದಿತ್



ಆ ಕ್ಷಣದ ಚೋರೆ ಏದ್ ಗ್ರೂಪ್‌ಂದ್ ನೋಟುವಕುಳ್ಳ ಏರ್ಪಾಡ್ ಮಾಡ್‌ಚಿ.

"ಓ ಪಾಸಿಟಿವ್"ಂದ್ ಗೊತ್ತಾಪಕ ಸಾಧುಕ್ ಕುಶಿ ಆಚಿ. ಆಚೇಂಗಿ ಡಾಕ್ಟರ್‌ರ ಮೂಡಲ್ ಚೆನ್ನಂಗ್ ನೆಟ್ಟಲ್ ಕಾಂಬಯಿಂಜತ್. ರೈಟರ್ ಅಪ್ಪರ ಕೂಟಿಯ ಪೋಯಿತ್ ಗುಟ್ಟ್ ಪರಂದಿತ್ ಬಾತ್.

ಹಮೀದ್ ಪೊಲೀಸ್ ಮಾದಪ್ಪನ ಕಾಕಿತ್, "ಮಾದಪ್ಪಣ್ಣ ನಂಗಡ ರೈಟರ್ ಬೋಂಡತ ಕಾರ್ಬಾರ್ ಮಾಡಿಯಂಡುಂಡ್‌ಂದ್ ತೋಂದುವ. ನಂಗಡ ಮಂಡೆಕ್ ಎಡ್‌ತ ಬಂದಿತ್ ನಂಗಡ ಕೂಳ್‌ಕ್ ಮಣ್ಣ್‌ಟ್ಪರುವಕ್ ಮಾಡಿರುವೋ ಎನ್ನೋ"ಂದ್ ಎಣ್ಣೆಚಿ.

"ನಾಕೂ ನೀಡನ್ನಕೇ ಡೌಟ್ ಬಂದಂಡುಂಡ್‌ರೇ ಹಮೀದ್. ಆ ಕ್ಷಣ್ ಚೈನ್ ಕಳ್ಳನಲ್ಲಾಂದೇ ತೋಂದುವ. ನಂಗ ಇಕ್ಕ ತಕ್ಕ ಪರ್‌ಂದತೇಂಗಿ ತೊಂದರೆ ಆಕು. ಮುಂಡತಿರ್ ಬಾ"ಂದೆಣ್ಣಿತ್ ಅಪ್ಪರ ಪೋಚಿ. ದಾರೂ ಗೆತಿ ಇಲ್ಲತ ಕ್ಷಣದ ತಡಿಂಜ ಚೋರೆ ಊತುವಕ್ ನೋಟ್‌ಚಿ. ಎಸ್.ಐ.ರ ಕೆಟ್ಟಿ ಚೋರೆ ಒಕ್ಕಿಪೋನಾಂಗ್, ಕ್ಷಣದ ನಲ್ಲ ಚೋರೆನ ದುಂಬ್‌ಚಿಟ್ಟಿತ್ ಅವಂಡ ತಡಿನ ದುಂಬ್‌ಚಿಟ್ಟಿತ್. ರೈಟರ್‌ಕೂ ಬೋಂಡಿಯಾನ ಚೋರೆ ಕ್ಷಣದ ತಡಿಂಜ ಕ್ಷಣ್‌ಚಿ. ಕ್ಷಣದ ತಡಿ ಚಿಪ್ಪಿತ್ ಚಾಡ್‌ನ ಕೈಬುರನ್ನಕೆ ಆಚಿ. ಕ್ಷಣದ ನೆರ್‌ಕಲೂ ನಿಂದ್‌ಪೋಚಿ.

ಎಸ್.ಐ. ನಾಯಕ್ ಉಷಾರಾಚಿ. ತನ್ನ ಬದ್‌ಕೆಚಿಟ್ಟಿತ್ ಚೋರೆ ತಂದ ಸಂಗತಿ ಎಸ್.ಐ.ಕ್ ಗೊತ್ತಾಚಿ. ತಾಂಡ ಕಷ್ಟತ್ ಸಹಾಯ ಮಾಡ್‌ನ ಡಾಕ್ಟರ್, ನರ್ಸ್ ಪಿಂಞ ಸಾಧುಕ್, "ನಿಂಗಡ ಸೇವೆನ ನಾನ್ ಮರ್‌ಪುಲೇ"ಂದ್ ತಕ್ಕ ಕೊಡ್‌ತತ್.

ಈ ಘಟನೆ ನಡಂದಿತ್ ದಂಡ್ ದಿನತ್ ಕೋಟೆ ಜೂನಿಯರ್ ಕಾಲೇಜಿರ ಪ್ರಿನ್ಸಿಪಾಲ್, ಓರ್ ಎಡೆ ಬಯತ್‌ರ ಪೊಣ್ಣಾಳ್ ಸ್ಟೇಷನ್‌ಕ್ ಬಾತ್. ಆ ಪೊಣ್ಣಾಳ್‌ರ ಮೋಂವೊ ಪಿ.ಯು.ಸಿ.ಲ್ ಓದಿಯಂಡುಳ್ಳ ಕ್ಷಣ್ ವಾಪಾಸ್ ಮನೆಕ್ ಬಂದಿತಿಲ್ಲೆ"ಂದ್ ಪ್ರಿನ್ಸಿಪಾಲ್ ಪ್ರಕಾರ್ ಎಳ್ಳಿ ಕೊಡ್‌ತತ್. ಆ ಅರ್ಜಿ ಇನ್ನನೆ ಇಂಜತ್.

ಮುತ್ತೂರ್ ಎಸ್. ಪ್ರಕಾಶ್ 17 ಬಯತ್‌ರ ಪಿ.ಯು.ಸಿ. ವಿದ್ಯಾರ್ಥಿ ಕೋಟೆ ಜೂನಿಯರ್ ಕಾಲೇಜ್‌ಲ್ ಓದಿಯಂಡಿಂಜತ್. ಗಣಪತಿ ಬುಡುವಂದ್ ವಿಘ್ನೇಶ್ವರ ಸೇವಾ ಸಮಿತಿಕಾರ ಮಕ್ಕಕ್ ಭಾಷಣ ವೈಪೋಟಿ ಬೆಚ್ಚಾನಗುಂಡ್, ಕಾಲೇಜಿರ ಓರ್ ಗೆಟ್ಟಿಗ ಭಾಷಣಕಾರ ಆಯಿತಿಂಜ ಪ್ರಕಾಶನ ಅವಂಡ ಸ್ಕೂಲ್ ಮಕ್ಕೆಲ್ಲಾ ಚಂದಾ ಇಟ್ಟಿತ್ ವೈಪೋಟಿಕ್ ಆಯೆಚಿತಿಂಜತ್. ಪ್ರಕಾಶ್ ಅಂದೇತ್‌ರ ವೈಪೋಟಿಲ್ ಕೂಡಿಯಾಡಿತ್

ಒಂದನೆ ಇನಾಂಪಡ್‌ಂದಿತಿಂಜತ್. ಆಚೇಂಗಿ ಬಯ್ಯ ಮನೆಕ್ ಪೋಯಿತ್ ಎತ್ತಲೆ. ಅಂವಂಡ ಸಿನೇತಂಡ ಸೈಕಲ್ ಕೇಟಂಡ್ ಪೇಟೆಕ್ ಬಂದಿತಿಂಜತ್. ಪ್ರಕಾಶ್ ಪತ್ತನೆ ಕ್ಲಾಸ್‌ಲ್ ಜಿಲ್ಲೆಲ್ ಒಂದನೆ ರ್ಯಾಂಕ್ ಪಡ್‌ಂದಂವ.

ಎಸ್.ಐ. ಆಸ್ಪತ್ರಂಜ ಬುಡ್‌ಗಡೆ ಆಯಿತ್ ಸ್ಟೇಷನ್‌ಕ್ ಬಾತ್. ಗಣಪತಿ ಮೆರವಣಿಗೆರ ಗಲಾಟೆ ವಿಚಾರಣೆ ಮಾಡುವಕ್ ಸಿ.ಐ. ಬಂದಿತಿಂಜತ್. ಅದೇ ಸಿ.ಐ. ಅಪ್ಪಯ್ಯ, ಈ ಪ್ರಕಾಶ್‌ರ ಪುಕಾರ್‌ರ ವಿಚಾರಣೆನ ನಡತುವಕ್ ಸುರು ಮಾಡ್‌ಚಿ. ಮಾದಪ್ಪ ಪಿಳ್ಳಾ ಹಮೀದ್‌ನ ಕಾಕಿತ್, "ಅಂತ ಮಕ್ಕ ದಾರೆಂಗಿ ಮೊನಿಯಾಂದೆತೆರ ಗಲಾಟೆಲ್ ಕೆಣ್‌ಂಜಿತ್ ಆಸ್ಪತ್ರೆಲ್ ಉಂಡಾ"ಂದ್ ಕೇಟತ್.

ಹಮೀದ್, ಮಾದಪ್ಪಂಡ ಮೂಡ್ ನೋಟ್‌ಚಿ. ಮಾದಪ್ಪ ಬಿಕ್ಕಿ ಕಳಚತ್. ಇದ್‌ನ ಕಂಡ ಸರ್ಕಲ್ "ಎನ್ನಂಗಾರೆ ಬಿಕ್ಕಿ ಕಳಪ? ಸತ್ಯ ಎಣ್ಣೆ, ನಿಂಗಡೆಲ್ಲ ಗ್ರಾಚಾರ ಬುಡ್‌ತಿರುವೀ"ಂದೆಣ್ಣೆ ಚಿ.

ಸರ್, ಸುಮಾರ್ 17 ಬಯತ್‌ರ ಓರ್ ಕ್‌ಣ್ಣ ಮೆರವಣಿಗೆ ಬಂದ ರೋಡ್‌ಲ್ ಬುದ್ಧಿತಿಂಜತ್. ದುಂಬ ಪೊಯಿತಾಯಿಟಾನುಂಡ್ ಆಸ್ಪತ್ರೆಲ್ ನಂಗ ಆಡ್ಡಿಟ್ ಮಾಡಿತ್.

ಸರ್ಕಲ್ ಆ ಪೊಣ್ಣಾಳೊನೋ, ಪ್ರಿನ್ಸಿಪಾಲ್‌ನೋ ನೋಟಿಯಂಡ್ ಕ್‌ಣ್ಣಂಡ ಚೇರೆನ ಕೇಟತ್. ಪ್ರಿನ್ಸಿಪಾಲ್ ಎಣ್ಣೆ ಚಿ, "ಕ್‌ಣ್ಣ ಅಂಜರೆ ಅಡಿ ಎತ್ತರ ಉಂಡ್. ಸಾಧಾರಣ ಬೊಳಪು. ಅಂದ್ ಖಾಕಿ ಸುರಾಲ್, ಬೊಳಪು ಶರ್ಟ್ ಇಟ್ಟಿತಿಂಜತ್. ಕ್‌ಣ್ಣ ತಕ್ಕ ಸುರು ಮಾಡ್‌ವಕ ಮಾತ್ರ ಒಮ್ಮಕೇ ಪರಿಯುಲೆ. ಚೆನ್ನಂಗ್ ಬಿಕ್ಕುವ. ನಾಲಂಜಿ ಶಬ್ದ ಉಚ್ಚಾರಣೆ ಮಾಡಿತ್ ಪುಡ್‌ತ ಕ್‌ಟ್ವನ ಪಿಂಞ ಸಲೀಸಾಯಿತ್ ತಕ್ಕ ಪರಿಯುವ. ನೆತ್ತಿರ ಬಲತೆ ಬರಿಲ್ ಓರಿಂಚಿ ಉದ್ದತ್‌ರ ಪಳೀಯ ಗಾಯತ್‌ರ ಕಲೆ ಉಂಡ್. ಅಂವಂಡ ಕೈಲ್ ನಂಗ ಸ್ಕೂಲ್‌ಂಜ ಕೊಡ್‌ತ ಪರಿಚಯ ಕಾಗದ ಉಂಡ್. ಅಲ್ಲತೆ ಭಾಷಣ ಪೈಪೋಟಿಲ್ ಕ್‌ಟ್ವನ ಇನಾಮೂ ಇಕ್ಕು" ಎಣ್ಣೆತ್ ತಕ್ಕ ನಿಪ್ಪಾಚಿಟ್ಟಿತ್. ಕ್‌ಣ್ಣಂಡ ಅವ್ವ ಸೆರಗಲ್ ಕಣ್ಣೀರ್ ತ್‌ಟಿಯಂಡಿಂಜತ್.

ಸಿ.ಐ. ಪೋಲೀಸ್‌ಕಾರಳ ತಿರಾಕಿ ಮರ್‌ಚಿ ವಿಚಾರಣೆ ಮಾಡುವಕ್ ಕ್‌ಣ್ಣ ಸೈಕಲ್‌ಲ್ ಬಂದದ್, ಚೀಲ, ಪುಸ್ತಕ, ಸರ್ಟಿಫಿಕೇಟ್ ಇಂಜದೆಲ್ಲಾ ಪೊರ ಬುದ್ಧತ್. ಸಾಧು ರೈಟರ್‌ಕ್ ತೊಂಡೆ ಕೆಟ್ವನನ್ನೆ ಆಚಿ. ಸೈಕಲ್‌ಲ್ ಇಂಜ ಬ್ಯಾಗ್‌ಲ್ ಪ್ರಿನ್ಸಿಪಾಲ್‌ರ ಕಾಗದ, ಭಾಷಣ ಪೈಪೋಟಿರ ಸರ್ಟಿಫಿಕೇಟ್, ನೂರ್ ಉರ್‌ಪಿಯ ಇನಾಮ್ ಕೊಡ್‌ತ ಖಾಲಿ ಕವರೂ ಕೆಟ್ವಚಿ ! ಇನ್ಸ್‌ಪೆಕ್ಟರ್ ಇದ್‌ನೆಲ್ಲಾ ನೋಟಿತ್ ಪ್ರಿನ್ಸಿಪಾಲ್‌ರ ಕೂಡೆ

ತಕ್ಕ ಪರ್ಂದಂಡಿರಣೆ ಸಾಧು ರೈಟರ್ ಪೊಲೀಸ್‌ಕಾರಳ ಕಣ್ಣ ಸನ್ನೆಲ್ ಪೊರಮೆ ಕಾಕಿತ್, "ಎಲ್ಲಿಯೇಂಗಿ ನಡ್ಂದ ಸಂಗತಿನ ಬಾಯಿ ಬುಟ್ಟಾರ್ತಿ. ಇದೆಲ್ಲಾ ಚಿಲೈ ಸಂಗತಿ ಬೊತ್ತತ್ತೀ"ಂದೆಣ್ಣೆ ಚಿ.

"ನಂಗಕ್ ಅಚ್ಚಕ್ ಗೊತ್ತಿಲ್ಲಿಯಾ ಸಾರ್? ಆಚೇಂಗಿ ಆಸ್ಪತ್ರೆಲ್ ಕ್ಕಣ್ಣನ ಕೇಪಕ, "ಎನ್ನೇಂಗಿ ಎಣ್ಣೆರತೇಂಗಿ ಎನ್ನ ಮಾಡನಾ?"ಂದ್ ಹಮೀದ್ ಕೇಟತ್.

"ಅದ್‌ಂಗೆಲ್ಲ ಬೊತ್ತತ್ತಿ, ಕ್ಕಣ್ಣ ತಕ್ಕ ಪರಿಯುವ ಸ್ಥಿತಿಲ್ ಇಲ್ಲೆ. ನಾಳೆ ಪೊಲಾತುಲೇ"ಂದ್ ಡಾಕ್ಟರ್ ಎಣ್ಣೆ ಚಿ. ನಂಗಡ ಎಸ್.ಐ. ಅದ್‌ಂಗುಳ್ಳ ಎಲ್ಲಾ ಏರ್ಪಾಡ್ ಮಾಡಿತ್‌ಂದೆಣ್ಣೆತ್ ಬೀಡಿ ಕತ್ತಚಿಟ್ಟತ್.

ಆಸ್ಪತ್ರೆ, ಪೊಲೀಸ್ ಸ್ಟೇಷನ್‌ರ ಪಕ್ಕಲೇ ಉಳ್ಳ. ಸಿ.ಐ. ಸಾಧು ರೈಟರ್‌ನ, ಕಾನ್‌ಸ್ಟೇಬಲ್ ಮಾದಪ್ಪನೋ ಕಾಕಿತ್ "ನಿಂಗ ಆಸ್ಪತ್ರೆಕ್ ಬಾರಿ, ನಾನ್ ಇಯಂಗಳ ಕೂಟಿಯಂಡ್ ಜೀಪುಲ್ ಬಪ್ಪಿ. ಕ್ಕಣ್ಣ ಎನ್ನನೆ ಉಂಡ್‌ಂದ್ ನೋಟಿತ್ ಅವಂಡ ಸ್ಟೇಟ್‌ಮೆಂಟ್ ಎಡ್‌ತವನಾ"ಂದ್ ಎಣ್ಣೆ ಚಿ.

ಆಸ್ಪತ್ರೆಲ್ ಉಳ್ಳ ಕ್ಕಣ್ಣಂಡ ಪಕ್ಕ ಎಲ್ಲಾರು ಬಂದಿತ್ ಎತ್ತಚಿ. ಮೋವನ ಕಂಡಿತ್ ಅವ್ವ, ಮೋವಂಡ ಮೇಲೆ ಬುದ್ಧಿತ್ ರಂಪ ಇಟ್ಟಂಡ್ ಮೊರ್ಡುವಕ ಕಾಲೇಜ್‌ರ ಪ್ರತಿಭಾವಂತ ವಿದ್ಯಾರ್ಥಿರ ಸ್ಥಿತಿ ಕಂಡಿತ್ ಪ್ರಿನ್ಸಿಪಾಲೂ ಮೊರ್ಡತ್.

ಆಸ್ಪತ್ರೆರ ಕೇಸ್ ಶೀಟ್‌ಲ್, "ಕ್ಕಣ್ಣಂಡ ಮರ್ಮಾಂಗಕ್ ಭಾರೀ ಪೊಯಿತಾಯಿತ್, ಬುದ್ಧಿಲ್ಲಿ ಕೂ ಕೂಟಿ ಬೂಟ್‌ಲ್ ಚೌಟಿತ್ ಕಿಡ್ಡಿ ಒಡ್‌ಂದ್ ಪೋನಾನಗುಂಡ್ ಉಚ್ಚಿಲ್ ಚೋರೆ ಪೋಯಂಡ್ ಉಂಡ್"ಂದ್ ಎಳ್ಳನಾನ ಡಾಕ್ಟರ್, ಸಿ.ಐ. ಅಪ್ಪಯ್ಯಂಗ್ ಎಣ್ಣೆಯಂಡ್ ಇಂಜಾನ ಕೇಟಿತ್ ಸಾಧು, ಮಾದಪ್ಪ ಅಪ್ಪರಿಪ್ಪರ ಮೂಡ್ ನೋಟಿಯಂಡತ್. "ಇದೆಲ್ಲಾ ಪೊಲೀಸ್‌ಕಾರಕ್ ಓರ್ ವಲ್‌ಂಜಿ ಕೊಂದ ಲೆಕ್ಕಾ"ಂದ್ ಸಾಧು ರೈಟರ್ ಮನಸ್ಸಲ್ ಗೇನ ಮಾಡಿಯಂಡತ್!

ಇನ್ಸ್‌ಪೆಕ್ಟರ್ ಅಪ್ಪಯ್ಯಂಗ್ ಆ ಕ್ಕಣ್ಣಂಡ ಅವ್ವ ಉರ್‌ಂಡಿಯಂಡ್ ಮೊರ್ಡುವಕ ಅವಡ ಬೋಳೆರ ಕರ್ತಮಣಿ ಕಂಡತ್.

ನೀಡ ವಡಿಯ ದಾಡ್ಡು? ಎಲ್ಲಿ ಉಂಡ್? ಇಲ್ಲಿಕ್ ಎನ್ನಂಗ್ ಬಂದ್‌ಲೇಂದ್ ಕೇಟತ್!

ಆ ಪೊಣ್ಣಾಳ್ ಬಿಕ್ಕಿ ಬಿಕ್ಕಿ ದುಃಖ್‌ಚಿಟ್ಟ್ ಮೊರಟಂಡ್, "ನಾನ್ ಪದಿನೆಟ್ಟ್

ಕಾಲಕ್ ಬಯ್ಯ ಮಂಗಲಾನ. ಡೌರಿ ಎಡ್‌ತಂಡ್ ಬಂದಲೇಂದ್ ಮಾಂವ, ಮಾಂವಿ, ಮಚ್ಚಣ್‌ಚಿಯಡ ಹಿಂಸೆ ತಡ್‌ಪಕಯ್ಯತೆ ಏಳ್ ತಿಂಗ ಕುಳಿಯಮೆಲ್ ಒನ್ನಾಂದ್ ಪೊಳೆ ಪಾರುವಕ್ ಬಂದವ, ಧೈರ್ಯ ಬರತೆ ಎನ್ನನೆಲ್ಲೋ ಮಂಗಲೂರ್‌ಕ್ ಎತ್ತಿತ್ ಮೂಡಿ ಮಕ್ಕಡ ಹಾಸ್ಪೆಲ್‌ಲ್ ಅಡಿಗೇಕರ್ತಿ ಆಯಿತ್ ಕೂಡಿತ್ ಬದ್‌ಕಿಟ. ದಂಡ್ ಕಾಲಕ್ ಬಯ್ಯ ಇಲ್ಲಿಂಜ ಪದಿನಂಜಿ ಮೈಲ್ ದೂರತಾರ ಮಣ್ಣೂರ್‌ಲ್ ಬಂದಿತ್ ಕೂಡಿಯಂಡ್"ಂದ್ ತಾಂಡ ಬದ್‌ಕಾರ ಕಥೆನ ಎಣ್ಣೆಚಿ.

ನೀಡ ವಡಿಯ ದಾರ್? ಏದ್ ಊರ್‌ಕಾರನಮ್ಮಾ?

"ಅವು ಮುತ್ತೂರ್‌ಕಾರ. ಪೋಲೀಸ್‌ಕಾರನಾಯಿತಿಂಜತ್. ಪೆದ ಸಾಧೂ"ಂದ್ ಎಣ್ಣೆಚಿ.

ಈ ತಕ್ಕನ ವಾರ್ಡ್‌ರ ಪೊರಮೆ ಕೇಟಂಡ್ ಇಂಜ ರೈಟರ್ ಸಾಧು ನರಿಪೂದ ವರ್‌ಂದನ್ನೆ ವಾರ್ಡ್‌ರೊಳ್‌ಕ್ ಪಾರ್‌ಚಿ! ಆ ಪೊಣ್ಣಾಳ್‌ರ ಮೂಡ್‌ನೊಮ್ಮ ನೋಟೊಚಿ.

"ಅಕ್ಕು, ಅವಳೇ....!"

"ನಾನ್ ಪೋಲೀಸ್ ರೈಟರ್.... ಯೂನಿಫಾರಂ ಉಂಡ್. ಎದಿಕೆ ಮೇಲಧಿಕಾರಿಯ, ಡಾಕ್ಟರ್ ಉಂಡ್"ಂದ್ ಅರಿಯತೆ, "ಉಯ್ಯ ನಾಡ ಸುಧಾ"ಂದ್ ತಬ್ಬಿ ಪುಡ್‌ಚತ್. ಅನ್ನನೇ ಕುತ್ತಿ ಅಳತಂಡ್ ಅವಡ ದಂಡ್ ಕಾಲನೋ ಪುಡ್‌ಚಂಡತ್. ಎಲ್ಲಾರೂ ಬೊರ್‌ಂಡಿ ಪೋಚಿ!

ಅಕ್ಕಣ್‌ಕ್ ಕಟ್ಪಲುಳ್ಳ ಕಣ್ಣ ಮೆಲ್ಲೆ ಕಣ್ಣ ತೊರ್‌ಂದಿತ್, "ಅಮ್ಮಾ.... ದಾರೋ ಸಾಧು ಎಣ್ಣುವ ರೈಟರ್ ಈ ಸ್ಟೇಷನ್‌ಲ್ ಉಂಡ್‌ಂದ್ ಗಣಪತಿ ಮಂಟಪತ್ ಎಣ್ಣುವ ಇಂಜತ್. ನಾಡಪ್ಪನೇ ಆಯಿತಿಕ್ಕುವಾಂದ್ ಅರ್‌ಂಜಿ ನೋಟುವೀಂದ್ ಸ್ಟೇಷನ್‌ಕ್ ಪೋನ. ಇನ್ನನೆ ಆಯಿಪೋಚಿ" ಎಣ್ಣೆತ್ ಅಲ್ಲಿಯೇ ಕಣ್ಣ ಮುಚ್ಚಿತ್ ಬರಿಕ್ ತರ್‌ಂಜತ್!

"ಅಪ್ಪಾ, ಮೋನೇ"ಂದ್ ಪುಚ್ಚಿ ಪುಡ್‌ಚಂವಂಡನ್ನೆ ಪಾರಿತ್ ತಾನೇ ಮೋಂವಂಡ ಬಾಯಿಕ್ ನೀರ್ ಕೊಡ್‌ತಿತ್ ಸರ್ಕಲ್‌ರ ಮಿಇನ್‌ಕ್ ದಂಡ್ ಕೈ ನೊಟಿತ್, "ಸರ್ ಕೋಳ ಇಡಿ. ನಾಡ ಸುಧನ ಮಾತ್ರ ಎಚ್ಚರತ್ ಕಾಪಾಡುವ ಏರ್ಪಾಡ್ ಮಾಡಿ" ಎಣ್ಣೆತ್ ಸುಧನೇ ನೋಟೊಚಿ ಸಾಧು! ನೀರ್‌ಳ್‌ಂಜ ಕಣ್ಣಕ್ ಒಂದೂ ಕಂಡಲೆ!

## ಖುಣ ತೋರತರ..!

ಪಶ್ಚಿಮ ಬಂಗಾಳತರ "ಅಲಿಪುರಂ ಕ್ಯಾಂಪ್ ಜೈಲ್" ಎಣ್ಣುವದ್ ಕಯಿಂಜ ಶತಮಾನತಲ್ ದುಂಬಾ ಕೇಳಿಪಟ್ಟಿ ಜೈಲ್. ಭಾರತ ಸ್ವಾತಂತ್ರ್ಯ ಪೋರಾಟತರ ಕಾಲತಲ್ ಬ್ರಿಟೀಷಡ ವಿರುದ್ಧ ತಕ್ಕ್ ಪರಂದಯಿನೆಲ್ಲ ಇಕ್ಕ ಕಾಫಿ ಮೂಟೆ ದುಂಬ್ಚಿಟ್ಟನ್ನಕೆ ರೈಲ್‌ಲ್ ದುಂಬ್ಚಿಟ್ಟಪೋಯಿತ್ ಅಲಿಪುರಂ ಕ್ಯಾಂಪ್ ಜೈಲ್‌ಕ್ ಇಡುವಯಿಂಜತ್!

ಲಕ್ಷ ಕಣಕರ ಜನಳ ಪುಡ್ಚಿ ಕೂಟುವಕ್ ಕೋಂಬರೆ ಎಲ್ಲಿಂಜ? ಬಲ್ಯ ಬಲ್ಯ ಪರಂಬರ ಸುತ್ತೋಡ್ ಸುತ್ತ ನೆಗ್ಗ ಮುಳ್ಳಾ ತಂತಿ ಪೊಜ್ಜಿತ್ ಸ್ವಾತಂತ್ರ್ಯ ಪೋರಾಟಕಾರಳ ಕೂಟಿರುವ ಇಂಜತ್! ಬೆದ್‌ಲ್ ಒಣ್‌ಂಗಿತೂ, ಮಳೆ ಮಂಜಿಲ್ ತೋಯಿಂಜಿತೂ ಚತ್ತವು ಚಾವಂಜತ್. ಬದ್‌ಕನಯಿಂಗಳ ಎಕ್ಕೇಂಗಿ ಒಮ್ಮೆ ವಿಚಾರಣೆ ನಡ್‌ತುವಯಿಂಜತ್. ಖೈದಿಯಡ ಹಾಜರ್ ಕಾಕುವದ್ ಮಾತ್ರ ಪೋಲಾಕೋ, ಬೈಟೂ ನಡ್‌ಪಯಿಂಜತ್!

ಒನ್ನಾಂದ್ ಜೈಲ್‌ರ ಅಧಿಕಾರಿ ಹಾಜರ್ ಕಾಕಿಯಂಡಿಪ್ಪಕ ಅಂವಂಡ ಕೂಡೆ ಇಂಜ ಜೈಲ್‌ರ ಅಪ್ಪಣು ಬೆರಗಾನನ್ನಕೆ ನಿಂದ್‌ಪೋಚಿ. 'ಕಾಳಪ್ಪ'ಂದ್ ಕಾಕುವಕ್ ಕೈ ನೇತಿತ್ 'ಪ್ರೆಸೆಂಟ್' ಎಣ್ಣಾನ ಚಾಯಿಕಾರ ಬಾಲೆಕಾರಂಡ ತಡಿರ ಮಾಟ, ಮೂಡ್‌ರ ಗತ್ತ್, 'ಕುಣ್ಣಿಮೀಸೆ ಕಾಳಪ್ಪ' ಎಣ್ಣುವ ಪೆದ ಕೇಪಕ ಜೈಲ್‌ರ ಅಪ್ಪಣುಕ್ ತಾಂಡದೇ ಓರ್ ಕಂದ್ ಕರ್‌ನ ಕಂಡನ್ನಕೆ ಆಚಿ ! ಅಕ್ಕ ಮುಂಡತೆ ಕೂಡಿಯಂಡತ್.

ಆಫೀಸರ್ ಪೋನ ಪಿಣ್ಣಾ ಆ ಕಾಳಪ್ಪ ಎಣ್ಣುವ ಖೈದಿನ ಆಯಿರಾಯಿರ ಖೈದಿಯಡ ಎಡೆಂಜಿ ತೇಡಿ ಪುಡ್‌ಚತ್. ಕಾಳಪ್ಪಂಡ ಕೈ ಪುಡ್‌ಚಂಡ್ ಓರ್ ಮರತರ ಅಡಿಕ್ ಕೂಟಿಯಂಡ್ ಪೋಯಿತ್ ಅಳ್‌ಪ್‌ಚಿಟ್ಟಂಡ್ ತಕ್ಕ್‌ಕ್ ಇಳ್‌ಂಜತ್. ಆಚೇಂಗಿ, ಒಬ್ಬಂಡ ತಕ್ಕ್ ಒಬ್ಬಂಗ್ ಅರ್ಥ್ ಆಪುಲೆ. ಆನಕಲೂ ಮನಸ್‌ರ ಭಾವನೆನ ಕಾಟುವಕ್ ಭಾಷೆ ಬೋಂಡೂಂದೇ ಇಲ್ಲೆ.

ಅಪ್ಪಣು, "ಕಾಳಪ್ಪ ಎಣ್ಣುವ ಪೆದ ನಾನ್ ಚೆರಿಯಂವನಿಪ್ಪಕ ಕೇಟಿಯೆ. ನೀನ್ ಏದ್ ಸೀಮೆಂಜಿ ಬಂದಂವ? ನೀಡ ಮನೆಲ್ ಪರೆಯುವ ತಕ್ಕ್ ಏದ್"?

ಕಾಳಪ್ಪ "ನಾನ್ ದಕ್ಷಿಣ ಹಿಂದೂಸ್ಥಾನತ್ ಕೊಡಗ್ ಎಣ್ಣುವ ಒರ್ ಚೆರಿಯ ಕುಂದ್ ಸೀಮೆರ ನಾಡ್ ಉಂಡ್. ಅಲ್ಲಿ 'ಕೊಡವ' ಎಣ್ಣುವ ಓರ್ ಜಾತಿರ ಜನವುಂಡ್. ನಾನ್ ಆ ಸೀಮೆಂಜ ಬಂದಂವ. ಅದಿರಡ್ ನೀನ್ ಎನ್ನಂಗಾಯಿತ್ ನನ್ನೊಬ್ಬನ ಈ ತರ ಕೇಟಂಡುಳ್ಳಿಯಾ? ನೀನ್ ದಾರ್? ಏದ್ ರಾಜ್ಯಕಾರ? ನೀಡ ಪೆಡ್‌ಎಂತ ಜೈಲರ್ ಸಾಬ್? ನೀನ್ ಈ ಜಾಲಾರ ಚಾಕ್ರಿಕಾರ. ನೀಡ ಮೇಲಧಿಕಾರಿಯ ರಾಜಕೀಯ ಖೈದಿಯಡ ಕೂಡ ತಕ್ಕ್ ಪರ್‌ಂದಂಡಿಪ್ಪದ್ ಕಂಡಕ ನೀಕೆನ್ನೇಂಗಿ ತೊಂದರೆ ಮಾಡು".

ಅಪ್ಪುಣು, "ಕಾಳಪ್ಪ, ನಾನ್ ಪುಟ್ಟಿತ್ ಬೊಳಂದ ದೇಶತ್‌ರ ಪೆದವೂ ಕೊಡಗ್‌ಂದೆ ಇಂಜ ಗೇನ. ಆ ದೇಶತ್ ಕಾವೇರಿಂದೆಣ್ಣುವ ಪೊಳೆ ಇಂಜದ್ ಗೇನ ಬಪ್ಪ! ಪುತ್ತರಿಂದೆಣ್ಣುವ ನಮ್ಮ ನಡ್‌ಪಯಿಂಜತ್! ಬೇಲ್‌ಲ್ ನೆಲ್ಲ್ ಬೊಳತುವಯಿಂಜತ್. ಅಲ್ಲಿಯತ್‌ರ ಜನಳೆಲ್ಲ ನಿನ್ನನ್ನೆ ನಲ್ಲ ತಡಿಕಾರ, ಪೆರಿಯವು ಕೊಂಬಮೀಸೆ ಬುಡುವ ಇಂಜದ್ ನಾಕ್ ಗೇನಾಪ! ನೀನೂ ಅದೇ ದೇಶಕಾರನಾಂದ್ ಅರಿಯುವಕಾಯಿತ್ ನಿನ್ನ ತಕ್ಕ್ ಪರಿಚಿಟ್ಟಿ. ನಾನ್ ಚೆರ್‌ಪತ್ ಪಡ್‌ಚ ಆ ಸೀಮೆರ ತಕ್ಕ್ ಮರ್‌ಂದ್ ಪೋಚಿ. ಆಚೇಂಗಿಯೂ ಚೆನ್ನ ಚೆನ್ನ ಗೇನ ಬಪ್ಪ!"ಂದೆಣ್ಣುವದು.

ಕಾಳಪ್ಪ "ಜೈಲರ್ ಸಾಬ್, ನೀನ್ ಎಣ್ಣುವಾನ ಕೇಟಕ ನೀನ್ ಕೊಡಗ್‌ರ ಕೊಡವನೆ! ಕೊಡವನಾನ ಪಿಳ್ಳಾ ನೀಕೋರ್ ಮನೆಪೆದ ಇರೊಂಡು! ಓರ್ ಕೊಡವ ಪೆದ ಇರೊಂಡು! ಅಪ್ಪಂಡವ್ವಂಡ ಪಿಳ್ಳಾ ಅಣ್ಣ ತಮ್ಮಣ, ಅಕ್ಕ ತಂಗೆಯಡ ಪೆದೇಂಗಿ ಗೇನ ಇಕ್ಕುವಲ್ಲ! ಕೊಡಗ್ ಬುಟ್ಟಿತ್ ಈ ಕಲ್ಕತ್ತಾಕ್ ಬಂದಿತ್ ಎನ್ನನೆ ಕೂಡಿಯಂಡಿಯ? ನೀಡ ಸಾಲ್ ಸಂತಾನ ದಾರೂ ಇಲ್ಲೆಯಾ?"

ಇಚ್ಚಕ್ ತಕ್ಕ್ ಬಾಕ್ ನಡ್‌ಕಣೆ ಜೈಲರ್ ಅಪ್ಪುಣುರ ಕಣ್ಣಲ್ ನೀರ್ ದುಂಬಿ ಪೋಚಿ. ದುಃಖ ಉಕ್ಕಿತ್ ನಾವುಲ್ ತಕ್ಕೇ ಉತ್ತಲೆ! ಕಾಳಪ್ಪನ ತಬ್ಬಿ ಪುಡ್‌ಚಂಡ್ ಎಚ್ಚಕೋ ನೇರ ಮೌನತ್ ಅಳತ್‌ಪೋಚಿ. ದೂರತ್‌ಲ್ ಜೈಲರ್ ಓರ್ ಅಧಿಕಾರಿ ಬಪ್ಪದ್ ಕಂಡತ್.

"ಕಾಳಪ್ಪ, ನಾಡ ಪೆದ ಅಪ್ಪುಣು. ಬೋರೆ ಏದ್ ಪೆದೋ ನಾಕ್ ಗೊತ್ತಲ್ಲೆ. ಅಪ್ಪ ದಾರ್, ಮನೆಪೆದ ಎಂತಂದೆಲ್ಲ ಗೇನ ಬಪ್ಪಲೆ! ನಾಡ ಸಿನೇತ ಬೊಡ್ಡು ಪಿಳ್ಳಾ ನಾಡ ಅಕ್ಕ ಅವ್ವಿನ ಮಾತ್ರ ಎಕ್ಕೊಲೂ ಗೇನ ಬಪ್ಪ. ನಾಡ ಕಥೆನೆಲ್ಲ ನೇರ ಕ್ಕಟ್ಟುವಕ ಬಂದಿತ್ ಎಣ್ಣಿತಪ್ಪಿ. ಇಕ್ಕ ನಂಗಡ ಆಫೀಸರ್ ಕಂಡತೇಂಗಿ ನಾಕ್ ಬಲ್ಯ ಶಿಕ್ಷೆ ತಕ್ಕು!" ಎಣ್ಣಿತ್ ಕಣ್ಣ ನೀರ್ ತೇಟಿಯಂಡ್ ಮರೆಯಾಯಿಪೋಚಿ.

ಅಂದ್‌ಂಜಿ ಕಾಳಪ್ಪನೂ, ಅಪ್ಪುಣುವೂ ಬಲ್ಯ ಸಿನೇತಂಗಳಾಯಿಪೋಚಿ. ಕಾಳಪ್ಪಂಡ ಕೊಡವ ತಕ್ಕ ಕೇಪಕ ಅಪ್ಪುಣುಕ್ ಪಂಡ್ ತಾನ್ ಪರ್‌ಂದಂಡಿಂಜ ತಕ್ಕ ಗೇನ ಬಪ್ಪಕಾಚಿ. ಚೆನ್ನಂಗೇ ದಿನತ್‌ಲ್ ಚಾಯಿಲ್ ಪಡ್‌ಚತ್. ನೇರ ಕ್ಕಟ್ಟುವಕಾಪಕೆಲ್ಲ ಅಪ್ಪುಣು, ಕಾಳಪ್ಪಂಡ ಪಕ್ಕ ಬಂದಿತ್ ತಾಂಡ ಬಾಲ್ಯತ್‌ರ ಕತೆನೆಲ್ಲ ಎಣ್ಣುವಕ್ ಸುರು ಮಾಡ್‌ಚಿ.

\*\*\*\*

ಅಪ್ಪುಣುರ ಅಪ್ಪ ಮಂದಯ್ಯ, ಅಪ್ಪುಣುಕ್ ಮೂಂದ್ ಬಯತಾಯಿತಿಪ್ಪಕ ಚತ್ತಪೋಚಿ. ಅಪ್ಪುಣುಕ್ ಓರ್ ಅಕ್ಕ ಇಂಜತ್. ಅವಡ ಪೆದ ಅಪ್ಪಿ. ಪಂಡ್ ವಡಿಯ ಚತ್ತವ ತಾಂಡ ಮಕ್ಕಳೋ ಕೂಟಿಯಂಡ್ ದಂಡನೆಯೊ, ಮೂಂದನೆಯೋ ಬಾಕೆ ಕೂಡುವದ್ ಮಾಮೂಲ್ ಪದ್ದತಿ.

ಅನ್ನನೆ ಅಪ್ಪುಣುರ ಅಪ್ಪ ದಂಡ್ ಮಕ್ಕಳೋ ಕೂಟಿಯಂಡ್ ದೇವಯ್ಯಂಡ ಬಾಕೆ ಕೂಡ್‌ಚಿ. ದೇವಯ್ಯಂಗ್ ಪೆರಿಯ ಪೊಣ್ಣೊ, ದಂಡ್ ಮಕ್ಕಳೊ ಇಂಜತ್. ರಾಜಿಲ್ ಚಾಯಿಲ್ ಇಪ್ಪಕ ಎಲ್ಲಾ ಚಾಯಿಲೇ ನಡ್‌ಪ! ಎಕ್ಕ ಚಾಯಿಕೇಡಾಚಿ ಅಕ್ಕ ಎಲ್ಲಾ ತರತ್‌ರ ಕೂಟಿಂಗುರಿ ಸುರುವಾಪ! ವಡಿಯ ಚತ್ತವಕ್ ಮುಂಡೆ ಪಾಟ್ ಕೇಟ್ ಕೇಟ್ ಮನಸ್ ದೈಂಬ್ ಕೆಟ್ಟಿಪೋಪ.

ಪಂಡ್ ಇಂದೇತ ಮಾದರಿ ಸಮಾಜತ್ ಸಾಮಾಜಿಕ ಭದ್ರತೆ ಇಲ್ಲತಿಪ್ಪಕ ಪೊಣ್ಣೊಕ್ ಓರ್ ಆಣ್‌ರ ತಾಕ ಇಲ್ಲತೆ ಬದ್‌ಕುವಕ್ ಕಯ್ಯುವ ಇಂಜಾಲೆ. ಆಣ್ ದಂಡನೆ, ಮೂಂದನೆ, ನಾಲನೆ ಮಂಗಲ ಕಯಿಪದ್ ಅಕ್ಕ ಕಾನೂನ್ ವಿರೋಧ ಆಯಿತಿಂಜಾಲೆ. ಅಪ್ಪುಣು ಅರಿವಕ್ ಆಪಾಂಗ್ ಮುಪ್ಪಡೇ ಅಪ್ಪ, ದೇವಯ್ಯಂಡ ಬಾಕೆ ಕೂಡಿತ್ ಇಂಜಾನಗುಂಡ್ ದೇವಯ್ಯನೇ ತಾಂಡ ನೇರಾನ ಅಪ್ಪಂದ್ ಅರ್‌ಂಜಂಡಿಂಜತ್!

ಅಪ್ಪುಣುಕ್ ಅರಿವಾಪಕ ಅತ್ತಳ ನೋಟುವದೇ ತಾಂಡ ದಿನಚರಿ. ದುಂಬ್‌ನ ಮನೆಲ್ ಕಂಜಿಯೋ, ಕೂಳೋ ಕ್ಕಟ್ಟ್‌ಚೇಂಗಿ ಅದ್‌ನ ಉಂಡಂಡ್ ಪೊಲಾಕ ಎತ್ತಳ ಬುಟ್ಟಿಂಡ್ ಪರಂಬ್‌ಕ್ ಪೋಪಯಿಂಜತ್. ಅಂದೇತ ಕಾಲತ್ ಕೊಡವಡ ಮನೆಲ್ ಕೊಟ್ಟ್ ದುಂಬಾ ಅತ್ತ ಇಪ್ಪಯಿಂಜತ್. ಅದೇ ಅಯಿಂಗಡ ಆಸ್ತಿ.

ಅತ್ತಬಾಣೆಲ್ ಊರ್‌ರ ಪತ್ತಿರುವದ್ ಮಕ್ಕ ಕೂಡ್‌ವಯಿಂಜತ್. ಊರ್‌ರ ಪರಂಬ್ ಒಂದ್ ದಂಡ್ ಮೈಲ್ ದೂರಕೆತ್ತಣೆ ಕಾಂಬಯಿಂಜತ್! ಓರಂದ್ ಪರಂಬ್‌ಲ್

ಒಂದ್ ದಂಡಾಯಿರ ಅತ್ತ ಮೇವಯಿಂಜತ್! ಅತ್ತಡ ಬೋಳೆಲ್ ತರ ತರ ತಟ್ಟೆ ಸದ್ದಾ... ಕಾಳೆಯಡೊ, ಮಂಡಂಗಡೊ ಕೆನೆರ (ಗುಟ್‌ರ್) ಸದ್ದಾ ನಾಲಾಬರಿಂಜ ಕೇಪಯಿಂಜತ್.

ಬಾಣೆರ ನಡುಲ್ ಪಂದ ಇಟ್ಟನ್ನೆಕೆ ಬೋಳೆಂದ್ ನಿಂದ ಮಾಂಗಿ, ಪಲ್ಲಿ, ಬೈರಿ, ಎಲ್‌ಂದೆರನ್ನತ ಮರ, ಆ ಮರತಾರ ಅಡಿಲ್ ತುರಾಂಡಿತೂ ನೇಂಡಿತೂ ಬುದ್ದಂಡ್ ಮೇಚಿ ಕರ್‌ಕುವ ಅತ್ತ! ಮರತಾರ ಕೊಡೀಲ್ ಚಿಲಿಪಿಲಿ ಪಾಡಿಯಂಡ್ ಪಾರಿ ಕಳಿಪ ಪಕ್ಷಿಯ. ಆ ಪಕ್ಷಿಯಳ ಬೋಟೆಯಾಡುವಕ್ ಪುಂಡ ತಟ್ಟೆರ ಬಿಲ್ಲ ಪುಡ್‌ಚೆಂಡ್, ಪದ್‌ಜಿಯೆಂಡ್ ಸುತ್ತಿಕಳಿಪ ಮಕ್ಕ, ಮರತ್ ಕೊರಿಯಂಗಡ ತುಳ್ಳಿಂಗಳಿ.

ಅತ್ತ ಬುದ್ದಂಡ್ ವರುವಕ, ಅತ್ತಕಾರ ಮಕ್ಕಕೂ ಪುರುಸೊತ್ತಿಪ್ಪಕ ಅತ್ತಡ ಬೆನ್ನಾಕೇ ತಾಂಗಿಯೆಂಡ್ ಪಾಂಗೋಳ ಉರ್‌ಪುವ ಇಂಜತ್. ಕೂಟ್‌ಕ್ ತರಾವರಿ ಸಂಗೀತ ಸ್ವರ, ಅತ್ತಬಾಣೆಲ್ ಮಕ್ಕ ಗುಂಪ್ ಕೂಡಿಯೆಂಡ್ ಚಿಣಿಕೋಲ್ ಕಳಿ, ಬುಗ್‌ರಿ ಕಳಿ, ಪುಡಿಪ ಕಳಿ, ಕೊತ್ತಿಪರತಾರಂತ ತರಾವರಿ ಕಳಿರ ಗುಂಪ್.... ಇದೆಲ್ಲಾ ಅಂದೇತ ಕಾಲತಾರ ಅತ್ತಕಾರ ಮಕ್ಕಕ್ ಸ್ವರ್ಗ ಸುಖ ಕೊಡಪಂತ ಮನರಂಜನೆ ಆಯಿಂಜತ್.

ಮನೆಲ್ ಉಂಬಕ್ ತಿಂಬಕ್ ಉಳ್ಳಯಿಂಗ ಬೂತಾಳೆ ನಾರಾರ ಕೊಬಲೆ ನೆಜ್ಜೆಂಡ್ ಕೂಪದಿ ತೂಕಿಯೆಂಡ್ ಬಂದಿತ್ ಉಂಬಯಿಂಜತ್. ಮನೆಲ್ ಉಂಬಕ್ ಇಲ್ಲತವು ಕಾಡ್ ಕಳೆಂಜಿ ಅಳೆಕಿಯೆಂಡೋ, ತೋಡಲ್ ಕಲ್ಲ ಮರ್‌ಚಿತ್ ಇಂಡ್ ಪುಡ್‌ಚೆ ಬಂದಿತ್ ಚುಟ್ಟ್ ತಿಂದೆಂಡ್ ಕೆಲ ದುಂಬ್‌ಚಿಟ್ಟವ ಇಂಜತ್. ಚೆರಿಯ ಪನೆಮರ ಕೆತ್ತಿತ್ ತೋಲೆಚಿತ್ ಅದೊಂಡ ತಿರಾನ ತಿಂದವಯಿಂಜತ್. ತೋಡಾರ ಕರೆಲಿಪ್ಪ ಮುಂಡೆನ (ಕೇದಗೆಪೂವ್) ತೋಲೆಚಿತ್ ತಿಂಬ, ಕುಂದಾಕ್ ಅತ್ತಳ ಆಟಿಯೆಂಡ್ ಪೋನಕ ಚೀಪೆಕಂಡೆರ ತಿರ್, ಕುಂದಾಲ್ ಮಾತ್ರ ಬೋಳೆವಂತ ಪುಟ್ಟಾಕಂಡೆ ಇನ್ನತಾನೆಲ್ಲ ಅಳೆಕಿತ್ ತಿಂಬಯಿಂಜತ್. ಅಲ್ಲತೆ ತರಾವರಿ ಕಾಡ್‌ಪಣ್ಣ್ ತೇಡಿತ್ ತಿಂದೆಂಡ್ ಕೆಲ ದುಂಬ್‌ಚಿಟ್ಟವ ಇಂಜತ್. ಬಿಲ್ಲ ಬೋಟೆಲ್ ಕಾಟ್ವಾನ ಕೊರಿಯ, ಪಕ್ಷಿಯಳ, ಗೂಟಕೆಣಿ, ಕವೆ ಕೆಣಿ ಪಿಳ್ಳಾ ಅಡ್‌ಚೆತ್‌ಲೆಲ್ಲ ಕಾಟ್ವಾನ ಚೆರಿಯ ಚೆರಿಯ ಪ್ರಾಣಿ ಪಕ್ಷಿಯಳೆಲ್ಲ ಚುಟ್ಟಿತ್ ತಿಂದವಯಿಂಜತ್.

ಅಕ್ಕ ಅತ್ತಕಾರ ಮಕ್ಕಡ ಮುಖ್ಯಪಟ್ಟಿ ಮನರಂಜನೆ ಅತ್ತಳ ಕುತ್ತಿಯ ಬೂವ್‌ಚೀಡುವ! ದಾಡ ಎತ್ತ, ಕೂಟ್‌ಲ್ ಕಾಳೆಂದ್ ತೀರ್ಮಾನ ಮಾಡುವ. ಅತ್ತಕಾರ ಮಕ್ಕಡ ಬಲ್ಯ ಸಮಸ್ಯೆ ಎಣ್ಣೆಕ ಪೋರ್‌ಪಡೆ (ಕ್ರಾಸ್)ಕ್ ಬಂದ ಪಯ್ಯುರ ಕೂಡೆ ಓಡಿತ್ ಕೂಟ್ ತಪ್ಪಾಚಿಟ್ಟವ ಮಂಡಂಗಳ ಹದ್ದ್ ಬಸ್‌ಲ್ ಬೆಪ್ಪದ್! ಪೋವಲ್ ಬಾಣೆಲ್



ಎನ್ನತ ಕಳಿಯೇ ಕಳಿಕಡ್, ಅಂದಿಮುಂದಿ ನೇರತ್ ಅತ್ತಳೆಲ್ಲಾ ಗುಡ್ಡೆ ಕೂಟಿತ್ ಮನೆಕ್ ಆಟಿಯಂಡ್ ಬರೊಂಡು. ಒಂದೋ ದಂಡೋ ಪೋಲಿ ಮಂಡಂಗ ಕೂಟ್ ತಪ್ಪಚಿಟ್ಟಂಡಕ, ಇಲ್ಲೇಂಗಿ ಕುಂದ್ ಪೋನಲ್ಲಿ ಅತ್ತಳ ನರಿಯೋ, ಕೆನ್ನಾಯಿಯೋ ಪುಡ್ಚಿಟಕ ಅತ್ತಕಾರ ಮಕ್ಕ ಎಳ್ ಜನ್ಮತ್ ಶಿಕ್ಷೆನೆಲ್ಲಾ ಅನುಬವಿಚಿಡಂಡಿಂಜತ್! ಅದತೂ ಚಿಕ್ಕವ್ವ, ಚಾಕಪ್ಪಂಗಡ ಎಡೆಲ್ ಬೊಳೆಯುವ ಮಕ್ಕಡ ಗೋಳ್‌ನಂತೂ ಗೇನ ಮಾಡುವದೇ ನರಕ!

ಈ ಪೋಲಿತ ಬಾಳ್‌ಕ್ ಒಗ್ಗಿ ಪೋಯಿತ್ ಚೆರ್‌ಪತ್ ಬಾಳ್ ನೀಸಾನಂವನೇ ಈ ಕಥಾನಾಯಕ ಅಪ್ಪಣು! ಅಪ್ಪಣುಕ್ ಓರ್ ಮನೆಪೆದವೂ, ತೊಟ್ಟಪೆದವೂ ಇಂಜಿತಿಕ್ಕು. ಆಚೇಂಗಿ ಅದ್‌ನ ಎಣ್ಣೆ ಕೊಡ್‌ಪವು ದಾರ್?

\*\*\*

ಅಪ್ಪಣುರ ಸಿನೇತ ಬೊಡ್ಡುರದೇ ಓರ್ ಕಥೆ. ಮನೆಲ್ ಎಟ್ಟ್ ಮಕ್ಕ.. ಅಪ್ಪನವ್ವಂಗ್ ಎಕ್ಕಲೂ ಕಾಯಿಲ ತಪ್ಪುವದೇ ಇಲ್ಲೆ. ಭೂಮಿಲ್ ಬೊಳ್‌ಂದ ನೆಲ್ಲಾ ಮೂಂದ್ ತಿಂಗ ಉಂಬಕ್ ಎತ್ತುವದೇ ಕಷ್ಟ! ಪಾಲ್ ಮೋರೆನ್ನೋ ಇಪ್ಪಯಿಂಜತ್. ಪಾಲ್ ಮೋರ್‌ಲ್ ಕೆಲದುಂಬುಲೆ. ಇಂದೇತನ್ನಕೆ ಅಂದ್ ಪಾಲ್‌ನ ಮಾರುವ ಪದ್ಧತಿ ಇಂಜಾಲೆ. ಕಾಡ್ ಕಳ್‌ಂಜಿ, ಪನೆಂಬುಟ್ಟ್, ಚಕ್ಕೆ, ಬಾಳೆ ಪುಕ್ಕಿತ್ ತಿಂದಂಡ್ ಬದ್‌ಕುವಯಿಂಗಳೇ ಏರ. ಕೊಡವಕ್ ಜಮ್ಮ ಭೂಮಿ ಇಂಜಾಟ ಮಾತ್ರಕ್ ನೆಮ್ಮದಿ ಇಂಜತ್‌ಂದ್ ಎಣ್ಣುವದ್ ಪೊಟ್ಟ್! ಉತ್ತ, ಕಳತ್, ನಾಟಿ ನಟ್ಟಿತ್ ಓರ್ ತಿಂಗತ್ ತಿರ್‌ಪುಳು, ಕೊಳ್‌ಪೆ ಪುಳು ಬುದ್ದಿತ್ ಬೇಲೆಲ್ಲಾ ಕಾಲಿ ಆಪಯಿಂಜತ್. ಓರಂದ್ ತೆವತ್ ಚೆನ್ನಂಗ್ ನಾಟಿ ಎದ್ದಕ, ಅದ್‌ಂಗ್ ಕರಿಂಬುಳು ಬುದ್ದಿತ್ ಓಲಿನೆಲ್ಲಾ ತಿಂದಿತ್ ಖಾಲಿ ಮಾಡುವ ಇಂಜತ್. ದೇವಡ ದಯತ್ ದೂರ ದೂರ ಓರಂದ್ ನುಲಿ ಬಾಕಿ ಆಯಿತ್ ಕದ್ ಕಡ್‌ಂದಕ ಅಲ್ಲಿಕೂ ಎಲಿ, ಕಾಡ್ ಪಂದಿಯಡ ಕಾಟ ಸುರು ಆಪಯಿಂಜತ್! ಬೊಳೆ ಬರಣೆಕ್ ಕಾಗೂಡ್ ಇಟ್ಟಂಡ್ ಪಂದಿಪಾರ ಅಳ್‌ತಕಲೂ, ನಾಲಾಬರಿಂಜ ಪಂದಿಕಾಟ ಆಯಿತ್ ಕಳಕೆತ್ತನ ಬೊಳೆಲ್ ದಂಡ್ ತಿಂಗ ಉಂಬಕ್ ಎತ್ತುವದೇ ಕಷ್ಟ! ಅದತೂ ಪಾದಿನ ಪೊಲಿ ಅಳ್‌ಕಂಡಿಂಜತ್. ಇಂದೇತ ಮಾದರಿ ಅಂದ್ ಕ್ರಿಮಿನಾಶಕ, ಕಂಪೆನಿ ಗೊಬ್ಬರ ಒಂದೂ ಇಂಜಾಲೆ. ಬೇಲ್‌ಕ್ ಪುಳು ಬುದ್ದಾಂಗೂ, ಎಲಿಪಂದಿರ ಕಾಟಕೂ ದೇವಕ್ ಪರ್‌ಕೆ ಮಾಡುವದೂ ಪಿಳ್ಳಾ "ಮುಟ್ಟಿ" ಎಣ್ಣುವ ಪೊಟ್ಟ್‌ಶಾಸ್ತ್ರ ಮಾತ್ರ ಪರಿಹಾರ ಇಂಜಿಯೆ!

ಊರ್ಲ್ ಒಬ್ಬನೋ ದಂಡಾಳೋ ನಾಲಂಜಿ ಬಟ್ಟಿ ಪೊಲಿಕ್ ಕೊಡ್‌ಪಯಿಂಗ ಇಂಜಕ ಅಯಿಂಗಳೇ ಬಲ್ಯ ಮನುಷ್ಯಂಗ! ಇದ್ ಸುಮಾರ್ 90 ಕಾಲಕ್ ಬಯ್ಯತ್‌ರ ಗ್ರಾಮ ಜೀವನತ್‌ರ ಸ್ಥಿತಿ. ಅಕ್ಕ ಚಿಲ್ಲರೆ ಪಲ್ಲರೆ ಸರಕಾರಿ ಚಾಕ್ರಿಕೋ, ದೊರೆಯಡ ತೋಟತ್ ರೈಟ್, ಚಾಕ್ರಿಕ್ ಕೂಡಿಯಂಡವು ಮಾತ್ರ, "ಸಾಬು ಕೊಡವ" ಎಣ್ಣೆ ಚಿಟ್ಟಿಂಡತ್! ಅಂತವು ನಾಡ್‌ಕ್ ಒಬ್ಬನೋ ದಂಡಾಳೋ ಮಾತ್ರ ಇಪ್ಪಯಿಂಜತ್.

ಬೊಡ್ಡುಕ್ ಕುಂದ್ ಪಕ್ಕ. ಅನ್ನನಾಯಿತ್ ಅತ್ತಳ ಕುಂದ್‌ಕೇ ಜಾಸ್ತಿ ಆಟಿಯಂಡ್ ಪೋಪಯಿಂಜತ್. ಓರಮ್ಮ ಮಾತ್ರ ಪರಂಬ್‌ಕ್ ಬಪ್ಪಯಿಂಜತ್. ಅಪ್ಪುಣು ಪಿಳ್ಳಾ ಬೊಡ್ಡು ಅಯಿಂಗಡಯಿಂಗಡ ನೊಂಬಲ ಕಷ್ಟತ್‌ನ ಅಪ್ಪರಿಪ್ಪರ ಎಣ್ಣೆಯಂಡ್ ಸಮಾಧಾನ ಪಟ್ಟವಯಿಂಜತ್. ದಂಡಾಳ್ ಅಪ್ಪವ್ವಂಡ ಪ್ರೀತಿ ಎಂತಂದ್ ಎಣ್ಣುವ ಚೋದ್ ಅರಿಯತವು! ಗರೀಬತನತ್ ಇಪ್ಪಕ ಮಕ್ಕಳ ಕೋಪಟೆ ಮಾಡಿಯಂಡ್ ಇಪ್ಪಕ್ ಕಯ್ಯುವಾ? ಬಡತನ ಪ್ರೀತಿನೇ ಮುಗ್ಗಿರುವ !

ಅಪ್ಪುಣುಕೂ, ಬೊಡ್ಡುಕೂ ಪತ್ತ್ ಪನ್ನೆರಂಡ್ ಬಯತಾಕಣೆ ಅತ್ತ ನೋಟುವದೂ, ಮನೆಪಣಿ, ಬೇಲ್ ಪಣಿಲೇ ಕಯಿಂಜತ್. ಅಪ್ಪುಣುರ ಅವ್ವಂಗೂ, ಚಿಕ್ಕವ್ವಂಗೂ ನನ್ನಾಲ್ ಮಕ್ಕಳಾಯಿತಿಂಜತ್. ಅಕ್ಕ ಮಾರಪನಿರ ಕಾಲ. ಮಾರಪನಿ ಬಂದಕ ಮೂನಾಲ್ ತಿಂಗ ಬುದ್ದಂಡಲ್ಲಿ ಆಯಿರುವ. ಅದತ್ ಬದ್‌ಕ್‌ನಂವ ಎಲ್‌ಂಬು ತೋಲಾಯಿತ್ ನಾಲ್ ಮೊಟ್ಟು ನಡ್‌ಪಕ್ ಕಯ್ಯತೆ ತಾಂಡ ಬಾಳನ ನಡ್‌ತೊಂಡು!

ಪುಡ್‌ಚ ಪನಿ ಮಾರತೆ ಒನ್ನಾಂದ್ ಅಪ್ಪುಣುರ ಅವ್ವ ಚತ್ತ್ ಪೋಚಿ. ಅಪ್ಪುಣುರ ಸ್ವಂತ ಅಪ್ಪ ಮಂದಯ್ಯಂಡ ಮೋವ ಸುಮಾರ್ ಪದಿನಂಜಿ ಬಯತ್‌ರ ಮೂಡಿ ಆವ್ವಿ. ಅವ್ವಂಡ ಚಾವುರ ಮೀದ ಬುದ್ಡ ಉರ್‌ಂಡ್ ಕಳ್‌ಚಂಡ್ ಎದೆಕೂ, ಮಂಡೆಕೂ, ಪೊಜ್ಜಂಡ್ ಮೊರ್‌ಡುವಾನ ನೋಟಿಯಂಡ್ ಅಪ್ಪುಣು ಮೊರ್‌ಟತ್. ಮನೆಲುಳ್ಳ ಬಾಕಿ ಮಕ್ಕಡಾತ್ ಚಿಕ್ಕವ್ವ ಪೆತ್ತದ್, ತಾಂಡ ಅವ್ವ ಪೆತ್ತದ್ ಏದೇದ್‌ಂದ್ ತಿರಿಪಕೂ ಗೊತ್ತಿಂಜಾಲೆ ಅಪ್ಪುಣುಕ್!

ತಾಂಗ್ ಪುಟ್ಟಾನ ಮಕ್ಕಳೇ ಪ್ರೀತಿಲ್ ತಕ್ಕ ಪರಿಚಿಡತ ದೇವಯ್ಯ, ತಾಂಡ ಚತ್ತ ಪೊಣ್ಣರ ಮಿಳ್ಳಾತ ಬಾಕೆಲ್ ಪುಟ್ಟಾನ ಮಕ್ಕಳ ಎಚ್ಚಕ್ ಪ್ರೀತಿಲ್ ನೋಟು?

ಇಕ್ಕ ಅಪ್ಪುಣು ನೇಂಗಿಪ್ಪಡಿ ಪ್ರಡಿಕೊಂಡು, ಎತ್ತ್ ಕಯಿಚಪಿಳ್ಳಾ ಮಾಮೂಲ್ ಪೋಲೆ ಅತ್ತಳ ಆಟಿಯಂಡ್ ಪೋಂಡು. ಅವ್ವ ಕೆಯ್ಯುವ ಪಣಿರ ಪಾದಿ ಪಣಿನ ಅಪ್ಪುಣು ಕೆಯ್ಯೊಂಡು!

ಎಕ್ಕೇಂಗಿ ಓರಮ್ಮ ಕೊಟ್ಟಲ್ ಚಾಣ ಎಡ್‌ಪಕಲೋ, ಬೈಟ್ ಅತ್ತಳ ಕೂಟುವಕಲೋ ತಾಂಡ ಅಕ್ಕ ಅವ್ವಿನ ಒಬ್ಬಳಾಯಿತ್ ಕಂಡಕ ಅಪ್ಪರಿಪ್ಪರ ನೋಟಿಯಂಡ್ ತೆಳ್ಳಚವ ಇಂಜತ್! ಓರಮ್ಮ ಅವ್ವಿ ತಮ್ಮಣಂಡ ಮಂಡನೆ ತೌಡಿಯಂಡ್ ಮೊರ್‌ಡುವಯಿಂಜತ್. ಅಯಿಂಗಡ ನೋಟತೂ, ತೆಳಿಲೂ, ಕಣ್ಣೀರ್‌ಲೂ ಅಯಿಂಗಡ ಸಂಸಾರತ್‌ರ ಕಷ್ಟ-ನಷ್ಟ, ಸುಖ-ದುಃಖ, ಕಯಿಪು-ಮೊವುಪು ಎಲ್ಲಾ ಅಡ್‌ಂಗಿತಿಪ್ಪನ್ನಕೆ ತೋಂದುವ ಇಂಜತ್.

ಅವ್ವಿ, ಅಪ್ಪುಣುಕಿಂಜ ದಂಡ್ ಮೂಂದ್ ಕಾಲಕ್ ಪೆರಿಯವ. ಮನೆದುಂಬಾ ಮಕ್ಕ. ಚಿಕ್ಕವ್ವನೂ, ಚಾಕಪ್ಪನೂ ದಂಡೂ ಅವ್ವಂಗ ಪೆತ್ತ ಮಕ್ಕ! ಅವ್ವಿಯೇ ಕೂಟ್‌ಲ್ ಪೆರಿಯವ. ಎಲ್ಲಾಡೊ ಆರೈಕೆಯೂ ಅವ್ವಿರದೆ. ಪೊಲಂದ್ ಬೈಟಾಕಣೆ ನಿಂದವಳಲ್ಲ, ಅಳ್‌ತವಳಲ್ಲ. ಅವ ಮನೆಲೋರ್ ಯಂತ್ರ ಮಾತ್ರ!

ಅವ್ವಿ ಪಿಳ್ಳಾ ಅಪ್ಪುಣುಕ್ ಮಾಂವಂಗಳೂ ಕುಳ್ಳಾಪ್ಪ, ಬೋಜಪ್ಪಂಗಳೂ, ಅವ್ವಂಡ ಅಕ್ಕ, ತಂಗೆಯ ದಾರೇಂಗಿ ಇಂಜತೋ ಇಲ್ಲೆಯೋ ಅದೆಲ್ಲ ಪೊರ ಜಗತ್ತರ ಸಂಪರ್ಕವೇ ಇಲ್ಲತ ತಬ್ಬಲಿಯಕ್ ಒಂದೂ ಗೊತ್ತಿಂಜಾಲೆ!

ಒನ್ನಾಂದ್ ಮನೆಕಾರಡ ಬಟ್ಟನೆಲ್ಲಾ ತೋಡಲ್ ಗುಡ್ಡೆ ಇಟ್ಟಿಂಡ್, ಪುಳುಂಗೋಡ್ ಪೊಡಿ ಉದ್ದಿಯಂಡ್ ಅವ್ವಿ ನೆನತಿಯಂಡ್ ಇಂಜತ್. ಅಪ್ಪುಣುಕ್ ಇಂಜದೇ ಓರ್ ಶರ್ತ್. ಅದ್ ಒಣ್‌ಂಗಿತ್ ಉಂಡೇಂಗಿ ಇಟ್ಟಿಂಡ್ ಬಪ್ಪೀಂದ್ ತೋಡ್‌ಕ್ ಪೋಚಿ.

"ಅಪ್ಪಯ್ಯಾ, ಬೋಂಡ..... ದಮ್ಮಯ್ಯಾ ..... ಬುಟ್ಟರ್ ಅಪ್ಪಯ್ಯಾ!" ಅವ್ವಿ ಮೊರ್‌ಡುವದ್ ಕೇಟತ್.

ಅಪ್ಪುಣು ಓಡ್‌ಚಿ. ಅವ್ವಿ ಮೊರ್‌ಟಂಡ್ ನಿಂದಿತಿಂಜತ್. ಅಪ್ಪಂದೇ ಕಾಕಿಯಂಡ್ ಇಂಜ ದೇವಯ್ಯ, ಮನೆರ ಯಜಮಾನ ತಾಂಡ ಮನಸ್ಸಕ್ ಇಷ್ಟ ಆನಾನ ಮಾಡುವದ್ ತಪ್ಪು ಅಲ್ಲಾಂದ್ ಎಣ್ಣುವನ್ನಕೆ ಭಂಡ ಧೈರ್ಯತ್ ಮನೆರತ್ತಟಿ ನಡ್‌ಂದತ್!

ನಲ್ಲ ನೇರತ್ ಎಡೆಕ್ ಓಡಿ ಬಂದ ಅಪ್ಪುಣುನ ಒಮ್ಮೆ ಕಣ್ಣ್ ಮರ್‌ಚಂಡ್ ತೆರಮೆ ನೋಟ್‌ಚಿ! ಅಪ್ಪುಣು ಒಂದೂ ಕಾಂಗತಂವಂಡನ್ನಕೆ ಅತ್ತಬಾಣೆಕ್ ಪೋಚಿ.

ಅಂದಾಂಜಿ ಅಪ್ಪಣುರ ಶನಿದೆಸೆ ಸುರು ಆಚಿ ! ಕ್ಷಣ್ಣ ಇಂದಾ ಚೆರಿಯಂವನಾ ಚೇಂಗಿಯೂ ನಾಳೆ ಬಲ್ಯಂವನಾಪ. ಅಕ್ಕ ದೇವಯ್ಯ, ಅವ್ವಿನ ತೊಟ್ಟ ಸಂಗತಿ ದಾರ್ಕೇಂಗಿ ಎಣ್ಣೆರು ಎಣ್ಣುವ ನೆಟ್ಟಲ್ ಮಾತ್ರ ದೇವಯ್ಯಂಗೆ ಇಂಜತ್! ಇಕ್ಕ ಅಪ್ಪಣು ನಿಂದದೂ, ಅಳತದೂ ತಪ್ಪೆ. ಅವ ಕೆಜ್ಜ ಪಣಿಲೆಲ್ಲ ಊನ ತೇಡಿಯಂಡ್ ಬಯ್ಯುವಾತೇ ದೇವಯ್ಯಂಗೆ ತೃಪ್ತಿ! ದೇವಯ್ಯಂಡ ಬಟ್ಟೆಲ್ ಅಪ್ಪಣು ಓರ್ ಮುಳ್ಳಾಚಿ! ಅಪ್ಪಣುರ ಬಾಳಾಕ್ ದೇವಯ್ಯ ನರಿಯಾಚಿ!

ತಾಂಡ ಗೋಳಾನ ದಾರ್ಕೂ ಎಣ್ಣುವ ಪರಿಸ್ಥಿತಿಲ್ ಅಪ್ಪಣು ಇಂಜಾಲೆ. ಓರಮ್ಮ ಬೊಡ್ಡುರ ಕೂಡೆ ಎಣ್ಣಿಯಂಡ್ ಮೊರ್ಡುವಯಿಂಜತ್.

ದೇವಯ್ಯ, ಅಪ್ಪಣುರ ಅಪ್ಪನಲ್ಲ ಎಣ್ಣುವಾನ ಪಿಳ್ಳಾ ದೇವಯ್ಯಂಡ ಸಂಸಾರತರ ಕಥೆನೆಲ್ಲಾ ಬೊಡ್ಡುರ ಅಪ್ಪನವ್ವನೂ ಪರೆಯುವಾನ ಬೊಡ್ಡು ಕೇಟಿತಿಂಜತ್. ಅಪ್ಪಣು ಪಿಳ್ಳಾ ಅವ್ವಿರ ಅಪ್ಪ ದಾರ್. . . . ಅವ್ವಂಡ ದಂಡನೆ ಬಾಕೆರ ಸಂಗತಿನೆಲ್ಲಾ ಬೊಡ್ಡು ತಾಂಗ್ ಗೊತ್ತುಳ್ಳಚ್ಚಕ್ ಅಪ್ಪಣುಕ್ ಎಣ್ಣೆ ಕೊಡ್ಪಯಿಂಜತ್.

ಒರೇ ಮನೆಲ್ ಇಂಜಕಲೂ ಅಪ್ಪಣು ಪಿಳ್ಳಾ ಅವ್ವಿ ಒಬ್ಬನೊಬ್ಬನ ಕಾಂಬದೇ ಅಪರೂಪ ಆಯಿಪೋಚಿ. ಕಂಡಕಲೂ ತಕ್ಕ ಪರಂದಾವಕೊಂದೂ ಕಯ್ಯಲೆ! ಬೇವ್ಚಿಟ್ಟ ಕೂಳೊ, ಕಂಜಿಯೋ ಮಕ್ಕಳೆಲ್ಲ ಉಂಡಿತಾನ ಪಿಳ್ಳಾ ಎನ್ನೇಂಗಿ ಬಾಕಿ ಇಂಜಕ ಅವ್ವಿ ತಿಂದವ ಇಂಜತ್. ತಾಂಡ ಪಣಿ ತೇತಿತ್ ಉಂಬಳಮನೆರ ಮೂಲೆಲ್ ಬುದ್ಧವಯಿಂಜತ್! ಚಿಕ್ಕವ್ವಂಡ ಕೀತನ ಪೊಡಿಯತರ ತುಂಡನೇ ಸುತ್ತಿಯಂಡ್ ಮೇಲ್ ಮುಚ್ಚಿಯವಯಿಂಜತ್! ಅವ ತಾಂಡ ಜೀವಮಾನತ್ ತೆಳಾಚ ದಿನ ಉಂಡೋ ಇಲ್ಲೆಯೋ ಕಂಡಂವನಿಲ್ಲೆ ಪರಂದಂವನಿಲ್ಲೆ. ಆಚೇಂಗಿ ಮೊರ್ಡತ ದಿನ ಮಾತ್ರ ಇಂಜಾಲೆ!

ಒನ್ನಾಂದ್ ಉಪ್ಪಕ ಬೇಲ್ಲ್ ಕಲ್ಲಾಕ್ ಕೆಣ್ಣಂಜಿತ್ ಅಪ್ಪಣುರ ನೇಂಗಿ ಪೊಟ್ಟಿಪೋಚಿ. ಕಾರಣೇ ಇಲ್ಲತೆ ಬಯ್ಯುವ, ಪೊಯ್ಯುವ ದೇವಯ್ಯಂಗೆ ಬಲವಾನ ಕಾರಣ ಕಟ್ಟಿಪೋಚಿ. ಎತ್ತಾಕ್ ಪೊಯ್ಯುವ ಕೋಲ್ಲ್ ಕ್ಷಣ್ಣನ ಕೆತ್ತ ಬೇಲ್ಲ್ ಉರಾಟಿಯಂಡ್ ಪೊಜ್ಜತ್!

"ನಾಳೆ ಪೊಲಣೆಕ್ ಎಲ್ಲಿಯೇಂಗಿ ಓರ್ ನೇಂಗಿ ಕೊಂಡ ಬಂದಿತ್ ಉಪ್ಪಕ್ ಎತ್ತ ಕೆಟ್ಟಾಲೇಂಗಿ ನಿನ್ನ ಬಡಾಚಿ ಕೊಂದಿತ್ ಕುಂಡಾಕ್ ಇಟ್ಪಾರುವಿ! ನೇಂಗಿ ಕೊಂಡ

ಬರಣೆ ಮನೆಕ್ ಬಂದಾರುವಕಯ್ಯ!"ಂದ್ ಅಪ್ಪಣೆ ಮಾಡಿತ್ ಕೆತ್ತ ಬೇಲ್ಲ್ ಬುದ್ದಲ್ಲಿಕೇ, ಕ್ಕಣ್ಣಂಗೋರ್ ಚೌಟ್ ಚವುಟಿತ್ ತಿರಿತೂ ನೋಟಿ ಪೋಚಿ ದೇವಯ್ಯ!

ನೇಂಗಿ ಕೋಂದಾಲೇಂಗಿ ಅಪ್ಪ ಚೌಟಿ ಕೊಲ್ಲುವದ್ ನೇರಂದ್ ಕ್ಕಣ್ಣ ನಂಬಿಯಂಡತ್! ಬುದ್ದಲ್ಲಿಂಜಿ ಒಪ್ಪುವಯಿಂಗ ದಾರೂ ಇಲ್ಲೆ. ತಾನೇ ಎದ್ದಿತ್ ತೋಡಲ್ ಕೆತ್ತ ಮೇಲ್ ಕತ್ತಿಯಂಡತ್. ಕೆತ್ತ ಮರಂಜ ಬಟ್ಟೆನ ನೀರಲ್ ಜಳಂದಿತ್, ಪುಂಡಿತ್ ಅದನೇ ಇಟ್ಟಂಡತ್! ಅತ್ತಳ ಬುಟ್ಟಂಡ್ ಬಾಣೆಕ್ ಪೋಚಿ.

ಉತ್ತಿತ್ ಬಪ್ಪ ತಮ್ಮಣಿಂಗ್ ಓರ್ಪುಡಿ ತಂಗೂಳನ ತಳಿಯಕ್ ಇಟ್ಚ್ಚಿತ್ ಅಪ್ಪಿ ಪಾರ ಕಾತತ್! ಮಜ್ಜಣ ತಿರಂಜಕಲೂ ಅಪ್ಪುಣು ಬಂದಾಲೆ. ಕ್ಕಣ್ಣ ಬರತ ಸಂಗತಿನ ಅಪ್ಪಿ ಚಿಕ್ಕವ್ವಂಗೆ ಎಣ್ಣೆಚಿ.

"ಎಲ್ಲಿಯೇಂಗಿ ಚಾವಡ್. ಕಯಿಂಜಕ ನೀನೂ ಚತ್ತಾರ್!"ಂದ್ ಮಾತ್ರ ಎಣ್ಣೆತ್ ಮರೆಯಾಚಿ ಚಿಕ್ಕವ್ವ.

ತಾಂಡ ಬಾಳನೇ ಪಾಳಾಕುವಕ್ ಪೊರಾಟ, ಅಪ್ಪಂದ್ ಕಾಕುವ ರಾಕ್ಯಾಸಿಕ್ ಅಪ್ಪುಣು ಬರತ ಸಂಗತಿ ಎಣ್ಣೆಚಿ.

"ಓಹೋ, ಅವನೊಬ್ಬನೇ ನೀಡ ತಮ್ಮಣನಲ್ಲ! ಬಾಕಿ ಮಕ್ಕ ಉಂಡತಾ ಕುಡ್ಚತಂದ್ ಕೇಪಕ್ ನೀಡ ನಾವು ಬುದ್ದಪೋಚಾ? ಅಪ್ಪನವ್ವ ಚತ್ತತಂದ್ ನೋಟುವಕ್ ನೀಡ ಕಣ್ಣ್ ಪೊಟ್ಟಿ ಪೋಚಾ? ಎಲ್ಲಿಯೇಂಗಿ ಚಾವಡ್. ಚೊಕ್ಕನವ ಚಿಕ್ಕಂಡು. ಓರ್ ನೇರ ಉಂಡಾಲೇಂಗಿ ಚತ್ತಪೋಪದೊಂದೂ ಇಲ್ಲೆ! ಕಯ್ಯವೇಂಗಿ ನೀನೂ ಅವಂಡ ಕೂಡೆ ಎಲ್ಲಿಯೇಂಗಿ ಚಾವಕೆನ್ನ?" ಎಣ್ಣೆತ್ ಅಪ್ಪಿರ ಸದ್ದ್ ಅಡ್ಕಿರತ್ ದೇವಯ್ಯ.

ಒನ್ನಂದೆಕ್ ಮಿಣ್ಣ್ ಬೊಡ್ಡ್ ಕುಂದಕ್ ಅತ್ತಳ ಆಟಿಯಂಡ್ ಪೋಯಿತಿಂಜತ್. ಅವಂಡ ನಲ್ಲೋರ್ ಗಬ್ಬಕರ್ತಿ ಪಯ್ಯನ ಎಚ್ಚಕ್ ತೇಡ್ನಕೋ ಕಟ್ಟಿತಿಂಜಾಲೆ. ಬರೆಬುದ್ದತೋ, ನರಿ ಪುಡ್ಚತೋ ಗೊತ್ತಲ್ಲೆ. ಅತ್ತಳ ಆಟಿಯ ಬಂದಿತ್ ಕೊಟ್ಟ್ ಕೂಟಿರುವಂಜಿ ಸದ್ದ್ ಮಾಡತೆ ಕೂಡಿರತ್!

ಪಯ್ಯ ಕಾಂಗತಾನ ಸಂಗತಿ ಮನೆಲ್ ಎಣ್ಣೆನಕ ಅಪ್ಪ ಬೆಪ್ಪಕಿಲ್ಲೆಂದ್ ಬೊಡ್ಡುಕ್ ನಲ್ಲೋಣ ಅನುಭವ ಇಂಜತ್.

ಪಿತ್ಯಾಂದ್ ಅತ್ತಳ ಕುಂದ್‌ಕ್ ಆಟತೆ ಪರಂಬುಕ್ ಆಟಿಯಂಡ್ ಬಾತ್. ಅಪ್ಪಣುರ ಮೂಡಲ್ ಪೋಡಿ! ಬೊಡ್ಡುರ ಮನಸ್ಸಲೂ ನೆಟ್ಟಲ್! ಅತ್ತಳ ಮೇಪಕ್ ಬುಟ್ಟಿತ್ ಮರತ್ತರ ನಳತ್ ದಂಡಾಳೂ ಅಳಾತತ್. ಎಕ್ಕೊಲುರ ಕಳಿ ತೆಳಿ ಇಲ್ಲೆ. ತಕ್ಕ ಬಾಕಿಲ್ಲೆ. ತಾತ್‌ನ ಮಂಡೆ ನೇತಲೆ.

ಅಪ್ಪಣುವೇ ಮಿಳ್ಳಾ ಬಾಯಿ ತೊರ್ಂದತ್. "ಬೊಡ್ಡು, ನನ್ನ ಇಂದ್‌ಂಜಿ ನೀಕ್ ಕಾಂಬಕ್ ಕ್‌ಟ್ಟುಲೆ. ನಾಡಪ್ಪ ನನ್ನ ಪೊಜ್ಜಿ ಕೊಲ್ಲುವದ್ ನೇರ್. ಎಲ್ಲಿಕೇಂಗಿ ದೂರ ಪೋಯಿತ್ ಪೊಳೆಕ್ ಬುದ್ದಿತೋ, ಕೇರ್‌ಟ್ಟುಂಡ್ ತೂಂಗಿತೋ ಚತ್ತರುವಿ!" ಎಣ್ಣೆತ್ ತಾಂಡ ಮನೆಲ್ ನಡ್‌ಂದ ಸಂಗತಿನೋ, ತಾಂಡ ಅಕ್ಕ ಅವ್ವಿರ ಗೋಳಾನೋ ಎಣ್ಣೆತ್ ಮೊರ್‌ಟತ್.

ಬೊಡ್ಡುಕೂ ಬಯತ್ ಪನ್ನೆರಂಡೋ, ಪದಿಮೂಂದೋ ಆಯಿತಿಕ್ಕು. ಅವಂಡ ಅಪ್ಪನೂ ದುಂಬ ಚೆಡಿಹಾರ. ಗರೀಬತನತ್‌ನಗುಂಡ್ ಎಲ್ಲಾಡ ಕೂಡೆ ಪಾರಿಕಳಿಪಂತ ದುಷ್ಟ ಸ್ವಭಾವತ್‌ರಂವ.

ಅಪ್ಪಣು ಮನೆಬುಟ್ಟ್ ಪೋಪ ತೀರ್ಮಾನಕ್ ಬಂದದ್ ಕೇಟಿತ್ ಬೊಡ್ಡುಕ್ ತಾಂಡ ಪಯ್ಯು ಕಾಣತಾನ ಸಮಸ್ಯೆಕ್ ಪರಿಹಾರ ಕ್‌ಟ್ಟಿ ಪೋಚಿ!

"ಅಪ್ಪಣು, ನಾನಿಂದ್ ಮನೆಕಂತೂ ಪೋಪುಲೆ. ಪೊಳೆಕ್ ಪಾರಿರನಾಂದೇ ಬಂದಂವ. ನೀನೂ ಇನ್ನನೆ ಗೇನ ಮಾಡಿತುಂಡೇಂಗಿ ನಂಗ ದಂಡಾಳೂ ಇಕ್ಕೆನ್ನೆ ಪೊರ್‌ಡನ! ನಾನ್ ದಂಡ್ ತುಂಡ್ ಕಾಡ್‌ಕಳಾಂಜಿ ಪುಕ್ಕಾನಾನ ಕೆಟ್ಟಿಯಂಡ್ ಬಂದಿಯೆ. ಇದಾ.... ನೀನೂ ಒಂದ್ ತಿನ್ನ" ಎಣ್ಣೆತ್ ದಂಡಾಳೂ ತಿಂದತ್.

ಕೆಲಕ್ ಬೋರೆ ಒಂದೂ ಇಲ್ಲೆ. ಮೇಲ್‌ಲುಳ್ಳ ಕೀತ್ ಬಟ್ಟೆ ಅಲ್ಲತೆ, ಬೋರೆ ಒಂದೂ ಇಲ್ಲೆ. ಕೊಡವತಕ್ಕ ಬುಟ್ಟಕ ಬೋರೆ ತಕ್ಕೇ ಗೊತ್ತಲ್ಲೆ! ಕನ್ನಡ ಪಿಳ್ಳಾ ಮಲಯಾಳ ಪರ್‌ಂದಾನ ಚೆನ್ನ ಚೆನ್ನ ಅರ್ಥ ಮಾಡಿಯವಯಿಂಜತ್.

ಮೈಸೂರಂದೆಣ್ಣುವ ಊರ್‌ಪೆದ ಕೇಟಿತಿಂಜತ್. ಅದ್ ಏದ್ ದಿಕ್ಕಲ್ ಉಳ್ಳಂದ್ ಗೊತ್ತಿಂಜಲೆ. ಕಾಲ್ ಪೋನಾಲೆ, ಬಟ್ಟೆ ತೇಂಜಾಲೆ ಪೋಯಿತ್ ಅಪ್ಪಂಗಡ ತಲ್ಲನೊ, ಹಿಂಸೆನೊ ತಪ್ಪಾಚಿಟ್ಟಿವದ್ ಮಾತ್ರ ಆ ದಂಡ್ ಮಕ್ಕಡ ಜೀವನತ್‌ರ ಗುರಿ ಆಯಿತಿಂಜತ್!

ಏಳೆತ್ತರ ಕಾಲತಂಜಿ ಅತ್ತಡ ಕೂಡ ಬೊಳಂದ ಮಕ್ಕಕ್ ಅಯಿಂಗಡ ಅತ್ತಳ ದಾರೂ ಗತಿ ಇಲ್ಲತನ್ನಕೆ ಪರಂಬುಲೇ ಬುಟ್ಟಿತ್ ಪೋಪಕ್ ಮನಸ್ಸು ಬಂದಾಲೆ.

ಅಪ್ಪುಣುಕ್ ತಾಂಡ ಅಕ್ಕ ಅವ್ವಿನೊಮ್ಮ ದೂರತಂಜಿ ನೋಟಂಡೂಂದ್ ಆಶೆ ಇಂಜತ್. ಅವಡ ಕೀತನ ಪೊಡಿಯ ತುಂಡ್, ಜಿಕ್ಕುಕೆಟ್ಟನ ಮಂಡೆ, ಒಣಂಗಿ ಒಟ್ಟನ ತಡಿ, ನೀರಡಂಗ್ನ ಕಣ್ಣ್, ಅರೆಲೂ ಮಂಡೆಲೂ ಓರಂದ್ ಮಂಗರುವ, ಇದೇ ಅಪ್ಪುಣುರ ಕಣ್ಣರ ಮಿಳ್ಳಾ ಲಿಂಜತ್! ಅವಡ ಬಾಳ್ ಎನ್ನಾಯಿಪೋಕೂಂದ್ ದುಃಖ್ ಚಿಟ್ಟಿತ್.

ಅವಳ ಕಂಡಿತ್ ಪೊರೊಡುವಕ್ ಬೋರೆ ಬಟ್ಟೆ ಇಂಜಾಲೆ. ಇಂದೇತ ಕಾಲತಾರ ಮಕ್ಕಡನ್ನಕೆ ತಿಳುವಳಿಕೆ ಇಂಜಾಲೆ. ದಂಡಾಳೂ ಅಯಿಂಗಡ ಅತ್ತಳೆಲ್ಲ ಗುಡ್ಡೆ ಕೂಟಾಚಿ. ಎಲ್ಲಾಂಡೂ ನಿಪ್ಪು ಬೋಳೆನ ಮಾಂದಿ ಕೊಡತತ್! ಕಡಾಚಿ ಕುಳ್ಳಿಯಳೆಲ್ಲ ತಬ್ಬಿತ್ ದುಂಡಾನ ಕೊಡಚತ್! ಬಲ್ಯ ಪರಂಬುಂಜಿ ತಿರಿ ತಿರಿ ನೋಟಿಯಂಡ್ ಮರೆಯಾಚಿ!

ಬೋರೆ ಅತ್ತಕಾರ ಮಕ್ಕ ಗುಡ್ಡೆ ಕೂಡಿಯಂಡ್ ಅಯಿಂಗಡಯಿಂಗಡ ಕಳಿಲ್ ಮುಳಿತಿಂಜವು ಅಪ್ಪುಣು ಪಿಳ್ಳಾ ಬೊಡ್ಡು ಯಾಲೆ ಪೋಚೀಂದ್ ನೋಟಾನದೇ ಇಲ್ಲೆ! ಅಪ್ಪುಣುಕೂ, ಬೊಡ್ಡುಕೂ ಬೋರೆ ತೊಟ್ಟಪೆದ ಇಂಜತೋ ಇಲ್ಲೆಯೋ ಎಣ್ಣುವದ್ ಗೊತ್ತಲ್ಲೆ.

ಮಕ್ಕ ದಂಡಾಳ್ ನಡಂದತ್. ಕೆಲಕಿಲ್ಲತೇ ನಡಂದತ್. ಕಾಲ್ ಪೋನಾಲೇ ನಡಂದತ್. ನಡಂದಂಡೇ ಕೆಲ ಬಯಿಪು ಮರಂದತ್! ಏದ್ ಊರೋ, ಏದ್ ರಾಜ್ಯವೋ, ಏದ್ ದೇಶವೋ? ಕೇಟರಿಂಜವಕ್ ಭಾಷೆಯೂ ಗೊತ್ತಲ್ಲೆ.

ಪುಟ್ಟನ ಊರಂಜಿ ದೂರ ಸಾಗ್ನನ್ನಕೆ ಜನಳೂ ಬದಲ್! ಪ್ರಕೃತಿಯೂ ಬದಲ್! ಸೂರ್ಯ ಒಬ್ಬ ಮಾತ್ರ ತಾಂಡ ಊರಲಿಂಜವನೇ..... ಅವನೂ ತಾಂದತ್. ಸಾಲ್ ಸಾಲ್ ಎತ್ತಗಾಡಿಯ ಪೋಯಂಡಿಂಜತ್. ನಾಪದ್, ಐಂಬದ್ ಎತ್ತ ಗಾಡಿಯ ಒಕ್ಕಚೆ ಸಾಲಾಯಿತ್ ಪೊರೊಡುವ ಇಂಜತ್. ಮಕ್ಕ ಗಾಡಿ ಸಾಲಾರ ಬಯ್ಯೇ ನಡಂದತ್.

ಬೈಟಾಪಕ ಗಾಡಿಕಾರಳೆಲ್ಲ ಗಾಡಿ ನಿಪ್ಪಾಚಿಟ್ಟಿತ್ ಎತ್ತಕ್ ಪಿಲ್ಲಟ್ಟಿತ್ ಅಯಿಂಗಡಯಿಂಗಡ ಕೆಟ್ಟಂಜ ಎರಿಬಟ್ಟಿರ ಕೂಪದಿನ ಉತ್ತಿತ್ ಉಂಬಕ್ ಅಳತತ್. ಮಕ್ಕಕ್ ಕೆಲ ಬೈಚಕಲೂ ಕೈ ನೋಟಿ ಕೇಪಕ್ ಕೊಡವಡ ಸ್ವಾಭಿಮಾನ ತಡೆಬಾತ್!

ಗಾಡಿಕಾರಡ ತಕ್ಕನೆಲ್ಲ ಕೇಪಕ ಅವು ಮೈಸೂರ್‌ಕ್ ಪೋಪವೂಂದ್ ಗೇನ ಮಾಡಿಯಂಡತ್. ಎತ್ತಕ್ ಕೆರೆಲ್ ನೀರ್ ಕುಡ್‌ಪ್‌ಚಿಟ್ಟಿತ್ ಗಾಡಿಕಾರ ಅಯಿಂಗಡಯಿಂಗಡ ಗಾಡಿರ ಅಡಿಲೇ ಬುದ್ದಂಡತ್. ಮಕ್ಕಳೂ ಅಯಿಂಗಡ ಪಕ್ಕೇ ಬುದ್ದಂಡತ್.

ಪೊಲಾಕ ಕೆರೆಲ್ ನೀರ್‌ಕ್ ಬಂದ ತೊಂಡಿಯೊಬ್ಬ ಮಕ್ಕಳ ತಟ್ಟಿತ್ ಒಪ್ಪಾಚಿ. ಗಾಡಿಕಾರಳೆಲ್ಲ ಅಯಿಂಗಡ ಕ್ರಮಪೋಲೆ ಓರ್ ವರ್‌ಕ್ ಕಯಿಂಜ ಪಿಳ್ಳಾ ಗಾಡಿ ಕೆಟ್ಟಿಯಂಡ್ ಪೋಯಿರ್‌ತಿಂಜತ್.

ಆ ಮುದಾಕಿ ಮಕ್ಕಳ ಕೂಟಿಯಂಡ್ ಪೋಯಿತ್ ಚೆನ್ನ ಅಂಬಾಲಿ ಕಂಜಿ ಕೊಡ್‌ತತ್. ಮಕ್ಕ ಜಿಂವ ಕೂಡ್‌ಚಿ. ಅಪ್ಪುಣು ಪಿಳ್ಳಾ ಬೊಡ್ಡು ಅಂದಾಡೀ ಆ ಮುದಾಕಿರಲ್ಲಿಯೇ ಇಂಜತ್. ಪಿತ್ಯಾಂದ್ ಅಜ್ಜಿ ಕೊಡ್‌ತ ಓರಂದ್ ರಾಗಿ ಒಟ್ಟಿ ತಿಂದಿತ್ ನೂಲ್ ತುಂಡ್‌ನ ಗಾಳಿಪಟತ್‌ರನ್ನಕೆ ಎಲ್ಲಿಕೋ ಪೊರ್‌ಟತ್!

ಆ ಕಾಲತ್ ಊರ್‌ಂಜಿ ಊರ್‌ಕ್ ಜನ ನಡ್‌ಂದಿತೇ ಪೋಪ ಇಂಜತ್. ಬಟ್ಟೆ ಬಟ್ಟೆಲ್ ಭತ್ರ ಇಪ್ಪಯಿಂಜತ್. ಕೂಟ್‌ಕಾರ ದಾರೂ ಇಲ್ಲತೆ ಬುದ್ದಂಡ್ ವರಿಪೋಯಿತಿಂಜ ಮಕ್ಕಳ ಒಪ್ಪಿತ್ ಭತ್ರಕಾರ ಚೆನ್ನ ತಂಗೂಳ್ ಕೊಡ್‌ತಿತ್, ದೂರತ ಪೊಳೆಂಜ ನೀರ್ ಕೊಂಡ ಬಪ್ಪಕ್ ಅಯೆಚತ್. ಅಪ್ಪುಣು ಪಿಳ್ಳಾ ಬೊಡ್ಡುಕ್ ಪೊಳೆಂಜ ನೀರ್ ಕಡ್‌ತುವ ಪಿಳ್ಳಾ ಕಾಡ್‌ಂಜಿ ಪುಳ್ಳಿ ತೇಡಿಯ ಬಪ್ಪ ಚಾಕರಿ ಕೊಟ್ಟಿಪೋಚಿ!

ಭತ್ರತ್ ದೋಸೆ ಕಡಿಯುವ, ದೂಸೆ ಬೂಕುವ, ಪಾತ್ರ ಕತ್ತುವ, ನೀರ್ ಕಡ್‌ತುವ, ಪುಳ್ಳಿಕೊಂಡ ಬಪ್ಪ.... ಇನ್ನತ ಪಣಿ ಕೆಜ್ಜಂಡಿಂಜತ್.

ಕೆಲ ದುಂಬ ಉಂಡಿತ್ ಅಭ್ಯಾಸೇ ಇಲ್ಲತ ಮಕ್ಕಕ್ ಇಕ್ಕ ಕೆಲ ದುಂಬ ಉಂಡಂಡ್ ಸ್ವರ್ಗ ಸುಖಿತ್‌ರ ಅನುಭವ ಆಚಿ! ಅವು ನೀರ್ ಕಡ್‌ತುವ ಇಂಜ ಪೊಳೆರ ಪೆದ ಕಾವೇರಿಂದ್ ಗೊತ್ತಾಚಿ. ಅದೇ ಪೆದ ಅವು ಪುಟ್ಟಾನ ಊರ್‌ಲೂ ಕೇಟಿತಿಂಜತ್. ಆ ಪೊಳೆರ ಬರಿಲ್ ಅಳಾತಕ ಅವ್ವಂಡ ಮಡ್‌ಲಳಾತ ಸುಖಿತ್‌ರ ಅನುಭವ ಆಪಯಿಂಜತ್!

ಆ ಭತ್ರಕ್ ಏದೇದೋ ರಾಜ್ಯಕಾರಳೋ, ದೇಶಕಾರಳೂ ಬಪ್ಪಯಿಂಜತ್. ಕನ್ನಡ, ತಮಿಳ್, ಮಲಯಾಳ ಇನ್ನತ ತಕ್ಕೆಲ್ಲ ಮಕ್ಕಕ್ ಅರ್ಥ ಆಪಯಿಂಜತ್. ಮಕ್ಕಡ ತಡಿಯೂ ಚಾಯಿ ಕೂಡ್‌ಚಿ. ಚೆನ್ನ ತಿಳುವಳಿಕೆಯೂ ಜಾಸ್ತಿ ಆಯಂಡ್ ಬಾತ್.



ಭತ್ತತ್ ಕೂಳ್, ಬಟ್ಟೆ ಅಲ್ಲತೆ ದುಡ್ಡ್ ಮಾತ್ರ ಕಟ್ಟುವಯಿಂಜಾಲೆ. ಆಚೇಂಗಿ ಕುದುರೆಲ್ ಬಪ್ಪ ದೊರೆಯಡ ಕುದರೆಕ್ ಪಿಲ್ಲಟ್ಟಿತ್, ಮಾಲೀಸ್ ಮಾಡ್ನಕ ಆರ್ಕಾಸ್, ಓರಾಣ.... ಇನ್ನನೆ ಕೊಡ್ಪಯಿಂಜತ್. ಅನ್ನನೆ ಕಟ್ಟಾನಾನೆಲ್ಲ ಕೂಟಿ ಬೆಚ್ಚವ ಇಂಜತ್.

ಭತ್ತತ್ ಬೈಟ್ ಒಳಿಯುವಯಿಂಗ ಇರ್ಲ್ ಪೇರ್ತ್ ನೇರಕೆತ್ತಣೆ ಏದೆದೋ ಸುದ್ದಿ ಪರೆವ ಇಂಜತ್. ಅದ್ನ ಕೇಟಿತ್ ದೇಶತರ ಅಡ್ಡಗಲ ಎಚ್ಚಕುಂಡ್ ಎಣ್ಣುವ ಜ್ಞಾನ ಮಕ್ಕಕ್ ಬಾತ್! ತಿರುಪತಿ, ಕಾಶಿರಂಥ ತೀರ್ಥಕ್ಷೇತ್ರಕ್ ಪೋಪಕ ಗುಂಪುಕಾರಳುಂಡ್ ಬೋರೆ ಬೋರೆ ರಾಜ್ಯ ದೇಶತರ ಪರಿಚಯವೂ ಆಚಿ.

ಅಕ್ಕ ಒಂದನೆ ಮಾಪಡೆ ಸುರುವಾನ ಕಾಲ. ಭತ್ತಕ್ ಬಪ್ಪಯಿಂಗಡ ಬಾಯಿಲೆಲ್ಲ ಮಾಪಡೆರದೇ ವಿಚಾರ. ಅದೇ ಊರ್ಲ್ ಪಡೆಕ್ ಬಾಲೆಕಾರಳ ಎಡ್ಪಾಂದೂ, ಪಡೆಕ್ ಪೋನಕ ಕೈ ದುಂಬಾ ಸಂಬಳ ತಪ್ಪಾಂದೂ ಜನಡ ಬಾಯಿಲ್ ಕೇಟತ್.

ಪಿತ್ತಾಂದ್ ಅಪ್ಪಣು ಪಿಳ್ಳಾ ಬೊಡ್ಡು ಪಡೆಕ್ ಬಾಲೆಕಾರಳ ಎಡ್ಪ ಜಾಗ ತೇಡಿ ಪುಡ್ಚತ್. ಬಾಲೆಕಾರಡ ಸಾಲ್ಲ್ ನಿಂದತ್. ಮಕ್ಕಡ ಉದ್ದಬಣ್ಣ, ತಡಿರ ಕಾಯಿಲ ಎಲ್ಲ ಪರೀಕ್ಷೆ ಮಾಡಿತ್ ಅಪ್ಪಣುನ ಆಂಜಂಡ್ ಬೋರೆ ಸಾಲ್ಲ್ ನಿಪ್ಪಚಿಟ್ಟಿತ್!

ಬೊಡ್ಡುಕ್, "ನೀನ್ ದಂಡ್ ತಿಂಗ ಕಯಿಂಜಿತ್ ಬಾ. ಅಕ್ಕಣೆ ಎಕ್ಕೋಲು ಈ ಪೊಡಿನ ಮುಗ್ಗಿತ್ ನೀರ್ ಕುಡಿ. ನೀಡ ತಡಿಲ್ ಮಲೇರಿಯಾ ಉಂಡ್!"ಂದ್ ಎಣ್ಣಚಿ.

ಆಯ್ ಆನಯಿಂಗಡ ಸಾಲ್ಲ್ನಿಂದ ಅಪ್ಪಣುಕ್ ಬೊಡ್ಡುನ ಬುಟ್ಟಿತ್ ಓರ್ ಮೊಟ್ಟ್ ಎಡ್ಪಕೂ ಕಾಲ್ ಬಂದಾಲೆ! ಪಯ್ಯನೋ, ಕಡ್ಚಿನೋ ಬೋರೆ ಮಾಡ್ನನ್ನಕೆ, ಅವ್ವನೋ, ಕುಳ್ಳಿನೋ ಬೋರೆ ಮಾಡ್ನನ್ನಕೆ, ವಡಿಯನೋ, ಪೊಣ್ಣನೋ ಅಪ್ಪರಿಪ್ಪರ ಈತಂಡ್ ಪೋನನ್ನಕೆ, ತಾಂಡ ತಡಿನೇ ನೇಳಕ್ ಈಂದಿತ್ ದಂಡ್ ಭಾಗ ಮಾಡಿಟನ್ನಕೆ ತೋಂದ್ಚಿ! ಈ ದಂಡ್ ಕೊಡವ ಕುಳ್ಳಿಯಡ ತಡಿ ಬೋರೆ ಆಯಿತಿಂಜಕಲೂ ಮನ ಒಂದೇ ಆಯಿತಿಂಜತ್ ! ಬಿಕ್ಕಿ ಬಿಕ್ಕಿ ಮೊರ್ಟಂಡ್ ದಂಡಾಳೂ ಮುರ್ಕಿ ತಬ್ಬಿಯಂಡತ್.

ಅಪ್ಪಣು ತಾಂಡ ಜೋಬಾಲಿಂಜ ಚೆನ್ನಂಗ್ ಬೊಳ್ಳಿರ ಪಾವುಲಿಯಳ ಬಾತಿತ್ ಬೊಡ್ಡುರ ಚಡ್ಡಿ ಜೋಬಾಕ್ಟ್ಟಿತ್.

"ಬೊಡ್ಡೂ, ನಾಕ್ ಇಳ್ಳಿ ಸಂಬಳ ಕ್ಕಟ್ಟುವ ಈ ಪಣ ನೀಕಿರಡ್" ಎಣ್ಣೊಚಿ. ಅದೇ ಅವು ದಂಡಾಳ್ ಪರಂದಂಡ ಆಖೀರಿ ತಕ್ಕಾ! ದಂಡಾಳ್ ಕಣ್ಣೊ ನೀರ್ ದುಂಬಿತ್ ಮಜ್ಜಣಕೇ ಬೈಟಾನನ್ನಕೆ ಆಚಿ!

"ಎಲ್ಲ ಸಾಲ್ ನಿಲ್ಲಿ. ತಿರಿತ್ ನೋಟತೆ ನಡರೀ"ಂದ್ ಅರಂದಂಡ್ ಕೂತ್‌ಟ್ಟತ್ ಅಧಿಕಾರಿಯೊಬ್ಬ.

ಅಪ್ಪುಣು ಮೊಟ್ಟೆಡ್‌ತತ್. ಬೊಡ್ಡು ಅಲ್ಲಿಯೇ ಕುತ್ತಿ ಅಳಾತದ್ ಕಂಡತ್ ಅಪ್ಪುಣು. ಅಪ್ಪರ ಎನ್ನಾಚೋ?

ಪಟ್ಟಾಳಕ್ ಕೂಡುವಕ ಅಪ್ಪುಣು ತಾಂಡ ನೇರಾನ ಮನೆಪೆದ, ಅಪ್ಪಂಡ ಪೆದತನೆಲ್ಲ ಕೊಡ್‌ತಾಲೆ.

ದೇವಯ್ಯಂಡ ಮೋಂವಂದೇ ಎಣ್ಣೊಚಿ. ಆಂಜೆಡ್‌ತ ಮಕ್ಕಳ ರೈಲ್ ಪತ್ತೆಚಿಟ್ಟತ್. ರೈಲ್ ಬೀಪ್‌ಚಿ. ತೆರಂಗ್‌ಚಿ! ಏದೇದೋ ಜಾಗಕ್ ಕೂಟಿಯಂಡ್ ಪೋಚಿ. ಚೆನ್ನಂಗೇ ದಿನತ್ ತರಬೇತಿ ತೇಂದದ್ ಹಡಗ್ ಪತ್ತೆಚಿಟ್ಟತ್! ಪೊರದೇಶತ್‌ರ ಪಡೆ ಭೂಮಿಕ್ ಅಯೆಚತ್. ನಾಲ್‌ಕಾಲ ಪಡೆಪೊತ್ತಿತ್ ಈ ಜಭ್ಬೂಮಿರ ಉದ್ದಗಲ ಕಂಡತ್.

ಕ್ರಿ.ಶ. 1918ನೇ ಇಸವಿಲ್ ಒಂದನೆ ಮಾಪಡೆ ನಿಂದತ್. ಪಡೆಪೊತ್ತ ಪಡೆಯಾಳಿಯಳ ಉಳ್‌ಪಿತ್ ಬೊಳ್ಳೆಕಾರ ತಂಗಡ ಭಾರ ನೀಕಿಯಂಡತ್.

ಅಪ್ಪುಣುಕ್ ಆಲಿಪುರಂ ಜೈಲ್‌ಲ್ ಓರ್ ಚಾಕ್ರಿ ಕ್ಕಟ್ಟಿಚಿ. ಮಂಗಲಾಚಿ, ಮಕ್ಕಳಾಚಿ. ಸಿಡ್‌ಬು ಕಾಯಿಲ ಬಂದಿತ್ ಪೊಣ್ಣೊ ಚತ್‌ಪೋಚಿ. ಮಕ್ಕ ಅಯಿಂಗಡಯಿಂಗಡ ಪಾಡ್‌ಕ್ ಬದ್‌ಕಿಯಂಡಿಂಜತ್.

ಅಪ್ಪುಣುರ ಕಥೆನೆಲ್ಲ ಕೇಟಿ ಕಾಳಪ್ಪಂಗ್, ಅಪ್ಪುಣು ತಾಂಡ ದೂರತ್‌ರ ಓರ್ ಬೆಂದ್‌ಕ ಎಣ್ಣುವದ್ ಗೊತ್ತಾಚಿ. ಕಾಳಪ್ಪಂಡ ಓರಾಂಡ್ ಜೈಲ್ ತೇರಣೆ ಅವನ ಅಪ್ಪುಣು ಪೇರ್ತ್ ಚಾಯಿಲ್ ನೋಟಿಯಂಡತ್. ಕಾಳಪ್ಪಂಡ ಕೂಡೆ ಕೂಡಿತ್ ತಾನ್ ಮರಂದೇ ಪೋಯಿತಿಂಜ ಕೊಡವ ತಕ್ಕಾನೋ ಪಡ್‌ಚಂಡತ್!

ಕಾಳಪ್ಪಂಡ ಜೈಲ್ ತೇಂದತ್. ಪೊರೊಡುವಂದ್ ಅಪ್ಪುಣು, ಕಾಳಪ್ಪ ರೈಲ್ ಪತ್ತುವಲ್ಲಿ ಕೆತ್ತಣೆ ಬಾತ್.

"ಕಾಳಪ್ಪ ಬಪ್ಪ ಬೇನಿಲ್ ನಾನ್ ಪುಟ್ಟಿ ಬೊಳೊಂದ ಕೊಡಗ್ಕ್ ಬಪ್ಪಿ. ನಾಡ ನಾಲ್ ಸಂತಾನ ದಾರೆಂಗಿ ಉಂಡಾ ನೋಟೊಂಡು. ಬೊಡ್ಡು ಎನ್ನಾಚೇಂದ್ ಅರಿಯೊಂಡು. ಕೊಡಗ್ಕ್ ಬಪ್ಪಕ ನೀಡ ಮನೆಕ್ ಬಪ್ಪಿ"ಂದ್ ಎಣ್ಣೆತ್ ತಬ್ಬಿಯಂಡತ್. ಹೌರ ಎಕ್ಸ್‌ಪ್ರೆಸ್ ರೈಲ್ ಪೊರಟತ್!

\*\*\*\*

ಅಪ್ಪುಣು ಪಿಳ್ಳಾ ಬೊಡ್ಡು ಮನೆಬುಟ್ಟ್ ಪೋಯಿತ್ ಸುಮಾರ್ ಇರಾವತ್ತಂಜಿ ಕಾಲ ಕಯಿಂಜ ಪಿಳ್ಳಾ ಬೊಡ್ಡು ಎಣ್ಣುವಂವ ಕೊಡಗ್ಕ್ ಬಂದಿತ್‌ಂದ್ ಪಳಮೆ ಆಚಿ! ಮನೆಕ್ ಬಪ್ಪಕ ಚೆನ್ನ ಪಣ ನೇಡಿಯ ಬಂದಿತ್‌ಂದೂ ಊರ್ ಪಳಮೆ ಆಚಿ!

ಬೊಡ್ಡುರ ಅಪ್ಪನವ್ವನೆಲ್ಲ ಚತ್ ಪೋಯಿತಿಂಜತ್. ತಂಗೆಯ, ತಮ್ಮಣಗಳೆಲ್ಲ ಸಿಡ್‌ಬು ಬಂದಿತ್ ಚತ್‌ತ್‌ಲೊ. ಅವಂಡ ತಂಗೆಯೊಬ್ಬಡ ಮೂಡೆಲ್ಲ ಸಿಡ್‌ಬು ಕಲೆ ಇಂಜವಳ ಮನೆಕಾರ ಕೂಡಿತ್ ಮಂಗಲ ಕಯಿಚತ್‌ಲೊ.

ಅವಂಡ ಪಾಳ್ ಭೂಮಿನೆಲ್ಲ ಮನೆಕಾರ ಪಾಲ್‌ಟ್ಟುಂಡ್ ಆಯಿತಿಂಜತ್. ಬೊಡ್ಡು ಪುಟ್ಟಿ ಬೊಳೊಂದ ಪಿಲ್ಲ ಮನೆ ಇಂಜಲ್ಲಿ ಮನೆಕಾರಡ ಅತ್ತ ಕೊಟ್ಟುಂದ್ ಇಂಜತ್!

ಬೊಡ್ಡು ಊರ್‌ಕ್ ಬಂದದ್ ಮನೆಕಾರಕ್ ಮಂಡೆ ನೊಂಬಲ ಆಚಿ. ಮನೆಕಾರ ಅವನ ತಕ್ ಪರಿಚಿಡುವಕೂ ಮಡ್‌ಚತ್. ಪಾಲ್‌ಟ್ಟುಂಡ್ ಆನ ಭೂಮಿ ಕಾಣಿನ ಬಯ್ಯಕ್ ಕೊಡ್‌ಕಂಡಿಯಾಕೂಂದ್, ಬೊಡ್ಡು ಆ ಮನೆಕಾರಂದ್ ಒತ್ತವಕೂ ಅವಂಡ ಸಂತಾನಕಾರ ತಯಾರಿಂಜಲೆ!

ಬೊಡ್ಡು, ನೆರೆ ಊರ್‌ರ ಪೂವಪ್ಪಂದ್ ಎಣ್ಣುವ ಓರ್ ಅಜ್ಜಂಡ ಪರಿಚಯ ಮಾಡಿಯಂಡ್ ದಂಡ್ ದಿನ ಇಂಜತ್. ಒನ್ನಾಂದ್ ಪೊಲಾಕ ಓರ್ ಕೀತ್‌ನ ಪೊಡಿಯತ್, ಮೂಡೆಲ್ಲ ನೆರಿಪುಡ್‌ಚ ಪೊಣ್ಣಾಳ್, ಪದ್‌ನಂಜಿ ಬಯತ್‌ರ ಓರ್ ಮೋವಳ ಕೂಟಿಯಂಡ್ ಪೂವಪ್ಪಜ್ಜಂಡ ಮನೆಕ್ ಬಾತ್.

"ಅಜ್ಜ, ನೆರೆ ಊರ್‌ರ ಬೊಡ್ಡು ಎಣ್ಣುವಂವನೊಬ್ಬ, ಪಂಡ್ ಊರ್ ಬುಟ್ಟಿತ್ ಪೋನಂವ ನಿಂಗಡಲ್ಲಿಕ್ ಬಂದಿತ್‌ಂದ್ ಪಳಮೆ ಕೇಟಿತ್ ನಾನ್ ಬಂದ"ಂದೆಣ್ಣೆ ಚಿ.

ಇದ್‌ನ ಕೇಟ ಬೊಡ್ಡು, "ನಿಂಗ ದಾರ್?"ಂದ್ ಕೇಟತ್.

"ನಾಡ ಸುದ್ದಿ ಒಂದೂ ಕೇಕತಿ. ಇವ ನಾಡ ಮೋವ. ಪಂಡ್ ಚಿರಾಪತ್ ಅಪ್ಪುಣುಂದ್ ನಾಕೋರ್ ತಮ್ಮಣ ಇಂಜತ್!"

ಅಕ್ಕಣೆ ಬೊಡ್ಡು ಎದ್ದಿತ್ ಅವಡ ದಂಡೂ ಕೈನ ಮುರಾಕಿ ಪುಡ್ಚಂಡ್, "ಅಕ್ಕಾ, ಅಪ್ಪರ ನಿಂಗ ಒಂದೂ ಎಣ್ಣಿತಿ. ನಾಕೆಲ್ಲ ಗೊತ್ತಾಚಿ! ಅಪ್ಪುಣು ಎಲ್ಲಾ ಸಂಗತಿ ನಾಡ ಕೂಡೆ ಎಣ್ಣೆನದ್ ಗೇನ ಉಂಡ್"ಂದೆಣ್ಣೆಚಿ.

ದಂಡಾಳೂ ಮೊರ್ಟತ್. ಅಂದ್ ತಾಂಡ ಸ್ವಂತ ಅಪ್ಪಂದೇ ನಂಬಿಯಂಡಿಂಜ ದೇವಯ್ಯಂಗ್ ಬೊತ್ತಿತ್ ಅತ್ತಬಾಣೆಂಜಿ ಓಡ್ನಲ್ಲಿಂಜಿ, ಅಪ್ಪುಣು ಮಿಲಿಟರಿಕ್ ಕೂಡವಲ್ಲಿ ಕೆತ್ತಣೆ ನಡಂದಾನೆಲ್ಲ ಅಪ್ಪುಣುರ ಅಕ್ಕನಾಯಿತಿಂಜ ಅಷ್ಟಿ ಎಣ್ಣೆಕೊಡ್ತತ್. ಕಣ್ಣ್ ಸೆರಿಕ್ ಕಾಂಗತ ಪೂವಪ್ಪಜ್ಜ ಕಥೆನೆಲ್ಲ ಕೇಟಂಡ್ ಅಳತತ್.

ಇಚ್ಚಕ್ ತಕ್ಕಾ ಬಾಕ್ ಆಯಂಡಿರಣೆಕ್ ಓರ್ ಪೊಲೀಸ್‌ಕಾರ ಬಾತ್.

"ಸುಮಾರ್ ಇರುವತ್ತಂಜಿ ಕಾಲಕ್ ಬಯ್ಯ ಅಪ್ಪುಣು ಎಣ್ಣುವ ಕ್ಕಣ್ಣನ ಕೂಟಿಯಂಡ್ ಊರ್ ಬುಟ್ಟಿತ್ ಓಡ್ನ ಬೊಡ್ಡು ದಾರ್?"ಂದ್ ಕೇಟತ್. ಬೊಡ್ಡು ಎದ್ ನಿಂದಿತ್ ಕೈ ತೊತ್ತತ್.

"ನೋಟಾರೇ, ನೀನ್ ಅಪ್ಪುಣು ಎಣ್ಣುವಂವನ ಕೊಲೆ ಮಾಡಿತುಳ್ಳಿಯಾಂದ್ ನೀಡ ಮನೆಕಾರ ಪೊಲೀಸ್‌ಕ್ ಪುಕಾರ್ ತಂದಿತ್. ನಾಳೆ ನೀನ್ ಸ್ಟೇಷನ್‌ಕ್ ಬರೊಂಡು. ಇದಾ ನೋಟೀಸ್‌ಕ್ ಸೈನ್ ಇಡ್" ಎಣ್ಣಿತ್ ನೋಟೀಸ್ ಜಾರಿ ಮಾಡಿತ್ ಪೋಚಿ.

'ಪಾಪಿ, ಪಾರನ ಚವುಟೊನಕಲೂ ಪೂರುವ'ಂದೆಣ್ಣಿಟ, ಬೊಡ್ಡುಕ್ ಅಡಿ ಆಕಾಶ ಕಾಣತಾಚಿ! ಪೂವಪ್ಪಜ್ಜಂಗ್ ಮಾತ್ರ ಬೊಡ್ಡುರ ಬೋಜಪ್ಪ, ಕುಳ್ಳಿಪ್ಪಂಗಡ ಚಾಲ್ ನಲ್ಲೋಣೆ ಗೊತ್ತಿಂಜತ್. ಬೊಡ್ಡುನ ಪಕ್ಕ ಅಳಪ್‌ಚಿಟ್ಟಂಡ್,

"ಅಪ್ಪ ಮೋನೆ, ನೀಡ ಅಪ್ಪಂಡ ಭೂಮಿನೆಲ್ಲ ಪಾಲ್‌ಟ್ಟಂಡ್ ಆಯಿತ್! ಇಕ್ಕ ನೀನ್ ಪಾಲ್ ಕೇಕೂಂದ್ ಇನ್ನೆಲ್ಲ ಕೊಲೆರ ಅಪವಾದ ಪೊರ್‌ಪ್‌ಚಿಟ್ಟಿಯೆ. ಈ ಆಸ್ತಿರ ಆಸೆ ಬುಟ್ಟಿತ್ ನೀನ್ ಎಲ್ಲಿಯೇಂಗಿ ನೆಮ್ಮದಿಲ್ ಬದ್‌ಕಿಯವದೇ ನಲ್ಲದಪ್ಪ"ಂದೆಣ್ಣೆಚಿ.

ಅಂದ್ ಬೈಟಾಕಣೆ ಊರ್‌ಲೆಲ್ಲ ಬೊಡ್ಡು ಬಂದಿತ್‌ಂದ್ ಪಳಮೆ ಆಯಿತಿಂಜತ್. ಅಪ್ಪುಣು, ಬೊಡ್ಡು ದಾರ್ ದಾರ್‌ಂದ್ ಊರ್‌ರ ಜನಕೇ ಗೊತ್ತಿಂಜಾಲೆ! ಆಚೇಂಗಿ ಪಾಳ ಪಳಮೆ ಮಾತ್ರ 'ಕುಂಬ್ಳತ್ ಕುಂದ್‌ಕ್ ಬುದ್ಧ ತಿತ್ತನನ್ನೆ' ಪಬ್ಬಿತಿಂಜತ್!

ಬೊಡ್ಡು, ಪೂವಪ್ಪಜ್ಜಂಡ ಕಾಲಾನ ಮೂಂದ್ ಕುರಿ ಪುಡ್‌ಚತ್. ಅವ್ವಿರ ಮೋವಕ್ ದಂಡ್ ಬೊಳ್ಳಿರ ಉರ್‌ಪಿಯ ಕೊಡ್‌ತತ್. ಈ ಮಣ್ಣಾರ ರುಣ ಇಲ್ಲಿಕ್ ತ್ತೇಂದ್‌ಪೋಡ್ ಎಣ್ಣೆತ್ ಕಣ್ಣ ನೀರ್ ತ್ತೇಟಿಯಂಡ್ ಪೊರ್‌ಟತ್. ಎಲ್ಲಿಕೋ ಎನ್ನೋ!

ಒನ್ನಾಂದ್ ಪೂವಪ್ಪಜ್ಜಂಡ ಮನೆಕ್ ಅಪ್ಪುಣು ಬಂದೆತ್ತಚಿ. ಆ ಮನೆಕ್ ಅವ ದಾರ್ ದಾರ್‌ನ ಕೇಟರಾಂಜಿತ್ ಬಾತೋ ಗೊತ್ತಲ್ಲೆ. ಕಾಯಿಲ ಪುಡ್‌ಚಿತ್ ಕಟ್ವಂಜಿ ಇಳಿಯುವಕೇ ಕಯ್ಯತ ಅಜ್ಜಂಗ್ ಅಪ್ಪುಣು ತಾಂಡ ಪರಿಚಯ ಎಣ್ಣೆಚಿ. ನಡ್‌ಂದ ಕಥೆನೆಲ್ಲ ಎಣ್ಣೆಚಿ.

ಪೂವಪ್ಪಜ್ಜ, ಅಪ್ಪುಣುರ ಕೈನ ಪುಡ್‌ಚಂಡ್ ಬೊಡ್ಡು ಊರ್‌ಕ್ ಬಂದಲ್ಲಿಂಜ ನಡ್‌ಂದ ಕಥೆನ ಓರಕ್ಷರವೂ ಬುಡತೆ ಎಣ್ಣೆಚಿ. ಅಪ್ಪುಣುನ ಕೊಂದಂವಂದೆಣ್ಣುವ ಅಪವಾದಕ್ ಬೊತ್ತಿತ್ ಬೊಡ್ಡು ಊರ್ ಬುಟ್ಟಾನೋ, ಇದಾಯಿತ್ ಚೆನ್ನ ತಿಂಗತ್ ಅವ್ವಿ ಚತ್ ಪೋನ ಸಂಗತಿನೆಲ್ಲ ಅಜ್ಜ ಎಣ್ಣೆಚಿ.

ಅಪ್ಪುಣು ಪಂಡ್ ಮಂದಯ್ಯಂಡ ಮೋಂವಂದ್ ರುಜುವಾತ್ ಮಾಡುವಕ್ ಒರೂ ಆಧಾರ ಇಂಜಾಲೆ. ತಾಂಡ ಅವ್ವಂಡ ದಂಡನೆ ವಡಿಯ, ದೇವಯ್ಯಂಡ ಮೋಂವಂದ್ ಸೈನ್ಯಕ್ ಕೂಡುವಕ ಅಡ್ರೆಸ್ ಕೊಡ್‌ತಿತ್ತಿಂಜತ್. ತಾಂಡ ಹಕ್ಕರ ಆಸ್ತಿ ಏದ್‌ಂದ್ ಅರಾಂಜವ ಆಸೆ ಆಡ್, ಆ ಆಸ್ತಿನ ಪಡ್‌ಂದವ ಆಸೆ ಆಡ್ ಅಂವಂಗ್ ಇಂಜಾಲೆ!

ಬೊಡ್ಡು ಕೊಲೆಗಾರಂದೆಣ್ಣುವ ಅಪವಾದಕ್ ಬೊತ್ತಿತ್ ಊರ್‌ಬುಟ್ಟ ಸಂಗತಿನೊ, ತಾಂಡ ಅಕ್ಕ ಅವ್ವಿ ಬದ್‌ಕಿತ್ ಬೊಡ್ಡುನ ತೇಡಿಯ ಬಂದಾನೆಲ್ಲ ಕೇಟಿತ್ ಅಪ್ಪುಣು ಮರಕಟ್ಟಿ ಪೋಚಿ!

ಅಂದ್ ಅಜ್ಜಂಡಲ್ಲಿ ಒಳ್‌ಂಜಿತ್, ಪಿತ್ಯಾಂದ್‌ಕ ಪೊಲೀಸ್ ಸ್ಪೇಷನ್‌ಕ್ ಪೋಚಿ. ನಡ್‌ಂದ ಕತೆನೆಲ್ಲಾ ಎಣ್ಣೆಚಿ. ಬೊಡ್ಡು ನಿರಪರಾದಿಂದ್ ಎಳ್‌ದಿ ಕೊಡ್‌ತತ್.

ನಾನ್ ಪುಟ್ಟ್‌ನ ಕೊಡಗಾಲ್ ನಾಕ್ ನೆಲೆಯಿಲ್ಲೆ! ತಾಂಡ ಕಂದ್‌ಕರ್, ಸಾಲ್ ಸಂತಾನಂದೆಣ್ಣುವ ಆಸೆ ಅಕ್ಕರೆನ, ಬೇಲ್ ಭೂಮಿಂದೆಣ್ಣುವ ಸ್ವಾರ್ಥ, ಬಲಿ ಎಡ್‌ತಂಡ್ ಅಪ್ಪುಣುರ ಮನಸ್ಸಿನ ಕಲಾಕಿರ್‌ತ್!

ಅಲಿಪುರಂ ಜೈಲ್ಲ್ ಇಂಜ ಸ್ವಾತಂತ್ರ್ಯ ಪೋರಾಟಕಾರ ಕಾಳಪ್ಪನ ತೇಡಿ ತೇಡಿ ಆಖೀರಕ್ ಪೇಟೆ ಬಸ್ಸ್ ಸ್ವಾತಂತ್ರ್ ಲ್ ಕ್ ಟ್ ಚಿ. ನಡ್ಂದ ಸಂಗತಿನೆಲ್ಲಾ ಎಣ್ಣೆ ಚಿ.

"ಕಾಳಪ್ಪ, ನಾನೂ ಬೊಡ್ಡು ಪೋನ ಬಟ್ಟೆಲೇ ಪೋಪಿ. ಕಾವೇರಮ್ಮರ ಮಣ್ಣೋನೋ, ನೀರ್ನೋ ಕೊಡ್ ಚಿತ್ ಬಂದ. ಇಂದೇಕ್ ಆ ಋಣ ತೇಂದತ್!" ಎಣ್ಣೆತ್ ಕಣ್ಣೋ ನೀರ್ ತೇಟಿಚಿ. ಏದೋರ್ ಬಸ್ ಪತ್ ಚಿ. ಅಪ್ಪರ ಕಂಡವು, ಕೇಟವು ದಾರೂ ಇಲ್ಲೇಂದ್ ಕಾಳಪ್ಪ ಎಣ್ಣೆ ಚಿ!

ಈ ಸ್ವಾತಂತ್ರ್ಯ ಪೋರಾಟಕಾರ ಕಾಳಪ್ಪಂಗ್ 1956ಲ್ ಕೊಡಗ್ ಸರಕಾರ ಉಪಾದ್ರಿ ಚಾಕ್ರಿ ಕೊಡ್ತತ್.

ಚೆನ್ನಂಗ್ ಕಾಲಕ್ ಬಯ್ಯ ಸ್ವರ್ಗವಾಸಿಯಾಚಿ.

- \* - \* - \* -

## ವಲಸೆ

ಸ್ವಂತ ಭಂಡವಾಳ ಇಲ್ಲತೇ ವಾಸಕ್ ಮನೆ, ಅರೆ ಏಕ್ರೆ ಜಾಗ, ಖರ್ಚಿಕ್ ದುಡ್ಡ್, ಮನೆಕ್ ಪಾತ್ರ-ಗೀತ್ರ, ಬಟ್ಟೆ-ಬರಿ, ಅಲಾಯಿದ ಪಣ, ಬೋಂಡುವೇಂಗಿ ಸುಲಭ ಕಂತಾರ ಸಾಲ... ಇಂಇಂಥ! ಒಂದಾ, ದಂಡಾ... ಬೋಂಡಿಯಚ್ಚಿಕ್...! ಕಡೇಕ್ ಇದೊಂಡ ಫಲ-ಪರಿಣಾಮ...?

"ಪೊನ್ನ ಪೊಲ್ಚೆ! ಗೋಲ್ಡನ್ ಅಪರ್ಚುನಿಟಿ! ದಂಡೇ ಕಾಲ, 1997ಕೆತ್ತಣೆ ಮಾತ್ರ. ಮಿಂಞ ಬಂದೆತ್ತನವನೇ ಅದೃಷ್ಟವಂತ! ಇನ್ನತ ಚಾನ್ಸ್ ಕಳಂದವತಿ, ಕಳಂದಂಡ್ ಬಯ್ಯ ಕೊರ್ಗತಿ! ಕೈಲ್ ಮೂಂದ್ ಕಾಸ್ ಭಂಡವಾಳ ಬೋಂಡ. ಸ್ವಂತ ಓಡೊಮನೆ. ಪೊನ್ನ ಬೊಳೆವನ್ನತ ಅರೆ ಏಕ್ರೆ ವರಾರ. ಖರ್ಚಿಕ್ ದುಡ್ಡ್. ಮನೆಕ್ ಬೋಂಡಿಯ ಪಾತ್ರ-ಗೀತ್ರ, ಕಟ್ಟಿ-ಕಡಿಕೆ, ಬಟ್ಟೆ-ಬರಿ. ಕೈಪಣಿಕ್ ಇಳಿಯುವೇಂಗಿ ಸುಲಭ ಕಂತಾರ ಸಾಲ. ಇದೊನ ಬಯ್ಯಿಕ್ ಕೆಟ್ಟಂಡೊಂದ್ ಕಡ್ಡಾಯ ಇಲ್ಲೆ. ಇರುವದಾಳೊರ ಓರ್ಗುಡ್ಡೆ ಮನೆ ಉಳ್ಳಲ್ಲಿಕ್ ನಿಂಗಡ ಮಾತೃಭಾಷೆರ ಒರ್ ಸ್ಕೂಲ್. ನಿಂಗಡ ಮತ-ಧರ್ಮತಾರ ದೇವಸ್ಥಾನ. ನಿಂಗಡ ರಕ್ಷಣೆಕ್ ಪೋಲೀಸ್ ಪಾರ!

ಕುಲೊಮಾಂವು ಅಟ್ಟಿ, ಮರ ವ್ಯಾಪಾರಕ್ಕೆಲ್ಲ ನಲ್ಲ ಅವಕಾಶ ಉಂಡ್. ಕಳ್ಳ ಕಾಚುವಕ್ ಗೊತ್ತುಂಡೇಂಗಿ ನಲ್ಲದೆ. ಜಾತಿಮತ ಭೇದ ಇಲ್ಲತೆ, ಈ ಅವಕಾಶ ಪಡೊಂದವಲು. ಈ ಎಲ್ಲಾ ಸೌಲಭ್ಯತಾರ ವಿವರತಾನ ಖುದ್ದಾಯಿತ್ ಬಂದಿತ್ ಕೇಟರ್‌ಂಜಿತ್ ಪಡೊಂದವಲು!

ಅಡ್ರೆಸ್: ಹೆಡ್ಡಾಫೀಸ್-ಕೊಡಗ್ ಇಮಿಗ್ರೇಶನ್ ಆಫೀಸ್  
ಒಣ ಮೀನ್ ಅಂಗಡಿರ ಕೂಡ, ಸಿದ್ದಾಪುರ

ಬ್ರಾಂಚ್ ಆಫೀಸ್: ನೆಲ್ಯ ಹುದಿಕೇರಿ, ಕೊಂಡಂಗೇರಿ  
ಕೊಟ್ಟಿಮುಡಿ

ಇನ್ನನೆ, ಬಣ್ಣ ಬಣ್ಣ ಅಕ್ಷರತಲ್ ಅಚ್ಚಾನ ಚೋಂದ ಕಾಗದ ನೆರೆ ರಾಜ್ಯತಲ್

ಒರ್ ಚಾಯ ಅಂಗಡಿರ ಗೋಡಲ್ ಪತ್ ಚಿಟ್ಟಿತಿಂಜತ್. ಕಜ್ಜಿ ಮಾಂದಿಯಂಡ್ ಅಳತಿಂಜ ಮೊಯ್ಲು ಇದಾನ ಕಂಡಿತ್ ಜೋರಲ್ ಓದ್ ಚಿ. ಚಾಯ ಕುಡ್ ಚಂಡಿಂಜ ಜಾರ್ಜ್ ಪಿಂಞ ಕೇಳು ಚಾಯಿಲ್ ಗೇನ್ ಚ್ಚ್ಚ್ಚ್ ಕೇಟಂಡತ್.

ಓಹೋ, ನಂಗಡಲ್ ಲಂಜಿ ವಲಸೆ ಪೋನವು ಕೊಡಗಲ್ ಪುದಿಯದಾಯಿತ್ ಕೊಂಡ ಬಂದ ಯೋಜನೇಂದ್ ತೋಂದುವ. "ಎನ್ನಾಂಗ್ ನಂಗ ಮುದ್ದ್ ಪೋಯಿತ್ ಅರ್ಂಜಿತ್ ಬಪ್ಪಕಾಗ" ಮೊಯ್ಲು ಕೇಟತ್. ಇಕ್ಕೆನ್ನೆ ಪೊರಡನಾಂದ್ ಕೇಳು ಪಿಂಞ ಜಾರ್ಜ್ ಮುಂಡ್ ತೆಕ್ಕಿ ಕೆಟ್ಟಿತ್ ಬೀಡಿ ಕತ್ ಚಿಟ್ಟಿತ್.!

ಹೋಟಲ್ ಆಲಿರ ಕೈಲಿಂಜಿ ಪೌಪತ್ ಉರ್ ಪಿಯ ಕೈಮರ್ ಚಂಡ್, ಮೂಂದಾಳು ಕೂಡೆನ್ನೆ ಬಸ್ಸಪತ್ತಿತ್, ಅಂದಿಮುಂದಿ ನೇರಕ್ ಸಿದ್ಧಾಪುರತ್ ಲ್ಲಂಜತ್. ಇಮಿಗ್ರೇಶನ್ ಆಫೀಸ್ ಕಂಡ್ ಪುಡ್ ಚತ್. ಆಫೀಸ್ ಸೆಕ್ರೆಟರಿ ಅಬ್ಬಾಸ್ ನ ಕೇಟತ್. ರೆಡಿಮೇಡ್ ಬುಕ್ ಲೆಟ್ ನ ಮೀನ್ ಕುಕ್ಕಿರ ಅಡಿಂಜಿ ಅಬ್ಬಾಸ್ ಎಡ್ ತ್ ಕೊಡ್ ತತ್. ಆ ಬುಕ್ ಲೆಟ್ ಲಿಂಜ ನೇಮ :

- 1) ಕೊಡಗಲ್ ನೆಲೆ ನಿಪ್ಪಕ್ ಇಷ್ಟು ಉಳ್ಳವು ಸಂಸಾರ ಸಮೇತ ಗುಂಪ್ ಗುಂಪಾಯಿತ್ ಸ್ವಂತ ಬಸ್ ವಿರ್ಚಿಲ್ ಬರಂಡು.
- 2) ಇನ್ನೆ ಬಂದವು ಕಾವೇರಿ ಪೊಳೆರ ಮಣ ಪಟ್ಟಿಲೆಲ್ಲ ತೆಂಗ್ ಓಲಿರ ಗುಡಿಸಲ್ ಕೆಟ್ಟಿಯಂಡ್ ವಾಸಕ್ ಸುರು ಮಾಡಂಡು.
- 3) ತೆಂಗ್ ಓಲಿನ ನಂಗಡ ಬ್ರಾಂಚ್ ಆಫೀಸ್ ಲ್ ಬಣ್ಣೆ ತಪ್ಪ.
- 4) ಜೂನ್ ಲ್ ಪುದ್ ಮಳೆ ಪುಡಿ ಕಣೆ ಕಾಫಿ ತೋಟತ್ ಪಣಿಕ್ ಪೋಯಿತ್ತೋ, ಕಾಫಿ ಕಟ್ಟಿತ್ತೋ, ನಲ್ಲ ಮಳು ಕಟ್ಟಿತ್ತೋ, ಕುಳ್ ಮಾವು ಅಟ್ಟೆ ಉಳ್ ಕಿತ್ತೋ, ಅಲ್ಲ ಕಳ್ಳಕಾಚಿತ್ತೋ ಬದ್ ನಿಸೆಂಡು. ತರಬೇತಾನ ಒಬ್ಬನ ಓರಂದ್ ಕ್ಯಾಂಪ್ ನಂಗಲೇ ಬುಟ್ಟ್ ತಪ್ಪ.
- 5) ಕಟ್ಟಾ ಕೂಟನ್ ವಸ್ತುನ ಈ ಆಫೀಸ್ ಲ್ ನಂಗಲೇ ಎಡ್ ತವ. ಕೆಣ್ ಂಜಿ ಬುದ್ಧಕ ಜಾಮೀನ್ ಕೂ ನಂಗ ಏರ್ಪಾಡ್ ಮಾಡುವ. ಪೋಲಿಸ್ ಕಾರಳ ನಂಗಲೇ ಸರಿ ಕೂಟಿಯವ.
- 6) ಮಳೆ ಪುಡ್ ಚಿತ್ ಪೊಳೆಲ್ ಕಲಕ್ ನೀರ್ ಬಪ್ಪಕ ಬೆಲೆಬಾಳುವ ವಸ್ತುನೋ,



ಪೊಮ್ಮಕ್ಕ ಮಕ್ಕಳೋ, ಪಕ್ಕತ್ ಸ್ವಂತ ಜಾತಿಕಾರಡಲ್ಲಿಕ್ ಕಡ್ತರಂಡು, ದಂಡ್ ದದ್ದ್ ಗೋಣಿ ಪಿಂಞ ಕಣ್ಣಾನ ಸಿಲೋರ್ ಪಾತ್ರ, ಬೆಚ್ಚಂಡ್ ಗುಡಿಸಲ್ಲ್ ಆಣಾಳ್ ಇರಂಡು.

- 7) ಪೊಳೆ ದುಂಬಿಯಂಡ್ ಬಂದನ್ನಕೆ "ಚತ್ತಕ ನಂಗ ಇಲ್ಲಿಯೇ ಚಾವಾ"ಂದ್ ತಾಂಗಿ ನಿಕೊಂಡು. ಗುಡಿಸಲ್ಲ್ ತೆಂಗ್ ಓಲಿ ಒಕ್ಕಿ ಪೋಪಕ ಎದೆಕೂ, ಮಂಡೆಕೂ ಪೊಜ್ಜಂಡ್ ಮೊರ್ಡಂಡು. ಬಾಕಿ ಸಂಗತಿ ನಂಗ ನೋಟಿಯವ್!

ಬುಕ್‌ಲೆಟ್‌ಲುಳ್ಳ ನೇಮ ಓದಿತ್ "ಇದಲ್ ನಂಗಕೆನ್ನ ಲಾಭ"ಂದ್ ಜಾರ್ಜ್ ಕೇಟತ್.

ಅಬ್ಬಾಸ್: "ಅಯ್ಯೋ, ಪೊಟ್ಟಿ; ಪೊಳೆನೀರಲ್ ಮನೆ ಒಕ್ಕಿಪೋನ ನಿರಾಶ್ರಿತಂಗಾ"ಂದ್ ಇಲ್ಲಿಯತ ಸರಕಾರ ದೇವಡ ಕಾಡ್‌ಲೂ, ಪೈಸಾರಿಲೂ, ಕಾಲಿಲುಳ್ಳ ಕೊಡವಡ ಜಮ್ಮತ್‌ಲೂ ನಿಂಗಕ್ಕೆಲ್ಲ ಆಳಣ್ಣ ಓಡ್‌ಮನೆ, ಅರೆ ಏಕ್ರೆ ಜಾಗ, ಸ್ವಂತ ಚಾಕ್ರಿಕ್ ಪಣ ಸಹಾಯ ಎಲ್ಲ ತಪ್ಪಾಚಿಡುವಕ್ ನಂಗ ಇಲ್ಲಿಯಾ?

ಕೇಳು : ಪೊಳೆರೊಳ್‌ಲ್ ಗುಡಿಸಲ್ ಇಟ್ತ್ ಅಳಪಕ್ ಜನಡ ವಿರೋಧ ಎನ್ನೇಂಗಿ ಬಕ್ಕುವಾ?

ಅಬ್ಬಾಸ್: "ಥೂ ಜಡ್ಡ, ನಂಗೆನ್ನಂಗುಳ್ಳೊ ಇಲ್ಲಿ? ನಾಚಪ್ಪಂದೆಣ್ಣುವ ಓರ್ ಆಸಾಮಿ ಚೆನ್ನ ಚೊರೆ ಮಾಡು. ಅಕ್ಕ ನಿಂಗ ಆಳಣ್ಣ ಪೊಪತ್ತ ಉರ್‌ಪಿಯ ತಾರಿ. ನಾಯಿಕ್ ಒಟ್ಟಿ ಚೂರ್ ಚಾಡ್‌ನನ್ನಕೆ ಪೋಲೀಸ್‌ಕಾರಡ ಮೂಡ್‌ಕ್ ಚಾಡ್‌ನಕ ಕೆ.ಆರ್.ಎಂ.ಎಂ.ಕಾರಳ ಚೆನ್ನದಿನ ಪುಡ್‌ಚಿ ಕೂಟ್‌ಚಿಡನ".

ಜಾರ್ಜ್: "ಪೇಪರ್‌ಕಾರಳೋ?"

ಅಬ್ಬಾಸ್: ದಂಡ್ ಕೊಡವ ತಕ್ಕಾರ ವೀಕ್ಲಿ ಚೆನ್ನ ತೊಂದರೆ ತಕ್ಕು. ಆಚೇಂಗಿ ನಲ್ಲ ಪಣಕಾರ ಪ್ಲಾಂಟರ್‌ಗಳೇ ಆ ಪೇಪರ್‌ನ ಓದುಲೆ. (ಕೊಡಗರ ಎ.ಸಿ.ಯೆ ಎಣ್ಣೆತ್ ಪೇಪರ್‌ಕಾರ ಬೊಗಳುವ ನಾಯಿಯಾಂದ್) ಆನಗುಂಡ್, ಬೊತ್ತಂಡ.

ಮೊಯ್ದು: ರೆವಿನ್ಯೂಕಾರ ಬುಡುವಾ?

ಅಬ್ಬಾಸ್: "ಹ್ಲೀ, ದುಡ್ಡಾರ ಮಿಂಞ ಕಳಿ ಉಂಡಾ? ಅಯಿಂಗಲ್ಲ ಎಂಜಿ ನಕ್ಕಿತ್ತೇ ಕುಮ್ಮೆ ಬೊಳ್ತಾನವು, ಮೇಚಿ ಇಟ್ಟಕ ಆಚಿ."

"ಎಂಡ ಪಡ್‌ಚೋನೆ, ನಂಗಡ ಅಪ್ಪವ್ವನೇ ನಂಗಕ್ ನಿಪ್ಪಕ್ ನೆಲೆ ಮಾಡಿತಂದಿತಿಲ್ಲೆ. ಅನ್ನ ನಿಪ್ಪಕ ನಿಂಗ ಈ ಕೊಡಗಲ್ ನಂಗಕ್ ಸ್ವಂತ ಮನೆ, ಜಾಗ ತಂದಿತ್ ಬಾವ ಬಟ್ಟೆ ಕಾಟಿತಂದಾಂಗ್ ನಿಂಗಡ ರುಣ ಎನ್ನನೆ ತೇಪೋ" ಮೂಂದಾಳು ಕೇಟತ್.

ಅಬ್ಬಾಸ್: ರುಣ ತೇಪಕ್ ಒರೇ ಬಟ್ಟೆ ಉಳ್ಳೊ. ಓಟ್ ಬಪ್ಪಕ ಮಾತ್ರ ನಿಂಗಲೂ ನಿಂಗಡ ಸಂತಾನಕಾರಲೆಲ್ಲ "ಕೈ" ಗುರ್ತಕ್ ಒತ್ತಿರಿ. ಇದ್‌ಂಡಪ್ಪರ ನಿಂಗ ಒಂದೂ ಮಾಡಂಡೆ.!

ಕೇಳು: "ನಂಗ ಇಕ್ಕಣೆ ಕೊಕ್ಕೆಕತ್ತಿಕ್ ಒತ್ತನವು ಆಕುಲಾ?"

ಅಬ್ಬಾಸ್: "ನಿಂಗಡ ನಾಡ್‌ಕ್ ಪೋಯಿತ್ ಕೊಕ್ಕೆಕತ್ತಿಕೇ ಒತ್ತಿ, ಇಲ್ಲಿ ಮಾತ್ರ "ಕೈ" ಗುರ್ತಕ್!"

ಒರ್ ತಿಂಗತ್‌ರೊಳ್‌ಲ್ ಕಾವೇರಿ ಪೊಳೆರ ಬರಿಲೆಲ್ಲ ನುಚ್ಚಿ ಕುಮ್ಮ್ ಏವಟ ತೆಂಗೋಲಿರ ಪೊರೆ ನೇಂದತ್. ನೀರ್ ಕುಡಿಪಕ್ ಪೋನ ಅತ್ತ ದಿನಕೋರಂದೇ ಕಾಂಗತಾಚಿ. ಕಳತ್ ಒಣಕೊಟ್ಟಿ ಜಮ್ಮಕಾರಡ ಕಾಫಿ, ನಲ್ಲ ಮಳು ಮಾಯ ಆಪಕ್ ಸುರುವಾಚಿ. ಪೋಲೀಸ್‌ಕ್ ಪುಕಾರೊಡ್‌ತಕೆಲ್ಲ ಮೂಲನಿವಾಸಿಯಳ ಪುಡ್‌ಚ ಬಂದಿತ್ ಕಾಲ್ ಕೈ ಪೋಚಿತ್‌ಟ್ಟತ್. ನಾಲಂಜಿ ಕೇಸ್‌ಲ್ ಈ ವಲಸೆಕೋರಂಗ ಕೆಣ್‌ಂಜಿ ಬುದ್ದಕಲೂ, "ಅಲ್ಪಸಂಖ್ಯಾತಂಗ" ಎಣ್ಣುವ ರಿಯಾಯಿತಿಲ್ ಎದಿಕೆ ಪಡಿಲ್ ಕೂಟಿತ್, ಬೆಂಬಾರತ ಪಡಿ ತೊರ್‌ಂದಿತ್ ಬುಟ್ಟತ್.!

ಸುರೂಲ್ ಬಂದ ಮೊಯ್ದು ವಲಸೆ ಬಂದ ಬೋರೆ ಜನಳನ್ನಕೆ ಅಲ್ಲ, ನಲ್ಲೋರ್ ಗುಣಕಾರ. ದುಂಬ್‌ನ ಕುಳ, ಅಪ್ಪ, ಅವ್ವ, ಪೊಣ್ಣ್, ಅರೆಮಕ್ಕ. ನಲ್ಲ ನಯಿಪುಕಾರ. ಊರ್‌ಂಜಿ ತಾಂಡ ಸಂತಾನತನ ಕೂಟಿಯ ಬಪ್ಪಕ ಅವಂಡ ಅಪ್ಪ ಗ್‌ಣಿಕೆಣ್ಣುವನ್ನಕೆ ಎಣ್ಣ್‌ಚಿ- "ಬೋಂಡ ಮೋನೆ, ನಯಿಚಂವೊ ಎಲ್ಲಿಯೂ ಬದ್‌ಕಲು. ನಂಗ ಪುಟ್ಟಿ ಬೊಳ್‌ಂದ ಊರೇ ಮದಿ. ಕೊಡಗಲ್ ನಂಗಡ ನಾಡ್‌ಕಾರ ಕೂಡಿತ್ ಪೆರ್ತ್ ಕೇತರೆ ನಡ್‌ತಿತ್ ಕೆಟ್ಟ ಪೆದ ಎಡ್‌ತಿತ್, ನಂಗಕ್ ಅನ್ನತ ಬಾಳ್ ಬೋಂಡ."

ವೊಯಿದು ಅಪ್ಪನ ಒಪ್ಪಾಚ್ಚಿಟ್ಟಿತ್ ಕೂಟಿಯ ಬಾತ್. ಬೋರೆ ವಲಸೆಕಾರಂಗಳನ್ನೆ ಅಂವೊ ಬೋಂಡತಾಸೆಕ್ ಪೋಯಿಲೆ. ಓರ್ ಮೂಲನಿವಾಸಿ ಅಪ್ಪಚ್ಚುರ ತೋಟ ಪಾರಕ್ ಒತ್ತಂಡತ್. ಪುಳಿ ತೋಟತ್‌ರೊಳ್‌ಲೆ ಚೆರಿಯ ಮನೆ ಮಾಡಿಯಂಡತ್. ಪೊಣ್ಣ್ ಮಕ್ಕಳೆಲ್ಲ ಪಣಿಕ್ ಪೋಯಿತ್ ನೆಮ್ಮದಿಲ್ ಬದ್‌ಕ್‌ಚಿ.

ಆದರೆ ಪೋಪಕ, ಒಮ್ಮೆ ಮಳೆ ಪುಡ್‌ಚತ್. ಪಂಡೇ ರೂಪಾಚ್ಚಿಟ್ಟಿ ಯೋಜನೆ ಪೋಲೆ, ಪೊಮ್ಮಕ್ಕ ಮಕ್ಕಳೆಲ್ಲ ದೂರ ಕಡ್‌ತ್‌ಚಿ. ಆಣಾಳ್ ಗುಡಿಸಲ್‌ಲ್ ತಿತ್‌ಟ್ಟುಂಡ್ ಪೊಗೆ ಒಪ್ಪಿಯಂಡ್ ಅಳಾತತ್.!

ಡಿ.ಸಿ. ಎಲ್ಲ ಗುಡಿಸಲ್‌ಕಾರಳ ಎಚ್ಚರತಾರ ಜಾಗಕ್ ಕಡ್‌ತೀಂದ್ ಆರ್ಡರ್ ಮಾಡ್‌ಚಿ. ಇಮಿಗ್ರೇಶನ್ ಆಫೀಸರ್‌ಕಾರ ಬಂದಿತ್ ಎಲ್ಲ ವಲಸೆಕಾರಡ ಕೈಲಿಂಜಿ ಐಂಬದಯಿಂಬದ್ ಉರ್‌ಪಿಯ ವಸೂಲ್ ಮಾಡಿಯಂಡತ್. ಕಾವೇರಿ ಪೊಳೆ ತಾಂಡ ಮಾಮೂಲ್ ರೂಪ್ ಎಡ್‌ತತ್. ತೆಂಗ್ ಓಲಿರ ಗುಡಿಸಲ್‌ಲ್ಲ ಒಕ್ಕಿಯಂಡ್ ಪೋಚಿ. ಪೋಟೋ ಎಡ್‌ಪವು, ಪೇಪರ್‌ಕಾರ, ಏದೇದೋ ಸಂಘ-ಸಂಸ್ಥೆ ಕಾರ ಮಿಂಞ ಬಯ್ಯ ಒಡಿಕಳ್‌ಚತ್. ರಾಜಕೀಯ ಪಾರ್ಟಿ ಕಾರ ಬಲ್ಯ ಸಮಾಜ ಸೇವಕಂಗಳಾಚಿ.!

ಸದ್ಯಕ್ ಮನೆ-ಮಾರ್ ಕಳ್‌ಂದಂಡವೊಂದ್ ಸ್ಕೂಲ್‌ಲೂ, ಸೊಸೈಟಿ ಕಟ್ಟಡತ್‌ಲೂ ಜಾಗ ಕೊಡ್‌ತತ್. ಓರೋರ್ ಕುಟುಂಬಕ್ ಆನ ನಷ್ಟ ಅಯಿಂಬದಾಯಿರಕ್ ಕಮ್ಮಿ ಇಲ್ಲತನ್ನೆ ರೆವಿನ್ಯೂ ಕಾರ ಸರಕಾರಕ್ ವರದಿ ಕೊಡ್‌ತತ್. ಎಂ.ಎಲ್.ಎ., ಡಿ.ಸಿ.ನ ಕೂಟಿಯ ಬಂದಿತ್ ಆಯಿನ ಪುನಾದಿಯ ನೆಲೆ ನಿಪ್ಪಕ್ ಏರ್ಪಾಡ್ ಮಾಡ್‌ಚಿ. ನಾನೂರಾಂಡ ಮೀದ ಓಟ್ ಇದೋರ್ ಗುಂಪಾಲ್ ನಾಡ 'ಕೈ' ಪೊಟ್ಟಿಕ್ ಬುದ್ಧತ್‌ಂದ್ ಮೀಸೆರೊಳಿಯ ತೆಳಚತ್ ಎಂ.ಎಲ್.ಎ.!

ಕೊಡಗ್ಗರ ಮೂಲನಿವಾಸಿಯ ಅಜ್ಜ ಮುತ್ತಜ್ಜಂಗಡ ಕಾಲತ್‌ಂಜಿ ಅಯ್ಯಪ್ಪ ಕಾಡ್, ದೇವಡ ಕಾಡ್, ಊರುಡುವೆಂದೆಲ್ಲ ಕಾಪಾಡಿಯಂಡ್ ಬಂದ ಜಾಗತ್‌ಲ್ ಈ ವಲಸೆಕಾರಕ್ ಮನೆ ಕೆಟ್ಟಿಯವಕ್ ಎಣ್ಣಾಚಿ. ಸದ್ಯಕ್ ಮನೆ ಕೆಟ್ಟಿಯೋಳಿ, ಜಾಗ ಮಂಜೂರಾತಿ ನಿಧಾನತ್ ಮಾಡನಾಂದ್ ರೆವಿನ್ಯೂ ಅಧಿಕಾರಿಯ ಅನುಮತಿ ಕೊಡ್‌ತತ್.

ಸುಮಾರ್ ನೂಯಿಟ ಐಂಬದ್ ಮನೆರ ಪಣಿ ಸುರುವಾಚಿ. ಪೈಸಾರಿ, ದೇವಡಕಾಡ್‌ಲುಳ್ಳ ಮರ ಕೆತ್ತಿತ್ ಈ ಮನೆಕ್ ಬೋಂಡಿಯ ಬಾರಿ, ಕೌಕೋಲ್, ಕಟ್ಟೋಳಿ ಪಡಿ ಮಾಡುವಕ್ ತೋಮಸ್ ಎಣ್ಣುವ ಮಾಜಿ ಖದೀಮ, ಇಕ್ಕತ ಸಮಾಜ ಸೇವಕ

ಕಂಟ್ರಾಕ್ಟ್ ಪುಡ್‌ಚಂಡತ್. ದಂಡ್ ವಾರತ್‌ರೊಳ್ ಅಜ್ಜಂಗಡಜ್ಜಂಡ ಕಾಲತ್‌ಂಜಿ ಕಾಪಾಡಿಯಂಡ್ ಬಂದ ಎಲ್ಲಾ ಮರ ಅಡ್ಡ ಬುದ್ಧತ್. ಅಂಜಾಯಿರ ಮನೆ ಕೆಟ್ಟುವಕ್ ಬೋಂಡಿಯಚ್ಚಕ್ ಮರ ಹಸನ್‌ರ ಮರಮಿಲ್ಲಲ್ ಜಮೆ ಆಚಿ.!

ಈ ಮಾದರಿ ಮರ ಸೂರೆ ಬುದ್ಧಾನ ಕಂಡ ಚೆನ್ನ ಬಾಲೆಕಾರ, ಅನ್ಯಾಯತ್‌ನ ಪೊರ ಬೂಕುವಕ್ ಪೇಚಾಡ್‌ಚಿ. ಪಂಡ್‌ಂಜೇ ಇಲ್ಲಿ ಉಳ್ಳ ಮೂಲನಿವಾಸಿಯಕ್ ಗುಡಿಸಲೇ ಇಲ್ಲೆ. ಕಾಡ್‌ಲುಳ್ಳ ಕುಂಬು ಪುಳ್ಳಿ ಕೆತ್‌ವಕೂ ಬುಡುಲೆ. ಅನ್ನನಿಪ್ಪಕ ಆರ್ ತಿಂಗಕ್ ಬಯ್ಯ ವಲಸೆ ಬಂದ ಕಳ್ಳಂಗಕ್ ಈ ಮಾದರಿ ಸೌಕರ್ಯ ಮಾಡಿ ಕೊಡ್‌ಪಾಂಡ ಗುಟ್ಟಿಂತಂದ್ ಸ್ಥಳೀಯ ಪೇಪರ್‌ಲ್ ಎಳ್‌ದ್‌ಚಿ. ಚತ್ತೆದಿನ ಮೀಟಿಂಗ್ ಮಾಡಿತ್ ಭಾಷಣ ಮಾಡ್‌ಚಿ.

ಅಕ್ಕಣೆ ಒಂದ್ ದಂಡ್ ಪೇಪರ್‌ಕಾರ ಈ ಮೂಲನಿವಾಸಿ ಬಾಲೆಕಾರಡ ಹೋರಟತ್‌ನ "ಸಹಾನುಭೂತಿ ಇಲ್ಲದವರು, ಮಾನವೀಯ ದೃಷ್ಟಿ ಇಲ್ಲದವರು, ರಾಜಕೀಯ ದುರುದ್ದೇಶದಿಂದ ಕೂಡಿದ ಹೋರಾಟ "ಂದೆಲ್ಲ ತಾರಾಮಾರ ಎಳ್‌ದಿತ್ ಬಾಲೆಕಾರಡ ಸದ್‌ಡ್‌ಕಿರ್‌ತ್! "ಅಲ್ಪಸಂಖ್ಯಾತರ ಮೇಲೆ ದೌರ್ಜನ್ಯ"ಂದ್ ಕತೆ ಕೆಟ್ಟಿತ್ ಮೂಲನಿವಾಸಿ ಬಾಲೆಕಾರಳ ಪೋಲೀಸ್‌ಕಾರ ಪುಡ್‌ಚಿ ಕೂಟಿತ್ ಹಿಂಸೆ ಮಾಡ್‌ಚಿ.!

ಜಿಲ್ಲಾ ಬೋರ್ಡ್ ಪಿಂಞ ತಾಲೂಕ್ ಪಂಚಾಯತ್ ಚುನಾವಣೆ ಬಂದ್ ಮೂಡ್‌ಕ್ ಮುಟ್ಟಿಪೋಚಿ. "ಕೈ"ಕಾರಳೂ "ಚಕ್ರ"ಕಾರಳೂ ನಾ ಮಿಂಞ ತಾನ್ ಮಿಂಞಂದ್ ಮಿಂಞಕ್‌ಳ್‌ಂಜಿತ್, ವಲಸೆಕಾರಕ್ ಓಡ್‌ಮನೆ ಕೆಟ್ಟ್‌ಚಿಟ್ಟಿತ್ ಕೊಡ್‌ತತ್. ಪುದಿಯ ಮನೆರ ಗೋಡೆಲೆಲ್ಲ "ಕೈ" ಗುರ್‌ತ್, ಎರಕ್‌ಲೆಲ್ಲ "ಚಕ್ರ"ತರ ಬಾವುಟ!" ಇವು ಏದ್ ಪಾರ್ಟಿಂದ್ ಕಂಡ್ ಪುಡಿಪದೇ ಕಷ್ಟ ಆಯಿ ಪೋಚಿ. ಓಟ್ ತಾಂದಿತ್ ಲೆಕ್ಕ ಮಾಡುವಕ ಆ ಕ್ಷೇತ್ರತ್‌ಲ್ "ಪೂ"ಕಾರ ಗೆದ್ದ್ ಬಾತ್!

ವಲಸೆಕಾರಡ ಈ ಪುದಿಯ ಊರ್‌ಕೆಲ್ಲ 'ಇಂದಿರಾ ಊರ್' 'ರಾಜೀವ್ ನಗರ' 'ಸೋನಿಯಾ ಲೋಕ' - ಇನ್ನನೆ ಪೆದವುಳ್ಳ ಬೋರ್ಡ್ ಬುದ್ಧತ್.!

ಸುರೂಲ್ ಬಂದ ಮೊಯ್ದುಕ್ ಮಾತ್ರ ಸ್ವಂತ ಮನೆಯಿಲ್ಲೆ. ಮೂಲನಿವಾಸಿ ಅಪ್ಪಚ್ಚುರ ಪುಳಿತೋಟ ಪಾರಕ್ ನಿಂದಾನಗುಂಡ್, ಅವಂಡ ಗುಡಿಸಲ್ ಒಕ್ಕಿಪೋಯಿಲೆ. ಫಲಾನುಭವಿಯಡ ಪಟ್ಟಿಕ್ ಅವಂಡ ಪೆದ ಕೂಡ್‌ನದೂ ಇಲ್ಲೆ. ತೋಟತ್‌ರ ಯಜಮಾನ ಕೆಟ್ಟಿಕ್‌ಕೊಡ್‌ತ ಮನೆಲ್ ತಾಂಡ ಸಂಸಾರ ನಡ್‌ತಿಯುಂಡಿಂಜತ್.

ಊರಾರ ಪೂಜಾರಿ ಪಟ್ಟಂಡ ಗಬ್ಬಕರ್ತಿ ಪಯ್ಯು ಮೇವಕ್ ಪೋನದ್ ಕೊಟ್ಟುಕ್ ಬಂದಾಲೆ. ತೇಡಿ ತೇಡಿ ಮದಿಯಾಚಿ. ಪಿತ್ಯಾಂದ್ ಚಂಗಪ್ಪಜ್ಜಂಡ ಮಂಡಂಗ ಕಾಂಗತಾಚಿ. ಪೋಲೀಸ್ ಪುಕಾರ್ ಕೊಡ್ತತ್. ಪೋಲೀಸ್ಕಾರಳ ಕೂಟಿಯಂಡ್ ಸುತ್ತಿತೂ, ಅಯಿಂಗಕ್ ತಿಂಬಕೂ, ಕುಡಿಪಕೂ, ಜೋಬ್ಕೂ ಕೊಡ್ತಿತೂ ಅಜ್ಜಂಡ ಮುನ್ನೂರ್ ಉರ್ಪಿಯ ಕಾಲಿ ಆಚಿ.!

ಓರ್ ತಿಂಗತ್ ಸುತ್ತಮುತ್ತ ಊರ್ಕಾರಡ ಸುಮಾರ್ ಇರ್ವದ್ ನಡೆ ಅತ್ತಳೂ, ಪೋರಿಯಳೂ ಕಾಂಗತಾಚಿ. ಚೋಮ್ಣೆರ ಉತ್ತಿತ್ ಬುಟ್ಟು ದಂಡ್ ಕೊಟ್ಟಿಂಗಳ ತೇಡಿಯಂಡ್ ಪೋಪಕ ದೇವಕಾಡ್ ಒರ್ ಬರಿಲ್ ಅಡೆಪದ್ ಪಾರ್ವದ್ ಕಂಡತ್. ಕೂಡೆನ್ನೆ ಊರಾರ ನಾಲ್ ಬಾಲೆಕಾರಳ ಕೂಟಿಯಂಡ್ ಪದ್ ಬುದ್ದಲ್ಲಿಕ್ ಪೋಚಿ. ಓರ್ ವರ್ಗತ್ ನಾಲಾಳ್ ಗೋಣಿಚೀಲತ್ ಪೂರ್ತಂಡ್ ಬಂದಂಡಿಂಜತ್! "ಎಂತ ನೋಟನಾ"ಂದ್ ಬಾಲೆಕಾರ ಕೇಟತ್. ಗೋಣಿಚೀಲತ್ಲುಳ್ಳ ಯರ್ಚಿನ ಚಾಡಿತ್ ಓಡುವಕ ದಂಡಾಳ್ ಕ್ಕಟ್ಟಿ ಬುದ್ದತ್. ದಂಡಾಳ್ ಓಡಿರ್ತ್.

ಕ್ಟಾನ್ ದಂಡಾಳ್ಕ ಬಾಲೆಕಾರ ಸರಿಕ್ ಬುಟ್ಟುತ್. ಈತಂಡ್ ಬಾತ್. ಓಡ್ನ ದಂಡಾಳ್ ಇಮಿಗ್ರೇಶನ್ ಆಫೀಸ್ಕ ಓಡಿತ್ ನಡ್ಂದ ಸಂಗತಿ ಎಣ್ಣೆಚಿ. ಕೂಡೆನ್ನೆ ಎಸ್.ಪಿ.ಕ್ ಪೋನ್ ಪೋಚಿ. "ಮೂಲನಿವಾಸಿಯ ರಾಜೀವ್ ನಗರತುಳ್ಳ ಅಲ್ಪಸಂಖ್ಯಾತಂಗಳ ಪೊಜ್ಜಿತ್, ದಂಡಾಳ್ನ ಪೂರ್ತ ಪೋಯಿಟಿತ್, ಪೋಲೀಸ್ ರಕ್ಷಣೆ ಬೋಂಡು."

ಇಮಿಗ್ರೇಶನ್ ಆಫೀಸ್ಕಾರಡ ಸಲಹೆ ಪೋಲೆ, ಓರ್ ವರ್ಗತ್ ಪತ್ತಮನೆನ ಕಾಲಿ ಮಾಡಿತ್, ದದ್ ಬಟ್ಟೆ ಬರಿ, ಗೋಣಿಚೀಲ, ಜಿಗ್ಗ್, ಕೊಕ್ಕಲೆ, ಪಿಲ್ಲ್ ಎಲ್ಲ ತುರ್ಕಿತ್ ತಿತ್ ಕೊಡ್ತಂಡತ್. ಬೈಟಾಪಕ ಇಡೀ ಪೋಲೀಸ್ ಪಡೆ ಬಂದಿತ್ ಎತ್ತಿಚಿ. 144 ಸೆಕ್ಷನ್ ಇಟ್ಟುತ್. ಊರಾರ ಮೂಲನಿವಾಸಿ ಆಣಾಳೆಲ್ಲ ಈತ ಬಂದಿತ್ ಬಡ್ಚತ್. ಪೋರಿಯ - ಅತ್ತ ಕಾಂಗತಾಯಿತ್ಂದ್ ದಾರೆಲ್ಲ ಪೋಲೀಸ್ ಪುಕಾರ್ ಕೊಡ್ತಿಂಜತೋ, ಅಯಿಂಗಳೆಲ್ಲ ಮಡಿಕೇರಿಕ್ ಪೋಲೀಸ್ ವ್ಯಾನ್ಲ್ ಕಡ್ತಚಿ. ಮೂಳೆ-ಮುಟ್ಟು ಪೊಳಿಯಣೆ ಪೊಜ್ಜಿತ್ ಒಳ್ಕಟ್ಟುತ್.!

ಮನೆಕ್ ತಿತ್ ಬೆಚ್ಚಂಡಯಿಂಗಕ್ ಮೂಂದ್ ನೇರ ಅಳತಲ್ಲಿಕ್ ಕೂಳ್, ಪೋಲೀಸ್ ರಕ್ಷಣೆ, ಸರ್ಕಾರತ್ಂಜಿ ಆಳಣ್ಣ ಐಂಬದಾಯಿರ ಉರ್ಪಿಯ ಪರಿಹಾರಕ್ ಏರ್ಪಾಡಾಚಿ!

ಎಟ್ವಾದಿನ ಪೋಲೀಸ್‌ಕಾರ ಊರ್‌ನೇ ತೊಯಿಚಿ ಬೆಚ್ಚತ್. ಕಾಪುಲಳ್ತ ಪೋಡೆಂಜ ತೊಟ್ವಾ, ಕುಟ್ಟಿ ಇಟ್ಟಿ ದಡ್ಡನೋ ಬುಡತೆ ಪುಡ್‌ಚಿ ಬಂದಿತ್ ಬೇವಚಿಟ್ಟಿಂಡ್ ತಿಂದತ್.!

ಪುಳಿ ತೋಟ ಪಾರಕ್ ನಿಂದ ಮೊಯ್ದುಕ್ ಮಾತ್ರ ಇದೊಂದಾಂಡೊ ಬಿಸಿ ತಟ್ವಾಲೆ. ಈ ಗಲಾಟೆ ಆಯಿತ್ ಎಟ್ವಾದಿನತ್‌ಲ್ ಒನ್ನಾಂದ್ ಇರ್‌ಲ್ ನಾಲಂಜಿ ಸ್ಕೂಲ್ ಮಕ್ಕ ಪುಳಿ ಕಪ್ಪಕ್ ಪೋಚಿ. ಪುಳಿ ಮರಕ್ ಕನಿಚ ಬಡಿಯ ಮೊಯ್ದುರ ಮನೆಕ್ ಬುದ್ಧತ್. ಮೊಯ್ದು ಪಡಿ ತೊರಂದಿತ್ ಕೂತ್‌ಟ್ಟತ್. ಬೊತ್‌ನ ಮಕ್ಕ ನಾಲಂಜಿ ಕಲ್ ಕನ್‌ಚತ್.

ಪಿತ್ಯಾಂದ್ ಪೊಲಾಕ ನೇರ್ತ ತಾಂಡ ಮನೆಕ್ ಕಲ್ ಬುದ್ಧಾನ ಯಜಮಾನ ಅಪ್ಪಚ್ಚುಕ್ ಎಣ್ಣುವಕ್ ಪೋಯಂಡಿಂಜತ್. ವಲಸೆಕಾರ, ಮೊಯ್ದುನ ಎನ್ನ ಸಂಗತೀಂದ್ ಕೇಟತ್. ಮೊಯ್ದು ನಡ್‌ಂದ ಸಂಗತಿ ಎಣ್ಣೆಚಿ. "ಅಯ್ಯೋ ಪೊಟ್ವಾ, ಇದ್ ಯಜಮಾನಂಗ್ ಎಣ್ಣುಂಡಿಯ ಸಂಗತಿ ಅಲ್ಲ, ಪೋಲೀಸ್‌ಕ್ ಪೋಕ"ಂದ್ ಅವನ ಕೂಟಿಯ ಪೋಯಿತ್ ಪುಕಾರ್ ಕೊಡ್‌ತತ್. ಕೂಡೆನ್ನೆ ಮೊಯ್ದುರ ರಕ್ಷಣೆಕ್ ಇರುವತ್ತನಾಲ್ ಗಂಟೆ ಈರಂಡ್ ಪೋಲೀಸ್‌ಕಾರ ಪಾರಕ್ ಇಪ್ಪನ್ನೆಕೆ ಏರ್ಪಾಡಾಚಿ. ಪೊಲಾಕ ಆರ್ ಗಂಟೆಂಜಿ ಬೈಟ್ ಆರ್ ಗಂಟೆಕೆತ್ತಣೆ ದಂಡ್ ಪೋಲೀಸ್, ಬೈಟ್ ಆರಾಲ್‌ಂಜಿ ಪೊಲಣೆಕ್ ದಂಡಾಳ್!

ಪಾಪತ ಮೊಯ್ದು, ಮನೆಲಿಂಜ ಓರ್ ಪೋಡೆನ ನೆರ್‌ಚಿತ್ ಪೋಲೀಸ್‌ಕಾರಕ್ ಅಡಿಗಿ ಮಾಡುವಕ್ ಸುರು ಮಾಡ್‌ಚಿ. ಅಕ್ಕಣೆ ಪೋಲೀಸ್‌ಕಾರ "ಏಯ್, ಬೆಕ್ಕೆ ಮಾಡುವಕ್ ಒಂದೂ ಇಲ್ಲಿಯರಾ?" ಕೇಟತ್.

ಮೊಯ್ದುಕ್ ಪೋಲೀಸ್‌ಕಾರಡ ಬೆಕ್ಕೆರ ಅರ್ಥ ಗೊತ್ತುಂಡೆಂಗೆನ್ನೆ! ಓಡ್‌ಲ್ ತಿತ್ತ್‌ಕಂಡ ಇಟ್ಟಿಂಡ್ ಬಾತ್. "ಕುಳ್‌ಪ ಕಾಂಬಲ ದೇವರು, ತಿತ್ತ್ ಕಾಯಿರಿ" ಎಣ್ಣೆಚಿ.

ಪೋಲೀಸ್‌ಕಾರ ತೆಳಚಿತ್, ಪೋಲೀಸ್ ಬೈಗಳ ಬಜ್ಜಿತ್, "ಅರೆಕುಪ್ಪಿ ಬ್ರಾಂಡಿ ಬರಡ್" ಎಣ್ಣೆಚಿ.

ಮೂಂದ್ ನೇರ ಉಂಬಕೇ ಗತಿ ಇಲ್ಲತಂವೊ ಬ್ರಾಂಡಿ ಎಲ್ಲ್‌ಂಜಿ ಎಡ್‌ತ ಬಪ್ಪೊ? ಪೊಣ್ಣ್ ಮಕ್ಕಡ ಕೈಲೂ ಉಳ್ಳ ಕಾಸ್‌ನೆಲ್ಲ ಕೂಟಿತ್, ಪೇಟೆಕ್ ಓಡಿತ್ ಅರೆಕುಪ್ಪಿ ಎಡ್‌ತ ಬಂದಿತ್ ಬೆಚ್ಚತ್.

ಅಲಂದ ನಾಯಿಯಳನ್ನೆಕೆ ಇಡೀ ಕೋಳಿನ ದಂಡಾಳೆ ತಿಂದತ್. ಪಿತ್ಯಾಂದ್ ಪೊಲಾಕ ಬೋರೆ ದಂಡ್ ಪೋಲೀಸ್‌ಕಾರ ಬಾತ್. "ಎನ್ನಾರಾ, ಇನ್ನಾಂದ್ ಬೈಟ್ ಭಾರಿ

ಗದ್ದಾಳ ಮಾಡಿಯಲೊ. ನೋಟನ ಇಂದ್ ಮಜ್ಜಣಿಕ್ ನಂಗಕ್ ಎಂತೆಲ್ಲ ಮಾಡುವಿ ಯಾಂದ್. ಹೆಂ, ಮತ್ಯದ್ ಬರಡ್"ಂದ್ ಮಾನ-ಮರ್ಯಾದಿ ಬುಟ್ಟಿತ್ ಕೇಟಿತ್.

ಬಟ್ಟೆಲ್ ಪೋಯಂಡಿಂಜ ಶನಿನ ಮನೆಕ್ ಕಾಕ್‌ನನ್ನೆ ಆಚಿ. ಪೊಣ್ಣಾರ ಓರ್ ಜೊತೆ ಓಲೆ ಮಾರಿತ್ ದಂಡ್ ದಿನಕುಳ್ಳ ಅಕ್ಕಿ, ಸಾಮಾನ, ಯರ್ಚಿ, ಕಳ್ಳನೆಲ್ಲ ಎಡ್‌ತಿತ್ ಪೋಲೀಸ್‌ಕಾರಳ ಚಾಕ್‌ಚಿ.

"ಚೋದರ್‌ಂಜ ನಾಯಿ ಚಟ್ಟುವ ನಕ್ಕು" ಎಣ್ಣಟ ಈ ಪೋಲೀಸ್‌ಕಾರ, ತಿಂದ್ ಕುಡ್‌ಚದ್ ಪೋರತೆ ದುಡ್ಡೊ ಕೇಪಯಿಂಜತ್. ಕೂಟಾಕ್ ಓರಂದ್ ಚೀಲ ಪುಳಿ ಕೇಪಕ್ ಸುರು ಮಾಡ್‌ಚಿ. ಯಜಮಾನಂಡ ತೋಟಿತ್‌ರ ಪುಳಿ ಕಯಿಪಾ, ಮೊವ್‌ಪಾಂದ್ ನೋಟನವಲ್ಲ ಮೊಯ್ದುರ ಸಂಸಾರ. ಈ ಪೋಲೀಸ್‌ಕಾರ ಇಂದ್ ಪೋಕು, ನಾಳೆ ಪೋಕುಂದ್ ಕಾತಕ ಅಯಿಂಡ ಪಾರತ್‌ರ ಡ್ಯೂಟಿ ತೇರುವ ಮಾದಾರಿ ಕಾಂಬೆಲೆ.!

ಮೊಯ್ದುರ ಪೆರಿಯ ಮೋವ ಪಾತುಮ ನಲ್ಲ ಚಾಯಿಕರ್ತಿ. ಅವಳ ನೋಟಿಯಂಡ್ ತೆಳಿಪೊ. ಚಲ್ಲಂಗಳಿ ಎಲ್ಲ ಸುರುವಾಚಿ ಪೋಲೀಸ್‌ಕಾರಡ. ಮೊಯ್ದುರವ್ವಂಡ ಬೊಳ್ಳಿರ ಚೈನ್, ಮಕ್ಕಡ ಕಾಲ್‌ಚೈನೆಲ್ಲ ಮಾರಿತ್ ಅಂದ್ ಬೈಟಿಕ್ ಪೋಲೀಸ್‌ಕಾರಕ್ "ಬಾರಣಿ" ಆಚಿ. ಮನೆಲುಳ್ಳವು ಬಣ್ಣೆ ಬುದ್ದಂಡತ್. ಮೊಯ್ದುರ ಮನೆರ ಪಡಿ ಓರ್ ಜಿಂಕ್‌ಶೀಟ್ ಮಾತ್ರ.

ನಡ್‌ಪಾದ್ರೆ ನೇರಕ್ "ಉಮ್ಮಾ"ಂದ್ ಜೋರ್‌ಲ್ ಮೂಡಿ ಕೂತ್ ಕೊಡ್‌ತಂಡ್ ಎದ್ದತ್. ಒಳ್‌ಲ್ ಬುದ್ದಂಡ ತೊಂಡ-ತೊಂಡಿ, ಮಕ್ಕ ಎಲ್ಲ ಬೊತ್ತಿತ್ ಕೂತ್ ಕೊಡ್‌ತತ್. ತಿತ್‌ಕಡ್ಡಿ ಗೀಚಣೆ ಪೋಲೀಸ್‌ಕಾರ ಮೆಲ್ಲೆ ಪೊರಮೆ ಕಡ್‌ಂದದ್ ಕಂಡತ್. ಅಕ್ಕಣೆ ಇಂಞೋರ್ ಪೋಲೀಸ್‌ಕಾರ ಮೆಲ್ಲೆ "ಎಂತರ ಇದೆಲ್ಲ ಮುಂಡತೆ ಬುದ್ದ"ಂದ್ ತಾಂಡ ಕೂಟಾಕಾರಂಗ್ ಬಜ್ಜತ್.!

ಮೊಯ್ದುನ ಕಾಕಿತ್ "ಇದಾ, ಎಲ್ಲೆಂಗಿ ಈ ಸಂಗತಿನ ದಾರೆಂಗಿಕ್ ಎಣ್ಣಿಟಕ ನಿನ್ನ ಒಳ್‌ಕ್‌ಡ್‌ಚಿಟ್ಟಿತ್ ಕಾಲ್ ಕೈ ಪೊಳಪ್‌ಚಿಡುವಿ"ಂದ್ ಬೊತ್ತಿಚಿಟ್ಟಿತ್.

ಪೊಲಾಕ ಈ ದಂಡ್ ಪೋಲೀಸ್‌ಕಾರ ಪೋಯಿತ್ ಬೋರೆ ದಂಡಾಳ್ ಬಪ್ಪಾಂಡೊಳ್‌ ಮೊಯ್ದು ತಾಂಡ ಸಂಸಾರತ್‌ನೆಲ್ಲ ಪೊರಡ್‌ಚೊಟ್ಟುಂಡ್ ಯಜಮಾನ ಅಪ್ಪಚ್ಚುರಲ್ಲಿಕ್ ಪೋಚಿ. ಮೊರಟಂಡ್ ನಡ್‌ಂದ ಸಂಗತಿನೆಲ್ಲ ಎಣ್ಣೆ ಚಿ. ದಂಡ್ ದಿನತಿಂಜ ಕೆಲಕ್ಕಿಲ್ಲ ತಾನೋ ಎಣ್ಣೆ ಚಿ.

ಮೊಯ್ದುರ ಸಂಸಾರಕೆಲ್ಲ ಊಟ ಕೊಡ್ತಿತ್, ಮನೆಲೇ ಆಕಿತ್, ತಾನ್ ಮೊಯ್ದುನ ಕೂಟಿಯ ಪೋಯಿತ್ ಪೋಲೀಸ್‌ಕಾರಡ ಮೀದ ಪುಕಾರ್ ಕೊಡ್ತತ್. ತಾಂಡ ತೋಟತ್‌ರ ಬರಿಲೇ ತಾಂಡ ಜಾಗತ್‌ಲ್ ಚೆರಿಯ ಮನೆ ಮಾಡಿತ್ ಅವಂಡ ಪೆದಕ್ ಪಟ್ಟೆ ಮಾಡಿಕೊಡ್ತಿತ್ ಆಕಿಯಂಡತ್.

ವಲಸೆಕಾರಡ ಮನೆ ಬೆಂಜಾಗ್ ಪರಿಹಾರಕ್ ಸ್ವಾಂಪುರ ಮೀದ ಸೈನ್ ಇಟ್ತ್ ಕೊಡ್ತತ್. ಏದೇದೋ ಕಾಗದಕ್ ಸೈನ್ ಇಟ್ತ್ ಕೊಡ್ತತ್. ಪಣ ಈ ವಾರ ಬಪ್ಪ. ಬಪ್ಪ ವಾರ ಬಪ್ಪಾಂದ್ ಅಧಿಕಾರಿಯ ಎಣ್ಣಿಯಂಡಿಂಜತ್. ಆಳಣ್ಣ ಐಂಬದ್, ನೂರ್ ಇನ್ನನೆ ಕೊಡ್ತಿತ್ ಬಯ್ಯ ತಕ್ಕನಾಂದ್ ಸಮಾಧಾನ ಪಡ್ತೆಚಿ.

ಅಕ್ಕಣೆ ಮಳೆಗಾಲ ಕೂಡ್ಚಿ. ಅಯಿಂಡಯಿಂಡ ಮನೆರ ಜಾಗತ್‌ರ ಪಟ್ಟೆ ಬಂದಿತ್ತಿಲ್ಲೆಂದ್ ವಲಸೆಕಾರ ಡಿ.ಸಿ.ಕ್ ಅರ್ಜಿ ಕೊಡ್ತತ್. ವಿಚಾರಣೆ ಮಾಡಿತ್ ರೆವಿನ್ಯೂ ದಾಖಲೆ ನೋಟಣೆ ಆ ಇಡೀ ದೇವಡ ಕಾಡ್ ಓರಾಂಡೆಕ್ ಮಿಂಗಳೇ ಓರ್ ರಾಜಕೀಯ ಪುಠಾರಿಕೂ, ನಿವೃತ್ತಿಯಾನ ತಹಶೀಲ್ದಾರಂಗೂ ಮಂಜೂರಾಯಿತ್ ಪಟ್ಟೆ ಕೊಡ್ತಿತಾಯಿತಿಂಜತ್! ಕೂಡೆನ್ನೆ ಜಾಗ ಕಾಲಿ ಮಾಡಂಡೂಂದ್ ಡಿ.ಸಿ. ಆರ್ಡರ್ ಮಾಡ್ಚಿ.

ಮಳೆ ಜೋರಾಚಿ. ಪಚ್ಚೆ ಇಟ್ಟಿಗೆಲ್ ಅಡಿಪಾಯ ಇಲ್ಲತೆ ಕೆಟ್ವಿನ ಮನೆಯ ದಂಡ್ ಮಳೆಕ್ ಬುದ್ಧತ್. ವಲಸೆಕಾರಕ್ ನೆಲೆ ಇಲ್ಲತಾಚಿ. "ಕೈ" ಗುರ್ತೆಕಾರಂಡ ಪಕ್ಕ ಓಡ್ಚಿ. ಅಂವೊ ಚೋತಿತ್ ಬಾಲ್ ಚುಟ್ಟಂಡ ಪೂಂಗಳಿರನ್ನೆಕೆ ಅಳೆತಂಡ್ ಮಂಡೆ ಆಟ್ಚಿ. "ಚಕ್ರ"ಕಾರಂಡದೂ ಅದೇ ಗತಿ. "ಪೂ"ಕಾರಂಡ ಪಕ್ಕ ಓಡ್ಚಿ. "ನಾನ್ ಕಾನೂನ್ ಕಾಯಿದೆ ಮೀರಿತ್ ನಡಪವನಲ್ಲ. ನಿಂಗ ಓಟ್ ಕೊಡ್ತವು ಉಂಡಲ್ಲ. ಅಯಿಂಗಳೇ ಕೇಟೋಳಿ"ಂದ್ ದುಂಡ್ ತಿರ್ಕೆಚಿ.

ಜಾರ್ಜ್ ಪಿಂಗಳ ಕೇಳು "ನಂಗಡ ರಾಜ್ಯತ್‌ಲೇ ಓರ್ ಪುಡಿಕೂಳ್ ನೇಡಿಯವಲು, ಪೋಕಾ"ಂದ್ ಬಸ್ಸ್ ಪತ್ತೆಚಿ. ಓರಂದೇ ಕುಳ ತಂಗಡ ಜಾಗ ಕಾಲಿ ಮಾಡ್ಚಿ!

ಮೊಯ್ದು ಮಾತ್ರ ಅಪ್ಪಚ್ಚು ಕೊಡ್ತ ಜಾಗತ್‌ಲ್ ಮನೆ ಕೆಟ್ಟಿಚಿಟ್ಟಿಂಡ್ ಬದ್ಕೆಚಿ!





## ಎಳ್ಳೆಕಾರ್ತಿರ ಪರಿಚಯ



ಶ್ರೀಮತಿ ಬಾಚರಣಿಯಂಡ ರಾಣು ಅಪ್ಪಣ್ಣಂಡ ಸರಕಾರಿ ದಾಖ್ಲೆರ ಪೆದ ಕೆ.ಯಂ. ಜಾನಕಿ 12-11-1948ನೆ ಇಸವಿಲ್ ಬಿ. ಶೆಟ್ಟಿಗೇರಿ ಕಾಳೇಂಗಡ ಮಾಚಯ್ಯ ಅಕ್ಕವ್ವ ದಂಪತಿಯಡ ಮೋವಳಾಯಿತ್ ಪುಟ್ಟಿತಾ 1969ನೆ ಇಸವಿಲ್ ಬಾಚರಣಿಯಂಡ ಅಪ್ಪಣ್ಣನ ಮಂಗಲಾಚಿ. ದಂಡ್ ಮಕ್ಕಡ ಅವ್ವನಾನ ಪಿಂಞ ಎಂ.ಎ., ಬಿ.ಇಡಿ., ಮಾಡಿತ್ ಚಾಕ್ರಿಕ್ ಕೂಡಿತ್ ಕೂಡಿಗೇ

ಉಪಾದ್ರಿಯಡ ತರಬೇತಿ ಸಂಸ್ಥೆಲ್ ಪದ್ನಾರ್ ಕಾಲ ಚಾಕ್ರಿ ಮಾಡಿತ್ ಇಕ್ಕ ಕುಶಾಲನಗರ ಸರಕಾರಿ ಜೂನಿಯರ್ ಕಾಲೇಜ್ಲ್ ಚಾಕ್ರಿಲುಂಡ್.

ಇಯಂಡ ಮೋವ ವಿಂಧ್ಯಾ ಅಪ್ಪಣ್ಣ ಜಮ್ಮಡ ಸೋಮಯ್ಯನ ಮಂಗಲಾಯಿತ್ ಕೆನಡಾ ದೇಶತ್ಲ್ ಚಾಕ್ರಿಲುಂಡ್. ಮೋಂವೊ ದಾ| ವಿಕ್ರಂ ಅಪ್ಪಣ್ಣ, ಎಂ.ಎಸ್.ಸಿ (ಎಗ್ರಿ) ಪಿ.ಹೆಚ್.ಡಿ. ಮಾಡಿತ್ ಉತ್ತರ ಅಮೆರಿಕಾತ್ಲರ ಬ್ರಿಟಿಷ್ ಕೊಲಂಬಿಯಾತ್ಲ್ ಪೋಸ್ಟ್ ಡಾಕ್ಟರೇಟ್ ಮಾಡುವ.

ರಾಣು ಅಪ್ಪಣ್ಣ ಕೊಡವತಕ್ಕಲ್ ಕಥೆ ಎಳ್ಳೆದುವೊ ಕೊಡಗ್ಲರ ಸಾಮಾಜಿಕ ಸಮಸ್ಯೆ ಪಿಂಞ ಜಾನಪದಕ್ ಸಂಬಂಧಪಟ್ಟ ಪ್ರಬಂಧ ರಚನೆ ಪಿಂಞ ಕನ್ನಡತ್ಲ್ ಪ್ರಬಂಧ ಎಳ್ಳೆದುವಾಂಡ ಕೂಟ್ಕ್ ಇಂಗ್ಲಿಷ್ಚೆಂಚಿ ಕೊಡವ ತಕ್ಕಕ್ ತರ್ಜುಮೆ ಪಿಂಞ ಕನ್ನಡ ಕವನತ್ಲನ ಕೊಡವತಕ್ಕಕ್ ತರ್ಜುಮೆ ಮಾಡುವ. ವಡಿಯನೂ ಪೊಣ್ಣೂ ಕೂಡಿತ್ ಎಳ್ಳೆದ್ನ ಪ್ರಬಂಧ ಸಂಕಲನ ಪಿಂಞ ತಮಾಷಿ ಕತೆಯಡ ದಂಡ್ ಪುಸ್ತಕತ್ಲನ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ ಅಚ್ಚ ಮಾಡಿತ್.

2000ನೇ ಇಸವಿಲ್ ಸಿಂಗಾಪುರ, ಕೆನಡಾ ದೇಶ ಪಿಂಞ ಅಮೆರಿಕತ್ಲರ ಪನ್ನಂದ್ ರಾಜ್ಯತ್ಲ್ ಪ್ರವಾಸ ಮಾಡಿತ್ "ಅತ್ತೆಕಂಡ ಅಮೆರಿಕ" ಎಣ್ಣುವ ಧಾರಾವಾಹಿನ 'ಮೈಸೂರ್ ಮಿತ್ರ'ತ್ಲ್ ಪ್ರಕಟ ಪಡತಾಚಿ. ಇವು ಇಕ್ಕ ಕುಶಾಲನಗರತ್ಲ್ ವಾಸವುಂಡ್.